

钱塘集

韦
骧

文硕阁

wenshuoge.com

目录

关于我们	3
提要	5
卷一	6
卷二	19
卷三	43
卷四	66
卷五	86
卷六	112
卷七	135
卷八	149
卷九	163
卷十	183
卷十一	203
卷十二	217

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部三

钱塘集 别集类二 【宋】

提要

【臣】等谨案钱塘集十四卷宋韦骥撰骥字子骏钱塘人皇佑五年进士除知袁州萍乡县历福建转运判官主官主中出为夔路提刑建中靖国初除知明州丐宫祠以左朝议大夫提举杭州洞霄宫卒其事蹟不见於宋史而集中所载袁状祭文诸篇署衔尚存可以得其大概焉端临经籍考有钱塘韦先生集十八卷宋史艺文志卷数亦同是编原本十六卷前有收藏家题识宋板韦骥集系明吴寛家藏本原关第一第二卷实止十四卷检勘书中凡构字皆空阙而注其下云太上皇帝御名当由孝宗时刊本抄传特所阙两卷诸本皆同今已未由考补耳骥少以词赋知名王安石最称其借箸赋而集中未见考宋史艺文志骥别有赋二十卷当别在赋集之内而今佚之矣其古体诗亦已不完而梗概尚具观其气格大抵不屑屑于规橅唐人而密咏恬吟颇有自然之趣杂文多安雅有法而四六表啓为尤工其精丽流逸已阙南宋一派虽未能接迹欧梅要亦一时才杰之士也谨厘改目次即所存之本以第三卷为第一定为一十四卷着之於録屡经传写脱落颇多世无别本其可知者随文校正其不可知者则姑从阙疑之义焉乾隆四十六年五月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷一

钦定四库全书

钱塘集卷一

宋 韦骧 撰

和邓舍人读之罘碑二十韵

之罘之碑何所刻昔者秦人纪秦德风饒日铄断璞昏雨暴水残老龟坼微芒遗字三四行容易历年千五百文词事实可考求赖有子长修简策始皇末年气益矜轻视天下夸功名玉墀金户厌宫殿不远万里为游行鼓锺帷帟不移徙所至毫发皆如情温寒清暑回造化絕深度险安经营徐市卢生巧窥测浪语神仙致君惑东巡亟欲见三山从此海壖来辙迹神仙杳邈不可攀六龙回首沧波碧从臣无以慰踌躇请陈勲业刊诸石高文大句如形容将以荣耀传无穷银鈎玉箸勒未久变故恍忽如飘风人心悲望鬼神怒瀉池神恠俄符同祸秦非胡胡在国长城未毕咸阳空空遗此石苍崖里万古悠悠辨终始虽然篆刻半缺讹至今不得藏虚美世人往往爱瑰奇蜡泽松烟印之纸览观莫不哀所为岂独玩焉而已矣

送皮献臣郎中赴河朔【提按便余袁州作】

明公器业真无敌术学精深贯今昔胸中应变勇所为韬养许谁窥畛域立朝壮齿名已高君相都俞采风迹擢从畿邑超等伦寘之计府凭宣力古来才盛多见排议论波涛起寻尺剖符江表虽左迁愤恤何尝动顔色惟思补报诚益勤奚翅循墙惊宠锡锄奸整敝皆得要百事详求不容隙宜阳编户十万余疲瘵弥年逢药石旄倪爱戴忧公去口颂心祈继朝夕除书忽尔天上来借寇无缘徒怅惜汝曹固恨夺慈父上意其如念河北河北近罹灾变深垫溺之余病艰食经营调度难其任正是庙堂精选择此时委寄非平时贤者岂辞当远适长川六月风云爽苒苒双旌标画鷁送行拥岸车马稠恋德尤多泪沾臆袁民慎勿挽公舟蚤看公归广膏泽

观劈石

篮輿远冒西山色宛转羊肠踏寒碧岩涯深处屡腾声何事晴云多霹雳寻声迤邐过枯林始见羣工劈山石斧斤锋刃奚足云铁楔纵横乃为力随文察理以段致大或寻常小盈尺心冥手应出自然不啻庖丁操騄駼问其勤苦将胡为驱车运致希酬直牛山濯濯罹采伐萌蘖悄如无夜息此山遭值甚牛山攻撃何年可终极石顽人智其奈何智巧反为天地贼

和残腊幽谷西游适

晴光泛泛山之阿谷禽朝飞声已和溪面冰消玉沙活临溪逆想春风过忽来忽往只随兴骑

从屏真殊无多略挽梅梢数纖蘂後日重来添几何

赋金橘得曲字

结根长江左移植清流曲朝晖歛夜霜香苞间寒绿落落黄金丸堆盘照明玉远想洞庭姿宜
慙风韵俗咀嚼聊一评嗜甘母见辱

即席

金炉兽焰回春律碧璫蠋花资野逸腊枝剪断玉莲光歌扇舞茵争秀出主人醉宾宾醉德倾
兀不慙冠武侧一时陈迹去莫追此段清欢宁易得

复用前韵谢和鄙篇以送行县

耐冲晓雾狐裘密乱踏寒霜马蹄逸徧行属邑敢惮劳乐岁偿逋民易出云间想恋双旌色跋
轡长坡首频侧更怀珍句重见酬一颗骊珠探颌得

和待梅花从一字至十字句

梅迟回雪已消花未开傍山林馆近水亭台相期白玉蘂数费碧云才况有冰霜对偶且无蜂
蝶嫌猜含蓄清香知自负包藏幽艷俟谁来岭头信兮使骑未至楼间怨兮角声已哀提壶秉
笔兮酣咏其侧花神有知兮得不留心哉

陪宜春守皮猷臣游化成岩

城闉北出春江濶铁锁联舟波浪截驱车度岸得幽岑半带云陰青欲活何年造化成此岩谁
为高阁依巉巖穿岩登阁意思豁气象百种相交参双旌远映苍烟色山鸟江花俱自得使君
暇豫真适然万室鸣弦不知极江南旧美传庾公浩辈爽逸陪游从风流不减当时盛独愧非
才列座中

和新晴

晴溪绿于蓝舴艋随风泛春光一何明山川在轩檻杖履登青臯牵条繫柔缆追攀尽幽兴寻
源达觴滥早春游王氏园看牡丹约花开再游探韵赋诗得早字

蜿蜒溪岸寻芳草似觉城东春色早并溪穿竹入幽林已爱和风养华藻参差雕檻木芍药细
叶新抽看渐好花开使节倪尚留愿奉清樽为花倒

和留春亭席上送苏判官

淮野征途人邻邦莲幕客飞鸟逸鞭声遥山引行色归欤况春近林芳多甲拆投宿可收灯囊中夜光白【以君得翰林新句故有是云】

饮櫻桃园

拂间尖出櫻桃表花枝巧向春风裊四座交飞白玉船一声相劝提壶鸟摇摇画隼青天杏落日酣歌近芳草拨开尘渎从清游安得樽前辞醉倒

州宅牡丹盛开蒙剪栏中奇品见赠仍属为短歌於席上

永阳州宅如仙隐花药粧春有畦畛牡丹开处彩为栏翠幕障风怯风紧日高花醒一开筵酒
璣照花花自晒东君不负禁林人猛放滂葩肆鈎引莫教狂雨妬清欢狂雨来时似秋槿主人
爱客令剪送一朵彩云离玉笋饮量恨非千丈陂欲吸百嘲还噪吻殷勤厚意不可酬谩作短
歌羞不敏

新泉

美泉在山人不知美泉出山还有时琅邪之东幽谷西公来发此清涟漪搜寻土脉示山叟霜
鏹入土荆榛披逡巡方丈露澄莹十目争看青琉璃一之二之来霄沸岭猿惊啸溪禽飞呼工
藂手甃白石玉匣宝鉴生光辉自从开凿贮寒碧朝云夜月常迟迟春华将近天气爽公携宾
从何逶迤回环栏楯照丹碧颠倒旌旆浮葳蕤飞觴弄翰不胜乐梅柳恨不先芳菲此时玩泉
爱清切异日饮德钦规为甘香润泽济枯槁源源难絶滁人思

赋酴醾短歌少留行旆

酴醾高架凌春风飘然疑与天香同琼英绿叶何玲珑开樽烂赏情无穷把酒祝花花且记玉
堂仙人将整髻柔条好为挽云輶少慰邦人恋轩意

晓雨离铜山驿

北风吹云顽不散山雨萧萧夜将旦起来勉强着征衣索马踟躇就途宴冈泥渐滑沮遄迈林
霭正浓迷远盼旅怀惨鬱亦所宜安得秋阳露霄汉

宿景德方丈

尘迹走尘途禅林少禅客我来宿方丈但爱秋月白夜分始就寝万籁同一默清辉满纱幌归
梦徒反侧木鱼虽无心粮粮动吾息

鵞湖仁壽寺

环抱烟云峯坦夷杉松迢古寺聊税鞅忻然遇幽胜跻攀上崖阁足以远眺听秋花或丹紫残
蝉尚呼应着处有佳趣征途自无定临风诵韩诗两事皆害性

石井泉

浅浅山下洞澄澄洞中泉泉声寂无闻泉色碧於天解纓不欲濯莹澈殊可怜掬饮聊漱甘願
我心常蠲

上饶祥符寺山亭【时太守刘载酒率游】

聯舟以为梁度溪即幽寺危亭躡层云远日得以肆城中楼阁多水外峯峦翠地主喜载酒相
从车马萃客心正悠悠严闥促回轡

月岩

一等造化功此岩何异絶其高仅齐云中杳如月如月月不圆望之光芒全何人植苍桂婆
娑亦相缘凡物偶有象爱好独难偏强名虽自人所得重天然诗者衒巧思或比蚀与弦由来
假借中奚必加鑽研

九日凤凰寺

节物惊重九区区尚山行固无登高约迟明即修程下马入古寺榜悬凤凰名来巢古所传至
今得徽称拂席坐其堂耳目一以清歛然壮穉集往往持盘飧问其何以至云此谢秋成年年
当此时村落相经营薄具 飮餽所将惟至诚感此良自叹吾生殆如萍从仕徒袞袞退归亦
无田去岁尝为客今晨复遄征佳节眼前过有酒难独倾紫萸金菊花何以为芳馨岂如羣野
人蹄涔自纾情行矣姑勉强义命心所明

过婺源诸岭

古言行路难非独在险阻兹焉婺源道登岭足劳苦何谓路之难其他未足数跻攀上崎岖仅
与猿猱伍下临万丈崖险黑不可睹马蹄长及腹仆颔几着土俛盼飞鸟背仰蹶游云缕藤萝
为所依用力必审举终日践羊肠天寒汗如雨凝结本无心开凿知强取君不见世情嶮恶未
易论此岭虽高前孰御

古金章【全椒民间二稚子得金章于野分而竞焉入于县县以献州】

黄金铸印龟为纽埋没郊原已绵久春泥深处衬耕蹄腊雪销时经猎走腊去春来几百年年
年寂寞无寅缘不知何代何王赐於此奚为独坠捐由来至宝宁长弃一旦光辉难自秘牧儿
羗子两窥观不识雕章只知利里胥白官官为收歛从下邑归之州发囊启袭生精彩十目争

视寒星流粲然五字分明在苍龙副将军所佩将军安在惟空名方寸坚刚终不溃物否而通理所宜在人谁谓殊於斯请看金印杂瓦砾未逢采拾毋轻嗤

中和堂

秋阳远泛秋山色越峤连云耸深碧廓然千里会一堂势压全吴迴无敌古今贵耳不贵目方丈蓬莱徒记籍安知严丽非壶中登览浑疑脱尘迹芙蓉耐霜红两行杉桧凌空翠千尺卷帘樽俎当清风大白一飞羣虑释??辉光生旧榜公以中和乐邦职又钦德操必有邻朝夕堂陰看七石

寒菊【仲冬十三日】

皎皎园中霜鲜鲜砌间菊长至破句来兹芳乃幽独岂其时使然寒威未加肃又岂各有命荣谢分迟速如何纖柔质坚可敌松竹绿叶共葳蕤金英相陆续究之得所自养助为之福去蠹诱童稚剪蒿专野仆恐弱即枝扶忧乾必浇沃北风赖密樊朝晖借余燠侵牟絕蜂蝶蹴蹂无鸡鹜得以保天材隆冬尚芬馥一溉必後枯嵒生论尤笃孟轲亦尝叹濯濯牛山木奚独物有是在人宜慎毓关节防疾疢驱除先嗜慾所养重於心非徒口与腹所履正乎道非徒险与曲纷华靡交战伎害尽消逐自然致冲和久壽不遭促持兹养生理可继乔松躅兴作寒菊诗葩浮宁传俗

题君佐寓翁庵

人生扰扰无非寓以寓名庵深得趣寓翁之庵年月多一日持文索诗句乃知主意不在诗欲以斯言昭未悟吾侪又作寓翁庵附赘悬疣聊复赋

观江都王画拳毛騧

忆昔曾观名画记画马独贵江都王当时所画拳毛騧声名气格凌有唐太宗爱之自题识縑素翕艳生辉光何年流落传人间至今不泯犹珍藏高堂邂逅一注目髣髴神骏如腾骧拳毛騧非凡马匹天驷之精为时出虬须英主数跨鞍出入戈鋌势飘逸谷州洛水血战酣电转风驰万人屈櫜枪扫尽社稷牢归来始觉金创密江都能事妙入神落笔夺得造化真星瞳月颊批竹耳一毫不谬诚絶伦时移物化丹青在後世乃识真骐驎寂寥莫继数百年其间唯有曹将军将军画马超俦侣於此区区奚足数为图漫杂师子花忍使龙姝失其处予知此画名实兼虚美安能动今古叹嗟不足聊一歌却愧辞华非杜甫

求陈和叔草书千文

伯英临池池水黑世称草圣真无敌逸少奇踪昔所珍曾为换鵞书道德晚有张颠尤恠伟意自公孙剑中得由来传播千百年笔法至今为准的近时此学虽凋零妙絶何尝虚赏识唯公

气格出天然挥埽能兼古人蹟纵如烟海鱼龙游?若秋天鹰隼擊斡旋舒慘在术内心通手应
难窥测曩传法帖久已寘安得千文饱矜式越溪明楮白於霜昼永愿公飞电墨

谢中书张侍郎分惠赐冰

蒸云炽结炎威稔紫禁传宣驰内品颁冰首及辅臣家三伏歛成秋气凜寒光莹澈带恩辉圭
角峥嵘出天稟红尘不敢傍朱门溽暑何由近华寝无瑕独愜水精盘荐冷潜被文石枕池凤
应思引轻喙鼎梅亦觐清余飪蜗庐穷处厌烦酷嘉惠分沾幸尤甚儿童惊目且相懼蝇蚋窜
身宁自审荷公借润变焦枯食蘗肺肠方渴饮强持累句冒钧衡深愧才华非鲍沈

暮夜还家得清叟所留二诗因以谢

暑云结雨殊蒸郁骑马天街尘土沕汗渍巾冠溜墨珠两目昏眵情忽忽入门下马意歛紓一
派清风偶飘拂豁然自喜方自疑短轴碧牋僮捧出开卷知为清叟诗濯热蠲烦一何疾清叟
之诗豪且丽笔力滂葩少俦匹上篇首吟东府西壁之画竹髣髴龙孙见奇质继言手植湘川
斑一一琅玕露萧瑟次篇追忆钱塘西湖之荷花十里红香梦难必形容摸写极纖妙造物无
心为之屈繁余何幸并获观冰饮玉壶清澈骨须臾狂霖轰雷车至宝似难安陋室欲还却记
古人言在处护藏宜有物且攄鄙思酢所贻无以续貂还见诘

昨日辄以鄙句奉谢重辱长篇为贶再藉来韵和荅

屋梁晓影初日瞰银潢下沃崑冈焚铁骑腾突方追奔璵璠入水体自温翩翩梦翼飞天门异
香气力能返魂真珠倾泻琉璃盆青铜古镜磨尘昏知音听凤裁龙孙重然宝剑垂荒坟扶摇
九万观化鲲君诗体格能并存大言软语清兼浑搜索物象穷乾坤琮牋碾出花无根字字馥
郁如芳荪至宝无价难轻论洪波荡纵长鲸吞元化运转通崑仑探颐不见雕镌痕胡为及我
穷陋门守护固乏育与贵美材谁荐为牺樽羃之疏布饰以琨致用清庙非常恩

和彦常看月

双扉窈窕疑仙穴锁宿弥旬尘事絕夜色萧然鼓二中联步空庭望寒月衆星掩抑天无云万
瓦鳞鳞带霜雪俯看腐草亦光辉仰数冥鸿自行列瑶台十二好裴徊银界三千孰分别钩帘
却坐未欲寝况有高谈助清澈忿忿置酒当虚櫺肴蔌釘飪殊微纖长檠彻去不复用岂假密
炬徒炎炎追思李杜篇章妙亦有狂语时相兼举杯劝饮一何怪斫桂浪慾尤难厌岂如我辈
赏以意一觴一咏情何恬兴阑影侧各分散心月两适俱无嫌

谢郑州张资政惠书寄酥十四韵

峥嵘岁律垂更旧芜室萧然度清昼追想牙旌欲首途策羸取别尝重复躊躇去德不胜情归
迫严闥仅能走歛惊霜月再弦望西向拳拳使心疚心之疚兮日益深使者踵门书忽授璨然

海语盈累幅字字輝华敌琼琇殷勤睠与奚所貽纸尾复题酥以侑开缄珍视未敢尝捧重临
风且三嗅初疑黄玉可如泥和以露华凝不溜又讶仙膏久链成自有光芒发昏瞽轻言岂学
陆机对以况蓴羹一何谬依稀乳酒下青云诗慕少陵慙浅陋汪洋惠意不可酬匕箸姑停聊
密覆留向春朝助後觴却望台星祝公壽

之文【十月十四日离益昌十九日叩提馆作】

薄晚出城闐江桥渡清澈暝投僧居宿虚阁对圆月收灯纳寒光莹净见毫末久之未即卧爽
气爱轩豁既眠复辗转竟夕滩声聒嚶嚶辨初鸣隶报马已秣就途諏所历七驿皆岑絕自兹
五昏晓寢食乃其歇肩舁及揽辔必步由险辍侧身经崎岖仰首睨巉嶮紫栈远如綫危处甚
髻髮独椎跨不测震足殊脆艱履之为不疑无乃徼幸切缘崖瞩飞涛尽眼喷霜雪往往生眩
转收盼不敢瞥间或得佳趣终多备惊蹶高峯?玉枕日射增皎洁因以名其村野老能指说蘧
庐尽流泉夜响每凄咽哀吟听猿狖残星半明?边城行渐近山势如削铁跋历愈艰苦气象且
凋缺萧条道旁舍编版代瓦设田妇负所汲鸢肩语嘲哂对此动叹嗟间里念远别我行缘所
职期会尤慎发指日鳩羣衆乡兵谨冬閱腰弓盈半万着令明赏罚颯颯凯訖事且憚粮糗竭
唯予敢自暇憇止养关节所以图兼程僊勉强羸劣读书贵行志王事无琐屑致身非青云努
力乏奇烈天涯适驰走使指亦忝窃何当成岁课归奏黄金阙解组虽未能乞麾薪歛拙优游
近吾土庶便松楸渴遐想无以止作诗纾郁结

小仲渡

山椒积雪尚堆琼山下桃花已开锦若教传画入中州便谓仙家事难审

得鹿【利州蒿平道】

呦呦山中鹿仓卒出深藪车徒歛以至惊顾却冲走荷篋适当之觚触难措手一夫不能胜掎
角赖前後我马止其所险隘不敢骤思欲纵之去腾突惧反受 繫四足愤气徒陰吼更番
耦八肩双只度九堠顺风率汗背暮达行馆右解徽置中庭微息已絕脰事殊注虞旗难以公
私剖脔割遇善屠騶砉声随肘均沾及兵隶不使或薄厚投醪古所重况此徧羣口闻音不食
肉兹义予独守猗嗟鹿之微共命殆非偶不由驰猎窘不以罟獲诱逡巡赴死地有若杵投臼
无乃失所向猖狂自貽咎彼类榛莽间知而能警否

百堂寺

巍峩江之干故迹百堂寺寺垫徙於旁遗构十一二百堂依岩崖像貌宛以备间虽或雕缺亦
足起敬畏江流几浅深江木几荣悴舟车日往还兴寢谁复议鑪香有余烬无乃妄饶觊独叹
镌凿功绵历何所自

石柜阁

一登石柜阁载读石柜诗诗人不可作诗思清可思至今江水流哀响犹依依佳趣想如古物是惟人非孤烟起林坳夕鸟相与归揽辔复前征长言解歔歔

石鏊

石鏊久已传往还迷所自下马诘亭卒指以水之涘徐行即其旁执纆俟我至问其将胡为云此久埋秘泥沙亦易发应手可立致逡巡肆挥举两鏊露精粹青如碧琅玕光莹非琢治圆模出自然小大羌有贰石根不可穷名鏊乃以类象物固其偶芜没良可喟悦非以名求何以见珍异顾我乏高才为诗强标识

过龙洞

晓过龙洞口秋雨寒江急?炬撒星飞随风光熠熠危阁势凌空履滑难择澁特特马蹄声谷虚良易入祗恐惊神恠轰雷起蟠蛰岂不念怀安自公忘岌岌

和苏进之同游乌奴山告成寺

长风掠疎林残叶何凄凄浮云带远山半压愁眉低纵游乌奴寺乃在嘉陵西嘉陵清且湍依约剡中溪十月未成梁傍舟祛挈提篙工上下手往往哈州犁系缆即肩舁踏石避角圭诘屈上嵯峨恍若登云梯下视飞鸟背仰听惊猿啼参差列佳境画幅展不齐峥嵘楼殿雄势欲凌云霓香穗暗金像岚光映璇题宝函发神翰燿灿壁与奎圣言远如天至理岂易稽洗目幸荣观诘止徒攀跻四座敬无譁寂默桃李蹊遗韶动衆听司南警羣迷兹辰尤乐只并合又将睽鹏抟九万程鷗鷖一枝栖其适固均耳安中养天倪

喜雨和曹子方

班超已老入玉关仲子欲絶得糟李洗肠术妙久疾愈拜井诚危涌泉起较之今日遇滂沱彼情未足方吾喜自从三月变旱暵百日磬磬沸田里豚蹄榼醕漫祷求朝夕丛祠致拳跪苗根土乾类龟坼愁望油云杳无涘富忧攘斂贫忧踣疾首蹙额谁不尔噫予岂独钧尔忧反覆万端思所以察冤遣滞督郡邑焚巫暴厓固非理精?赖我同僚贤甘泽应祈裁可弭沛然倾注数十刻沟畎皆盈一何伟闽山草木亦增辉万口懽声宁遽止翌朝又复得高篇磊落珠玑光满纸强酬珍贶愧拙疎两喜相投当不鄙

武夷游仙咏

崔嵬倚天苍翠匀罗列百里清无尘气象不与凡山钧举目已讶非前闻悠悠官道行溪滨不陟峻险仙源分穿松度竹微荆榛古观壮丽依嶙峋道人鹤氅乌纱巾引我举棹乘长津横滩激浪花如银舟子敏捷妙入神萦纡逆泝山之根两壁万仞干青云如庵如室如仓囤奇踪恠状何纷纷仰观持久头酸辛开蓬偃卧望始真遗机断脱鑪不熏漆棺不朽藏何身鸡窠乱草

宛若新舟航六七排鱼鳞半入崖广谁施陈辄疑构置因昔人留此诡异矜常伦却看危峭无攀扪下插万丈深潭沦虽有智力何由伸此莫漫诘徒自勤手披旧记烦咨询逖想会仙奚所存两峯最大势最尊当时曾集三千宾幔亭铺设紫云茵酒味醇洁肴羞珍凤儿荷香艺絶羣宾云奏彻更几春饮散只以夸曾孙神仙渺茫难重论此会此语相传云俨然遗迹尚不泯严祠唯奉武夷君潜有惠泽均斯民我游自午至夕醺目力所能才逡巡长言记录濡毫频师仙术异非所欣但怅胜槩无缘隣

行役一首【离建寧县宿缘心院】

浮梁跨寒溪出郭十余里暝投僧舍宿月影清如水剪烛吏文退孤坐俄隱几逡巡念岁月凋疎惊髯齿少学虽自勇壮行何不伟胡为浪奔走岂足称使指许国徒有心归田尚无拟徘徊仕路间老大良可耻气弱不耐饮诗多常累纸一吟聊破闷再咏渐臻理以及百千言往往不能已且以养情性固非争绮靡此乐非丝竹美听不在耳紆鬱得以纾易直油然起所以驱驰中冥搜未尝弛今宵幸夷旷似匪尘纷迤悠悠万感集销烁欲何以遂为行役篇篇成姑自喜挥毫复吟讽若与嘉宾比疏泉以养泉所益不在彼蛟蚓间相杂要之适吾已傥或不吾知奚恤讥狂斐

别李世美

御茶贡了文书閒静坐一堂生昼寂木兰花谢叶成陰霁日辉辉荡轻碧主人为我开芳筵灑灑金樽泛春色举杯相属念我行赠以长篇重圭璧联官共职诚意钧踰岁光陰驹过隙自慙老钝於事疎每幸高才见裨益招携地宝溢课输立遣讼简平鬱抑隔州移粟賑疲氓指日毆兵斩狂贼走章驰檄公事外闲有赓酬副清适搜罗絶景穷造化铺写幽情露胸臆今朝饮别接殷勤判袂分歧在朝夕萍蓬邂逅难期度鱼鴈附托宜频的愿聆三节促归轩聊慰驰情想风格

和礼部苏尚书释栝

渊明植五柳万古清风传子猷种修竹幽况亦飘然峥嵘韩退之甘受庭楸牵由来高爽姿气欲凌云烟嗜好脱凡近孰能窥後先岳岳尚书公声华天下贤仪曹经昼闲春日方暄妍不思葩蘤妖惟喜操节坚呼工斩恶木买松种堂前培溉劳朝夕霜雪期千年北垣有余地虚锄徒自怜名卿送珍材类至诚所缘释栝仅踰尺标致怀参天拱把念所养扶持必周旋孤根旧土随不使知其迁逡巡十旬泱生意何鲜鲜栋梁他日功顾遇此辰偏清诗为题品光芒耀星躔栝荣诗不朽流芳共绵延後来戒剪伐当继甘棠篇

和孔彦常侍郎癸酉冬雪

淳深等彭泽瑰恠轻玉川读公冬雪吟爽气何飘然斋祠宿华省对此同云天坐看积琼瑶光辉想蓝田泥滓歟藏垢朽枯顿增妍纷纷布寒空往往迷飞仙狐裘綢余温薰炉凝【平】微

烟清冷彻心骨复谁嘲昼眠雄词笔下驱若放春水船庆丰仍记岁讽咏期他年

留题忠州丰都景德观

丰都县北岷江侧古观峥嵘耀金碧层峦秀拔异羣山乔木侵云竞千尺二仙去久丹灶冷【王方平陰长生丹竈尚存】空载遗文在碑刻俗士纷纷徒叹嗟曾有何人继真迹

岑公洞

耿耿石洞天开镌岑公之隐来何年一朝仙去名晦然商人受香忘所传舟抑不进方省讐奉香入洞舟乃前灵踪自此人拳拳至今乾溢皆致?恍忽应祷殊无偏我来敬谒岁欲迁?泊沙碛登舁肩蹴踏锦石行江壩洞门屣步侵云烟瞻望塑像钦华颠挺之作记夸唐贤勒珉虽昏辞尚全却恨戾止非炎天不见百尺悬飞泉唯有岩窦声涓涓顷之自可遗尘缘况乃投隙图留连嗟予远宦方拘挛搜奇寻胜姑勉旃此日得此澄心渊安能摆脱追神僊临崖浪笔书长篇

追咏西园海棠

西园正月月欲残海棠一株花正繁滂葩艷艷鬪朝日露洗蜀锦红光寒回环桃李竞无色卓尔独秀当朱栏两春行役不及见今日偶幸官身闲拟开金罇恣懽赏酬酢宿恨开衰顔无何职事忽牵制遽戒舟楫乘波澜却嗟逐物犹薺芥未免回首兴长叹悠悠清夜入寤寐往往蝶梦曾飞还归来绿叶空满枝正与老态相追攀须知乐事少如欲谁谓天意於人慳

杨内翰读书堂

无为山色参天碧翰林旧隐多遗迹跨鹤凌风去几年独有文章光翥轡构堂续志广所存善矣鵠原足余力清白永随风月久形容杳与尘埃隔伊尔歔忆四纪前曾蹑云梯附鹏翼此堂坐想不获登漫寄长言勒岩石

八月十八日观潮

浙湍浩漾连溟渤宵昼潮头卷沙出中秋三日日欲西一岁之潮盛今日雪山横亘截江来巨浪翻空生倏忽吴儿当此夸善泅执炬扬旗徐出没旁观奚止动精爽壮士为之犹股栗由来习俗竞兹辰士女欣然勇相率纷纷毕集遶长堤翠盖成陰何栢密邦侯乐衆为开筵歌管凌虚遏云物玉堂鉅公临右席宾主交辉映簪绂注目应同济川念赏心仍寓和民术区区下客久不逢二纪光陰容易失幸陪高会还旧观聊解叹嗟挥老笔

谗龙

退之昔日谗风伯今日吾友谗应龙应龙闻之两耳卓急卷海水飞长空陰云噎噎为後先变化赫日成昏矇田间槁穗有生意虢子属纆卢医逢望霓万口动一喜往往备赛求豨豨顷之气象复舒霁飘洒尚不遭溟蒙龙乎奚尔不努力遽若有稟还收踪天岂虐斯民不欲为年丰林林未必皆咎戾必有任责当其凶蕲君勿谗龙谗龙非无从旱乾水溢各有召应荅不谬如洪钟昭昭之鉴明且威讎敢旷久而忘功一欲窃弄权霏霏私羣农震怒起旋踵菹醢谁躬慎无凝土像夭矫昼夜狂舞青衣童精诚修警感毕听朝暮膏泽盈寰中

和董都官登城南楼

危楼百尺据城堞徙倚浑疑到紫烟卑湿岂愁梅雨地清和尤喜麦秋天一川晚照飞孤鹜满袖薰风听杜鹃乡思摇摇白云外官拘唯幸际尧年

思养

懒登危阁望天东山外风烟隔几重白髮庭闱未归侍青纶尘土若为惊故乡辽复踰千里薄宦拘挛等万鍾指数瓜期尚稽远悠悠斗粟为谁春

上太守陈少卿十韵

风流富川盛善政久濡沾市价童无惑关讥盗不潜卖刀人向本让路俗知谦明府精区处圜扉絕滯淹青纶方调补内屏幸趋瞻直道爰来遇孤踪岂自嫌有时申谏议仰见霁威严志得宁辞贱公闲倍养恬奚须祈汲引足以慰清廉静念官居乐长言孰可箝

董都官索署中山亭诗

突兀灵亭倚翠微纷然尘境此中遗高明颇愜星郎意邃密如嫌俗客知吟对青山摇玉麈醉临华月解银龟襟怀蹇蹇安闲久偃卧多应梦赤墀

荅董都官索去年诗债

軫下传音旨胸中长忸怩如何终日暇犹负隔年诗寡和知声妙难抽恨思迟殷勤还见趣荒鄙敢为辞

和闻新制间岁贡士

五载兴贤日月疎间关多是老闲居朝廷远虑淹才弊郡国新颁间岁书士子将期贺空谷诗人当复兴嘉鱼无能自愧逢辰早已脱犁鋤就棧车

和江亭春半

亭压长江气象雄清明时节夕阳中天边远嶂横深翠花外余霞没乱红鸥鹭飞鸣得闲趣渔樵歌唱有淳风谁能共向春光醉穷达多忘学塞翁

和久雨

陰霖继月酷相因旱魃今年遽丧神膏泽翻忧害东作芳期那敢爱青春非无官政还蒿目奈有民咨易动唇天听甚卑羣语切雨师何事未回轮

和寒食在富川

城关咫尺到春郊跃马行春固不劳寒食萧疎观物态楚歌嘲哂聚儿曹平湖漾日扁舟满芳榭迎风画鼓高薄暮田翁醉归乐山花倒插挈余醪

杂咏五首

一【提壶】

长林栖息自安如谩劝闲人挈酒壶世治有谁从醉隐徒劳健吻汝知无

二【竹鸡】

切切声呼泥滑滑强关人事最无机安知巧舌为身累锁向雕笼不得飞

三【闻蛙】

蝮氏官亡种类滋脰鸣连党欲何为喧然无理令人恶忆着昌黎吏部诗

四【忘忧草】

忧乐由来繫所存强名微草不须论箪瓢悦道顏渊德陋巷当时岂种萱

五【杜鹃】

啼血辛勤尔自贻百花时节好闲飞行人日日春山过相劝相呼總不归

惜花

玉人携酒对花枝怅息红芳已半稀楚帐歌中别虞氏马嵬丘里顾杨妃

清明闻楚歌

髣髴渔阳鼓 掺挝依稀江左後 庭花清明旧俗无 佳尚唯此喧声杂暮蛙

初晴复雨感事

朝晖还复变蒙蒙 过尽韶华冷落中 媚紫妖红如病悴 也应无暇笑春风

对雨怀陶掾

雨气侵池馆 清如秋向深 遥知修敌具 潇洒不关心

钱塘集卷一

卷二

钦定四库全书

钱塘集卷二

宋 韦骧 撰

和聂充甫水南见寄

袞袞孤城里惟君离俗居车鱼絶嗟叹诗酒养冲虚掩面羞龙断澄心对古书天其假幽寂停
湔合何如

又和

诗来盛说溪山好局事萧萧似隐流闲对文枰销白日勇持吟笔战清秋城中事逐渔樵得门
外客无车马留而我拘挛但增羡强酬佳句思难抽

和酬聂充甫新寄

霜叶乘风舞秋云盖野平南溪尘境絶东道玉壶清佳处怜君得新篇慰我情无缘一携手相
共濯冠缨

送李尉解任归庐陵

官冷余才晦涂清得代还维舟纷扰外行酒别离间水落蛟鼃伏沙空鴈鹭闲归欵风味好天
未辨家山

摄户纠二曹事因自戏

三参军事归权握贱务区区日倍增却笑近贤衙署贵时人虚号一条冰

贾尉见迫给廩因以诗戏

月粟见须何太迫贱生奔走正无聊蕲君勿虑晨炊絶吾党而今解折腰

送浦大会甫赴榆次

平生落落多豪气万里区区赴冷官今日送君非故閤一樽为我尽情欢解舟吴浦江云重策

马并门塞雪寒富贵功名行孰御古来新沐必弹冠

贾庆甫示山中梅诗因继成

雪意将成腊欲来乱山深处见寒梅化工若与人情比此树多应未及开

荅鲁虞部见寄

鄙才效职便穷僻忽忽天星殆二周系狱空虚民讼少幸门堙塞吏心忧琴书永日清无际草
树逢春绿正柔惊坐高宾如见顾幽懽何惜贯貂裘

又荅惠诗并新鱖

珠玑盈纸将新味方丈分甘及贱夫大啜一杯乡思动却嗤张翰只思鲈

独登临清阁

阳阳何处一逍遥朱阁临清兴味高翠靄相连结春态澄光下视监秋毫绿杨静舞腰初困白
鸟闲栖目不逃独到独归俱有意暂期尘土落只裯

得董都官书因为寄四首

晚来音驿拜勤渠咫尺拘挛万里踈却羡浔阳堤上柳长条往往拂贤车

七年恬寞坐江濒今日登途气象春请剧书成为泽大马蹄无惜入红尘

花表危楼远目穷华轩不见见春浓春山缭绕无重数还在春山第几重

登临何以慰相思把酒开编读旧诗正是去年酬唱景春风花草半离披

櫻花

叶落不随羣花开亦趣春初包莲蘂白半折粟文皴蜂蝶遥相笑儿童冷不亲华丹君勿责劲
直在吾身

和太守临清阁一首

朱阁新前构峥嵘枕水端地饶千顷秀天付四时寒波蹙龙鳞活山斜凤翼攢晴光照毛发翠
靄夺华丹贺老空游监严公浪记滩轩窗通浩荡棹桡变雕残静极尘机丧清多饵钓难来当

思洁白意不在游盘气爽如开凌堤环若刈兰绘工忧措手诗将勇濡翰远目穷层汉澄心俯曲栏鸢鱼皆自得宇宙始知宽神物应相护贤侯与衆懽政声喧盛美隅泣解辛酸登览临春昼雍容兀醉冠千龄幸臣宋五袴正歌潘环佩锵芳席旌麾揭画竿笳箫音嘒嘒貔虎势桓桓俗乐芹争采宾归铗不弹落成今日事遗爱咏斯干

榴花

本根树立宜坚厚韡韡佳花号石榴丹赤终能尽敷吐馨香何必事飘浮晴光照处火欲烈雨气凝时血不流莫怨春风施力晚天教美实冠清秋

乾元节口号

祥电当年绕斗明岩廊今日享隆平三朝功业山河固万国讴歌宇宙清湛露均恩锡华宴薰风入奏阜羣生庶官愿祝无疆寿葵藿心齐向日倾

观碁

不卜天时不背山枯碁遇敌战谈间藏机闇伏三千楸侵道雄關百二关羣语虽咻难改听一先偶失若无顔人心勇善能如此谁谓渊骞未易攀

剪金花一首和陶掾韵

花神委曲竞光陰特向低丛剪寸金买断园林初夏景意教蜂蝶慰寒心玲珑圆影风前舞寂寞红芳雨後深稚子知名不知实采之掷地听余音

枇杷

美种盛东南园林十二三金丸方磊落琼液正包含采熟鸣禽怨?多稚子贪岂须江国重天下嗜柔甘

和陶掾同登晓亭

芳蹊诘曲上亭南小树萦纤若舞骖直对苍山班席坐旋寻幽卉满头簪楮皮裁幅明如玉竹叶浮杯绿似蓝共酌共诗其乐胜俗忧应是不能堪

庆甫借碁子

碾玉为碁黑白明临枰思策且须精莫教败衄空如扫却出枝辞辄罪兵

和贾尉女真花

祗恐繁云炽碧空
火龙昼跃汗随风
飘来翠叶亭亭处
滴出芳葩点点红
最美虚心如有待
直饶润色更无浓
主人为尔邀宾醉
狼藉杯盘晚照中

昨暮会饮庆甫署
观女真花因求一二诺
以厥明至期不至遂戏成一首

见许黎明和露剪日高
何事尚稽期也知更欲延宾履
次第开时固未迟

谢太守惠家园瓜

种继青门气类嘉
恩传铃阁动光华
含滋虽本生成力
采实难胜宠赐加
冽若层冰破蒸鬱
明如碧玉照疵瑕
贱官咀嚼深衔恋
代至明年正及瓜

萧洒参军宇六首

萧洒参军宇临庭客
不过秋花生意渐
夏木昼陰多坦腹
羣书幌搭藜一径
莎尘泥奔走外得
此兴如何萧洒参军
宇年来讼狱稀凝
尘掩丹笔苍藓半
圓扉晚树鸣蝉沸
虚檐鬪雀飞何须
溪谷隐即此是忘
机萧洒参军宇郊
原咫尺分门前涨
溪水屋角露山云
白鸟斜阳见鸣榔
半夜闻安知名利
境驰骋共纷纷萧
洒参军宇回环百
亩间山光侵户牖
柳色锁门阑尽爱
清风满相仍白日
闲只赢诗思勇濡
笔溅青纶萧洒参
军宇疏池小圃东
风荷朝披靡月竹
夜玲珑樽酒有时
满囊钱计日空养
恬真得地摔茹乐
融融萧洒参军宇
幽轩占一隅栟榈
双翡翠薜荔绿氍
毹偃息三年计炎
歊六月无跽藏晦
疎拙违俗任卢胡

八月泛江送客

送客欲逡巡
方舟棹频夕阳千嶂外
秋色一江匀酒面
红烟惨歌眉翠黛顰
昔年离别恨今日
并如新

送浦倅之阙

翹翹别乘出吴关
吏俗随轅不敢攀
此日谩淹飞盖住
明时那许壮才闲
秋花几处逢孤驿
凉月相迺过暮山
请剧书成双阙近
伫闻忠论解天顏

酷暑初夜

尽日炎炎酷暑蒸
黄昏气象未全清
天风难值树浑静
海月不见云空明
羣蚋得时方伺隙
噪蝉何事懒收声
噫予自有安恬趣
岂废林间坦腹行

十月

风脚无时定霜花昼亦飞天愁云四合树冷鸟相依陋室羣书满衡门俗客稀饥肠何以疗园芋正丰肥

望

木落望始远陰沈其奈何遥山云四闭飞雪两相和天惨景愈短楼高寒更多凝然空引睇鸿鹄不知过

和吴常甫移石

千夫挽车载无计奈人灵惊起蛟蟠迹空遗鸟篆腥莫歌山有栲始信物如萍只爱坚姿峭予眸为尔青

再和

突兀见升平前非望汝灵尘途虽闔眼血刃不磨腥气格希神岳漂浮贱水萍遇迁何足讬唯守自然青

残春

家近西湖日往还恬然不觉到春阑水边花发华丹尽水面清光终未残

休王其如各有时开荣方徧又春归东君忧在阳功乏多少闲云天上飞

塞上

塞草游驹犊边城夜不关健儿心亦礼老将没於闲岂见兵符走唯闻象贡还从兹徐积比不得塚前山

初上汴舟思归

夜气凄清星斗全倚檣引望东南天怀归重念秋垂尽倦目羞看月又圆况是汴流投浅濶夫何单舸尚留连京华岂谓无心恋自恨孤踪远遽延

小饮楼上作

西风吹酒面楼阁近重阳悔把菊枝插幡思乡路长比来求熟醉到了减清狂不是纷华少纷

华我所忘

舟晚行

汴水日就浅篙师心不皇扁舟若无滞旧里亦非长残叶余秋色明霞接暮光黄昏未停泊独自倚危樯

汴上榆柳

栽培芟治责官曹官牒书为第一劳擢干不知多少树施功唯系万千艘斧斤畏法谁能近雨露流恩气转豪今岁河堤新决坏森然安用拂云高

归兴

船头破浪疾如云船上篙工勇力分行色纵无笳鼓竞归心急在旨甘勤远山偶向斜阳见幽鴈偏从半夜闻安得巨觥为大饮乱浇乡思作醺醺

初入淮上

汴水方穷到淮水大船蹇蹇拒风行不知静里千帆过唯喜空中一派清秋气已残山态老夕阳未尽浪花明牧儿随队闲无事强作歌声和橹声

自守

薄仕功名未计高懒随时辈强譊譊推诚本在求诸内害义何如寡所交岂为初官寻要路唯忧旧学长心茅清贫我乐人毋诮不独扬雄解解嘲

骧每恶晏起强酒二癖因作诗自警

晏起已嗟为惰甚詎堪酒病复相婴未忧居养能移气当念怀安实败名便腹亦尝嘲睡癖腐肠非是醉时清辰乎径去谁能止壮志毋宜恃晚成

感梦

真人无梦梦非真自愧通宵所梦频凶吉有来皆系命岂须占讯复劳神

将赴富川

去年乾没道途间今岁官期日月悭学古虽然非为禄食贫宁不厌居闲利心汲汲人皆是巧

宦悠悠我不关三尺若能多所活尘泥何必贱青纶

驻轩亭

下马得危亭江晴气象清潮头千顷白柳色万株明风物应如古登临独有情行春始今日今日不虚行

过桐庐郡

舟倚桐庐岸春风草树明经由今假道潇洒旧闻名山势侵云上溪流见底清兹行得佳味夜枕听滩声

过七里泷

溪流一道突羣峯耆旧传为七里泷唯喜幽佳忘世俗不忧湍险赖篙工鸟声喧滑春风里人影稀疏翠色中却惜扁舟不停泊全输好趣属山翁

和红蕉

欲赋红蕉拟象难等夷未必下芝兰霞飞翠岭分余彩凤宿青梧半露冠举目尽知惊特秀推诚谁解比含丹莫教俗笔空传画也作寻常润色看

和公余言怀

荆扉栖息久壮志未能摅昨绾半通绶新持三尺书虽然烦听讯何足挠冲虚伺隙余公局开编入燕居敢希成大器唯恐近污渠心欲平冤狱情奚病滑胥贤门不多地贱子幸投裾每得高文贶翻嗟旧业疎自滋忘弃学岂复怅离蔬若使华无实宁为蔽芾樗

和访古

古人抱道重行志未肯轻从碌碌居孟子历为侯国客退之三上相君书心忘险厄高苏武言极兴衰仰仲舒试问渭滨如不遇直鉤何日得生鱼

五月到官七月八日始并得家问二

琐琐尘泥迹悠悠远宦心一朝何喜甚连客得家音义训通千里人情贱万金斜阳复东望依旧暮云深

红文苑

色若栖霞雉圆如插綉幢春葩应有并秋卉合无双

和董公肃十日菊二首

自是重阳过重阳菊不迟幽芳始经宿羣好奈随时未减黄金蕊何妨白玉卮赏花非赏节衰谢直为期昨日堕乌纱游懽等孟嘉今晨举青眼独自竞黄花香冷朝犹盛人疎势可嗟明年又重九何以面芳葩

和苦吟二首

夫子吟何切辞源泻不枯秋山凿寒玉夜蚌抉明珠感叹通前古风情满五湖只忧长寡和白雪本高孤骖也饶诗癖才疎思每艰持毫欲临纸逐兽不知山着意穷三百唯时见一班羡他唐老杜气格独优闲

厅前丛竹

软枝轻翠近檐垂朝暮清风不失期明月满庭无隐伏夜深惟有此君知

八月十四日夜月

中秋垂一宿延颈望金波素魄虽微缺清光已觉多圆来殊俯近观者尚蹉跎明夕当如鉴光华更几何

十五夜

八月得中节今宵秋又中由来金气王向尽月华充翫与多方共清非别夜同明皇如未死依旧惑蟾宫

十六夜

明月上天稽中秋已过期十分初减处万目共怜时不见昨宵盛安知今夜衰清光比他夕犹胜满如规

咏萤

诗作东山事已除宵行今复动谁嗟秋高党类纵横出月黑光芒斗顿加风触羣飞迸星火水澄乱影漾金沙区区曾有分辉客晋室寒儒本姓车

咏水

泽物施工讵可名涓涓以及大川成更逢卑处须流惠有不平时即发声倾侧只将盈上準毫厘宁向外边明宣尼所取尤深远盖取原充昼夜行

咏竹

此君坚直本天然岂学妖花艷主轩筠带轻霜凝不落干瑳圆玉碧无痕非春长自繁枝叶有地终须大本根谁为裁音荐清庙定胜嘉木就牺樽

残灯

寒窗夜将艾一点映萧萧焰向鸡声短花随蝶梦凋何须惜余照且喜近清朝老婢不知此荆钗屡屡挑

谢董都官见寄

区区贱质耻无闻深荷明公曲爱存谈席方忻接余论诗筒多谢遗佳言辞源浩若江河泻文意过于布帛温听狱平反愿承教异时安敢议高门

再贶诗复以前韵荅之

媿将鄙句报多闻操纸安能蔽所存砚墨未乾忧见罪牋封还枉却酬言长吟不觉手之舞熟览方知即也温长者如兴起予叹摄齐时愿一登门

咏草

萋萋广原上苒苒曲江湄人迹不到处春风似有期勾牵碧成阵蒙蔽密如丝待看野火烈百虫悲不悲

闻新鴈

夜堂危坐气凄清秋月光中新鴈鸣出塞不知多少路穿云才听两三声归时行列应如旧来处风烟合认程今夕沙汀好栖息弋人诡计未能成

仙掌峯

巨灵前事杳难评融结皆由造化成山历古今常似掌地当西北是扶倾擎开太华几千仞指出飞鹏数万里岁旱定须先展效力推云雨救苍生

剪刀

一身分二首一首一銛鋋遇物无微细交锋即断伤剪齐絜汝銳任用在君详大抵便柔脆毋令过所长

秋怀

西风潇洒作轻寒黄叶楼中强解颜画角几声催晚照乱云何处是家山宦途有立宁辞贱局事无多岂厌闲浊酒一杯休万虑长林烟暝暮鷗还

汴河

通济名渠古到今当时疏导用功深源高直接黄河泻流去遥归碧海浔护塚尚存芳草乱隋舟安在绿杨陰年年漕运无穷已谁谓东南力不任

黄河

四载收功故道循滔滔千古势无垠流知江海涵容大静觉乾坤覆煮均未必崑仑独倾注祗应河汉共潰沦如何骑得鲸鱼背直到天涯一问津

和聂充甫晨霜

勿异繁霜早园林已具腓隕时兼夜气凝处张寒威月落初分白阳升还尽曦棱棱不终日由此识天机

东庵院

闻说东庵在庐岳浮屠百数无双堂陰翠色连危嶂门外清光挹大江怪石漓岏坐龙虎老松突兀树旌幢何时得对幽佳趣摆脱尘襟酒满缸

和聂充甫冬晓初起

霜月孤光在寒鸡一唱催晨兴衣未煖夜诵帙犹开乡梦还千里愁肠过九回浚明何所立緹室又飞灰习曹何君屡有引年之语而未暇请今兹官满解去骧作诗言其荣以壮其志惟僚友不异幸同辞以助之

营营贵富此胡为可止能归即可师家住岭南谋退老官休江左正其时相从禄仕随诸子得谢乡闾似者谁赢取林泉长日月为君潜计乐无涯

司马南楼纳凉

溪外层楼入翠微登临炎酷杳如遗千山相掩云争出万浪欲光风倒吹摆脱尘纷得危坐牢
笼清旷就新诗短衣野老遥相目应怪官闲亦有时

贾中甫送庆甫弟来尉永兴久之告归仆多其来而重其去乃为诗以送之

仲弟安居後先庐忆故乡睽离何足惜气义已为光远趾他年见归心千里长西风吹别酒为
赋鹄鵠章贾庆甫以局事乘小船犯风波感其危而为诗且以相示仆亦於舟字韵和呈其卒
章盖言有俟以慰贤劳之叹也

万顷风波一苇浮发巢犹稳羨蒙鸿唯余忘胆惊其说况子轻身坐此舟辄戒立墙虽孝节尊
曾驱阪本忠谋小官辛苦宜无念自古高贤达以忧

公闲念诗社之废寄陶贾二同僚一首

地僻少将迎溪山一概清秋深孟嘉宅岁古闾阎城吏隐全输我诗豪半属卿社坛何冷落濡
笔请寻盟

雨後

西风吹雨过江城林馆秋浓气转清埽叶堆枯阶半没步畦经润履无声拒霜欲蘂扶疎翠暮
雀争栖格磔鸣贱局安闲出天幸未须多口论功名

见省符知有代官一首

寸禄固拘挛区区顿豁然比来符檄至代者姓名传公事多闲日归期不及年喜情通梦寐累
夕拜亲前

和陶掾见寄

寂默公闲外新诗忽见撞比来知燕坐时得近秋窗临奕夸能胜持杯学诈降【此二句陶君
之言且中其病也】相逢怯此病继晷请然釭

待拒霜开一首

予怜拒霜好独立冠凋穷故腊新移至经年曲爱隆栽培曾倩圃灌溉每呼僮覆护障炎日枝
撑御暴风欲高殲隘叶待盛拓芳丛不取蒿莱蔽那妨雨露蒙翠行疎密等微径往来通恐折
频敲雀忧衰屢?虫清秋方淡薄碧蘂已玲珑占表如争胜藏身若养蒙绿幢擎葩圆玉琢青
葱美操寒中辨丹心日已充不甘为菊後渐见出篱东虽本生成力宁非养治功从容延晚节
次第待轻红肯学杨花雪悠悠负主翁

陶掾书齐小饮

学非焉用赘多多养浩当须继孟轲把酒相懽外纷扰吟诗大句破妖魔坐中谁作向隅泣天下今无扣角歌圭绂巍巍君勿羨安知此乐不如他

秋日即事呈同僚

潇洒临霜夕清居守决曹严城吹角罢隔墉听猿号警卒持更切呼囚报钥牢讼庭澄一水尘事戢千毛檐閒蚊雷絶池虚蛙吹逃逍遥静襟虑抖擞敞只稠树木凋零尽星辰气焰豪月微棕影薄风急鴈声高忆昔随羣学当时髡二髦读书图皦皦感古动忉忉意趣青云近輝光白玉韬百钱宁问卜一钓冀连鳌直谅谋相与回邪欲尽磨自期非干蛊幸遇岂屯膏翻腕雕文陋难逢异数褒葳蕤从末宦洵涩着青袍歛翅鹰栖臂垂头骥伏槽安能枉寻尺犹得饱藜蒿但恃心如砥那矜目察毫穷通任甄冶险恶远波涛养浩虽潜孟折腰诚愧陶常嗤强蛇足敢叹抑牛刀袞袞途泥里悠悠日月愆居然成俗态何足谓贤劳贫贱非无赖清平况夙遭边隅虚障候弓矢载鞬囊途易家音数官闲坐食叨人皆讥野僻我独固持掺寂寞几尘甑包并或餽糟趋时聊勉勉乐道每嚶嚶肺腑兹尤慰朋从义不谄相逢甚优渥得兴且游遨胜赏当随地秋郊况附壕山嶠正堪展溪曲尚容舫莫计空清俸须令贯浊醪菊香分嚼蘂蟹美共持螯谈席争挥麈诗坛让拥旄纵横新义论嗣续旧风骚气鋭千戈立词抽万茧縲功名休挂齿志业本夔臯

宣赦回马上口占

黄纸恩书下紫宸岂惟羣罪许从新其间多少寛民意四海承宣有几人

十月暮登延壽閣

湖水渐如带扁舟渡亦艰山空翠屏浅荻老雪花残立马寒烟际登楼霭暮间严闥促回轡吏隐乐终慳

晓坐

晓鼓鼕鼕日欲升寒厅危坐对前楹霜威着树琼瑶色鴈阵横空风雨声自喜优游服王事那嗟寂寞滞山城凄凄院吏公衙退却就书帷万虑清

夜射通叔虞曹圃

束苇然膏百炬红夜堂寒气变春融流星半没飞金镞缺月初圆引角弓赏罚明如棘门上和容远过泽宫中平心不为长眉醉慷慨真成壮士风

辨诈

远俗无知祇慕恩凿山踰岭献麒麟诸儒不用区区辨多少难明伪似真

田叔

冒死随敖衣赭衣当时踪迹已几希忠哉相鲁扶君过不使民情向我归

感事

治体清明已久成世途欷侧未全平憊人仗势千钧重直士无媒一缕轻忍视凿墉高外观更嗟画饼窃虚名山林岂是多局鏹自为区区志欲行

和鲁成之兄弟见谢

新文来复数旧观顿然还愿助羣锋銳那慙底石顽辞豪虽欲抑理属不容删废懒翻多媿衰迟近学山迎亲来毕幼妹之嫁久雨稽阻思望而作一首

江南二月尚春寒千里安舆冒险艰远想长岐同积雨不知今日过何山出迎应喜诸孙慧奉壽须惊两髯班从此莫轻离膝下茹蔬坚乞侍高闲

董公肃都官被命倅南海以当分符之寄南归道中贶书因以诗为寄一首

瘠中邂逅饮寒冰未及公书慰鄙情脂辖近离双凤阙拜恩新倅五羊城旌旗晓过山川秀笳鼓春归里落荣诗社荒凉怀旧将不知何日可寻盟

荅鲁成之兄弟以诗惠牡丹

品冠名园盖物尤主人分惠若为酬摘兼残雨妖娆甚将以新诗意义优几树天香盈翠笼一栏春色想鸿沟满头恣插成狂醉为恐花神恨暗投

闻诏寄鲁成之兄弟

天子需贤虑逸遗诏书间岁出丹墀嗟予衮衮成无状美子飘飘正得时能将必先期敌胜善占当自照心疑相将岐路青云近莫厌萧条更下帷

代官未至泊舟颁条门独宿署中

独宿官居静维舟古岸斜尘埃犹吏局烟水寄吾家乡梦连宵动归心计日差何晨望星斗晓

橹趣呕哑

南湖晚霁

雨脚随云断湖光带日还微虹初照水余雾尚怀山理网渔歌喜支篷孤棹闲萧然安舫泊尽
室画图间

过白公堂

四百余年兵火後至今遗构葺如新谪官岂是多恩惠谁谓文章不动人

庾楼

仗节当年分国寄危楼千古压江潯山川风月宜如旧踈旷还同庾老心

狄公祠

数间冷屋苍山觜忠孝功名万载师曲俗佞神惟畏祸停舟祇谒小姑祠

陶令祠

莫笑先生犹假醉先生于道未宜轻门前五柳今何在唯有江流百丈清

舍绮霞阁五首呈石丈职方

绮霞阁

美构冠名城区区喜与登澄泉朝窃鉴爽气夜相陵物象方倾盖襟怀过饮水苍葭此何幸玉
树是依凭

水中亭

回环水面碧于蓝晓夕清虚万象涵佳趣不容为独樵史君横约在亭南

枯荷

绿萍漂合旧根斜独恨来迟过了花不见离披照秋水尽依名阁作余霞

蕉迳

两行对植接低圯弱质毋嫌费?治十月绿陰犹满迳也胜蒲柳望秋衰

小山

嵌空寻尺立池津池北池南孰可邻草树自羞还自笑凋荣一节任天真

和石丈职方长春花

舄奕红芳续皇皇若竞辰尽居羣卉右独得四时春孤节寒方见滂葩日又新笑梅侵腊候欺菊冒萧晨值赋知均被生成此特频咨咨偏惠意天听杳难尘

待令移寓赵氏园亭

待次乡间计索然故人亭馆寓 跼折腰五斗羞彭泽破屋数间如玉川晓竹冒霜清节苦夜禽啼月小声圆萧条真趣非无赖捽茹簞瓢素所便

贺简夫石丈罢令先期请老

七十能归世已稀挂冠况在壮龄时休风远过疏公上清节未甘陶令卑门枕白云朝睡美席函明月夜杯迟区区胶禄宁无耳漏尽钟鸣合自思

遣兴一絕

睡思容易醒辗转衾裯单今宵听风竹始觉窓外寒

得陈安道书知移邑名次

安道枉书自东都报我外移春可準予方寂处藜藿空蓄缩仅同枯壤蚓闻之虽喜良自嗟仕岂为贫今颇近男儿有志期必行五斗折腰何足愍

初睡

冻云卷尽月华清寒气棱棱夜转生一卷古书齐万虑满杯醇耐卧三更附炎鄙态悲时薄养僻孤踪任俗评旷逸最便朝睡美邻鸡不用再三鸣

忆富川四首

渴忆富川好官居似隐潜江山慰情淡鱼稻养贫廉旅传无将送狴牢絕滯淹疎闲真自得何恤远炎炎渴忆富川好孤城挿翠屏淳风在人物真趣满郊垌野屋千间古晴山四壁清别来

平鄙思偃卧閱图经渴忆富川好优游度岁时白云藏治署苍竹对书帷奕战侵遗筭诗坛让
拥麾还乡固佳况畴昔尚深思渴忆富川好官休欲放船垂囊买村酿掷饵得溪鲜迹寄纷囂
外情摅旷逸全交游日相醉屡以去期迁

陪胡公奕碁

区区席末侍枯碁臆计苍黄胆欲飞制胜固难施小智冥行多是触沈机狂谋殊愧千无得銳
气何劳十即围贱子衄归深自庆只褫荣带老人辉

清明

去岁清明富水滨今年旧里邁芳辰风流萧洒殊前日花木依稀似故人游览不宜辞烂熳别
离还复在逡巡鬪闲幸可频吟醉春色当于我辈亲

阻雨

清明未远正春浓澍雨无情苦见攻沽酒穷垆应减价障泥豪锦若为功轮蹄寂寞湖山闇桃
杏凋疎台榭空唯有居闲足幽况晏眠冷屋似山翁

病目未愈

病目私庖药足治【平】茫然盈月尚多眇易平本远风埃路难愈应缘笋蕨时花入书编飞
扑扑星攢檐隙转累累古今是否消深虑视少唯便默以思

即事

云物半陰晴春蠹酒气清花空叶自隘梅重核初成嚟论无柔语酣歌有壮声翠眉应见笑先
老擲风情

杜鹃

杜鹃叫林表晓顰色初分却忆动乡思去年江外闻

周生哀辞

所到固为命嗟君志不通未施稽古效遽邁及泉凶玉毀垂成际兰摧共茂中哀歌闭新垄寂
寞四山空

致政胡郎中生日

未容广受擅余徽远嗣亲荣二十期【先尚书前归休於杭地】山岳有神储秀日朝廷无事
乞身时挂车濯濯吴风厚奉壽洗洗夏景迟贱士葭莩敢为献愿光南国过期颐

和简夫游南岩

古寺因山半翠微跻攀危蹬上云扉只应秀色随秋吹还似红尘染客衣子贱鸣弦方暇逸渊
明解绶已来归吾侪幸得陪清览相与优游养道肥

又和见招鼓山游

气凉天淡正时秋野兴山情猝未休承召驩于鳧藻甚但忧尘迹累清游

又和闲居

雨余秋气逼幽斋时动新篇雅奏谐不是溪山清耳目自缘冰雪满襟怀荣名疣赘心都弃世
事毫毛力已排唯有鉴湖风月近贺公前迹可为侪

和扑满

一等出钧陶唯便儿女曹海怪材甚小扑满祸难逃所忌同欹器为忧在错刀物微诚谕远招
损警贪饕

送处道丈之台任民掾

辞曹新调补术学久坚完有位欲行志爱民无小官脂车乘短日山国动微寒即听佳声满贤
劳岂或叹简夫丈昔遗老杜别集而骧以外集当之久而亡去近承多本因以诗请

昔日交传集外诗规模虽记旧编遗近闻机格多兼副可赐闲中一解颐

赠项子後处士

介似於陵可谓清老来志操益坚成胁肩傅会羞衰俗粹茹优游尽此生只以图书养高性不
繇林藪市虚名谁编野史防遗逸当为先生作独行

去年今日

去年今日到宣州舟倚昭亭晚雨收鸭脚釘盘随土物蟹螯将酒掩珍羞溪间鴈集菰蒲老田
外人歌?稭稠此际剡游还忆旧闲中情味两悠悠

忆江上

故岁官还势亦勤飘然单舸下长津
风江无定收帆早夜浦多虞
擊柝频俸辍稻粱虽怕之直
轻鱼蟹不嫌贫苍波古木应如旧
惆怅经由又隔春

千佛岩读书寄内

官期末迫暂闲身
敦学岩居及夜分
霜落空山寒切骨
风号万木响连云
有民勿谓书休读
无术当知政必殚
独宿不辞应会我
功名富贵本辛勤

石夫人挽辞

有子任清时夫人新拂衣
人生到此乐天数奈相违
壺肃风规在衾闲粉泽微
云愁寒垄暮何处是魂归

石经老挽辞

已矣九泉归嗟君值短期
胸襟遗草在孝友阖门悲
学谢生前用名多没後知
幽冥当自慰造物本无私
咏唐史

李卫公【靖本名乐师】

能作膏肓遗萧辅【高祖曰李靖是萧铣辅公佑膏肓谓破之也】
更於西北振威雄【北谓突厥西谓立大宁王慕容顺】
若非明主矜羸老几向高丽弃旧功【末年欲征高丽太宗不许】

李英公【积本徐世积】

威加突厥胜长城【太宗曰今委李世积于并州岂不胜远筑长城】
药赐须灰感圣情垂没训言非不虑奈何坟土竟遭平

尹思正

执笔威踰知一杖忤权活得月
将身位终八座非为幸埋戟相符岂不神

李朝隐

拽宦鞭奴蔑贵权当时风角?衣冠
及为御史声名减岂是官高便欲安

张中令【九龄】

金镜文高压万珍开元宠遇号知人范阳奏日言如用安得西蒙蜀道尘

李适之

鑛金言率遇参商罢相还歌乐圣章怖死宜春中奸贼令人扼掣痛其亡

二阎【立德立本】

八座蝉联属弟兄当年门地足辉荣可嗟不富经纶业唯着丹青制造名

苏世长

披香殿上叹隋君校猎营闲劝十旬莫谓口忠心则诈何如胶口不言人

刘知几

五说三长历历陈坚辞史任斥因循若教直笔专归手褒贬应能慰後人

卢怀慎

言极公忠器业清死犹勤恳荐时英贤哉度已推姚相不幸幡成伴食名

李林甫

国忠祸衅根芽日此贼倾唐势已先构陷名臣冤且衆天乎何意与终全

杨国忠

权由宠盛危宗社天子倾心日自如十万北来犹未悟潼关尚听促哥舒

王珪

斥姬援祖沃君心贞观箴规器独深私庙因循遭纠劾可嗟玷玷在球琳

戴胄

持平远继张廷尉献议尝班魏郑公谁谓尚书无学术没身何媿谥为忠

戴至德

神翰飞英纪至贤谓如舟楫济洪源偷名岂学刘仁?专向朝堂卖主恩

魏郑公

东宫尝吠非其主贞观终高献纳臣不独齐桓忘射带太宗当日最知人

虞世南

太宗宠异号名臣五絶当年赐目新亡也重嗟文物去石渠东观谓无人

韦见素

入相年余值狂寇独随车驾岂非忠奸凶萌祸根芟远史笔如何罪及公

契苾何力

自称烈士受唐恩宁死延陀不屈身莫陋将军本蕃种中朝似此几何人

李光弼

阃外分忧屡积勳间言几欲变深恩十年三覲劳方面荣耀双旌并在门

邓景山

并门雄镇军权重歛怨残躯不足伤偏将赎身由纳马贱人贵畜自为殃

韦坚

勿诧崔生得【丁纻反】体【都董反】歌运潭聚歛一何多术虽可鄙非其死甚矣奸臣恣网罗

房琯

蜀途赴难忠虽固车战亡师咎已深天子未归京未复不知何暇有琴心

崔尧

大臣许国当由道执政如何事佛淫身附奸邪不知祸却谈报应感君心

杨绾

总政中书月未期郭崔奢侈遽中移代宗勿叹天亡早用相斯人已後时

郭子仪

凌烟阁上中兴後勲德光全属令公鱼辈也知深用力其如谦巽悟宸衷

萧复

面排卢杞兴言佞背沮刘公受旨私真相不知知彼相便容辞疾等闲司

柳浑

刑寬毀玉回天怒智料渝盟识虏情延赏见跻终不愠陶陶谁似柳宜城

李揆

献替初虽有可贤忌能遭贬是谁愆顰头鼠目言何易重困江湖十五年

忆双栢桐

忆昔厚栽培怜双异衆材青青江外色往往梦中来未得甘棠比宁随弱柳衰春华摠劲质冷淡为谁开

送刘诚夫江陰狱掾

学老才优底里精青衫今始掾江城高门积德功须倍三尺持平道可行听决即能诚吏俗名声安用势公卿相逢未几还相去赠别非言岂慰情

石龟

磨琢成龟智不虚天然体理画难如世珍未许论荆璞神迹当曾负洛书山泽秘奇西蜀远星辰分气北方余坚完自得灵身计安用区区免余且

县斋即事

作邑慙无术怀民赖有年讼简消不逞宾席汰非贤奉养庭闱稳论求典册全谁言非吏隐山水匝城堧

喜德甫彦文至

昏昏山雨锁春晖徧邑萧条客至稀怜子远来求所益愧予无术慰焉依文章未易论高出行谊当须及庶几幽阁羣书足游意圣贤虽邈欲谁归

雨池荷花

云翳前山雨脚长洒然清气动莲塘花中润色添来美叶上繁声过去忙红面浑羞泣珠泪翠盘微重浮琼浆萧萧古县无公事赢得澄神坐冷床

金华按覆回止普净

雨止山路滑肩舁进亦难官拘当勉力室处岂非安浅涧流还急鸣禽意自宽来归虽薄暮古寺且盘桓

登楼

邑落皆山水登楼远目通从容民事外游息圣经中画饼羞虚誉持衡尚至公此心难语俗举袂挹松风

离邑之衢按狱

出野暴雨作迟晴方戒行溪山百里秀气象一番清于役途虽远祛虑意自平民田况交隶足以慰予情

野塘白莲

路转方塘口塘莲云不如孤芳已难值秀色况非余及鉴波平後飘香雨过初泥途忧溅污顽鹭仗谁祛

石龙

隐隐苍山壁蜿蜒此蛰身物生多有象人附即为神头角千年古威灵一境伸确然难以诘立马为逡巡

还邑遇雨

一阵陰云一雨来驱除烦暑洒尘埃山川固不为迎合岂是先知地主回

闻国哀

欲及乾元节登遐诏忽翻万方钧疾痛三纪被仁恩气象河山惨光华日月昏小臣忠未效饮泣望崑仑

县圃刈禾

林下圭田一亩余春耕秋斂亦勤渠年丰独喜能钧衆月给谁嗤薄助吾已愧拔葵贤鲁相更羞尘甑诵莱芜字民固合知民事稼穡艰难坐可图

荅吕秀才

惻微調急意虽完势力鎔铄岂自安畎亩君忧家计迫风波我畏宦途难敝衣非不怜原宪尘甑其如类范丹情礼甚勤无以谢愧将珉石报琅玕

荅顏长道见寄

花溪前日还辕处惆怅高贤又阻陪山雨在云方惨淡野烟笼水正低徊别离轻似风飘絮迟想多於渴望梅胸腹殷勤岂无感果然緘寄好诗来

同邑簿检?堤柳乘兴游保壽僧舍

拨置簿书看种柳等闲联轡入云岐山僧莫道疎迎候我辈行行不自知

过紫霄宫

先春曾宿紫霄宫今日重游春正融谁道居官便跼缩也能偷暇向忙中

游壽山

暫离簿领来邻邑旋访灵踪到壽山乘间一游真未易岂论身寄此中闲

下山复题二首

頻望羣峯目已惊山僧更解说山情夕阳归去心难足未听飞泉雨後声

宛转松蹊入五峯更临危阁半晴空山花鸟语皆真趣谁是韬光傲世翁

望方岩

路过方岩未及游肩輿回首兴难收野桃带日遥相笑笑我山情不自由

宿灵岩

坐邑传闻此岩好心疑好事张浮辞及来胜境穷游览却悟前言有漏遗触石烟云如障俗倚崖殿阁半乘危自嗟吏治多牵制只作清虚一宿期

百丈苍岩入杳冥高低气象本天成藤蟠翠壁龙蛇动涧泻断崖风雨声不许画工为润色只应诗伯长余情栖鷗乱墨题僧室车马何时再此行

自灵岩回途中寄顔令

吏役谁撓绕寻幽得二三穿云离古观冒月宿灵岩乘兴诗何择孤游语自臧寄言酬地主清赏可无慙

冒雨游石室

陟磴苔痕滑穿岩雨脚收爱山隣邑令来作雨中游

鸡人峯

石室前头一片春天然形象附嶙峋山家况味无晨夕安用鸡人赋此身

雨止

雨止单蹊步可通寻春天气似相逢山花有意飘行盖野水无情照瘦容挈榼竟难成独饮抽毫犹得当朋从逡巡且尽今朝兴数阖归来趁暮钟

晓霁归邑

夜枕轻寒睡思衰迟明方霁促归来车徒虽患泥行蹇林麓还逢秀色回山雨定非天意足溪云应为主人开野花零乱春禽闹此兴何如鼓吹陪

钱塘集卷二

卷三

<集部,别集类,北宋建隆至靖康,钱塘集>

钦定四库全书

钱塘集卷三

宋 韦骧 撰

戏别顔令

趣驭不遑辞地主趣晴唯且荷天公县楼归去劳东望早就新篇寄好风

将及熟溪

东风吹散黑云轻渐望吾疆野色青料得熟溪滩响急到时聊为驻轩听

邨落

轻寒切切战春阳村落人家意自遑老妇画眉窥止水痴儿曝背坐颓墙牛归小径蹄痕叠犬吠空山响荅长夏赋未来秋赋了片时优佚胜膏粱

途中寄县斋诸士子

花发蒙亭画景舒浩歌应叹食无鱼灵岩恨不同真赏且把新诗慰子居

离石室

九十阳春兴已酬登山穿谷尽清幽闲田不是无多让故遣尘劳作胜游

离邑寄顔长道

县城不出已逾月出爱秀野浮青春前时枯株变深翠对我意气如欣欣肩輿渐入南康道溪山清旷交吾邻簿书拨置固可喜又况雅谊还相亲

闻诏士呈同僚朱伯英

圣神虑遗士豪俊思致身诏书一飞传上下交欢忻吾侪职山邑步局志未伸缅想风云会廓

然忘我勤

和亭

前贤重交际世俗竞将迎用礼皆由正知和始可行候亭增旧构题榜易先名训激非存远还当鉴鄙情

和伯英初霁

日出乾坤静陰霖革累旬前溪声未减绿野秀如新人意犹祛病物心疑再春此情谁解赋先手属东邻

和顏令见寄

孤城四面插羣峯云翳经旬雨气雄自愧不才为县尹近来无事若山翁几思羽翼飞腾去幸有英豪咫尺中独上高楼方引脰喜逢嘉句载清风

洗出郊原物象明积陰祛尽喜天晴东邻长道诗新寄增我溪山一倍清

权东阳既久求归武川上守倅

章守

剧邑虚官偶承乏字民何术慰林林文翁化被虽无事巫马才慙惧不任樽俎弗踰宗祝计牛羊自守乘田心愿归山邑逃瘵旷养拙寒儒荷赐深

沈倅

星火州符气势豪敢辞承乏赋贤劳设施每恐无能及旷责还忧不可逃捕鼠孰淹希骥足解牛难任割鸡刀愿令樗散归闲邑更使潜心缘饰高

衢梁试院呈同事

秋风动林叶山国早寒轻较艺精神暇持杯语论清勿辞淹鎖院未用尅归程留意如求举终当不误评

依前韵酬张屯田和诗

落笔流星缓躊言白璧轻鄙辞翻可媿老格有余清择士无精鑒糊名况旧程更烦为大句使

我壮文评

试士毕同长道东归

相将冒晓出郊原但值佳山即驻轩投午未行三十里和诗已及半千言黄云被野田禾熟白雪翻空溪浪奔高旷襟怀共为乐此情难与俗人论

上睦州刘工部

政行荆楚百蛮怀却拥旌旄向此来自喜平生无枉道岂论千里复淹才恩苏疲瘵精神返威慑奸憊胆气摧秋晚子陵溪上好樽罍风雅许谁陪

桐庐古郡压乌龙潇洒佳名信不空傲世曾栖隐君子谪官多属钜贤公连云城郭残秋外近水楼台返照中太守公余登覽胜始知天意养其衷

和朱尉见招

作尉由来本仙局况能投隙会僚朋开怀自适人须美治具虽疎客不憎雨意初收天爽快田工将毕岁丰登高吟大饮无羞澁祇恐秋风苦不胜

和顏令见寄

别後经宵各到家别时岐路两萦斜相期卮酒重何日独对秋林浪有花攻墨却思同整具择金犹记共澄沙语言髣髴如朝暮但怅睽离似海涯

观穡

霜风卷叶度高楼楼上萧然对晚秋坐看野人收?稭相将尽室在田畴赴晴汲汲如防寇望岁区区已见酬遗榧多忘歌笑去乃心应亦傲轻裘

寄长道

诗筒寂寞过残秋望断前山暮霭收共简犹思石岩句连鑣悔失烂柯游晴溪激浅声还细栖鸟争深閤未休野兴与君当不异不知今日在层楼

县斋即事

比来?讼少拙令称幽潜爱日开朝幌看云卷画帘澄神烹茗粥忆古检书籤菽水清多乐溪山意自恬韬光异耕钓苦志念渔塩骥足空思展牛刀敢谓淹民心久当信佐局美相兼笑傲言

祛隘賡酬韵鬪严囊钱如未乏樽酒尚能添园笋新成绿池荷半露尖共谋怀坦坦母恤远炎
炎此兴欢无敌逢人语必箝

永康徐尉次寄顏令诗韵见寄因以前韵酌答

柅车为别始中秋遽见霜朝爱景浮自愧马期无少暇祇应梅福有清游殷勤好句能相寄哦
咏幽斋岂便休此段情怀何所似月明更上庾公楼

和朱伯英後圃见招

爱君邀客以清诗会我公?诟讼稀卷白到时须自勉乱红飞处是春归

初夏公余

公?日无事民伍正蚕耕夏浅寒犹在云浓雨易成图书存远古诗酒有余情傲吏居幽僻其谁
谄近名

和朱伯英迓送还示

怜君连蹇从初仕慰我萧条典一同莫为尘劳便兴叹所施无负即为功

和太守郡阁望羣山有雪

郊原霁後晚寒清残雪笼山望处明尽道凝留因地冷当知粉饰藉天成崑冈玉聚微云歛沧
海潮横返照轻解赋属谁诗格老贤侯登覽在层城

自郡还寄长道

故岁局重城填然思不清归来见春老何处慰诗情顾我几茅塞知君已帙盈社坛当未废旧
约可寻盟

和顏长道见寄

宛转溪山邑落深春归云物易成陰莺穿别坞遗新子花谢前村失旧林自厌簿书为滞迹未
应轩冕足关心东邻幸有顏明府清旷襟怀且共吟

谢朱伯英遗诗

我辈清怀善自将不须才与古人当佳辰美槩无穷尽险语高词亦转相隐吏未能离扰扰诗

情犹得慰皇皇如君逸格谁忘羨驂裊终难困服箱

和顏长道寄三首

首夏

秀邑发丛萱清陰泛新竹园林足幽思阳阳曲池曲奚独念春归爱此未炎燠

县斋肆笔

簿领区区岂愜情尘纷安得眼长青且希五柳先生醉莫似清江使者灵临政每慙非善治随时尤愧【阙】谁能与我还幽旷陇上耦耕还带经

閱武川倡酬

往还赓唱百余篇草草编联後或前语气有时凌夜月词源何啻泻春泉须知吏隐能遗俗不独山栖解乐天屈指代期秋信逼封人莫厌屡驰牋

扫蒙亭

芜亭一扫媿陈蕃松柏陰森翠竹环開蛭尽毆澄曲水横柯旋斫望青山人归畎亩醇风在我近图书白日闲樗散自知成独乐慚无善效及民间

次韵和顏令见寄

再来东白日无休剗割唯忧或滯留满眼烟尘真可厌幸而涵碧见清秋

伯瞻郎中生日

瑞气飘飘贯斗牛当时貽庆在南州太平势盛高贤出造化功成万物秋侯国几年凝课最相门今日足风流祝公寿与灵椿等庶得胷中尽壮犹

中秋南康夜会得天字

宿陰初卷尽万状正萧然夜色兼秋半人情爱月圆褰巾洒浊酒露坐幕青天佳节还相遇阳阳忆去年假道南康长道语今夕中秋正故岁聚并喜乐时也遂留以夜饮饮半和所示诗

月华乘颢气人竞此宵明旧会嗟经岁修途为辍程凉飘襟袖爽秋入管弦清莫谓红裙饮新诗亦间成

睦州千峯榭二首

千峰围绕自苍然古榭凄凉不记年搜索旧名逢雅尚主张佳境有豪篇坐凌翠靄羣器隔眼入清秋万状全芜废不唯兴此地当知民物尽陶甄

层基突兀倚晴空碧嶂回环势复重秀色有时侵画隼苍烟尽日卧乌龙严公滩近增幽槩方叟诗存得旧踪贤守葺遗殊衆好政闲把酒看千峯

宿广严靖阁

久为簿领废登临一宿禅扃万虑沉半夜松声惊梦枕琴书幡起故园心

过法寧僧舍

积陰卷尽见朝阳更入云林古道場踈旷襟怀终久在暂离簿领已清狂

题虎峯真师壁

虎踞山形路屈盘烟云过尽到禅关老僧得地真安稳不向人间趣往还

检覆鸡啼源还虎峯

到此崎岖力已疲肩輿西去更乘危始知不及闲人好避险从安任所之

寒雨夜会得歌字

佳客来相遇衔杯语论和夜寒兼雨甚酒色向人多泪烛摇红萼风帷动翠波漏声催举白檐溜混微歌朋契谈间合诗锋闇里磨十年方一笑不醉奈情何

呈范子镇同年

白日当时共得仙清樽未倒且留连间关益部君今去後会轻论又几年

劝元功饮

昔时同閤今同郡气义相懽此最亲莫向酒杯成偃蹇醉来诗格合清新

再和范同年得厅字

人生难计拟并合若漂萍稀濶同年会萧条古县厅冒寒欺雨势卜夜托龟灵漏转歌声促风
余烛烬零主樽慙北海客量过沧溟愿且留车马离弦未可听

涵碧池

原泉有本养渊淳更似端人见底清竹色山光朝暮在当知涵碧不虚名

涵碧亭

座隅平地是云山爽气无穷六月寒梦得祇知图未善不知能画不能完

瀑泉

堂堂一道出山腰色似垂缣响似潮何必枕流图洗耳坐观已觉俗尘消

双石鱼

谁磨紫石作双鱼绕以清流泛酒觚祇使幽人添醉逸山林未快忆江湖

傲亭

峩然危构冠山巅以傲名亭傲可贤不与世人论是否谁能来此卧云烟

双峰

我爱双峰若竝趋钧然苍翠傲荣枯定应天意成真槩磊落相依道不孤

击瓠

箫鼓厌喧豗瓠声可荐杯鸣珂秋猎骏翎佩晓朝回挹注虽为助甄陶别有胚玉纖敲击鋭惊
起玉山頽

和朱尉示亲老生日

臈残朝夕是新春秀入溪山碧万寻白髮亲逢蓬矢庆彩衣人奉玉杯深风回?砌弦簧宛日上
帘旌插珥森敢谓小官无足慰尽懽菽水亦甘任

和朱伯英元夕

燃灯结彩学春山佳节还逢邑事闲僚佐相从真我侣旄旆共乐在其间月中风味当无比醉里尘劳似不关祇以清罇期漏尽明朝应悔主才慳

席间和向辟之元夜

令节伸眉且自寛与民同乐是民官宴酣岂为残更促醉兀何妨万目观舞袖飘飘凌夜月灯山闪闪战春寒孤城谁谓萧疎甚无愧途人即可懽

无愧涂人即可欢【原阙】 月华莹澈通春夕民气融和却暮寒拊膺肴蔬成曲会扶携老稚任环观邑农他日逢今日往往应能话旧官

回长道中论

【原阙】 纷吾子文章有本根此说独能通正【原阙】
专门剖开先圣难明旨羞杀拘儒既【原阙】

才何足议但凭余焰发冥昏

和长道候使者宿龙窟见寄

【原阙】 幽寺傍【原阙】 昂藏顶翠螺县尹候迎车𨔵【阙】 田𦉳观【原阙】
潭间水黑应龙卧松表风清独鹤过

【原阙】 我萧斋倚柱祇长歌

寄【原阙】 长道将罢邑借前韵以寄

山【原阙】 对春风把酒螺况是安𦉳器讼少何【原阙】
怀多眼看野色烟云秀指数瓜期日月过闻说【原阙】 将解印追攀无计且酣歌

和见贻

拘挛山邑四【原阙】 滞徒嗟薄宦身忆昨同时来视事美君先我作闲【原阙】 心虽记多佳议寒齿还忧失旧邻安得追攀如素约舳舻衔尾倚江滨

送章郎中赴阙

【原阙】 治已成还台荣望本峥嵘朝廷不许淹贤【原阙】

借守情晓日旌旗动行色春风笳鼓作【原阙】

阙城西道祇恐朱轡欲迅征

【原阙】孰可俦弟兄麾节占三州疲甿救尽方为【原阙】
还岂自由仁似周侯小棠在清嫌汉守大【原阙】应静夜双溪月远挂公心未得休

探得海棠送章仲成

高低海棠枝交结离人思离披海棠花烂熳离人醉醉来离思轻看花【阙】有情一片随春风悠悠逐君行

和长道交道释见招同趋府

北出城闉【原阙】明待驱款段趋君行归时亦欲偕吟醉寄语【原阙】落英

同长道游惠僧翠樾堂

覃覃洁宇【阙】城阿车马知名始见过邃密莫嫌春态浅牢笼不【阙】翠陰多玩心爽槩真偏得泯迹空山去几何今日【原阙】褰带暂将尘扰就消磨

清明雨

陰云散漫与山平草暗花昏匝古城定是大心恶游放故将雨脚鎖清明谁知静圃无穷趣独有幽禽不住鸣况值清明归去客共樽谈笑有余情

四月一日西池作

【原阙】荷叶大如钱拙令无功又一年六月京尘传流【原阙】嫌池上更迁延

和朱尉首夏偶书见寄

蹭蹬瓜期失山城独滞留驰驱更万态寒暑过三周底里繇前固堤崖懒外修仅能违吐茹岂谓足阳秋所幸偷安佚兹心在讨求门阑方事隙园落见春休秀色孤花载晴光隘叶浮池鱼行有队林鸟语多羞芦笋青簪密丁香翠幄稠藏身啗野茧露角笑蜗牛?拥芭蕉扇墙披薜荔裘清风如远俗危坐自忘忧目极山兼水云飞越与瓯官曹虽鞅掌野兴易牵钩鰕絶侵疆讼阁无覆刺投优闲为佐局邈迤得吾流酒薄犹思共诗成罔不酬肺怀非异致议论诎相矛受代何辞晚谋懽且自由他时遂睽阻徒尔念英游

游金柱观瀑泉

源高云表许谁穷
飞出岩前百丈雄
岂是山神作灵恠
解将烟雨变晴空

和伯英 赋

【原阙】 隐恠少人知
非是山僧别有机
漏泄一朝逢地 【原阙】 终不似前稀

同朱尉游普宁僧舍

讼庭无事出南城
来扣禅关万虑平
强作优闲羞宓子
自成清淡爱梅生
碁敲玉局林莺啭
诗落苔牋山鬼惊
却说去年违此约
老僧应解管宫营

和初夏雨中

瞥然春去浹旬余
积雨乘陰气节殊
旷野石泉飞白练
虚檐溜激明珠蜩
因寒晚羣情病麦
候晴收万室须空
解登楼伺云色爱
民拙令愧偷儒

端午雨饮伯英池館

山城重午遭陰晦
谢氏池亭亦自堪
野色映来歌舞好
炎威消去酒肴甘
手中菖屑随杯泛
头上榴花带雨簷
且尽主人留客兴
明年谁北复谁南

送王学士赴京东漕

重寄属名卿
除书拜宠荣
山东移使节
天上动星明
经画几三载
恩威尽列城
询求皆疾苦
课入自丰盈
酣宴哈无取
焦心悯未宏
孟阳?已愧
刘晏誉还轻
报国胷襟壮
纾民术学精
休风鼓羣吏
高论满诸生
岂敢身干进
难排翼传声
褒功形圣诏
易地近王京
捧檄将新命
遮车见衆诚
拳拳思远托
冉冉即修程
电闪旌旗活
云收鼓吹清
山川开爽气
草木有余情
行健途疑促
吟豪思欲倾
越吴钧慕恋
齐鲁乐奔迎
万里宣材力
中朝倚辨营
金谐犹有待
輿议岂能平
器尚虚兼济
谋终赞仰成
宸衷方外藉
安可忆登?

晓出候按察

未晓驱车出炎蒸
畏日高苍茫侵雾气
隐约听鸡号流滞还
尸禄奔驰敢叹劳
苦吟随处有未始
废陶陶

自和

将旦云天惨前瞻使旆高田翁持火走山鸟向人号自哂折腰久谁怜负弩劳解从归去乐空愧不如陶

偶作

纱巾踈爽葛衣宽簿领无多笑傲间黄卷仰持眠昼榻白云斜歛见晴山风荷泻露池声激烟柳藏蝉野趣闲日月淹留非不幸柅车休叹未西还

予莅制济民药朱尉掌棠常平粟因以记

火日炎炎五月天邑中分事力相完君当庾廩司平糴我近方书辑衆丹共识朝廷欲为惠岂图居处自偷安谁言忠谊须谋大未合谋时且恪官

和新竹

根本坚深岂费培龙蛇蛻尽见天材斜穿似爱幽人到踈列还容小径开凉月骤添新影密清风不减旧枝来岁穷自有凌霜节宁比秋衰恶草莱

和独钓

苍葭欺绿鬓白水照朱颜掷饵渊渟处牵钩荡漾间亦知鱼响沫肯学雀衔环且欲资清旷消磨永日闲古人多隐钓意不在微求稽海曾垂犗磻溪旧直钩声名当日晦德业後來收莫笑临流者持竿迹更幽

送刘睦州移京西漕

贤杰恬荣进朝廷睠旧材优闲辍为郡按举复行台忆昨巡荆北于时会岁蓄转输忧国计假易缓民财吏议乌能避邦条不可裁谪迁知咎戾忠信即基胎解印离江浒分麾泝浙洄列城遗厚爱千里沛余才火玉坚难变霜松翠弗摧壮行心所勇胶禄素尝哈履道期终固谋身絶外猜子文忘愠色严助乐归来抚俗专求瘼提纲独整颓察幽穷帶芥屏恶自渠魁狂狴春多草宾堦雨不苔溪山围几席风月侑樽罍毫瘦清吟苦弦高雅曲哀黄堂成卧治青律再飞灰况味安符竹曾襟傲面槐桐庐声绩远莫陞宠光催近部劳经画兼资藉玮瑰使旌蜺夭矫宸诏凤毡毳肃肃途将戒元兀慕若孩车攀朝轴舟遁夜张桅被命恭虽益封章恳以推让廉仪组纁贪冒慢弩骀京辅非轻寄天衷未易回功名当盛获蕴蓄岂空培舆论薪皆愜高怀愿更恢壮猷那久抑早晚咏良哉

双莲二首

池间 鞞红特尔不雷同共本青跗瘦骈头秀色充湘娥心并恨江女佩双空忍负流觴乐虚

教逐暮风临风皆独媚同蒂忽相亲擢秀材宜合飘香势自钧虽慙两岐瑞已掩百花春定是
怜濡滞殷勤悦主人

和朱伯英以诗庆将代

非材安敢叹淹留吏外尤忻共雅游欲代虽知归去乐相看还动解携愁襟期岂逐炎凉变谈
笑应随簿领休来岁黄花何处好怀思把酒对霜秋

再和

区区邑落四逢秋敢诧归期占上游似得葵丘瓜代信如销都护玉关愁琴弹夜月声还变诗
写溪山兴未休幸有台池且同醉别离到後更何由

将归

代期渐可数光陰掉鞅归时秋已深篱菊正牵元亮眼江鲈还动季鹰心迎新送故人徒扰兴
利除残我不任唯有溪山不辜尔未尝旷日废清吟

效谢宣城体呈同事

秋风鼓长松声来何飏飏衆鸟相与还山椒落景收吏冗得所隙笑傲偕优游虽无杯中物亦
足忘余忧

呈孙东美【睦州试院】

露气侵帘幕萧然夜已分括囊停较艺倚几重论文邂逅成相际从容慰所闻溪船行各去回
首只秋云

试罢

沓沓纷袍去寥寥鎖院中云收晴野旷潮卷夜江空难尽文章鑒终输议论公敢辞淹旦暮归
翼尚羈笼

和东美示内乐亭诗

养恬真有得逐俗固无心月沼秋如监风松夜当琴公余偏坐晚客至不谈今张我名亭意慙
君寄好音

和东美见寄

子陵溪上各危檣心逐君归到故乡回首苍茫空鹤望乱山萦绕似羊肠评文酷爱曾襟远坐
邑还忧事业荒忽得新篇开鄙塞甚于潍水决沙囊

钧爱亭

簿领支离每竞辰退思当亦在吾民抑扶为术如偏取字养存心固一均杖履数来消迳藓笙
歌久阕聚梁尘天公岂复遗踪拙风月随时不负人

内乐亭

谁谓兹亭浪得名寥寥气象副深诚地饶松竹千年色天与云山四合清靖节固尝为傲吏子
真元不势名卿伊余窃慕恬然乐肯以纷华战性情

凌翠阁

凌翠阁翠光寒不落公事余闲日日来檐前好鸟无惊作

凌翠阁突兀撑寥廓满眼苍烟万里春忍负十分金凿落

凌翠阁四面祛棂箔千里无云看月明何必庾家楼上乐

凌翠阁山绕如城郭风味都侔陶令居所慙犹被青纶缚

木芙蓉词

木芙蓉墙头浅浅红秋林枝叶十九空独此葩扈当秋风秋风无意开俗眼俗眼不开须在依
接?斜欹勿嫌重满蓼何恤惊儿童岂必黄金菊难辜白玉钟

国哀

天地有大故朝廷凶讣来五年再罹苦臣民若为哀钜贤荷遗托梦泽滂九垓衣冠又新命收
泪心悠哉

离乡

不走京尘已十年治任西去兴悠然功名欲立非人致才宦未伸还自怜路柳得春多意思野
禽批水共连翩孤舟独载无人语唯把空书考圣贤

过千金怀陆刚叔许顾道

记得当年泛小舟相将随计冒残秋故人笑语无缘合今日烟波独此由老木战风春尚浅断云笼日雨方收自惟我辈襟期在碌碌谁甘便白头

平望阻风

大风嗥空声烈烈小舸逆牵饶 瓢交跣拥鼻坐其中蚤暮恍然难以别利名无?人自紫山林无局人自絶区区冷官何足赖奔走勤劳可嗟咄

题周开祖丛翠轩

所居知所向种竹接前檐翠色无时减清风引日添萧疎共谈麈辉映祇书籤碌碌夏畦病输君此养恬

汴上遇孙楚材

春陰蔽日多飘风二月凛冽犹穷冬馭夫凌兢踏泥冻旅况索莫填心胸淑人邂逅获交马语言浹洽欣相从夜投孤驿共清饮安得复诉瑠璃鍾

再和所酬

茆弘?迹已绵久谁于二月为隆冬相逢诗酒得贤侶遽使炎燠生吾胸饮酣真趣不可坏诗狂险韵皆能从殷勤鄙句复叩激自喜牙琴还遇鍾

早行

晓鸡三唱已戒馭复长郊残雪笼河岸初阳射柳梢野人犹闭户宿鸟?依巢而我何为者区区足自嘲

宿零壁驿

凄寒动春夕覆被益重袍乡梦惊还远征途久觉劳破牕留月影古木任风号闻戒无兵馈刚肠独佩刀予枕屏书叔夜养生论而孙楚材观之有诗相示遂次来韵以答

枕外霜屏手自书数千微指慰焦枯乘时岂羨鹏飞海悖理须讥马守闲治气养心予所慕长生久视古非无喜君与我同兹好免蠹当终学尸枢

和黄彦文示诗

执经今日 相从快若鸿毛翼疾风持已已怜仍旧好力文还喜後來充平蹊安肯容茅塞美

玉寧辞以石砮顾我空空当考击愧无术学似河东

岩斋晓起

晓起郊原寂清风盥栉傍松梢泫微露岩顶泛初阳髣髴山禽语飘零古殿香携书寓蹊拙三伏化寒凉

寄陈安道

同年同第复同门计治同为待次人一纪清时共濡滞两身孤宦各艰辛不要钟鼎须耕道未遂山林为食贫吾党襟期当自信且随天意养轮囷

又和所示

布鼓微声强自信两篇响答语惊人连城自我忻怀宝八字凭谁叹受辛岂为倪来轻有动但能恬守即安贫相期厚养忘多欲莫似豚蹄祝满囷

七夕

此夕流传久不磨相逢樽酒且酣歌竿垂阮服终成强腹晒隆书顾几何漫道银潢能限隔未闻河鼓畏风波楼闲安用穿针乞世上纷纷巧已多

七夕寄安道

去年此夕我拘官君挟鱼轩到此安自尔分驰数千里岂图今日一交懽风萍离合光陰速月桂交游契分完不倒玉壶终未已待将河汉夜深看

附郭照邻舟还乡一首

国门回首气葱葱拜了君恩去意浓故里华舟幸同载邻邦嘉士喜相从高谈浹洽情无畛新句纵横笔有锋往往旁人多羡慕主人况是郭林宗

送郭照邻赴南雄签幕

浅汴萦回减迅流緑榆疎薄弄残秋兰舟去指三千里梅岭前头第一州幕府久须贤者画朝廷最重远民忧近来选擢多超迈竚听君才不次酬

汴舟早行二首

隐约短窗明
呕哑两橹声
晓寒衾外觉
乡梦枕中惊心喜
亲闱近身从宦路轻
男儿棺未盖
安可叹虚生
容足岂无处
浮名浪自牵
通宵不安寝
湍水正鸣船
旅况情何赖
家音远未传
凌晨飞棹急
聊以慰迁延

延和引对

昔年便殿拜恩光
今日重来惨肺肠
螭陛载瞻新侍从
龙颜如仰旧君王
星霜一纪逡巡过
膏泽三朝次第当
埃壒尚能裨泰岳
岂无忠谊报明昌

至泗即天长独归叙别照邻

长淮十月北风高
判袂临津首屡搔
草草旅装方揽辔
勤勤别酒更持螯
扁舟君去良多况
间道予归岂惮劳
行矣余杭期会在
早来江上看寒涛

再回前韵

画船东下橹声高
闪见旁舟堕玉搔
张翰归心鲈满箸
毕公狂兴蟹双螯
朝食餍飮唯论饱
夜语诙谐岂厌劳
乍聚乍离当不恠
夫君多可似山涛

无脚桥【汴上】

枘凿关连壮横空
不可摇激波无鴈齿
跨岸只虹腰
改制千年取倾舟
衆患消乘輿济人者为
惠固相辽

离泗上

晓雾鎖长淮
初阳熨未开
造舟行险滑
舁竹势迟徊
迴野苍茫合
严风浩荡来
归耕如有地
劳苦曷为哉

避雨大明寺

去时骤雨忽兼风
歇马曾留此寺中
今日来归复如此
始知事有偶然同

和简夫游鼓山

气肃乾坤万物秋
久违真槩喜重游
高闲况奉挂冠乐
旷逸惭非蜡屐流
狂饮何羞吹落时
鲜岂必置船头
鹏抃鷄集逍遥等
醉眼冥冥百事休

申园席上口占

凉秋池館燕闲身密席荣驩主与宾白日神仙分两膀青云兄弟占三人东篱潇洒黄花好北海风流绿酒醇投辖更须防壤坐夜深共醉月精神

和李信臣游南岩

秋云杳杳鎖秋岩恠木森森碧潭游骑去时平壁晓老僧迎处满衣岚何人自塑临泓水近古遗棺石龕我忆昔年曾此醉却嗟今日辍陪参

答信臣遗诗以失南岩约

闲里萦愁不自由驰心空想碧岩秋连鑣独远朱蹄骏酩酒还辜绿螳浮嗟我数年遗覽历属君一尺更迟留定知清兴难穷尽莫便轻回访戴舟

和南岩回

心舒还爱日境胜欲忘归茶战弱一水碁兵尚十围秋山终易冷暮坐只添衣上马回首数霜蟾逐盖飞筒夫丈约游南岩时以妇翁室会遂渝爽依韵和其来篇

巨源常少恠第五岂无私酒食先为困溪山辄负期七年思旧赏隔日诵新诗康乐清游在随轩别有时

和信臣游简夫太丞申园

洞门流水地仙家弃禄归来餌晓霞不比鍾山多怨语未饶金谷足名花风弦静舞千龄鹤夜枕闲听一部蛙此乐人间无覓处只应天畔有灵槎

又和

一门清训黄金贱三叶荣名翠琰题杨雀语言先世得荀龙头角後來齐聯姻君喜重交好高閑予慚早独跻试听野人歌盛事满床牙笏当公主

和简夫送信臣同年次韵

龙凤当年共力攀参辰异迹十年间相逢邂逅身为客叙别踌躇色动顔北冀马羣先骏逸南山豹隐旧文斑而今百里还淹止行听佳声似鲁山

庐陵待试士呈伯升郎中

重门昼鎖碧梧陰秋气凌虚日向深耳目暫清抛吏局情怀终乐近书林安排一月拘挛计酬

醉千人进取心未撓试期饶暇逸倚罇尤喜听高吟

中秋夜

人间此节号佳辰鎖宿文場意自伸雨脚洒开秋气象云头放出月精神坐无红?何妨乐賸有芳醪不计巡数句愿歌今夕事主人才力似阳春

贈别伯升

士林佳誉久飞扬脱迹初筵本异常尽道清朝隐方朔不知白髮困冯唐古今议论千端胜南北风情万里长乍会乍离劳景向萍江楼上独相望

又和来篇

贡闱将毕意扬扬日夕炎凉亦未尝几听秋声废高枕屡乘月色坐中唐云牋写句慙非敌玉尘挥谈服所长款段匪朝归冷僻未知何以慰邻望

陪吉守范淳元观玉虚观灵芝席上口占

庖陵盛事照明昌浩荡西风八月凉宾履共随红旆去仙宫新报紫芝芳成非雨露寧无感出近星辰别有祥谁谓古书难尽信眼看珍异答龚黄

寄题吉州三瑞堂

珍祥叠叠遗庖陵芝秀莲双瑞露清天意独偏三物应人心胥庆一堂成壁间篇咏辞多实席上樽罍势自荣早晚玺书褒治行颍川遗美为销声

送章少卿赴阙

老成风迹蔼中朝威惠南边久已劳三节召归方汲汲列城怀恋尚嗷嗷郊原雨止车尘少霄汉云空旆影高太上定嗟相见晚伫闻秋覲拜恩褒

和龚簿同辨金剑源

两源溪水弄清音百丈山峰削翠琳不顾衣冠当赤日共看沙砾辨黄金自缘世态嫌遗利岂是吾侪枉用心却忆去年并会乐相逢又得叙离襟

刘仲诚以武夷记见借

自从见借武夷编每一开编思渺然使我胸怀厌尘滓
美君家世乐神仙漫亭曾会千余客石洞元居十六天
何日访灵寻翠壁待将名字谩雕镌

寄上高宰孙世则

乡间游处景醇全忽忽光阴二十年官局旧嗟踪迹远
封人今喜信音传才驱繁剧君应易事夺清闲我独然
畏简未能成会合且持诗句写拳拳

道中寄景升仲诚二同官

两道几千里残炎七月天累囚念濡滞匹马重迁延
夜宿荆榛际朝行虎豹前幡思竹轩好拥事亦神仙

巴陵讯囚所居附岳阳楼前

双扉昼锁夜传呼讯鞫劳心迹也拘祇有清虚慰怀抱
开轩即是洞庭湖

洞庭湖上岳阳楼旧走声名徧九州今日偶来犹吏事
幸当风月近中秋

洞庭秋四首

洞庭秋旦好余雾尚怀山日色一竿际波光万顷间
宿商鸣櫓去夜网得鱼还佳趣知多少濡毫恨思慳
洞庭秋昼永气象坐中分浩荡三江水苍茫万里云
君山压波面民舍傍城根自昔看图画今焉过所闻
洞庭秋薄暮日脚返沧溟云气天涯赤峯峦水上青
归舟来隐隐夕鸟去冥冥鼓瑟音何在空闻帝子灵
洞庭秋夕爽皎月莹长空颢气重湖接清光四望通
楼开云母扇人在水晶宫胜绝无穷景萧条万古同

寄示二小子

学自辛勤富名从旷怠休痴慵回尔意扞格慰吾忧
股刺难须着邻光岂用偷当知汉唐世家绪有公侯

洞庭即事

日车闪闪下山椒风阵萧萧掠柳条湖上晚秋天气爽
楼间极目客销湘妃哀怨冯谁听楚屈英灵何处招
窃禄无田归未得浪吟当此愧渔樵

浪头卷白去无垠山面铺青一色匀气象清雄无处比
情怀局促此中伸欹危钓艇唯堪望仓猝商帆不用嗔
顾我遽来非自任也知牵制为官身

君山

洞庭波上崢高峰翠色难将别岫同真籍从来标福地大钧于此费神功蛟龙拗怒深深避星月流光面面通尘迹未能乘兴往据鞍回首正秋风

岳阳楼

岳阳楼句旧空传今日登临一慨然不是洪钧有偏党岂容胜概独完全山川形势三千里基构声华五百年襟带西南太平世收罗风月属私权

晓起

落月光微暝霭收一轩潇洒旅怀幽湘君山外波涛晓麋子城边草木秋俗吏区区情易倦古人皦皦志空求且希月廩从官给仰事孤亲洁膳羞

閱金科

得情犹勿喜圣训所宜钦取正存三尺持平在一心摭文唯恨密丽罪莫求深岂必于虞辈源流定可寻

和朱伯英新州诗见寄二首

武川当日一分襟会合乖期向武林从此参辰不相比由来岁月渐加深书邮远道烦新寄诗社前盟约再寻何以报君双白璧南楼高处独萦心

吏冗拘人好思慳怜君远远发昏顽梅花岭外题诗寄萍实江边继韵还数幅密缄迢递去寸诚都写别离间翻思旧日赓酬乐鼓噪当时更有颜

送潘簿还侍下

四见霜花始解官彩衣还侍肯盘桓胸中事业仍加益篋里经书不废看立马仙山风?侧移舟秀水露帆寒铨衡论奏恩辉近早寄佳声遗我懽

送周广之令桂阳

犹余残雪凝山椒已见新春上柳条引领不能成面别寄诗空欲减魂消为言民社迁官重莫叹湖湘去路遥早向县廷舒所学如君风迹定翺翺

安远道中

晚穿乱水踏欹危晓度空山瘴雾飞今日戒途甘险阻古来谋事重依违行询野叟观其欲静
究州图记所非走徧封疆收定议黄花时节合东归

金精岩

回岩万仞透青暝造化功偏窍凿精自是神仙乘福地岂因谗诈诱愚兵金牀旧迹知何在石
鼓遗歌仅可评尘寰暫来心已悟灵场千古为苍生

游金精回书朝阳岩观壁

秋入羣峰气象清朝阳才过到金精胜游却向尘劳得此日情怀慰此行

板石驿

童山皆戴石浅水屡萦村路接猿猱险云兼瘴雾昏披榛投舍馆藉草展行樽吏役身无定天
涯一断?

中秋午夜和溪看月

去岁中秋别岳阳洞庭湖外望清光今年袞袞仍行役此日萧萧复异乡林叶泛辉兼玉露水
波摇影接银潢出船聊踞胡床坐远负高楼列酒觞

登鬱孤台

区区倦翼傍旌旄独上名台滯思逃章水背流余????合嶮山前隐独峯高万家井落氛埃絕千
里喉襟气象豪一见荆川胜侯印况将佳趣慰尘劳

去年秋宿洞庭湖今日登临在鬱孤两处风流皆胜絕一身奔走亦崎岖光摇二水看云断翠
滴千山爱日晡吏役不容清兴足放船回首望城隅

过贑石

乘危趋疾固轻身却羨操舟妙入神石罅安船石头立渔人谩笑往来人

天柱滩

密密贑滩三百里此滩崛起最峥嵘中原柱石知多少安用江心濫得名

九月八日离?

明日重阳日章江独放船岂无时节兴固有简书牵残暑犹争际余雷忽霈然诘朝晴气爽忍负菊花天九月八日薄晚离赣城十余里而雷雨作遂倚舟以宿九日晓行又十余里而逆风暴甚乃泊于白鹄滩侧之史君相留不可屡以亟行见谑今日会宾席间当语及濡滞以为笑矣因书以自戯云

佳辰来可喜久客去难论为忆东篱菊因辞北海罇逆风吹急浪单舸泊孤邨缅想茱萸宴卢胡有後言

至万安

西风萧瑟作秋声远客归心信水程双石尖尖双鹭立一滩渺渺一舟行酒杯无侣难成饮诗句非奇谩写情晚泊沙头从杖履故乡何在眼空明

和孙世则着作新年见寄

不奉清谭一纪余相期情分愈于初数篇秀句锋谁敌累幅华牋手自书芸省联曹虽喜共萍江制邑独慙踈如君才术当超卓安见飞黄困守闾

剽繁芟弊力无余行学存心负厥初冻笔方驱器讼牒解颐忽得故人书分襟固久情还密领邑虽邻迹也踈安得同时俱代去相从山水乐吾闾

行年

行年四十志方刚一任蓬松两鬓苍道在忽愁施設地心恬寧惑利名場本无畎 为私计只有诗书可自强努力终非素餐辈未堪回首顾沧浪

宿新乐驿

去秋村北宿僧床今夕村南寓驿堂官仆颇谙蹊迳熟野人应笑往来忙敝裘不耐春寒甚老马犹堪山路长独酌独吟还独寐此中清况亦难忘

之?推劾道远雨甚念从隶之劳

山雨淋头急冈泥没骭深从驱尔何罪行役我甘心柳鞢忧难趣分装恐不任苏樵复稀遇寒气少相侵

安福驿

作邑多离邑去家如去乡三年三过驿一别一回肠治绩安能胜征途乃备尝何时腰解印长

嘯入余杭

喜晴

今年未见日指数两经旬清旦初开霁元功始布新溪流徐变绿林啜便知春吏役方长道油云莫更嗔

南昌铁柱

南昌昔谓水浮州铁柱持持事更幽天地有鑪劳一铸蛟螭无穴解羣忧槎牙露处几三尺摇撼徒然踏万牛人赖旌阳恩力大此功何愧禹功优

寒食

春来二十日寒气尚棱棱万甲殊未拆新雷徒已曾山禽鸣瑟缩道马足凌兢节候无惊异江南旧所称

贑州鞠効呈同事邓宰德夫

二月春寒倍觉深双扉昼鎖栢庭陰修途远至劳虽甚雅谊相亲喜不任穷核须繫颺用智哀矜当亦共存心累囚未引犹纾暇浊酒那辞细细斟

次韵和同时到院

各沿台檄会平番萍水金谿隔万山两处相期仗官驿一时交际到江关如何远趾符同甚岂是诚心膂合间案牒牵仍母易视囚情未得莫优闲

鎖院深寂夭桃独芳有可怜之色为诗要德夫共赋以赏之

静院深局霁雨新小桃墙侧弄精神只知春色归吾眼不悟他乡寄此身露蕊妖韶真自得胭脂浓淡属谁匀共将短句酬幽艷奚独东风是主人

二月十六日感雨示同事

烛烬遗朝几炉烟出昼帘时春惊一半山雨怅相兼吏局如巢寄家音以鹄占敢思游观乐同患滞囚淹

钱塘集卷三

卷四

钦定四库全书

钱塘集卷四

宋 韦骧 撰

讯鞠有间呈德夫

同时鎖深院轮日直寒厅所得期无喜忘情在不经桃心随雨碎柳眼向人青早晚连镳去春郊约罄瓶案积云堆影庭虚谷应声撈答非所事杖履有余清静迳牵情数芳林照眼明相逢得佳侣尤足慰营营

次韵德夫推院有感

薄宦予嗟少定踪贤劳君叹久西东相从山国春多雨共忆公园花已丛酒约倒杯忻有伴诗寻险韵惧无功勤乘闲隙酬清兴便与分襟櫂短篷

惜春

皦皦春阳上柳尖轻轻朝雾亦相兼教雏老雀穿雕栱失伴狂?入翠帘深院难将飞絮鎖空阶且任落花黏惜春情味从来甚今日江城兴倍添

二月已破三月来吟诗空忆少陵才檐前有意残花堕云里无情旅鴈回何处轮蹄蹂芳草谁家丝管上高台吾侪局外添婴绕此段襟怀强自开

次韵社日且以善谑

社日江南眼屡经春天峽北寄春城双飞海鷺知时节半醉田翁舞太平谩把杯盘为小饮频催案牍况垂成却思廉割东方朔归遗那无动旅情

复假前韵为即事二诗且言别于卒章

烟花苒苒裹江亭云霭纷纷接暮城物态除非诗可写旅怀唯藉酒能平燕知社节来何早莺怯春寒语未成非晚与君分袂去他时当记此时情

浩如潮水出东溟勇似云梯破铁城谈麈交挥逾月久吟毫相抗几时平清驩返向尘劳得佳集元非计构成还守邑疆相望远陇烟江月若为情

上巳日贛川忆东湖【湖在宜春】

韶光强半已消除
峤北芳华眼不辜
黄鸟穿林金闪烁
紫荆铺地锦模糊
持循畏简催胥吏
整顿归鞍戒仆夫
传语东风为加意
少留花卉在东湖

晓风吹雨过溪南
春色晴光三月三
燕觜啄泥方汲汲
杏梢欹水正酣酣
樽庖冷落俱能耐
刀笔萦仍岂自甘
珠阁帘堂应好在
待教门外系归骖

再用前韵为感春喜会二首酬德夫

五侯门馆映交衢
点检春光肯翫辜
教舞庭除红锦藉
看花牕牖碧纱糊
侈心忘理虽儿女
乐事乘时亦丈夫
而我拘挛过佳节
岂无船在贺家湖

感春

东风烂漫巨江南
林薄余花十二三
隐隐游丝飞日影
娟娟戏蝶舞春酣
独旗共爱茶芽嫩
佳境俱怜芋蔗甘
谈屑不宜虚永昼
长岐分背谩停骖

春杪书怀三十韵呈同事邓令

覆囚将讫事春杪
兴蹉跎亭馆依游好
云天气候和江山
秀色远桃李绿阴多
燕熟巢仍补莺新语尚讹
迳深无过辙门閤可张罗
雨渍苔钱积风旋柳絮涡
落花冲蚁阵侧叶露蜂窠
朝雾开如埽晴丝荡若梭
鸣禽多了了舞蝶并傚傚
物意良俱得人情亦自阿
轩窗资坐啸杖履起行歌
屋角骞飞翼帘旌动翠波
画图连壁带香穗接庭萝
笔颖牵诗癖茶枪战睡魔
清谈屡挥麈酣饮必空螺
语射怜当鹄论书忆换鹅
九霄明日月万国富山河
轻减中原役韬藏绝塞戈
壮犹据濶略崇论辟么麽
束帛丘园走封轺驿传过
拔才方迅疾养拙且婆娑
鳬鹤形难壹鸛鹏好自颇
痔医荣足贱藩乞诈宜诃
投步安夷坦存心谢揣摩
势穷嗟屈贾道乐慕渊轲
豹隐潜加泽牛山戒执柯
忘非羞搏虎招议畏鸣鼉
末宦难萦束高怀固岌峨
踏青筵已旷镊白镜慵磨
聊作逍遥咏君其谓我何

次韵和邓德夫再和书怀别用三十韵

飞文侔羽檄执议有金科
于役同之贛夫君仅自鄱
相逢多所乐末礼去其苛
鱼咏蒸然罩材忻茂者莪
穷奸摧狡穴辨枉愈绵痾
日食肴几变宵忧寐欲吡
恤冤防夏旱驱害逐春雉
核实当由已指踪奚自他
囚衣应足蝨吏案已胜驼
居似蛇存蛰归如茧化蛾
险途须屡叱行旅勿轻呵
白雪风中絮青钱水上荷
佳辰怜爽旷秀句好雕瑳
束卷儒风旧严装武貌番
分岐兹泮涣回首则猗那
蚁酒慵为酌藜羹糝不齏
轻遗逸士?倒踏谪仙靴
恍忽东西驿踌躇上下坡
嚶鸣忻得侣妖?况方瘥
引脰邻于鹤离肠迴若沲
版徒犹相武笔吏解封鄮
易失时兼势难淹轴与藟
莘耕方释耒磻钓亦收蓑
勉力攀翔凤何心跃遁骡
养躯宜气适乘兴且颜酤
淡泊延诗

伯喈远舞娥加功草封岱着意吊沉罗即是金扉对无辞墨绶拖此违临晚磬声问约新禾
何日瞻天驭同听白玉珂

紫荆花

紫?暮春庭少陵诗思清老蛟蟠曲干丹矿缀繁英花谱元无品春工别有情不随桃李色俗眼
莫相轻

寄元真州

春陰荡尽见春妍立马长坡思渺然望断双旌已难见声闻五袴只空传遥知裁剧常虚刃应
赏风光蚤布筵不省玉人歌阁处红梅多少落樽前

荆林道中示孙张二君

西风掠雨作朝寒联马相将入乱山愧从使车无补助敢辞征驭历间关日边帝阙瞻犹远云
下亲闱念未还旅思纷纷何以慰间求佳论一开颜

再用前韵和孙正甫所示

画船同出汴渠湾天末云收数点山共应辟书离魏阙谁持别酒唱阳关间论浙右经年事此
去胶东几日还男子有为须远趾谁能辕下久低颜

胶水道中逢九日呈温伯舍人

绣衣奉使出东州九日旌轩不暂留固有诚心当倚注肯缘佳节废询求马蹄远践天涯路鴈
翼横飞海角秋安得一樽黄菊酒代公冰饮过宵休

再用前韵谢和诗二首

虽知自古有言酬倍获佳篇却重留裘璞固宜资一笑报瑶何意足多求词源浩若江河注笔
力成如造化秋询度余闲吟咏作岂非夫子德公休

九月十八夜宿莱州海庙夜分登亭望月观海呈伯温舍人

昼从旌旗过碧山夜陪巾履望漫漫蛟龙睡着风波静鸿鴈影低星月寒不极清光分岛屿无
边爽气接栏干此时此兴真夷旷莫作闲游一等看

出东莱城示海傍观者

老稚相携出翳林玉沙堤上听车音便安赤子朝廷意补助清时使者心畎亩均休无一役岁时赈乏有千金东人只见东溟濶不识君恩似海深

再和孙正甫音字韵呈舍人

峩峩气格冠书林落落文章叩玉音
甄别谏垣虚说论聊持使节慰焦心
红尘翠靄飘衣绣紫幅黄油护印金
采尽輿情将入告谋谟谁得见精深

九月二十二日黄县道中遇雪

九日登州路西风暴作威黄桑犹半在白雪已交飞
惯见邦人眼难当旅客衣来思尚稽咏遽此对霏霏

将至登州

长途冉冉马萧萧风势横来带雪飘
鴈队去成铍觜阵螳樽行向剑头挑
气清肝膈诗还健寒切肌肤酒易消
顾我不才无寸补徒瞻使骑旆旌摇

闻潮

钱塘江上吾家近惯听秋潮动地鸣
今日蓬莱于役处却疑身在故乡行

和淮阳颜长道见寄

冉冉征途似梦间相从未几又先还
却思前日同清会不若当年醉碧山
别去载怀眉宇旧书来重说髭毛斑
吾侪固有襟期远肯向明时容易闲

登蓬莱阁

行尽东州到此州登临更尽北山头
孤城突兀连沧海三岛参差耸暮秋
广座下疑鳌负石危檐远学蜃为楼
蓬莱方丈虽冥邈高阁今朝亦胜游

和孙正甫二首

马头今日向西行不比来时道路生
与子联镳下长坂无人回首望高城
疎林积叶牛闲卧衰草牵风兔自惊
诗思过于归思好征鸿斜衬落霞明

马头今日向西行仆驭欣欣脚力生
白雪波涛离海国黄金宫阙想京城
墙间笑语羣儿集木末冲飞独鸟惊
从此归程宜倍道解鞍须到衆星明

路疑

晓起仍行迈征途一梦新鴈低如有信马急似无尘青讶山长雨黄疑柳自春此身从袞袞奔走岂由人莫夜仍投宿邮亭葺半新风帷如涨海烟幕似征尘白讶牕催晓红疑炉变春归期尚淹晚鞅绊可尤人

游齐州灵岩四首

征尘汹汹顿消磨路入灵岩好趣多崖穴透空疑书月泉池凝绿似春波锦帷香细薰千佛金殿灯明觉衆魔一宿禅房幸安稳明朝骑马又长坡

东国名高独此岩羣峰环抱自韬铃道场岑寂规风古禅室空疎杖屨严木落有时飘殿角云寒终日蔽山尖不知双鹤归何处留得灵泉与衆甜

区区不觉路岐难尘土衣冠喜动顔已见成书归上国更逢便道覽名山随轩幸涉三时久弭节仍陪半日闲却与禅翁自相悦绣衣云步共追攀

鸡鸣峯外日曈曨欲去踌躇兴未穷索笔请题青石柱留名愿附碧纱笼重裘?触千山雾回轡轻随一径风跋马频频望苍翠他时应与梦?通

再和顔长道见寄

行役牵挛好思慳诗筒句浹未能还驱驰东国黄尘路梦想南乡碧玉山顾我俗情方滚滚爱君佳句独班班再吟再和都緘寄幸有冥鸿羽翼闲

小雪後牡丹号朝天红者开于县宅西圃

西林枯枿着繁霜一品仙葩独自芳天意似教惊世俗岁寒方信属花王才迎晓日仍添色不得春风也倍香修竹茂松应内愧後凋从此是寻常

八月二十四日州牡丹

八月西风动地来枯株衰卉惨池台如何春色花王品独对霜威御史开冷艷自然欺竹栢清香足以荐樽罍岂非千里寛羸俗召得阳和暗里回

寄橙与孙叔康

金包磊落冒朝阳輝映秋林气?长带露摘来盈翠笼披云擎去荐黄堂野芹谩欲分微意盃菊应嫌夺异香沙上木奴还可贡题书须待洞庭霜

按水旱之裁将毕呈叔康太守

使符星火急骑马徧郊原水旱生灵瘁朝廷惠泽存纵横来履亩高下必分村欣牒秋云积批毫墨电奔岂无忧岁计何敢隘君恩不许胥徒歛寧从仆驭繁恐惊民室困愁蹴路尘翻县令非能此邦侯预戒言流离乌忍去悵悌莫轻论辄代疲甿手为诗谢戟门

喜潘通甫回郡

传道前驺入郡城白狼山外一驰情谈锋睽远踰三月使指间关涉几程我独贤劳肯嗟叹国之武备藉经营公余未省诗多少愿借沧浪许濯缨

和潘通甫芍药十韵

衆卉已萧索朱栏始盛开尚先秋後菊肯羨腊前梅秀出丝头软红深脰缕堆踈明怜点缣巧丽爱重台倍得花神力偏当吏部才雨枝成堕髻风叶自扶腮彩笔真难写金刀未易裁狂香晴转暴醒态晓方回议品须推贵论功鄙接栽仙宫疑髣髴安得不徘徊

暑雨言怀和潘倅十八韵

暑雨应时至年来民气和池塘假灩澦畎亩小滹沱踈缩栖梁鷺淋浪贴水荷一番新涤垢何处不盈科旦市犹无迹寒门愈可罗庭柯均见濯檐溜独成波猎子愁收弋田翁喜荷蓑蜂衙忘刻候蛙吹恣吟哦篋恨书生蠹场忧麦化蛾凉风飒以度清兴?然多公退书帷寂诗余道服拖虽非侔击玉仅可比鸣鼉屡促低弦轸频倾浊酒螺自存惟浩气兼养类菁莪衣葛踈仍补羹藜淡不齏百瓴舒足力六字习心呵未有焚鱼兴寧为扣角歌兹辰拜高咏适足慰蹉跎

和孙叔康九日三首

楼压西城埤垧重使君才思浩无穷芳罇泛出陶潜菊健笔吟成老杜风西座一时飞大白双旌尽晚卷深红自怜远迹违高会九月篇章亦幸同

使旆登高拂晓来贤宾道旧喜追陪东篱黄菊因时盛北海清樽趁节开帘幕云收见洲渚笙箫风引下楼台新诗侑酒穷佳兴不惜当筵耻执爨

区区冷色度凉秋不得乘时奉胜游九日杯觞虽独远一番珠玉幸兼收紫萸随分浮金盞明月还能照荻洲欲写萧条才思拙临牋尤愧乏银鈎

和潘通甫芍药

牡丹谢後觉荒凉此艷中兴百步香莫谓雕栏当晚节须知名卉絶羣芳金刀剪处云霞破翠

笼擎来锦绣装别乘殷勤华府宴应将花谱议前王

和叔康侍亲游琅山

晚扬红旆出郊关昼奉安舆上碧山野色苍茫云色外岚光飞动水光间行庖荐饌烹金鼎荷
剑挑鐔结玉环归路邦人瞻庆侍银龟朱绂照酡颜

五十如婴孝慕难公余彩服侍登山回头民社千间密引望乡关一水间暂奉清游临佛界都
将尘事付庄环凭谁画与东州看刺史何如闵与颜

和孙叔康以诗寄芋

清淳一阕听埧簾磊落堆盘享芋鵑拙令此时心饫足慙忘野外有民饥

琅山听窈山人琴

秋深危阁气凄清来听先生促轸声一曲写成君子操七弦传尽古人情游云檐外如将合幽
鸟枝间不敢鸣未省琴心在何处高山流水对前楹

又和孙太守琅山席上

薄雾轻笼晓日黄攀从旌旆到禅坊坐怜古木荣枯惯仰笑秋云聚散忙酒约覆盆分甲乙诗
成击鉢互宫商兴酣犹恨严闾逼少促归鞭趁月光

和潘通甫六月十二夜月

去望犹三夕光华宛矣同炎天几及半午夜喜当中爽气乾坤满清辉宇宙通恍瞻银界白遽
失火云红庭叶霜花泛池波雪色融间阎消烈暑寥廓散轻风快若离深甌飘然出大笼秋毫
归一鉴宿翳却千重谁弄桓伊笛徒思范蠡篷魁杓俄转北箕尾渐回东林静踈瑶圃桥虚卧
玉虹余凉入幽室暗雾滋深丛纬象光仍小银河???自洪依希太清境髣髴广寒宫鸟宿羣疑
定人闲万虑空调琴闲对客酌酒旋呼童莫语身兼世休论萍与蓬且来明月下举白听梧桐

送潘通甫沿牒淮东

火云焰焰野无风浅澁河流小舸通尺纸遽传朝命下翌朝齐送使旌东道间覽物应多感职
外成诗寓几筒王事念深忘畏景贤劳安肯动胷中

和通甫见赠二首

几年持养副天成造次云为必中程乐内何希悦来贵畏知唯有白丝清蓬瀛尚欠文章手寰海徒传学行声今日诗筒互酬唱他时回记岂忘情

肝胆区区岂足矜抆风宁复计鹏程未能名迹如山重且喜心诚似水清学譬治蛙犹失溉文参击缶不成声感君篇贶虚褒借强扶藜芜写鄙情

和通甫道中先寄

神明不爽久 踰一望旌轩旧观旋残茀光陰江海上新春消息柳梅间倾风固喜同披雾窃禄仍羞似抱关更奉诗筒先寄贶解颐高句动苍顏

和通甫同登庆和寺阁

佛宫楼阁倚云端人世尘埃杳不干万里海光生日眩半天风势切肌寒老僧指境依稀辨往客题名次第看一奉胜游承健句诗魔暗里为摧肝

和潘通甫寄孙太守

五马传呼尽避骢二车行县海墉东歌声被筦腾新曲酒盏垂莲学倒蓬回驭望仙双旆晚戒程余庆一帆风拘挛不得陪供帐只许区区鄙句通

和潘通甫陈贴海道中作

飞空恨乏王乔舄拥弊几如晏子裘兴利略行田际港冒寒仍上海边楼草埋古迹存荒垒云漏阳光见远洲不独区区祇吏役又随轩旆作清游

寄孙叔康

岁华垂改月犹圆寒夜长思一欲然从政谩图行幼学济民何术御凶年消忧姑酌贤人酒托德唯瞻刺史天安得居诸如过隙早看麴麦被原田

寄邓舍人二首

顷随旌旆按东州一别门阑物再秋内诵德言如在耳仰瞻云步但昂头掖垣遥想丝纶暇海角方深赈恤忧安得此身如泛梗区区能傍济川舟

白髮书生意气完确然行学效民官九天宫阙心长在万里江河分亦安屡愧姓名尘荐牋岂论明类必弹冠感公知遇如何报唯有霜筠敌岁寒

廷评庆寿口号

纳庆新春八十年更逢诞日一开筵童顏鹤髮人间贵道服乌巾地上仙玉盞輝輝擎寿酒金
炉苒苒泛香烟暂停丝管听祈颂愿见恩书历九迁

乙卯十二月十四日夜宿东禅僧舍

簿书虽是不离身一宿精庐兴味真莫道後栏花未拆夜来霜月岂慚春

又题僧壁即事

天地收功固欲全朝廷恩惠岂容偏饥羸大衆粟不足县令胡顏入俸钱

和潘通甫中春即事

杂花交错裹楼台二月向残三月来尘迹遇时随分乐酒樽逢景等闲开幽禽有意名相唤飞
絮无情舞自回游覽莫为频数厌逡巡便举送春杯

和季春初牡丹花

遶栏矜赏日千回赋咏慚无卓犖才天意似嫌羣卉杂花王留在晓春开曾经唐苑声歌後不
是隋园剪彩来安用繁言警聒惑爱奇能有几人栽

暮春对景书怀

一番新雨洗楼台何处红芳不烂开春色渐随流水去薰风还入弄琴来梁巢戢戢鸣雏鷯林
叶陰陰覆老梅遇景乘时须自适江头每到日西回

和晚春雨霁

油云卷尽晓天明风色融和日色轻着处余花知有命一番绵雨喜初晴园林经润春难老庭
馆无尘气转清谁道东君忘所属此时於物特垂情

和落花

春风几日为催开却趁春风委翠苔莫讶花王留不住本缘真宰偶然来暗随蝶梦飘书榻半
逐莺声落吹台綠叶依依犹可爱吟肠终日为萦回

和木香花

架竹引繁英青罗簇素琼潜卑宝相色远过瑞香清被雨凝云重因风舞雪轻凭谁变花谱陞在最高名

和以双头牡丹赠叔康太守

盈盈仙葩忽双开似把轻罗一样裁綠蒂相扶真艷出芳心齐送异香来浪吟莫惜诗千首烂赏何妨酒百盃剪寄黄堂有余爱也应蝶梦不空回

和登琅山为民祈福

佛宫突兀枕琅山金碧楼台诘曲栏霁雨愿收田潦积盛阳祈变麦秋寒红旗苒苒来何肃赤子林林意自寬早晚丰登应精恳行看展报上层峦

和书怀

朴拙从来附会疎恬然养内肯求无自怜结髮遭平世不愧孤踪在坦途一意固当知趣舍百钱寧复问荣枯钟鸣鼎食非吾动所得须论象罔珠

和晚晴书事

圆荷贴水翠钱稀风掠余花片片飞细雨有情容易歇青春无系等闲归楼头晚鼓牵声远海上云山乱点微坐喜民田见丰兆幅巾谈笑对残晖

和孙叔康探梅二十八韵

臈过春将近江梅想已苞逢时在南国探信出东郊径雪晴初埽河水薄易敲寻香望林隙惊素辨山坳跃马回宾鴈飞旗偃蜡猫初芳得消息喜气自并包岂待莺声促寧忧蝶足跑先容为桃李脱迹远萧茅此日花神睠他年驿使譙前驺传已的後乘听犹声独被阳功早奚论地势饶新葩同衆阅秀句仗谁抄湛湛尘纓濯纖纖痒背抓金丝才出蒼珠琲遍攢梢攀折诚难忍将承亦旋教重疑仙界种复过岁寒交莹洁疏情寡精神动目宵贪幽频倚杖薄晚倦回鞞有酒安辞醺无鱼孰叹庖轻裘忘拥腋短发任垂髻坐不娛歌舞盘非贵烙炮量尊鍾与鼎器隘斗兼笥勇作先春计甘从逐物嘲琼英行渐盛玲赏莫轻抛次第筭家酿随宜饌野肴投闲集簪履尽日卷旌旛陇笛终当起涂歌或载嘏空枝徒取恨片片若为胶

和观雪二十韵

纷纷随朔吹及物任洪纖足以称为瑞疎哉比撒盐朝飞收羽翼夜象晦鈎铃农望先知喜童心岂易厌对疑银界色啖胜露华甜寸隙期皆徧微埃迴不兼豪筵宾酒壮远塞虏兵殲长坂愁羈旅空山困隱潜尘怀经岁挠清兴此时添已变琼铺砌还惊絮扑帘扁舟谁念戴采笔自

追淹野思生犹浅诗情雅若爛凝眸万顷白引?六花尖和寡思琴操赏高忆酒帘江潮云盖水
楼阁玉粧檐折竹惊寒雀衰葭拥暮鷁冷官饶寂寞僻邑养安恬坐患凶年久行忧疴气渐探
深评尺咫均庆及闾阎仰恃贤侯德无劳太史占

和叔康席上

两麾相遇百花春烟海漫漫共此垠席上笑谈成秀句一番传咏乐邦人

海上风光入暮春使轩轻过古城垠琴台此去犹千里已有先声慰昔人

哭路长吉

器业本青云泥涂竟屈身盖棺穷海角还葬大江滨子幼今无怙家清正苦贫传闻动归旄西
望一沾巾

和潘通甫颐斋书事

簿领羁拘日少休江山清兴未能酬必琴希弄缘谁咎陶柳不栽还自谋谩道庸庸多後福岂
甘泛泛祇随流高轩一过尘襟爽旋折堂萱记酒筹

和中夏清虚堂

碧玉阑干白石除虚堂潇洒聚书图窗明昼可窥蚊睫檐静时闻噪雀雏凉吹东南生砌竹繁
陰朝夕在庭梧主人襟量清如水此段幽佳称得无

中夏偶成

地交淮浙属通川官守区区改岁年鉴照自惊生髯雪感时还听噪林蝉鍾鸣鼎食何为动鹤
引熊经似有缘内乐无穷奚恤外便便休诮孝先眠

和凌霄花

翠蔓缘株上红芳冒暑开凌霄诚有谓托质岂无媒

和余庆道中

荒凉古邑近东溟时喜轩车出按行水鸟逆风如有向晚霓收雨似多情心探畎浚丰年兆目
极云沙远思生佳句更从清旷得肯由尘事汨聪明

和孙叔康中秋寄运判胡秘丞

郡堞危楼夜气清江光海色接天平凉秋一半无边爽皓月十分何太明使者星轺行暨远令君兵酿恨徒倾自怜负弩区区迹却向澄霄望旆旌

又借韵寄太守叔康

城近江山夕霭澄楼开栏槛与山平秋光正似鸿沟判月影圆如白璧明诗压东阳台上句酒曦北海座中倾荒墟拙令方匏系引脰西风画隼旌

和太守叔康以诗荅桃

铃阁挥毫写浩才云牋艷艷发松煤桃投愧匪千年种瑶报荣夸十袭开目送武陵佳实去耳听清庙雅音来不龟献药尝封地未似芹诚致赠瑰

又借前韵谢惠茶

灵芽产自越岩隈精制须调焙下煤隐士寄题缄且密使君分惠重其开点疑白雪盈瓿泛啜恐清风两腋来却和短章酬雅贐画墁何以谢琼瑰

寄橘柚

海门橘柚胜湖湘采献铃斋有意将旧岁空希杜陵句今年方报董涇霜敢私磊落充宾豆愿贡甘香佐寿觞蒞可羞诚所致厥包况是重维扬

送王圣途得代还青社

坐纓簿领久纷纷解印终更兴味新尽室图书离海角一船风雪渡淮滨家山远认云门晓里社行看孟宅春术学似君须得路早教马足踏京尘

孙太守席赋催粧

萝蔓新穠可重夸葭莩旧契转增华闺门素守先生训牢聳来归御史家直户三星乘节候迎车百两减浮奢鹊桥深夜飞霜冷早对菱花整髻花

和孙叔康寄示上元

闻说邦人庆上元使君同乐具宾筵朱轡不得陪清赏明月空能共此圆和气暗随香穗散微风轻送烛花偏漫将鄙句追高会已负当时白玉船

和雪三十韵

密雪连空散同云盖野繁朝晖掩羲驭暮象蔽天垠皛皛漫长陌霏霏集短垣杉松苍翠夺禽
鸟语声吞病 樵斤斂寻踪猎骑奔金茎迷沆漑银界变崑仑光借寒儒牖威消贵冑门酤帘
表深巷?屋露幽村可向红炉烬难忘醪酒樽竹梢低欲折梅萼重犹存没谷吟当楚离江咏去
袁高才题不尽妙曲写仍翻旅鴈宵飞戢栖鸡晓舌扞塞严添玉垒林?化琼园远岸舟藏鷁高
楼瓦匿鸳秋涛千浪叠夜甲万军屯缀若凝酥洁堆如琢虎蹲脂车休旅传铙佩放天阍不以
多为瑞谁言即也温神锋剪何利地轴卷无痕暗与春工敌清随朔吹喷朽株银作叶圆沼壁
为盆照耀偏宜月侵陵只有萱藩篱白羽插略约素虬蜿汀鹭难求侣城乌不辨昏流年垂改
龠危坐祗销?自视丰和兆心穷造化元纷纷沾动植渺渺助乾坤屏螯殊强力滋枯独养原芸
然知矣否雨露未成恩

又和倒韵

匿疵真有德值物不偏恩细或穿幽隙悠然被广原皛皛均旦暮浩浩壹乾坤凜冽添寒气苍
茫返混元鹄鸥潜失影狐貉暗忘魂竹重风旌褭池凝晓监昏飞毫玉兔脱蟠径素龙蜿陵弱
侵庭柳埋青抑砌萱屑琼谁措手炼粉若为盆当?墙头积回飏瓦口喷羣飞停淖噪万丑掩瘢
痕穷巷情方憚豪堂势自温萧条孤驿路冷落古祠阁乱辙分明印双鸱髣髴蹲何时飘絮定
着处白云屯酒榼倾浮螳吟牋染戏鸳妙才窥赋象佳兴袭游园冰监清相照瑶枝俯可扞剡
舟那遽载郢唱且重翻啖啖深怜武栖迟酷爱袁韩诗高孰抗谢赋久仍存肃肃东方骑优优
北海樽危楼登郡堞远目瞰江邨摘 踰梁苑中严过棘门雄辞端獬豸险句崑仑缀韵金
声協挥毫墨电奔丰年见先兆沴气已横吞氛霭销中夜球琳冒短垣清光交素魄余润浹枯
根嘉瑞由嘉政輿歌莫厌繁

陈次全长春轩

闻道新轩外长春日日花幽人自蒟轴佳卉对葩华波浪千重险烟云一望賒徒思故园旧短
句寄君家

太守孙叔康下车

荣过故里拥朱轮乞得偏城便奉亲道路尚惊持斧使衣冠犹是避驄人下车恳恳唯宣泽濒
海元元正食贫草木无情还自喜霜威不见见阳春

别叔康

数年为邑幸焉依德论源源每霁威瓜代逡巡惊易及棠陰踟躕忍轻违勸踪方此从尘路旅
梦多应遶绣衣回首海城烟雾杳愿闻三节召公归

复用叔康送篇韵和答

岸柳参差影画桥云横日薄旆旌高
赠言有宠荣褒袞制锦无功愧释刀
苒苒征途行渐远拳拳德表望空劳
仰銜顾遇知何似负戴丘山过巨鳌

京口别叔康

舳舻幸会舣江干再别情惊岂易安
坐邑三年师恺悌归程累日奉盘桓
金山寺外波涛晓铁瓮城头草木寒
欲上孤舟又南望何时重戴触邪冠

昨日以事不得陪赴和甫学士之召

藩侯遣事风霆疾御史高谈宇宙宽
千里几年成远别一樽相对尽清欢
知无红旆翻新曲想有瑯弓敌暮寒
尘迹鈎牵违燕集坐追佳兴入毫端

蒜山酒

蒜山高阁直连云酒以山名味独醇
玉盞横飞光照眼金盃满泛气回春
幕天欲似刘生颂卧瓮寧为毕卓身
须信主人如此酒酣酣千里醉深仁

和潘倅通甫游狼山寺三首【次韵】

川原浩荡杳回环附郭苍然独此山
殿阁栖云长冉冉庵岩度日自闲闲
凋零花草三春後髣髴闾閭十里间
远邑拘挛闻胜覽驰心閤逐旆旌还

参天云木覆危冈下瞰藂林释氏坊
图按古今询露井水分淮浙看风樯
清才得景吟还健浩气登高力更强
公暇此游真可乐纷纷何算少年场

谯门南向是狼山车马朝行意思宽
风散落花红糝糝日随飞盖翠团团
望穷沧海尘寰小坐逼空岩昼景寒
三伏生秋有余地无人画与雍州看

和行海门

画船轻过绿杨湾风掠双旗势自翻
笔吏濡毫写新句厨人鱠玉荐行樽
翩翩舞燕随樯影一一惊鸥破水痕
按部从容有佳趣苍烟落日肯销魂

和金沙道中晚景

海鷺飞如织红花巧胜裁春光随水去
野色向人来苇薄农家露林疎古寺开
扁舟暂踰缩旷

望指层台

谢通甫寄交藤方并气术图

仰高诚府日钦钦翰墨飞光忽见临练气指迷先六字饵丹传诀胜千金仁人锡类多推已尘迹知非早有心聊咏小诗酬厚赐自惭布鼓若为音

和叔康首夏书怀五首

催得春归始自安杜鹃啼血血应乾晴林日永午陰重烟海风多晓气寒壮志经时嗟冉冉苍顏覽照愧团团公余且学田家饮也胜沙场引棹丸

清和气候爽衣冠海邑稀逢柱础乾朝拂玉徽琴韵紧夜开宝匣剑光寒肺肠似石终难变利禄如沙岂易团行学但知无所负奚为逢射与僚丸

阮屐因山固少完陶巾缘酒未尝乾庭疎红药三春过地近沧溟四月寒堂燕语酣如有诉林蜂衙退自分团太平吏隐真夷旷安用机心寓腊丸

区区并海作民官手里鱼须竹已乾仕路蹉跎诚计拙世情巖险为心寒但全冲气充丹府莫问灵苗采紫团夏景渐长民事简静开黄卷爇香丸

诗坛老将气桓桓招集同盟插未乾句险直从天上落辞清能使座中寒勇挥健笔蛟生角旋劈华笺凤破团更爱一时皆善和声声严鼓中隕丸

次韵和孙世则以诗送别

解印踰旬君已知新诗相寄重相违由来从宦无期定不得同时受代归揽轡益嗟贤谊远异乡况是故人稀宜春台外空回首独整区区勸翼飞

介亭二十韵呈杭守祖龙图

列石何年出危亭不日成两行分磊落八顾壮经营表里山川秀朝晡气象清江湖俱有趣天地岂无情聚井看碁布重城视带萦望通鱼鼈远势压凤凰轻鸟背飞来见云头过去平屈盘疏一迳浩荡接双盈难秘神僊境兹逢赏识精元侯挟余裕乐俗沸休声物外笼真槩胸中愜雅诚有时陵翠靄极暮耸红旌九万鹏程近三千客履荣樽罍卑北海篇咏小宣城岷首空多嗜蓬萊漫自评古今为絶观风月快平生覽景聪明旷书铭意思宏优游傲圭衮端正等权衡恺悌均吾衆中和得所行此心非苟豫奚愧介之名

和陈和叔内翰忆梅花因手植数本又命画工作生枝于屏间

翰林清兴满江乡尤忆梅花趣
藹芳已写幽屏外桃李更摅思
压班扬自期造化加先意岂
待婵娟借末光幸预樽前此
佳赏还祈手植早飘香

丛山堂

经营新自翰林公势压南谿
气象雄四顾高明千里近一
团苍翠万山丛琅邪路入青
林转丰乐泉疏白石空唐相
若能前此制当时应不暇怀
嵩

次韵答和叔见招茅庵奕碁

岂弟移风州事稀何妨退食
自委蛇新阳来复茅庵暖喜
奉高篇促对碁

和同游溪北竹园

追攀却忆谪仙诗曾向东城
倒接此日清游非痛饮一时
幽趣有枯碁鸟声似逐新阳
啖竹色如便晚景迟胜槩佳
辰莫轻真看看召节动归期

咏雪

密雪乘新腊凝陰混太清洒
空寒送色着物静无声舞恨
庭除隘铺宜原野平枯株资
点缀朽壤藉包并价踊村醺
酒愁添古塞兵巧裁梁苑赋
幽动剡溪情可庆丰年兆何
虞盍气生行看穷岁龠坐喜
覆山城远祖篇章在元侯德
政成与民为福外閭闾一心
倾

咏雪霁月夜见简

百尺城头雪月间城楼更向
碧霄干优游野步来危坐髣
髴仙踪在广寒幽致独为中
夜赏清辉分与近隣看瑶台
十二传佳句潇洒高情岂易
阑

和雪前数刻迎郊赦口占

君恩无远近千里到山城人
意方均喜天心为降霙旌旗
增德色箫鼓变和声盛际千
年会谁将史册评

明月庵

南谿郡古牙城壮城上楼台
屹相向晴天落日碧山横登
覽依稀在屏障从容北步上
茅庵圓如瓊帳幽如岩眼前
竹石皆自得物外气象容谁
探公余时来兴清切幅巾道
服双筇节廓然遺照坐可忘
更向庵心画明月

和闲步城上率游城南

城南古木未全凋溪里寒鱼正可撩红旆追攀真得趣尘怀万斛等闲消

和夜登东阁

夜初乘兴上城头白玉蟾蜍碧玉天爽旷襟怀谁得似谪仙身世岂非前

辞劝饮

主意固殷懃须辞酒味醇愿为投辖客不作吐茵人

雪後游琅邪山联句

南溪约幽寻西岭极遐观【绎】初阳色朦胧残雪光汗漫【骧】相望楼殿间宛在云霄半
【绎】泉声减琤淙山势欲飞窜【骧】岩寒雨花霏谷暖烟絮乱【绎】幽鸟度乔林惊猿
折枯干【骧】决决涨溪流辉辉披野岸【绎】兰芽吐尚微冰乳凝未泮佛屋对峯尖禅庵
倚崖断【骧】轩窗爱虚豁赤白从漫漶行敲玉玲琅松溜珠璀璨【绎】宁将琼砾分未省
兰蒿判行幽兔迹深瞩远鷗翅缓登宜阮孚屐隐称嵇康锻【骧】结游贤躅多鑱石清诗烂
极目穷跻攀投隙违羈绊荣观太帝书暂憩飞仙馆【绎】石立翠屏张霞收丹锦散觐坐客
炉拥负暄僧衲换迭胜唯务得陟危宁复憚【骧】谁乘泛海槎直欲傍银汉【绎】况有凌
云才何妨举风翰【骧】景多苦冥搜欢解愜佳玩【绎】乃情慰悬想昔传非谩澜【骧】
题輿真莫俦刻烛愧非伴【绎】玉局共藏机瑶琴越操漫【骧】謡谚喜年丰评文同月旦
【绎】大笔肆滂葩小巫成泚汗【骧】造适寓林泉贪紫任冰炭【绎】通倪去末礼从容
占奇段【骧】促节歌更新衔杯酌无筭【绎】敢谓良会难堪为画图看【骧】感慨非独
醒赍酬每三叹【绎】翔步虽异途清懽归一贯【骧】洒落似青冥拘挛岂狴犴絶顶所见
稀清狂兹兴罕【绎】立饫谢珍鲜行庖後樵?唯恐三节来难留千骑驛【骧】何时金鰲客
重亲玉皇案回首念斯游驰精杳无畔

和会峯亭

千峰环聚翠馍糊欲卜为邻岂易图且使缣绡画将去披观未必後仙都

和喜奉御札改元元丰口号

改号泥封下碧空天光远烛郡城中禁林旧德承宣重预向偏州致岁丰

又和

元丰嘉号改明年万里江山色愈鲜侍从旧臣承紫诏拜恩如在御床前

幽谷回口占呈和叔内翰

五骑行歌五马前乱云轻点乱峯巅此时佳兴此中醉一阕清诗一玉船

和山郡早起

牙城晓色动旌旗笔吏来抄枕上诗溪柳山梅应闇觉先春芳意肯迟迟

铃斋书几烛花消帘外寒霜晓尚飘却忆夜来行乐处烟村云坞听农谣

和腊日初晴会同僚射饮投壶

晓风吹雨作晴云腊日山城已似春林木欣欣初有趣郡斋皦皦?无尘祭军雅戯齐酣战矍圃
环观密布鳞此乐得为知所自天将丰岁与滁人

和雪意

冻云惨淡连吴野舞雪缤纷鬪楚宫郡守华堂方置酒山翁鹤驭忽乘风未看夜月光辉助已
喜寒梅气息通欲把新诗解嗟叹强随高韵愧无功

坐中闻击鼓毆傩声戯联数韵

故岁妖疠逐新春祥庆多【绎】旌旗催出猎箫鼓引毆傩【骧】将军至鬪髻罗刹过
【宪】丹书神按籍白昼士挥戈【绎】革面徒为异清门岂有魔【骧】成功在搜厌正气
满天赭【宪】

行县坐野馆食次得所贖手墨兼惠雀鮓兔饌因以鄙句驰谢

清江雀鮓冠江南置兔鲜腴美可餐旅食寻常疑指动铃斋方丈忽分甘行庖釘餽珍非八下
筯矜持嗅必三知味便知公意重属餽寧以小人贪

和郡斋即事

郡斋铃索静无声风引香烟入翠屏綦胜文枰子收玉诗成汗简竹书青治民不害为高卧对
客何尝衒独醒他日凤凰池上乐也应难忘养生经

和岁除

莫惜年华此夕凋漫漫将旦即春朝
缙帷指刻更残律析木循环复建构
玉璣椒花投晓荐银
繁蜡炬隔年消祇应幽谷知时早已欲飞迁翠木乔

元丰改元元日登行春阁

夜尽铜壶漏朝生玉律春日称元最重年
与号俱新郡阁晴光早山城喜气均
椒觞初献寿仙木已书神鹰隼心难止
龙蛇蛰欲神溪水仍泛泛园柳自欣欣
物意幡然作人情岂不伦区区
添甲子歛拙任洪钧

和岁节见招城上闲步

山头宿霭微微见木末春风细细生
动植逢时俱有意乾坤造物本无情
拘挛未易逃?检休暇
何方解组纓所幸得吟潇洒句又随旌旆上牙城

和天庆观醮宿

璧月团团彻晓明琳宫深邃寂无声
传闻此夜曾斋宿读着新诗骨也清

和因观罩鱼斫鱠

一丈深溪一丈鱼不论高价只愁无
携来缕作霜盘鱠美玉纷纷得所沽

昔咏洗刀鱼眼红少陵才思摩秋空
今朝大嚼有余兴佳句复出文章翁

和野步

追随仙舫南溪去欲向春波掷钓竿
无奈东风揽清兴却吹晴霭作溪寒

和柳眼

觚烟窥月早于梅不待东风着意催
应为朱轮屡回顾未春先向道傍开

小桧球

裁芳剪嫩巧间关屈叶蟠枝不可攀
抛掷似遗春女戲一团轻翠在朱栏

和见招

仙馆憇旌輿清篇手自书
拨烦虽欲往俗吏得休无

竹径

萦纤一道贯檀栾入翠穿斜步履怪俗客也应无暇到不烦春笋为遮拦

和宝严阁

佛宫高阁踞城东巾履闲来面碧峰风却云头护清景春催柳眼作先容溪傍几簇红梢露竹外谁家翠幕重玉局棊收归路近昏鸦惊溃一声钟

钱塘集卷四

卷五

<集部,别集类,北宋建隆至靖康,钱塘集>

钦定四库全书

钱塘集卷五

宋 韦骧 撰

和立春日东风雪意偶作

紉紉城头五鼓催东风连夜逐春回物心方喜寒威改云色犹将雪意来戟户劝农牛破土琴堂介壽螳浮醅何妨盈尺饶嘉瑞发滞开萌有迅雷

和山城灯夜

山城灯夕兴厌厌俗乐年丰令节参竿首挂星还拱北云中回鴈倦图南笙箫度曲喧芳席彩翠交光结秀岩邦伯欲归人恋恋帐兵休报鼓声三

上元後南溪泛舟联句

野渡半篙水春风一苇航【绎】柳梢舒嫩綠梅萼泛幽香【骧】绣羽惊波起翠鳞跳日光【绎】环城得佳趣清思满高塘【骧】

和适意

阳春催物态清暇养天和求外於情薄陶真所得多梅苞新烂熳松影旧婆娑此日衔盃乐何如鼓腹歌

和春陰倦游

铃阁兴何幽公庭讼不留未能清昼寝偶作夹城游竹色仍烟翠梅香趁水流持杯听暮角一任起楼头

和新晴

泛鷁兼乘竹高低秀色间鸭头生野水凤翼展晴山纪摭青春态消磨白日闲郡园双白鹭投晚逐人还

谢惠瓦墩

百尺危亭旧路榛自公呼吸变兰荪更怜数奉亲輿到分惠芳斋碧瓦墩

谢惠山花菜

铃下凋盘送山蔬雅惠沾乱丝银鲫鱠交叠玉龙髯日膳荣分美晨羞荷见添题诗授来使珍重岂知賸

和见招游城东园

东城老圃埽青苔竹栢深中一迳开桃蘂柳芽俱有意安排春态待公来

赋新笋【用杜子美诗语为首句】

竹里行厨洗玉盘旋抽新笋正檀栾柔鞭乍断泥犹湿嫩箨初苞藓未乾象箸偶存遗様短琼林才拆冷光寒如何且缓凋觞荐留作青林虎豹看【退之诗云看皮虎豹存】

迎春花

欺梅压柳肯相然佳号迎春岂浪传细叶茸茸垂绿髮繁英璨璨簇金钿先时不入林莺妬晚节唯容露菊鲜绣在罗衣真有趣不将红紫累婵娟

以前韵作春寒攀迓

春寒山色似昏烟风度谯门昼漏传露柳软条金缀纽雨苔圆点翠遗钿登楼引领情方远行帐来诗墨尚鲜坐想琅邪归路晚两行红蜡代婵娟

再和春寒

云迷晓日山头闇风落春梅水面香十里郊原皆有趣一番歌吹从寻芳佳辰浩荡情怀愜化国优游晷刻长更把高才酬胜景他年吟诵信难忘

赋石碁子以机字韵

灵岩山下石采拾比珠玑圜璞生虽小文楸数可围纷纭星并霁黑白玉争辉赋质神工妙磨礲俗巧非透关经手耐争道转心稀落落无情甚谁为胜负机

滁上间日陰晴联句

陰晴淮海气何殊一昔风光互惨舒【绎】大块养春裨造化繁云间日蔽居诸【骧】暖回沙磧催来鴈寒彻冰池怯上鱼【绎】山色晦明如代谢花枝凉曝似相於【骧】朝暾忽荡川原净夕翳还笼井落疎【骧】快适得朋酺醪酒困眠无兴读残书虹霞灼灼飞琳馆烟霭蒙蒙袭隼?【绎】定与物情均燥湿殆非星好有盈虚【骧】连空雪意迷高柳遶舍阳和坼嫩蔬【绎】林外昏鶂啼野尽城头新月上帘初【骧】

和观新历

玉琯初回太族春新颁中朔到淮滨眼前节物南来鴈出处知时似智人

龙蛇蛰久待春雷鸿雁图南去却回山国不惊时节改九天新赐历书来

雨後城上种蜀葵效轡轳体联句

不憚移根远姑怜向日姿春风从自得【绎】夜雨况相资敏速飞霜鏤婆娑拥碧枝幽葩兹有待【骧】杂卉漫多奇野藿非余尚庭兰盍尔知【绎】倾心安所守卫足岂其私得地何妨徙【骧】干霄固可疑采幢须夏节緑饼与秋期莫以藂生陋【绎】唯其秀出宜迁非拔茅进爱岂握苗为【骧】色解凌溪锦花应当酒卮遶栏窠尚小【绎】傍砌影犹卑援护情宜倍栽培力已施【骧】桃蹊容烂熳竹迳耸参差不待毛嫱妬【绎】何嫌鲁相辞土培忧压嫩竹插为扶欹疎密齐行列【骧】芳华逋疾迟纖茎簪间导繁藂珥交垂【绎】恐践禽须逐防侵草必夷养完先固本采折俟乘时屡戒园夫守【骧】频频墨客窥拾来同地芥吟就比江蓠泛与萧蒿长偏饶雨露滋何如君子德修直任荣衰【绎】

和答代简二絶

远想陰云鎖碧山坐听檐溜响潺潺却惊漏泄洪钧妙变化风雷顷刻间

晓风吹聚几山云掩抑朝晖气候昏想望城头飞盖阻郡斋应乐旧书温

和城头相望

雨余山溜涨春沟欲上危亭奉燕游前望篮輿转城角恍疑仙步在鳌头

画舫泛春偶联一絶

近郭风光日日新城头溪上互寻春【骧】欲知昨日篮輿客便是今朝画舫人【绎】

和野步自幽谷之寺庄

出郭爱暄韶芳蹊接涧桥轻车侵草色飞盖拂林梢自得行春乐且无眠昼嘲浅黄看柳嫩淡碧辨山遥此院游曾记他林隐倦招放怀天地濶落日听歌樵

茅亭观雨中杏花得中字

茅亭高对杏花丛漠漠陰云小雨中蜀锦濯来添润色燕脂洗出变轻红幽香肯怯残梅妬膩艷尤便弱柳笼不改晴阳老芳态令人曲意度春工

幽谷谢惠新酿家饌奉亲

花里深深使语传银壶乘酒副珍鲜翰林旧德垂情至鹤髮慈亲荷惠偏寿棻此时添乐只彩衣今日倍忻然却吟鄙句通铃阁匪报尤慙木李篇

和櫻桃花开帐饮口占

櫻桃花里置行厨一榼琼浆数尾鲈勇趣红芳集宾履玉山倾倚照冰壶

又和行字二韵

东风如酒醉朱櫻终日酣酣弄秀英天上谪仙乘兴赏一番歌吹傍云行

和正闰晦日

孟陬闰晦半春光夜刻初消昼刻强谷鸟有声皆得意林花无处不飘香池经夕雨添新绿柳舞东风发故狂亭压高城延过躅湛然清兴引盃长

和春晚过幽谷口占

先春当日探芳芽瞬息而今已落花碧实有心应见笑岂须新艷引流霞

又和至丛山堂口占

残红新绿媚朝晴脚到丛山眼倍明春老物情皆有趣只因犹欠早莺声

和小雨乘兴游城西竹园

冷逼林坳笋未筠润通花底砌无尘且倾文举盈樽酒莫惜林宗折角巾

和会饮牡丹丛间

移樽近檻就香多輒效花前小子歌愿扩酒肠无惜醉淡红楼子独嵯峨

倒用前韵

宛转眉山效蜀峨花前执板为清歌歌声暗与春风合催折芳心不厌多

再和前韵仍以峨字为首尾

峨冠莫惜插花多多插名花壮醉歌歌罢襟怀肆夷旷愿平羣险剗嵯峨

和山行回坐临清桥啜茶

云輶回处引笙箫疑向春宵度鹊桥桥上茗杯烹白雪枯肠搜遍俗缘消

再和

醉向溪头按洞箫夜瞻略约似星桥清欢未足班荆坐一任纱笼爇炬消

暮角清声杂凤箫一时冠带似園桥谪仙诗句春泉涌万斛量愁顷刻消

偶疾未平不得预龙蟠之游辄成诗以迓还旆

山城春物已阑珊病肺朝来强自寬疲繭未堪随驥尾高明空想到龙蟠日烘栏楯花枝卧风
袞阶除柳絮团索笔题诗待回驭肯将尘语累清欢

牙城话别口占

移节名藩去有期牙城重上思依依落花也似人情恋扑袂飘香不浪飞

饯别劝饮

垂杨楼上卷珠帘歌扇轻摇落絮黏邦伯指期移绦节州人终日拥彤檐危弦脆筦催金盞芳
草青山照画檐酩酊愿公无惜醉祇应羲驭驻峯尖

送别回作

祖饯初还重叱违懒鞭款段入城扉旌旗人去山川晚台榭春归花药稀鼓吹渐遥空望望旄
倪相顾共依依自怜无以纾诚恋唯有诗筒殆庶几

和耿天隲翦彩梅花得开字

根如芝草不因栽叶似春云容易开应有靓粧偷艶去且无狂蝶为香来殷勤玉盏频飞举酬酢金刀巧剪裁烂赏更於何处好蟾光雪色在瑶台

元日

簇律新声应寅杓旧观还三朝思北阙万寿祝南山谬忝金闺籍遐违玉笋班山城濡滞迹望日想天顔

席上劝仲元著作勿辞酒

百盏先尝一盏醇三分才破一分春花间剔火香烟细竹外垂帘画笔新落日穿林照檐额绪风吹草动堦唇莫愁酩酊辞公劝金尊空时迹已陈

和苏正甫劝饮之作

芳陌草萋萋相逢又解携柳梢迷緑酒歌韵怨春低兰菊时难一鷓鴣乐自齐送君须满饮未放锦障泥

赋迎赏欲开杏花得花字

闰月春光助物华杏园迎赏欲开花昼慵闺绣工犹浅晓起宫粧色渐佳嫋嫋风枝偏弄送酣酣烟蘂自交加对君安得辞昏醉更作狂歌恣所夸

又用花字为即席

春色漫漫不可涯谪仙亭馆最幽佳歌声闇逐风中絮酒筵旁看盏里花击鉢题诗助清旷藏?传令止喧哗他年追念从真适炊熟黄粱一梦賒

陪秋叔游幽谷即席赋一川花

城南幽谷去非賒踏石穿云境趣佳门下车鱼情浹洽道旁旌旆影髣髴笙箫宛转随风远台榭参差对日斜白玉为船载琼醕未容轻负一川花

和社日小饮

挑菜佳辰过夕醺又逢春社举清罇不为归遗东方态且对韶妍一醉昏

赋牡丹黄蘗

依栏凋谢若为情旋拾残红入鼎烹吞秀嚼香须细细送春唯此一杯羹

和范子功学士留题二贤堂

屹然棖桷傍云烟榜揭堂名以二贤翰苑钜公存往躅集仙肤使出新篇寒光共杳山椒月幽韵相投陇下泉一等声辉惊海内後先踪迹似忘年

真守侯公辅见留之勤因辞以诗言欲遽往早还之意

洗涤炎蒸夕雨凉瞥然行役过邻邦旅怀耿耿通秋漏征舸萧萧倚暮江礼豆辄辞蕝义许绪言倾听砥心降莫疑踪迹便奔走云下孤亲雪髯双

夜宿淤丘

古岸维舟夜向深胡床踞坐絶嚣音烟林隐隐成孤垒水月辉辉滉碎金勉强官途情易厌冲蒙狙诈力难任予心欲道从谁语祇有清宵一苦吟

泛滁河

十里之间五六湾行舟终日绕青山更为先後枫林翠互出东西古屋闲酒为孤斟心易倦诗非共赋思仍慳秋风飒飒吹襟袂可是无情促髥斑

出滁口入江峡

逆风吹浪雪花翻舟出滁河浩荡间枹转一声鸣似鼓櫓摇数丈漩如环路通淮右千源水望断江南一带山莫恨区区缘吏役此时清旷亦开颜

和徐仲元以诗见送

火云涌起势崔嵬行舸纱窗一一开自是宦途无定迹莫嫌台檄属非材往还倏忽南柯梦离合殷勤北海壘更谢人为离别语果然朝暮得归来

吴六合道原席上

单舸西来六月初偶逃远役且踟躇幽寻古寺尘怀放高会虚堂暑气除地主延留情已厚故人邂逅乐何如回头陈迹无寻处姓字闲於壁上书

李白祠堂

祠宇前临姑熟溪溪流湛湛清无泥春来秋去几百载朝云夜月长相繁堂间画像水玉质高风爽气何凄凄文章光?本万丈来此寂寞由谗挤当时放荡沉清骨因有声名不漂没莫论楚屈与吴胥谁有高才追髣髴

姑熟州宅後泛舟清饮

古郡萧萧草木秋牙城北出上扁舟乔林有隙山微见曲岸无风水自流竹色雅如侵甃研鸟声时似劝觥筹勿哈吏役行拘束酒兴诗肠亦自由

过九华山

旌骑前头是九华未能游历已咨嗟好将秀色开尘眼又被浮云一半遮

冠幘峰

渡江行役走埃尘路过名山兴味新冠幘危峯勿相笑俨然云外亦辛勤

閱九华錄

仙居岩巘几千重秀入青冥气势崇他日却来寻胜境且将图錄记诸峯

宿九华驿阻雨

喜无檐溜滴空堦秣马轻装入夜催一阵松风惊晓枕又疑天外雨声来

又过九华山

昔年尝慕此山游今日经行不暇留好意尙为尘迹累碧鸡山凤勿相尤

登齐山

临岐跋马向齐山苒苒烟萝试一攀恠石何年居物表白云终日伴僧闲气吞城郭纷嚣外势接江湖浩荡间况是重阳时节近紫微前咏好开顏

弄水亭

清溪翠巘两相宜雄构峥嵘压贵池弄水得名应有谓登山留咏想同时【弄水亭本唐刺史

杜牧所作牧於此有登齐山诗】角声北起秋云动桥影西横晚照迟佳趣古今看不尽前人
遗美後人思

离池州过长围岭

孤城西出夕阳偏岭上行行思渺然草木高低共秋色江湖左右各天边凌风短髻无由掠投
宿轻蹄不用鞭一簇人烟紫岩驿解鞍聊看月婵娟

别滕元发侍郎

尘役间关旅思收幸瞻旌戟少淹留多年目断丹青步再拜心轻万户侯三节行催虎符去双
毛将近凤池游门阑欲别徒惆怅吟对江山?不休

宿杨梅驿

两壁万千嶂一邨三四家度桥逢古驿下马踏秋花夜永蛩尤苦云空月自华冷官无好趣安
用五书车

早行

鸡声喔喔似相催秣马登途酒一杯海日欲升山顶赤林霏初散岭头开自怜旅梦经千变谁
谓离肠只九回苟禄奔驰还窃笑未能容易赋归来

晓离杨梅驿

长坡峻阪足崎岖晓出杨梅古驿孤山腹带云如曳练稻梢垂露欲流珠穿篱鸭脚深深碧近
水鸡冠小小株行役虽劳遇佳境且将幽句慰瘡痍

即事

舞蝶双飞穿宿露鸣禽相唤弄朝暾涧盘石迳长蛇转山入秋空翠凤骞枫叶园林看自好菊
花时节与谁论高怀不为尘劳减安用笙箫簇酒樽

过面山渡

碧溪深水不胜篙船尾呕哑一橹摇岸北岸南秋色好西风吹叶马萧萧

食鰕

踰尺秋江鰈𩚑轻愧自深穿腮窺秣頰引鬣訝涂金调鼎情虽銳飞刀爱不任何須鮪满箸始
动季鷹心

对监

寒光满尺余拂拭在朝晡敌面知相应纖毫肯见诬壯顏随岁老短髮任秋枯皦皦胸中事君
能照得无

建德道中感兴

穿云度水涉修程日日长亭复短亭秋老声音闻过鴈夜凉精彩见飞萤羈怀遇物如縈絮诗
思投闲似建瓴却羨野人收刈毕寂然无事掩柴扃

思侍

旅宦经秋厌路尘家书累日寂无闻劳身江左驰单传极目淮东望白云俚听难将至音悦天
和不学衆人焚趋庭往往逢寒律叱馭回轅两未分

感怀

埃壒满祗裊谁矜意气豪独知安履坦宁复叹屯膏剑气藏秋匣弓声闭古弣临风浩歌罢短
髮不胜搔

忆後城覽秀亭登望

村落园林有几家隔墙遥出拒霜花自怜马上看秋色不似城头覽物华

过查林

路向山腰转云从陇首飞晓天初衣袂村驿罕乘肥覽物惊秋老论心悟境非归期且寬计雨
雪或霏霏

落日

郊原爽气入衣巾佳趣源源立马频落日山川无限思秋风江海未闲身

闾阳驿观中秋月

却扫陰云藉晚风十分圆月挂天东中秋此夜光华盛万国钧情喜翫同何处楼台恨偏照几

家樽俎对寒空自怜独宿荒山驿浩兴长歌未易穷

宿坛石驿六首

秋高征袂怯西风寂寞邮亭倍旅惊独有无心清夜月更深山里也相逢

山馆萧条冷似冰黄昏四壁但蛩声无端更恶飞萤点强起前檐鬪月明

归期尚远路程赊已觉秋林菊渐花莫恠临风多北望琅邪山外寄吾家

求官穷僻本藏头远冒风霜不自由岂是有才如硕鼠可能无术似蜗牛

纷纷贵贱则锱铢义命由来共取诸推己及人人所慕不然何以称襟裾

独贤安敢辄咨嗟靡盬当知载旧诗回轡未堪期早晚望云终日起亲思

想庐山三首

昔年曾过九江秋引睇庐山不及游行役今朝垂欲到无端牵制又回轡

访水寻山好已迂胜游难必果何如二林咫尺还淹兴空读匡庐易覽书

走遍江南二十州庐山未到谩悠悠故知人事相邀阻唯想他年取次游

适江表

水落山高古渡幽马蹄轻健蹴溪流朝行暮止三千里叙旧逢新一十州倦听乱蝉催落日喜看黄菊助残秋不才於世无裨补强就奔驰祇自羞

中秋十八夜雨望月阻兴

赏过中秋才两夕人心独待月华多也知不惜饶光照争奈闲云好事何

饶守游晋老席上偶成

西风吹叶影悠悠行役江城旅思收名慕荆州忻一见道经鄱水爱三秋芙蓉欲蘂斜阳转鸿鴈初飞爽气浮不用樽前苦相劝斗筭唯恨怯觥筹

再答和篇

落日山川晚鼓休西风楼阁远烟收清谈亶亶忘尘役醪酒深深战暮秋独恨去当霜草路不能留见菊花浮更慙健句酬衰唱刻烛甘输第一筹

又和答并叙别

风骞绣额炉香转江照金樽宿霭收尘客轻装渡寒水主人佳句压清秋自忘远馭瘖兼病岂顾闲书沉与浮回首高城空企望驰情无算不堪筹

龟峯

偶向尘劳得胜游纵观三十六峯秋巢云负月几千岁欲问神龟不转头

龟凤猿螯各定名峯峰峭恠倚青冥也知造物无情甚凝结如何特肖形

别铅山杨公济

征尘浥涩暮秋时税鞅登堂暗澣衣久别自怜心鬱鬱相逢今喜语霏霏池中尽谓蛟难畜塞上行看马自归落日西风满襟袖临岐回首重瞻依

行赴云门驿

石迳踏羊肠朦胧晓日光久行情易厌少事兴还长林表霜枫赤山根露菊黄从来清冷趣今日倍阳阳

谢简夫太博惠茶

越岭掇春英淮城惠不轻一杯分爽气千里想高情啜与幽人共烹宜庶子清挥毫答珍贶还愧玉川名

海陵按事

山城幽趣远海国暮寒多委琐从谁遗拘挛祇自诃庭虚哀度鴈巷閤絶鸣珂案牍紫仍外陈编亦可磨

琅邪三十二咏【并序】

予官滁踰年矣每投隙游琅邪山爱赏不知厌已虽数有篇句然恨其池台亭阁景物之多而写之不能尽乃为三十二咏以别之

琅邪山門

双鶴栖華表仙山自此通云霞是局鎖尘土若为攻

长松迳

十里开幽迳松陰互蔽亏山翁心亦侈步幃用青丝

净镜亭

路转翬檐出山回秀气多亭名不须看对镜已如何

翠微亭

谢屐低前齿登临势渐雄岚光动衣袂知在翠微中

白云亭

路作两岐分亭多聚白云无心本无恋於此尚纷纷

醉翁亭

醉翁虽已没遗构在山阿不比陶潜石清时乐自多

薛老桥

流泉渟处濶跨石石桥横题柱无踪迹茫然薛老名

逊泉

两窦涓涓泻无何後却前谁能来酌饮回意学相先

班春亭

云木气氤氲风光日日新风謡随五马来此听班春

石流渠

凿渠疏白石绕檻走清泉不为流觴醉来当涤万缘

琅邪山

晋王曾此隐释子住何年泉石无今古图经有後先

回马岭

有意寻幽胜跻攀固所怀如今岭路稳鞍马不须回

开化寺

架巘及依崖轩窗次第开等为方外客於此更清怀

御书阁

岌岌中霄汉风传宝阁香三朝神翰在奎壁夜交光

阳水篆

笔力真奇伟磨崖几百年勿嫌人贵耳此学世无传

庶子泉

宫相湮沦久兹泉日夜生泉存人不见空复着虚名

白龙泉

殿角滢泓澄源高登地灵老僧来洗鉢不畏白龙腥

酴醾轩

诘曲小轩斜酴醾一架遮春风零落後浑似雨天花

寂乐亭

踏石穿林去披云就坐来禅翁寂寞地猿鸟肯相猜

招隐堂

小蹊回石角締构倚山腰一片幽栖地谁令便可招

归云洞

石洞何时有名传事或非那知为雨後却向此中归

清风亭

松竹繁陰满峯峦秀色并暑风从此度别是一般清

大历井

竹里藏深井栏镌大历春不知开凿後几个鍊丹人

千佛塔

礲石施丹艧凌云势亦孤如何千种相并在一浮图

石庵

不独烟霞窟天然石作庵坐禅遗迹在岩溜自香甜

晓光亭

东面双峯缺遐瞻万里平朝朝沧海日先向此中明

了了堂

了了还未了都忘了始真登堂知此意方悟死前身

望日台

曾有长安客题为望日台樵苏人不测到此亦裴回

石屏风

造化非无意都如图画中犹嫌未奇恠更出石屏风

会峯亭

胜槩当冲要回环拥翠峦烟云藏不得如在掌中看

法华池

会峯亭下路斜带法华池不待观池水尘迷已顿离

东峯亭

山中时节早地势近春华岁岁东风至先看傍砌花

客舍早春

早春晴霭乍悠悠客舍深沈物趣幽日薄草头初破甲风旋鸟毳偶成球庭柯憔悴红犹远池水澄明绿渐浮隐吏近来多鞅掌纾怀何处一登楼

栩栩亭

碧崖高处筑遗基缔构迢然得所依境趣似仙探絶迹登临如梦悟轻飞路穿幽谷云霞密势接丰山草木稀欲识主公题榜意不容纷扰累忘机

偃盖松

摧折风霜久犹传偃盖松只凭文笔力何必大夫封

春晓

百舌穿林语未完悠悠归梦忽惊残心知庭外春霜重裘压单衾觉晓寒

海陵逢春

海角春初至林樊气未和天寒梅发晚沙近鴈飞多窗纸疏明玉帘旌荡翠波旅怀随日长索莫不胜歌

感兴

富贵功名岂足邀鷖鹏所得各逍遥古今多少难齐事烛理都如见晷消

观飞鴈偶十有三

肃羽度春晴差肩足弟兄何时别燕塞此日类秦筝应律声犹剩排空字宛成冥冥奚所滞惆悵弋人情

忆梅二首

去年幽谷探寒梅把酒曾将累句催不意今年行海角玉英开尽未归来

向来踏雪旧枝旁指日相期折素香可是去春吟太苦闇招离别间清狂

近元夕怀景纯少卿

忆逐双旌下暮城岁华垂尽魄哉生瞬眸已见元宵月归步犹淹累日程远想笙箫同衆乐坐
怜刀笔久相婴驰情只有清辉共更走诗筒代寄声

灯花

??银檠上开荣歛尔新芳心唯报喜艷色不关春翠幕障风稳兰膏借润频屡占皆取验始信
有花神

水精笔架

璞琢穷工巧书帷适用高得邻辉宝墨栖迹卧文毫匪月光长在非冰暑自逃千金不论直一
字若为褒

自宝丰镇移红蕉於永阳後圃

为爱红蕉品格殊移根千里涉崎岖不知今岁秋阳里能有丹心似旧无

风琴

穴竹张弦耸碧空不劳抑按任天风莫夸有智藏声足须信无心触处通明月夜深飘更远闲
窻人静听何穷知音弗辨山兼水都在洪钧一噫中

鴈屏

羽翮本云程丹青入小屏长年离远塞尽日啄寒汀暮角无惊势春风悄去翎几回疑繫帛旅
枕梦初醒

春寒

檐霜重如雪池水冷于冰鸟舌生根澁花心起怨憎旅人尤倍觉年少尚难胜欲作新春饮高
楼未可登

春陰

云靄結青冥成陰重复輕
雖知養春色終是慘人情
索莫初花態躊躇去鴈聲
芳時不宜忽紫陌待暄晴

咏馬

種格得房精
奇豈易名耳批秋竹薄蹄蹴水云輕
徒受雙羈制誰知千里程
未為良樂遇春陌自長鳴

咏素扇

不羨裁紉妙唯憐入手輕
月從天上落風向座中生
却暑期宣力經秋任寡情
人心能似此及物豈無成

火筴

勁直不容偏纖纖體并圓
附炎非曲致執熱藉雙全
爍炭隨方減寒灰應手然
洪爐在調适持此以為權

桔槔

露井無窮惠機心在桔槔
淺深皆應取俯仰不為勞
固免贏瓶悔全勝短綆操
如何翻鄙笑抱瓮自孤高

投壺格

古來壺矢樂今日亦鈎情
慶馬誰亡法論籌却有評
較能分勝負按數計虧盈
好是摧機中收功特地輕

花鐵書鎮

鐵尺平如砥銀花貼軟枝
成由巧匠手持以鎮書為
彈壓全繫爾推遷實在台
不能柔繞指方冊最相宜

鵬狐圖

戢翼下云中驚狐計遂窮
筆端傳擊搏座上感英雄
猛勢看如活妖?覺已空
推奸當若此不獨畫為工

咏影

所赋一何钩悠悠各一身行藏宁逆物进退本由人向晦都忘累逢明固任真含沙尚能祸辨早莫因循

咏声

寂寞曾非迹能闻乃辨声於人缘有感在物本无情涛怒中秋盛雷威百里惊更论空谷答至理自相倾

陈後主

绮阁宝为床庭花曲韵长三妃惑沈湎十客助骄荒不作强邻备还罹独足殃胡颜犹侍饮更献请封章

方竹杖

钩是龙孙种怜方与衆殊既能同劲直还自表廉隅雨露恩虽一风霜迹更孤端人以为杖气类雅相符

访隐

暂出纷嚣外相寻寂寞乡埽门风竹影扑座露花香白玉为琴轸丹砂贮药囊疑年闲试问甲子亦都忘

咏烟

漠漠复霏霏因风任所之山家晨起後渔舍晚归时散远连云没飘斜悞鸟随更堪萦旅思怅望碧江湄

探後园桃花二首

忆对残花邀客醉留连花下惜芳辰而今只待微红露便向枝头覓旧春

藉草开樽往兴深摇花落盏十分斟当时已有今年约肯放花残负赏心

溪上桃

数本临溪岸春多色更天暗香穿水腻细蘂入风娇枝卧侵微草红繁蔽小桥武陵迷客路与

此不相辽

多景楼

尽道人间占胜游天将多景遗斯楼江山远顾穷千里风月平分入两州日日高明疑後夜年年潇洒觉先秋不知今古登临客消却尘怀几斛愁

和吕景纯以梅花盛开见寄

晓寒虽在有春催坐想庭梅烂漫开滞迹方愁冰蘖过清风还喜玉音来传芳酷重裁云手比美遥评傅粉腮归见余花须共醉相宜况有水精杯

又和灯夕见寄

瞥来海国未言旋歛见新春换旧年佳节阻陪千骑乐元宵空想万灯燃民声喧溢丰时岁酒价飞腾要市鄽多谢高情不遐弃清诗相寄宝珠圆

春思五首

庭前弱柳黄金线池畔新苔绿玉钱可是燕鸿恋韶景犹将健羽度晴天

香心夭艳尚包藏蜂蝶优游苦未忙何处纸鸢飞白昼几家归燕认琼梁

青烟拂拂扑晴晖帘幕无风永日垂不恨离人归不早只疑春色故相欺

近来碧瓦减朝霜春意垂垂满众芳未睹花光照庭榭且看草色绕池塘

半惨半舒云外日似无似有水边风羈愁不为阳和减只恐因春绿髻空

春游

春游是处接纷华寒食风光日欲斜柳拂画桥嘶玉勒草绵香陌度金车云边蹴蹴声相远花外秋千影半遮莫羨少年多意思随时行乐自无涯

将归

他乡理讼改新年事竟归心顿释然坐厌帘间窥昼景行将马上看春天无穷芳草含朝雾几许初花倚暮烟长陌风光应渐好羈怀朝夕付金鞭

蔡仲远内翰出虢州刘龙图所寄诗因次其韵

暂离翰苑出南州
匝匝金羈络马头
泉石清幽为已物
耕桑勤苦共民忧
笔驱滞事如飞电
语决尘缘似破沍
内合旧交诗远寄
心期犹未许裴休

和仲远留题方銳长老方丈

当知迷悟不相因
举手如何拂监尘
试问禅翁住方丈
近来多少晚参人

又和仲远答銳长老二首

庭栢经霜色半黄
暂安禅室意阳阳
高怀洞见人间世
鳬鹤纷纷自短长

山前旌剑弄晴光
瞻谒裴回殿角香
却坐灵堂问禅伯
莫持迂论作金汤

送周开祖赴阙引对

君繇鴈荡解官时
我亦琅邪受代归
邂逅故乡方道旧
逡巡行舸又成违
十年离合都如梦
千里冲蒙勿自欷
况是枫庭将奏课
好摅奇蘊动恩辉

和邓温伯内翰九月七日约游北高峯

幸奉清游入翠微
陰云漏日照旌旗
登高预整孟嘉?
访古闲寻白傅诗
桂子正传飘岸客
菊英先喜泛瑠璃
公归留宿湖山暮
恐误郊关竹马儿

用别韵再和

岱岳参天十八盘
当年旌旆许追攀
兹游况近重阳节
何幸还陪一日闲
陟巘舍车登岌岌
爱泉持酒听潺潺
玉堂健笔成高咏
欲和临池恨思慙

和温伯道旧见寄

忆随星骑按胶东
屡说余杭气象雄
今日共为乡里庆
看公双拥旆旌红
回环山水仙壶外
高下楼台画幅中
剩把豪篇传美槩
免教清话又成空

又和九日有怀见寄

九日风光不可辜
更堪潇洒在江隅
兴如蓝水真能适
诗比齐山亦自娱
莫向三秋悲齿髮
须将一醉等贤愚
酒阑忽忆胶东路
跋马随轩望上都

致政孙朝请过故里为五老之会

荣参天上列星躔闲向人间作地仙故里相逢十华鬓一时同会五高年图传略过商山叟
齿序几齐洛宅贤有子奉觞公最美绣衣使者彩衣鲜

胡巨源郎中挽词三首

官荣符列宿政术妙专城未尽平生蕴俄从长夜行怛情归浩荡爽气入清明独有南州俗空
传遗爱声语论常惊座精神迥照人中途多坎久疾遂湮沦髣髴朱轮改裴回画翼新秋风
入哀挽行路亦伤神汲守卧犹治冯郎髮半华冥鸿方避弋美玉已埋砂露湿铭旌重风随挽
绋斜九原无甚恨嗣子善传家

汴上简陈成伯学士

除书何日到宣城水驿迢迢引旆旌千里讴謡犹在耳双溪风月岂忘情行庖荐玉淮鱼美坐
席浮香楚醴清何幸旧游衰晚者得随舟尾共修程

次韵答所和

苍茫云水度淮城櫓影联联注羽旌汴泗幸随行舸末潇湘况重故人情晨征共济襟怀豁夜
泊交谈气味清应有高篇思宛句可无美酎继乌程

和见寄

公到蓬瀛十五春我犹碌碌似轻身自忻今日旌轩遇却忆当年研席亲高论聳听多皦皦孤
衷懒叙且循循试将辈学樽前数白髮相逢有几人

和丹阳守许仲途朝议春深饮会即席二首

宝炉香穗战春寒四座融怡极日懽且乐杯觞随水曲莫愁烟雨满江干首题诗句争传咏欲
插花枝更细看衆客为公须一醉何妨倒着接?冠

疑恠和风却暮寒华堂宾主正酣欢人间高会真难偶身外浮名岂足干緑蠹泛杯春可吸红
英近烛夜宜看梁尘莫逐歌声转只恐纷纷扑醉冠

劝酒【集句三首】

二月已破三月来青春白日映楼台劝君更饮一盃酒一月人生笑几回

离丹阳

人从北固山前去云水苍茫日向西今夜渡江何处宿杨花落尽子规啼

惜花

东风吹园杂花开不忍虚掷委黄埃且来相就饮一斗渐老逢春能几回

和陈成伯小饮

布素平生友如公乃達人相逢临远水累岁望清尘万语难穷意三杯且混真鹏鷃各飞举同是未归身

再和

百丈卷河滨相欢席上人香飘清近水歌动净无尘良会诚难必开怀好任真心期在他日湖海共闲身

再和陈成伯见寄

两篇 思敌青春开拨尘昏向此身道旧悠悠言易感论心炯炯谊还亲光陰似穀何难转事物如环且漫循白雪调高知寡和强歌徒愧郢中人

舟次柳子小饮呈成伯学士

久客无佳思长途有戒心系舟偕择地击柝互传音西月光犹浅南薰候已深一樽虽冷落所幸不孤斟

石懿老大夫生日

万石风流盛中秋气序清门弧当日庆寿棐此时盈庭下芝兰茂腰间印绶荣况高颐养术龟鹤得长生

留别张枢言龙图二首

夔臯事业久声华尚郁谋猷世所嗟专阃收功全整暇偃藩从请示优嘉高谈耸服三千客和气融怡十万家不日九天飞诏下行看驤裊蹴堤沙

政成西蜀肆高怀乞得东吴盛府开千里惨舒都在手百城趋稟孰为才恩寬疲瘵精神健威

慑奸憊胆气摧下客拳拳唯慕谊欲违旌戟更徘徊

陈公武中散生日

身作名卿早挂冠饮水清节久坚完门弧远想当年庆寿璫宜深此日欢簪绂诜诜侍佳讌弦匏苒苒战轻寒葭莩敢以诗为献唯祝公如卫武安

过金陵上仆射王舒公

天眷皇图盛真儒德性高文章追孔孟事业过伊臯难进轻三帀功收变一陶斗枢符斡运主柄赞持操万务繇吾揆千龄庆所遭邦财理丰本民力较秋毫惠徧农无乏输均役不骚保兵知警守禄吏絶贪饕信令朝廷重伸威塞境牢深谋压夷狄侵地复岷洮万里耕桑富中原气象豪河淤开亿顷海贡集千艘着义尊经典更科待隼髦养材从引类设学???纷袍试士先三尺传师或六韬进贤轻似汲去弊勇如礪化俗迂狙诈乘时等凤翱赤心全皦皦鄙议过滔滔表正销羣靡言深决衆諂郭崔奢自减杨墨谬皆逃勲烈轻铭鼎光华外奏鹖台阶回远趾仙观乞闲曹异宠藏珍带优恩避节旄锺山归旧隐槐府辍先劳不宰经纶效潜忘简策褒烟云供笑咏风月共游遨古寺唯轻屣秋溪只小舸羹调梅斂实旱救雨收膏寰宇恬安枕衣冠赋执翽何时传入覲羣望慰皦皦

送范子镇承议同年宰清源

愿君安虑宰清源已雪南闽大狱冤勿叹割鸡犹屈刃当知容驷可高门解舟兰水春沙浅税鞅榆关夏木繁所得最多公谊在他年富贵岂须论

中书张侍郎生日

薰风初泛舜弦声崧岳储精王佐生巨室当时庆弧矢熙朝今日赞机衡燕堂荣映台躔近寿璫光浮昼景清愿祝修龄如卫武长挥相笔化隆平

迁居近局谢陈成伯假车惠茶

冷官远室足间关疲马羸兵倦往还局左卜居甘迫窄城东寓迹谢寛闲短辕助载方衙惠灵蔕蠲烦愈厚顔两腋风生家事少并吟惭匪昔贤班

再和答篇

为困奔驰乃近迁勿哈飞倦不知还趋朝遂免三更起归舍新添数刻闲漫致鄙篇酬雅贶却烦秀句解衰顔高轩若许来惊座陋室杯盘亦可班

又和来篇

已愧苍葭倚玉难更慙投砾引珠还卢生破屋居新稳韩子豪篇语自闲虽有清樽仁高躅须期黄菊奉朱颜自惟雅集犹淹缓诗战雄师未必班

和赵達夫元夕礼闈鎖宿

元宵鎖宿礼闈清春意寒威两战争月照楼台疑昼景风传车马讶雷声蹉跎自愧青云志勤苦须怜皓首生勿叹拘挛度良夕共开精鑒选经明

次韵杨久中将试进士

双扉尽日关旧观恍然还进士将纷集经生且暂闲较材归俊杰兀坐属踈顽远想驹空谷移文愧北山

又和鎖宿即事

金门拜敕望严宸禁陌联鑣傍早春此日贡闈身亦与昔年文阵意如新为僚况偶羣英集投隙何妨雅论频共念残科多滞士归期缓指甲申旬

示黄彦发欧阳勉甫道旧

浮世难逢故旧并贡闈风月可忘情当年论事皆陈迹此日评文亦浪名荏苒光陰踰一纪间关志气话平生且将觴咏消闲隙鹏鷃逍遥理自明

和久中闻笛

风摇古木影萧森何处飘来暮笛音杳杳恍如天上曲悠悠不减陇头吟未逢明月心犹恨却忆残梅兴亦深幽思萦回长不断欲量应及数千寻

和达夫雪齐

雪余着处是琼瑶惜向春风势易消野色澄明经一洗鸟声喧滑自相招润通弱柳晴林媚清逼归鸿云路遥浩荡幽怀吟不尽高楼斜日望寥寥

戏呈吴伯固同年

白玉墀前共得仙而今邂逅半华颠评文我辨异同字出义君持难易权畏简不能成共酌纾情莫惜寄新篇上林春晚归鞭动意思何如癸巳年

又次前韵答所和诗

裁句清如李谪仙挥毫放浪近张颠偶於贡部同官责更向诗坛擅将权戏笔谩追丹桂旧报
言还愧木瓜篇一樽何处偕吟啸浩兴犹堪逐少年

和久中春风

三月东风势渺漫侵陵和景作清寒发扬造化非无力鼓动芳菲自有端鬪草戏儿忧手瘥怀
边思妇忍眉攒祇输便腹忘机者不废书帷昼寝安

寄陈君佐

山阳判袂几三纪铁柱题名过十年聚散信如萍逐水光陰奚翅筭离弦高材未用君犹健弱
羽无心我自全鳬鹤短长何足算相逢樽酒且留连

和吴子友贡院作

晓跃骅骝紫禁开诏音不许少淹回斜鞭忽过天街柳曳履还侵佛合苔昼幕四垂如近汉夜
灯相比似占台会将精识抡荆璞当有孚尹应手来

和中裕古监

君有青铜独可怜规模奇古衆疑年寒光不减谁人致真监无期本自然秋水未堪方洞照霜
蟾应是恨长圆主人较艺还如尔坐别嫫施丑与妍

钱塘集卷五

卷六

<集部,别集类,北宋建隆至靖康,钱塘集>

钦定四库全书

钱塘集卷六

宋 韦骧 撰

京居

冷官仍白髮陋巷足青苔
弥月不书刺经时长覆杯
未能依间壑空欲远尘埃
聊作支离况诗成祇自哈

送冯材叔宰蕲春

海角分携仅十年鉅创钩是偶生全
相逢未暇聊持酒就别还惊欲放船
顾我滞踪徒袞袞羡君归翅自翩翩
蕲春岂足劳余刃应有佳声慰慊然

韩敏之学士貳少府往拜凡三而未覲因致以诗

一枝栖息又逢春何幸高贤晚获亲
顾我画墁惭所食荷公倾盖异於新
绪余袞袞心尤慕盘辟区区礼未伸
三望膺门漫刺字且持累句愬因循

邃明生日

昴宿储精岳降神乾坤鍾异鉅贤身
间生庆候年弥永辅世休声日又新
台鼎梅调方夏实凤池风好正南薰
因时愿祝松椿寿长赞熙朝秉化钧

致政孙大夫挽词

荣养如公世所稀薤歌今日勿深悲
生封郎位腰金贵老向仙乡拥节随
积德已酬高閤志遗踪何愧北山移
义方有子声华重千古灵丘起後思

同文馆试上舍和同事孔彦常学士即事

笔阵收锋考战文喧喧车马隔重门
心矜力学求之密目到雄辞气不昏
美宝辨来三献愜雕虫屏尽六经尊
囊封奏号须明发吉梦应先彻九阍

又和

强继高吟岂足论聊持布鼓过雷门解颐传咏知辞妙落笔酬言怯思昏霜叶舞风鸣碧瓦寒
云漏月射清尊好传秀句频惊座索马行将戒守阍

又和前韵呈彦常明叔

软语霏霏过夜分程文都已辨专门香焚龙脑神还健书检蝇头眼易昏
从传呼金阙晓星辰环拱紫垣尊拆封御史何时到曳组相将谒禁阍

较试将毕呈彦衡察院【上官】

当年京口望清尘德论於今想记频何幸上庠参较艺又依高鑑免遗珍
下帷昼寂霜威歛挥麈宵寒月色新早晚奏名归驶迅九衢多少避驄人

又和彦常试院即事

城堦候馆势宏开捧诏彤庭薄暮来庠序旁延优上舍行能参考见高才
糊名独得珠无胫摭实更忻山有莱贤杰闻风争入彀簞瓢何足乐顏回

天寒帘幕气萧骚终日披文不厌劳但有诚心裨藻鑑敢矜明目察秋毫
璵璠啓袞光难掩鵬鸮凌虚势自高号奏身闲无一事唱酬尤喜得诗豪

辨骏由来尽马羣裁声今已得龙孙不容一字虚褒贬可见诸生究本源
衡鑑有凭宜自信毫厘无益懒轻论分携莫惜频交语且尽樽前爇泪?

呈郭奉议明叔

峤北分攜一纪逾浮梁唯奉数行书如何邂逅同萦绊遂得从容接绪余
道旧良多动嚬笑忘形不觉度居诸出门幸且时相顾更望新篇数起予

食蛤蜊二首

适口珍鲜品格高泥深海近不能逃若教毕卓曾知味岂肯甘心把蟹螯

自卫区区亦甚勤刳肠剔柱奈何人若知射影能相惧应学含沙得保身

谢鍾离中散公序惠草书

留心不减汉张芝体意俱完世学稀下笔欲为来者法临池时见古人非篇篇骇目神如电字字凌虚势若飞多谢公余怜所好璨然累幅遗珠玑

呈户部李尚书二首

八座辉光道德隆陋儒何幸奉从容听言迥出羣贤表顾已荣於万户封密啓更慙先荐鹗高门况是晚登龙荷公恩意知难报劲节当先比涧松

三纪光陰疾若驰一身孤宦亦逶迤人疑碌碌非奇节谁信器器足有为白髮精神怜晚景青云志气慙卑枝门阑此日蒙优遇可是囊中穎脱时

呈南邻司门盛海之同年

昔咏相过人不知於今想见少陵诗邻居何幸偏依德交语乘闲祇隔篱攀桂当年联步武近兰此日慰瞻思冷官罢局方无赖但向清风且乐饥

过二里山

夜宿陈仓驿朝行三里山千峯排鬱鬱万石激潺潺征驭来何亟幽禽语自闲尘劳亦知幸胜景得跻攀

御爱山

五峯列翠俨如屏御爱知非浪得名行客勿轻加诮咏播迁岂是不关情

凤翔刘明复龙图刊李茂正德政碑勒移维摩塑像文求诗因寄

龟趺螭首势崑然轻重由来在所镌名削奸臣磨伪说像迁居士记真詮精文本自精诚出妙手幡因妙相传以善辟邪殊可敬为公嗟叹作诗篇

和遂州太守李安上年兄见贻

拥麾遥想陟崔嵬骤喜清谈复屡陪攀桂当年追远趾偃藩今日仰高才如公闳博难淹外顾我迂疎任傥来相遇且宜忘倍道慙同持酒赋层台

寄提刑岑岩起

两世同年世亦稀同官同路复同词登途先後无多日聚论参差已过时剑外石梯方息鞅山南珍翰忽伸眉情知邂逅当非晚聊寓长言写所思

过朝天岭

崔嵬陟尽复凌兢暂舍银鞍杖策行栈阁架空霄路近栏干护险晓云平仰看翠壁层城峻下瞰长江一带萦自惜仙才难蜀道始知难此不虚名

三盘阁

江山千里势雄豪终日缘崖未是劳欲识寒心骑马处三盘阁上看惊涛

玉枕驿

嵬然峭壁入青云玉枕光辉絶世尘岂是羣仙露奇迹故将珍玩惑途人

过故平

间关危栈过迢嶢忽见平原旅恨销却被飞涛送乡思悠悠想见浙江潮

回宿故县驿

回首边城暮霭轻乱山深处宿归程流泉遶榻鸣寒夜别是劳生一段清

文剑道中

剑阁文台相去遥朝行山顶暮行腰双眸视险睛常眩两髀乘鞍肉半消空有辛勤驰远道愧无毫末补清朝何时解组归乡国十里西湖弄短桡

登科

先世曾夸尺五天後來苗裔独萧然可怜三十三年内科第唯吾父子传

青云意气已参差白髮精神只自嗤喜汝登科年尚少好摠事业趁明时

黄石榴花

六月羣芳歇榴花拆浅黄色方金菊淡体异玉簪长触目犹能媚迎风不在香无劳问朱实秀发占中央

大行皇帝挽辞二首

圣文摭道妙神武拓边封治迹超三代焦心厌九重方仪韶乐凤忽驾鼎湖龙遗烈传千世鸿基固祖宗检玉将封岱遗弓已上僊新陵崇永裕旧节罢同天哀仗愁云外悲笳惨月边攀髯臣子恨万泪欲成川

再咏黄石榴花二首

花似新鹅色泽均萼如柘茧乱纷纷更临返照遥凝目翠幄无端惹瑞云

佳人最爱石榴红染作轻裙步履同唯有此花难入意任教荣悴逐薰风

自剑还道中寄同事苏进之

君寓姑苏吾舍杭惯从云水乐仙乡相逢邂逅趋端礼同职间关到益昌疲俗未肥心所病故园何在梦偏长新阳欲动林泉好觴咏随时且自强

宿上亭驿

按部嶽崎向梓潼上亭孤驿倚寒空淋铃尽想当时雨吼地愁闻竟夕风冲冒狂飈忧病体驱除宿翳懒神功吉朝揽轡逢清霁致敬宜将樵意同【谓唐孙樵也】

谒梓潼庙

英威凛凛西州血食潼江度几秋曾运陰兵摧贼垒每均甘泽惠农畴翠帟半卷香烟动金榜高题日影浮暂止轺车聊一奠肯将曲祷累神休

题岑岩起剑门诗刻後

扑面尘埃二十年纱笼石刻顿光鲜庾辞不用题黄绢自有惊人秀句传

和岩起观旧诗有感

弃繻东去有遗篇杖节西还近几年莫向长岐悲齿髮似君行学可怡然

又和十二月二十九日思封道中

巴山险阻备尝之笑读豪篇似抵巇况是岁华垂尽日却为贤者独劳时寒多未放泉声活春近先从柳眼知早晚星轺趣回轡东园共醉小枝枝

和资守许泽翁见寄

十年为别只逡巡喜见来篇墨色新且解征鞍同一醉异乡难遇故乡人

长柳馆

地名长柳柳初长下马临泉却坐床客舸傍沙收百丈野禽窥水竞双翔

筹钱铺

里名胜母曾车止邑号朝歌墨驭还我领漕权来此坐不唯自哂且頽顔

见性堂

由来迷悟尽真如见性名堂亦谩书万变纷纷任交战一心了了即安居
檻花天秀乌能浼庭栢孤高自有余多谢前人为留意使予聊得寓清虚

都竹道中

陰平才过万山重路指江油栈阁通峯顶云收余夕雪马蹄尘少带春风
一溪水色瑠璃碧几坞梅花锦绣红莫谓奔驰足劳苦目前佳趣亦无穷

过赤岸潭

轻輶晓过赤岸潭莫讶凝眸涉再三百丈澄澜连底见千寻翠壁与天参
钓丝森蔚迷芳岸鹅管参差滴秀岩胜槩心藏俟能画肯教凡笔谩镌鐫

过雪峯亭

二月春将半山高雪未消危亭在屏障万水缀琼瑶似与尘寰隔安知云路遥
区区澄按外暂得驻轻輶

经望星山

缘崖陟磴势凌兢偏坐银鞍傍险行更向望星山上过扪参方信不虚名

蟾啼岭

艱脆肩輿半側身嶽岨石磴但无尘山行从隶难成列路转前驱却向人
更瞰江潭尤觉险独怜桃李解粧春他时跃马康庄稳莫忘欹危蹙頞频

亭溪道晓行

白云起处山樱发绿柳垂边水蛩鸣唯有晓寒殊未减重裘还似冒霜行

至白水驿辍趋文还益昌

辍程趋疾且归来莫讶回船在不期恐失东园桃李色一年深恨欲何追

和许冲元内翰易元日登塔之游为再登

浮屠屹屹势参天旌旗朝临又一年一日再登清兴足旧游新变异时传嘉篇却寄踰千里遗爱相仍沸两川尘湏剽闻肝胆醒况陪胜览即芳筵

又借前韵为攀别之作

紫诏催还二月天清台颁历涉三年高文昔冠羣儒首异政今为两蜀传此日旌旄度危栈何时舟楫济长川筋骸渐远劳瞻望犹想飞花傍祖筵

和岑岩起见寄三絶

别来凡历几重山又报兼途策马还而我病躯方觉健喜时觞酒助谈闲

分携斜日在青山不意黎明我遽还却向益昌迎马首由来无定是人闲

百丈江流万仞山一车方往一车还若教说着邯郸梦都在葫芦掩口闲

谢岩起寄凤团茶

北苑先春云凤团封题分寄墨初乾未甘金碾消磨了且作琼枝爱惜看水异康王烹莫称才非卢子咏应难强抽鄙句惭瑶报佳惠轻酬岂自安

至西县走呈岩起

所部虽同邂逅稀今年差比去年迟蓼图犹忆当时玩菊酒还陪此日持衰髯已斑乌足叹壮心徒在竟何施相逢且尽从容兴况是终更欲及期

再和岩起以诗答谢惠团茶之句

灵芽不减密云团十袭清香翠若乾羌句聊纾情内动明珠更得掌中看轻投雅贐公为易并

获殊珍我自难报德酬言古人重斐章不再岂遑安

城固道中先寄

睽违旬浹似朝晡劳想清水映玉壶谩寄小诗驰鄙意更能还贶雅篇无

税鞅行邮日欲晡汉臯重得造仙壶不知挥麈交谈外还许拢弦入听无

凌晨马上得惠诗再次元韵

诗筒方讶惠音稀击鉢来篇果不迟定欲擅场专独胜岂容遗幅久相持招邀近想融樽满往返多惭孺榻施况得鸾弦声出幌肯教马足自稽期

建芽精嫩凤为团海错珍鲜鰕作乾远物方慙容易献来篇不似等闲看始忻报玖情何厚幡觉阳春和独难写寄中州传好事须教纸价踊长安

自今酬唱不宜稀所恨诗盟结已迟两阵辞锋漫交战一坛将钺敢争持宦途何愧为难进老境宁当效力施相遇相期情谊远莫临觴咏数瓜期

闻胡琴一首

园林雨过秋萧索幅巾谈笑情方乐歛然一抹四朱弦续续清声透帘幕轻拢慢捻手应心如出自然非以学露蝉凄咽春莺啭变化逡巡动寥廓审音度曲肃衆听歌舞满堂生寂寞自嗟投老饮量衰一举为空金凿落

书西县壁

判袂知非远驰轺约屡经犹於暮云底回首汉臯亭

闻岩起至以诗先寄

宝峯亭下菊鲜鲜妩媚秋风似可怜欲摘一枝分玉盞星轺莫惜屡扬鞭

公来税鞅且盘桓山国萧条正早寒虽缺鸾弦翻妙曲聊凭螳酒助清懽

和道中咏怀

酒軼刘伶颂茶高陆羽经庶几延笑语何事驻长亭

和述志

振职提三尺潜心醉六经高材难浅度岂止狱平亭

和念祖

仰服籀金训传家在一经况当声教远夜柝静戎亭

和庭橘

常思洞庭橘美实冠南方雪蘼千林谢金衣万顷黄辉光依泽国髣髴在仙乡沈咏滋迎露韦
诗寄待霜远邦方渴想邻圃得清香未用矜封户何如助醕觞分甘音尚阻抽思韵空长岂必
三吴渚宁烦一苇航搘筇即可到反掌便堪尝慰我东南梦殷勤送斐章

又和告成寺

嘉陵江势并山回山寺双扉对水开凿石千寻维佛屋参天一举类仙台白云有意频舒卷幽
鸟无情自往来心境两忘真未易登临便谓出尘埃

送益铃高宣事

王孙远器世功勲材略纵横旧出伦春事近违文陛侧铃兵遥指锦江滨赠篇累什皆通贵去
国賒程少故人倾盖相懽一樽酒感君离思并如新

过青山

迟晓扬镳陟峻冈马蹄凌厉踏新霜崔嵬昨日参天碧萧索今朝满目黄堕叶离披疑虎迹曲
蹊盘屈类羊肠按行若也多裨补敢惮崎岖道路长

至苍溪

輶轩寒入苍溪县秀句遐追老杜诗送客泛舟空往事过峯来摘似当时高材遗兴千年在远
宦羈怀万里随索笔谩题行馆壁可能闲料後人思

自西水还少憩锦屏山广寿院

按行回轡阆城南登陟崎岖力不堪却坐锦屏休倦迹暑天冰水沃醺酣

云台观

缘崖涉涧上云台古观稀逢车马来翠栢迳深长蔽日玉鱼池浅仅胜杯取桃人去无遗迹鎖
药炉存絶旧灰唯仰天师凜然像祇愁双剑起风雷

谢岩起惠支颐二首

几杖安身外於兹用智深见貽扶勸頷捧受识仁心本异支离隐何妨彦祖钦唯愁说诗善笑
解恐难任引髭聊试颇安然正好凭依学坐禅儿女环观齐指笑朱顏犹未怯双莲

和苏进之见招兼简岑岩起

夫君捧诏独先来趋节还先数月回联事已忧将判袂列城况是未丰财翻蒙雅饁同肤使更
枉清篇费美才若得星轺留暂驻吐茵强酒不辞陪

和子方登朝京楼偶成

登楼为喜乍晴时欲倚栏杆日已微头上云生还作雨座间风劲却添衣笑言且共须臾乐气
象休惊顷刻非应是催诗念前况果然高唱属先机

再和

楼号朝京人未归浮云蔽日雨霏微静论国手饶基路闲喜官身着道衣心慕孟轲潜养浩年
过蘧瑗久知非随时觴咏聊同乐全胜区区竞巧机

再用前韵奉简

未能形德似支离行学由来恨力微罔利唯羞陟龙断可言宁念卧牛衣高材幸遇同忧乐公
论相投壹是非待向游从废碁局区区安用谩藏机

和答前福守林中散

使指频将念匪宜闽山何敢惮驰驱荐贤銳意先推鹗逐恶雄心肯问狸却愧裁篇为惠重况
当卧轍欲留时光芒照眼观华藻遥想张芝墨满池

福州古田天王院撒珠轩

过颍因人激跃成撒珠取类亦虚名偶观却忆鍾离意委地当时事独清

谢公永惠荔枝

筠笼远致色犹鲜咀嚼琼英真味全多谢仁人怜病渴故将灵腋爽心?

和子方夜过卧云庵絕句

自愧银鱼久未成区区从政谩辛勤过庵佳句撩幽兴待买青山占白云

曹子方静常庵

爱君新作静常庵况是佳名继郑南昼坐不知人扰扰夜存长保气酣酣寓言记述希庄叟复命栖时慕老聃标榜粲然辉衆目几何立懦与廉贪

答曹子方少年弄篇翰一首

虚堂隐几坐忽忽若假寐飒然清风来顿尔爽昏思新诗执在手展读过三四初言少年弄篇翰喜道白髮聊自戏次惊老境今且迫岂甘物役汨其志轻视富贵如浮云极论穷通钧一意高谈念平时健句存远记请老愧袭常先期乃吾事君年才知命耳顺予阙二自此七星霜投绂去朝市是时取高篇却托冥鸿寄公方处要途利達沛才智见诗当不嗔犹认旧书字其来不待索应亦念衰瘁君年方如我今日那肯抽簪饵芝术庶几得以警幽情莫忘采真挥劲笔

游武夷山二絕

泝溪游覽絕尘纷看尽奇峯过所闻昔日幔亭何处是寂寥空想武夷君

心爱仙山役世缘乘輶欲去谩留连更祈秋日停羲馭莫遣回头怨暝烟

寄陈安道同年

执别都门四见春悠悠吴越断音尘尔来虽幸官居近所得唯蒙手翰频折桂交游三纪外系匏踪迹两溪滨未能把酒论离濶聊寄篇章托去鳞

游武夷山二首

一溪秋水碧溶溶逆掉扁舟遡晚风卧看峯峦耸奇势心疑造化銜殊功宾云曲断笙箫远机石苔荒组织空仙理冥冥难究诘抽簪归隐羡刘公

融结山川凿混元谁为窟宅遗神仙三千曾会幔亭客十六仍标洞府天崖有珍苞不缘种棺遗清骨莫知年披图昔谓多增饰至此方知画未全

游武夷山寄曹子方

访寻仙迹覽羣峯诘曲清溪两桨通
幡念不成秋後约独游还与未来同

和蒋穎叔重山馆留题

清诗题柱几朝曛二十余年伴岭云
今夜泥轮犹宿此隔溪依旧磬声闻

江墩舖

郊原秋老湛无风孤坐危亭夕照中
刈熟人归荷肩重嘻嘻笑语话年丰

宿泰宁县驿

紉如五鼓响寒厅夜艾东窗未肯明
一片滩声聒幽枕几番归梦不能成

离建宁

境穷昭武入长汀溪侧山根指去程
护险栏干红繚绕依稀如傍蜀江行

烂石

嵌岩烂石耸溪湾峻削陶人手不闲
落在深郊犹及此斧斤何必叹牛山

宿宁化县鷺峯寺

轻輶冒雨势匆匆晚入幽溪宿鷺峯
一夜泉声绕清榻梦回何待晓来鍾

留题龙地岩

应龙何日跃天衢不识还思旧隐无
见说至今遗惠在每兴云雨救焦枯

临汀行馆十月桃花盛开

十月临汀气候讹桃花零落发林阿
也知欲趁春风媚争奈穷州地暖何

宿宁化西隐院

邮亭地远宿禅扃夜永时寒睡思轻
檐溜不鸣知雨止窗棂半白悟天明
更攢百点催兵从鸡送三号起使程
自愧区区少裨补北山文在盍留情

过鳞原驿

晨餐才了又遄征驿榜鳞原以地名山顶寒多雪花重溪湾流浅玉沙明田畴有获良农喜社鼓无声暴客平奉诏非材幸无事行中时得肆吟情

度烂溪

独木为桥度烂溪溪傍山石烂如泥高低采削材如一祇恐钩陶意不齐

二月十二日早按行临汀遇大雷电而雨

传车十月到长汀鬱奥犹如暑气生经夕山川带云雾凌晨雷雨动栏楹乍逢旅客殊多怪惯见邦人情不惊聊作小诗传所遇他年稳坐活平生

晚洲岭

行行晚洲岭高若离人寰肩輿薄层霄身在杳霭间朝天及青泥谁谓蜀道难岂如兹峻陟不类羊肠盘斗上五千尺步步须跻攀隆冬犹汗浹睥睨唯心寒旁沾宿云润下视飞鸟闲恍如陶公梦插翼冲天关潜慕汉忠臣叱馭毋盘桓古语固有之酖毒比宴安君恩思未报何敢惮艰险临风一长吟所叹两髭斑

师子峯

欲将师子号奇峯蹲踞如真倚碧空闻说近山无虎啸可非潜伏畏威风

双溪驿

按程颇自觉淹留朝夕经行处处幽忻逢古驿双溪水追忆东阳八咏楼

陰山馆

圓峯聳於前鸣泉绕其後若使画成图谁云非傳会

游宝盖岩

度溪履险得幽岩欲去徘徊意尚贪吏部祝融峯下句未宜留此付镌鐫

题馆节堂

建阳溪水接仙流溪上新堂气象幽弭节柅轮从便适观风问俗得优游凌虚岌岌围千嶂据要冲冲控八州白髮书生倦奔走每怜潇洒为迟留

寄曹子方

度溪踰岭一何劳霜髯鬢首屡搔自愧晚年空碌碌唯逢佳境且陶陶会仙古观风流远馆节新堂气象豪不得与君同啸傲强抽荒思引吟毫

再和

佳和殊堪渴想劳幅巾霜髯遂忘搔长言灿灿经三复至乐融融共一陶遇事未能全吏隐解颐幸得接诗豪愿前瓜代频酬唱任秃秋蟾玉兔毫

和曹子方

遶舍方怜喜鹊鸣临风更听振金声戇儿远宦趋庭过善友新篇击鉢成荒学漫传乌足道嘉辞借誉一何荣凤毛池上他年贵谦晦终难掩道耕

和子方赠祖夷仲提刑

蓬萊为别几秋风倅乘当年服狗公梁汉曾嗟失高躅瓠闽幸迟扩前功税车白髮相看喜把酒黄堂一笑同行见荆清八州境里言应不咏垣东

冬至三日游水南诸寺

曦轮飞上宿云收晚出城南趣适幽六寺连延行复道一溪萦绕泻寒流世情共喜新阳复仙境聊成极目游不以篇章记登覽此时清兴若为酬

和公舒太守长至游水南僧寺

纷华盛丽已心灰?履寻山尚喜陪聊藉琴樽乐清景全胜车马冒黄埃年登况毕三时务阳复仍忻七日来更爱起予传秀句使君诗笔富天才

送曹子方

判袂长亭岁律残天寒云霭惨溪山间关唯恐君兼道寂寞仍愁我独还秀句八州神物护轻轺千里老人攀他时企想音书外伫听休声聳近班

护国院十咏

雷分石

闻说丰隆为剖开非关星陨自天来数齐元凯峥嵘势不是寻常作削材

香炉峯

由来元化作钧陶赋象香炉峯势高恰似羌庐山下见不容太白独抽毫

天然桥

欲渡银潢上九霄回头云路正迢迢谁知略约由天造全胜间关履鹊桥

玉印峯

拂云苍翠势嶽崑玉印分明带秀林变化固非缘堕鹄天将宝玩镇幽深

石监峯

天悟迷人亦自然团团石镜为高悬潜令演若狂心止忘照回情学坐禅

蛰龙潭

蛰龙潭上木陰森百丈垂丝未度深蟠屈只应如传说俟时腾跃作商霖

放生池

看收数罟买鲜鳞纵在深池是亦仁但使校人诚子产自然微物遂天真

凤凰山

凤凰山色似晴光半入青云两翅张谁谓太平宁有象峯峦犹学瑞禽翔

鎖翠屏

屏名鎖翠势弯环环境胜全疑出世间枕石眠云乃其地谁能先向此中闲

仙茆峯

餌茆仙去絕遺踪屹屹孤峯倚碧空空使时人想鸞驭寸心长惑有无中

次韵推官东庵

紫竹交陰处微行接小轩
辘轳声在井薜荔翠依垣
自有山林趣何妨鸟雀喧
公余聊宴坐方寸得澄源

步云亭

官居潇洒并城壖
城上危亭势屹然
庠豁四檐通日月
回环千里见山川
凌虚迥絕寻常地
据要追吟尺五天
莫讶白云随步起
望中祠宇指梅仙

又和李世美再题步云亭

嶢嶢气势压南闽
髣髴鹏程近紫氛
女堞却依丹檻底
翬檐迴与碧霄分
融樽有地留清景
阮屐无时蹴乱云
引脰更劳西北望
子牟驰恋继朝曛

和世美久雨枕上偶成

釜中何虑致鱼生
庭下宁论辍运甓
夜厌繁声惊梦枕
朝愁润色浥书屏
无聊搔首怜垂白
遣兴题诗写杀青
此段公居正岑寂
还如旧隐掩柴扃

又和久雨

继日霖霖势不停
淙淙高屋似翻瓴
气昏亭阁迷仙境
云闇山川掩画屏
穞麦潜忧化蛾白
溪荷遥想没钱青
占晴问蔡师前语
罄折恭於奉鼎扃

晚晴

积雨鎖山城幡然喜
晚晴园林变新緑
沟洫有余声
日色间何濶
云陰否已倾
无才希杜赋短句且抒情

红蕉

红蕉秀南土对植燕堂陰
每为开青眼唯怜吐赤心
华丹天赋异凋瘵岁寒深
拟夺兰茝誉殷懃约共吟

和刘公舒题步云亭

締构迢嶢倚碧空
建安气象瞩清雄
自矜远目穷天末
更喜新篇入彀中
坛指昇仙叹梅福
山连梦笔想文通
梯云每到如平地
养勇何须羡北宫

五月三日见萱草一枝

薄薄初阳晓雾披庭萱再见似相知月临仲夏才三日风折今年第一枝
蔦翦兼金黄灼烁干瑤圆玉碧参差好花来岁应如旧知在何州记此时

和世美吉祥为别

山驿迢迢畏景舒星轺不肯少踟躇先之古寺图分袂故约前驺幸柅车
雾卷茗瓯分啜罢风收谈麈赠言余虽知暂别非踰月尚覬邮筒数惠书

又次韵庆除代

一封黄牒下云头受代需时若自谋虽幸有期趋北阙自惭无术惠南州
累年尘土甘祗役万里烟霄想告猷犹赖高材见裨助不教孤迹漫淹留

去冬留题管节堂世美朝请今夏按部过之为诗见贲辄次韵奉和

拙句惭先刻佳章幸继游褒题踰八字传咏入中州舍馆仍增丽时炎倏变秋
悠悠想清思长似建溪流世美朝请贤友近按昭武还宠示道中杂诗十三首因成拙句奉呈

冲蒙盛暑历山川肤使何尝叹独贤星骑逡巡一千里仙才洒落十三篇
笼罗絶顶裁诗句撻发高情破万缘但恨阳春难继和暗投终辨夜光圆

荔子

闽地高材最杰然结成丹荔冒炎天堆盘火齐光芒转溜齿琼浆气味全
玉井莲房空赋咏秀江萍实谩流传更哈蜀品烦驰传闾向红尘动笑妍

与世美奉诏旨分督决狱甲戌判袂之武阳壬午还宿中兴寺而得世美自延平所寄诗因次韵

盛暑宵忧动遽旒敕催诸道决累囚承流宣泽弥兢惕履险航湍敢滞留
南北分驰才数夕重轻释繫已三州高材想尽哀矜意美疾当从勿药瘳

八月上澣登步云亭

一日优闲九日忙步云亭上共翱翔地高始觉秋风劲事隙方知昼景长
戏举禅谈一重案静看茶战第三汤吾民况有京坻望远宦宜从啸咏忘

中秋夜雨

秋色中分夜气清月华今夕最澄明如何骤雨横来势不徇高楼倚望情桂子飘零无处覓
烛花燿焰为时生莫辞尽醉酬佳节犹觐余光接晓晴

公舒朝请得福守所寄荔子佳品二而咏以二诗乃以为示辄次韵奉和

邻境緘驰荔子丹黄堂矜诧满雕盘香收残爇余龙脑牋写新诗掩凤团咀嚼定嫌琼液薄形
容更比水精寒强抽滞思聊追和珍菓清吟两可欢

佛宫奇品号礶黄黄穀笼珠径寸光种异却轻萍有实味甘全胜蔗为浆南人拭目惊稀见北
客流涎试一尝翻笑洞庭霜後橘岂能当暑侑持觞

建安郡庠重彩记事

泮水秋深爽气全簪绅戾止共拳拳丹青图写三千礼藻绘形容七十贤如堵聿来观盛集采
芹应有赋新篇诸生好进公卿业此日风流亦与传

九日示壽隆

九日闽中气尚暄扶持病体坐家筵喜看数朵黄金菊强引三分白玉船浮世漫论轩冕贵佳
辰难遇子孙圆明年汝对陶公菊应念欣欣戏彩前

建安山水亦几希九日登高着处宜秋杪风光自潇洒老来情味少欢怡举杯喜见黄花泛落
羞将白髮吹佳节不能成酩酊浪吟小杜昔年诗

留题南剑州延平阁

危阁横空待胜游登临尽道冠南州面分列嶂环羣秀坐看双溪会一流斜纳朝晖长易旦逆
消暑气每先秋更传宝剑深潭近半夜寒光射斗牛

冷风阁

胜槩天成所得偏一来登覽兴飘然拂云栏楯尘寰远隔水楼台画幅全隐隐归舟摇落日悠
悠飞鸟破孤烟冷风可御非虚目况是层峦对演仙

题尤溪县林平铺壁

前岁方离蜀道难崎岖今日过黄山自嗟使事殊无补只向尘途历险难

题黯淡滩

慎操舟楫度危滩脱险从安反掌间岂似俗流争利達难防笑貌伏波澜

将到富沙寄世美同事

判袂于今涉五旬驰驱无复寓书频险途顿失往还倦高谊却忻朝夕亲近事欲蕲祛蔽塞新吟应许和清纯富沙此去无多地先走诗筒致所陈

和刘公舒见示生日诗

衰迟何幸住佳章远引吾宗及汉唐户挂桑蓬当日喜毫挥珠玉此时光欣临爱景披辞藻怯向清飈动髯霜松柏由来交茂悦愿回善颂岁寒芳

和李世美见寄兼送推官宰彭泽

北风传晓角宿雾鎖寒城秣马登途早将雏振羽轻一经承祖训百里傲官箴多谢龙门秀贻诗壮去程

又和道中书事奉怀

同日分携去先期掉鞅回驰情随道远残岁怯春催客舍惊新柳山城叹落梅佳篇慰翹望还馭过王台

和刘守正月十日新茶

乳雾浮浮啜新茗祇疑春自壑原来开筵人日踰三昼试焙申年第一杯首面光肥香已透辅车津润味全回不须七盃清风至满腋依稀在楚台

和正月十七日攜具见约

远宦随时且自娱看看受代又脂车燃灯初过忘岑寂极日相从接绪余瘴雾催花锦零落春风吹髯雪稀疎追怀古语成新咏万事无非酒破除

又和

着处山川秀可娱何妨投隙数驱车韶华已过三分一岁律才经半月余北海樽罍虽自满东阳篇咏不宜疎惟愁南国春多雨谁把繁陰为埽除

和世美以前韵惠诗

东亭清集幸相娱暮角声休尚柅车冷淡莲光灯夕後微茫桂魄雨天余交谈自喜高情合投老还嗟乐事踈况是离怀起朝夕好凭樽酒豫驱除

南园正月二十三日见牡丹因翦分送而公舒太守以诗为报遂次来韵

上元八日冒轻寒翦送南园两牡丹为我果然兴絶唱知君不作等闲看香余凋檻春犹浅咏入华牋墨未乾更说僧坊曾寄植纵观须待解征鞍

和世美行役不与贡第一茶

采凤团龙贡紫宸今年斗柄仅离寅四千里望中天阙第一番题北苑春拜表尽恭初遣使乘轺还念未归人太平岁集梯航献山岳何如此效珍

又和督决囚

盱食忧民睿思焦默怀时雪滞层霄十行新下寛囚诏诸道交驰奉使轺縲绁稀疎至恩浹旒倪欢感大钧调宣扬德泽慙绵弱但采尧民擊壤謡

和刘守以诗约赏南园牡丹

闲花浪蘂漫芬敷满檻妖韶体自殊且看淡红随分有须知絶品此中无剪愁魏国掺掺手辨怯齐门一一竽已埽幽亭待清赏更烦佳句预相娱

别刘公舒

间关杖节使全闽何幸邦侯遇故人谈笑一樽时得暇讴歌千里政如春解携白髮情非昔赠别清篇思入神却想萍踪流未远会看飞诏趣朱轮

出闽境永丰道中

去暮愁行泗州岭清晨喜见江东山二年巡按劳南走尽室安全庆北还负弩兵回喧渡口插秧人看立田间却嗟奉使无裨补征返徒添两鬓斑

道中闻莺

栖止垂杨最上枝緑丝深罩鬱金衣也知行客留心听弄尽新声始肯飞

水碓

杵臼功能自古施更堪引水代人为谁知满溢倾欹处却是临机效力时

滕龙图挽词

践历清华四十年老成忽逐逝波迁盐梅未展和羹效裘带终淹分阃权忠义长为古人比功名固有史臣传不材曾附风雷末远寓哀辞倍泫然

送孙圣微同年赴浙漕

当时折桂共云梯四十余年迹久睽白首为郎方接武绣衣出使又分携放船汴水寒犹浅跋马都门日欲低远想清风播仁闻融融先满浙东西

雄胜东南越与吴光华使节暂驰驱比年郡邑多疲俗今日朝廷用老儒固有风声镇嫚薄何妨膏泽慰焦枯公余且尽登临兴严召终难缓走趋

张大资挽词

峥嵘仪貌国辉光曾与明堂作栋梁颡面鉅藩方偃息间生英气忽飘扬文章絶笔星辰晦德业遗芳简册香不以修龄畀贤杰伤嗟无处问苍苍

熙载功成髯未华蕃宣屡易见褒嘉凤池旧别经年久鹤驭新乘去路賒哀挽声凄霜月冷铭旌影转晓风斜故山归葬依先壠千古悠悠贤世家

送莫和中刑部致仕归吴兴

司刑华省健精神容易飞章便乞身未老先休多有志似君勇退几何人安车渐远京尘路归棹仍追雪水春而我区区尚持禄自惭乡境谩为邻

大行太皇太后挽词

德业高千古忧勤尽九年卷帘将复辟弛卫忽登仙饮泣均中外流恩在幅员春风低挽唱幽咽厚陵边临朝扶圣治盛烈掩姜任寿享尧龄浅哀添舜慕深灵衣粲翬翟溢册刻球琳仰望轩星晦凄愁万国心

和刘公仪郎中对雪

九陌尘埃变玉沙云中双阙陋仙家丰年欲啓三登兆大巧先裁六出花高卧洛阳逢汲引雄

文梁苑动吁嗟郎闾自愧徒温饱坐拥炎炉叹岁华

和刘公仪省宿呈同舍

夜宿冰厅愁解衣南宫正是苦寒时窗含积雪犹明几炉拨残煤始卷帷无所忸怩当俯仰不须容易叹衰迟更为佳句贻同舍使我挥毫美色丝

次夕宿省再用前韵呈同舍

凜烈寒威着寝衣中台独宿夜分时郎潜已叹斑冯髯幼学空思下董帷直舍孤灯生晕浅禁垣清漏送声迟何年追语今宵事笑向江湖理钓丝

再次韵和公仪所示

忿忿下马脱朝衣夜直仪曹岁晏时香穗萦回清一榻烛花明媚耀重帷诗成白雪音难和梦断黄粱熟已迟见说迟明还剡奏恳求宫钥待言丝

和公仪索和诗

唱酎三峡浪飞花敏捷曾蒙秀句夸为感来篇惊岁暮因成阁笔待春华见斑固已慙窥豹失酒当须鉴画蛇鄙思强抽迫险韵还如策蹇度褒斜

又和忆小园梅花

为忆新梅发旧枝勇操吟笔对晴晖幽香不到青绫被冷艳应迷白羽衣忽忽屡经春色改纷纷或傍笛声飞祇疑渴想高情剧频向冰厅有梦归

和喻明仲题纯粹大师虚一轩诗

闻说琳公最佳处榜题虚一一轩清逍遥羽客真高隐旷達星郎肯谩名琴挂无弦藏至乐炉存微火鎖长生未能投步资闲适聊和新诗托寄声

和陈图南见喜权金部

綠槐经午转庭陰投隙相过省闷深且喜清谈共挥麈莫嗟白髮各盈簪邻曹尚幸联官乐兼局那辞冗事侵更辱高吟叙情旧侑欢何必浊醪斟

又次韵

诗将争功定绎骚堂堂风格等刘曹高情迭唱通三叹险语相先较一毫酷暑俄惊变潇洒噪
蝉何敢助雄豪嗟予老拙慵牵强养勇终怜不目逃

送孔彦常待制赴宣城

宣城从古号名城新拜除书拥旆旌刻奏屡传求外补偃藩颺得遂高情虎符南国先声重鷁
首秋江去意清最好笳铙将压境敬亭山色远相迎

又和义夫学士

开府南陵气序秋翠屏千垒对岑楼力宣膏泽均千里坐赏溪山冠十州小谢篇章耐吟讽谪
仙踪迹自风流公余好尽登临兴应诮区区宋玉愁

胡右丞挽辞

石辖辞荣重寄分却趋召节造天阍表仪八座方尊德惻惻连章乞偃藩将见辨严离凤阙忽
传感疾自鹄原公薨不及期颐寿至理冥冥岂易论

邓左丞开府挽辞

学术材猷间世资进登丞辖仅踰时壽非德称天何恡命与心违古所悲一品衰荣加赠典九
重震悼辍班仪灵輿还葬从先壠呜咽秋风薤露辞

和盛中叔侍郎斋宿唱酬

谁谓南宫夜直频宿斋清集迴难亲翌朝唯幸窥新什三纪尤欣叙古人共庆球琳已华国独
慙樗散漫先春更将鄙句追诗战益耻弢弓托负薪

尝进酒

昔年北苑试龙茶似陟云霄饮露华今日礼曹尝御酒又疑尘迹到仙家自知衮衮官身幸莫
向区区俚耳夸此段出於尸禄外支离形德更何加

钱塘集卷六

卷七

<集部,别集类,北宋建隆至靖康,钱塘集>

钦定四库全书

钱塘集卷七

宋 韦骧 撰

柵山驿早起

柵山孤驿夜寒清
襆被?柴坐迟明
行旆动时红日上
肩輿经处白云生
连峯峭恠浓铺翠
流水盘纒数送声
自喜区区王事外
纵观佳境有余情

望崖上遗构

万仞苍崖耸碧空
谁为危室?云中双扉虚辟
无人到疑是飞仙逞妙工

四十八渡

山盘水转路岐开
揭厉凡经六八回
若向芳春桃盛发
几何非自武陵来

送刘公仪典四明

人间离合固寻常
契义稠重岂易忘
崇政青春同擢第
文昌白首并为郎
东城判袂情怀惨
南国分符兴味长
唯伫东风慰瞻望
治声当不减龚黄

和何子温郎中家园一首来诗有风月同吟之语故篇末及之

江河清兴渺无边
又睹新诗忆故园
仙爪虽欣搔痒背
布音还愧过雷门
祗闻松石夸朋旧
应免纷华遗子孙
何日幅巾陪燕坐
共将风月快吟魂

自峡之夔过竹竿山

行路始知难覆盆
千石间为逃人鮓
瓮敢憚竹竿山
晚日羣峰碧
春风两鬓班
何时似都护
还度玉门关

荅宋茂宗诗卷

夔府春残暂息肩感君佳遗意飘然顿忘巖嶮三千路为得风骚五十篇山水清音归老笔球琳秀气满新编虽无健句酬来赋终日吟哦兴自全

宿云安 云岩寺

去国三千里携家四十程云岩暂投宿聊使梦魂清

雨中观白莲一首

终日飘零酷暑平白莲池上独含情已怜莹洁添花色更爱淋浪打叶声宫女洗妆余粉泽水仙欹弁濯琼瑛漫携玉盏衔冰酒气味须教一等清

读潘阆再过钱塘一絕

昔年潘阆足诗情曾过钱塘眼暂明今日天涯闻此句无穷乡思逐江声

和答韩循之送行诗

归隐无田计未成区区叱驭又遄征自慙白首犹尸禄何补清时漫远行谈麈追思挥玉色送篇珍重发金声欲知天末相望处云水苍茫白帝城

和荅刘子先舍人送行诗

梯险航深岐路賒国恩未报敢咨嗟感公秀句浑惊俗送我孤踪远使巴民讼稀疏几吏隐官居岑寂似山家举头霄汉思贤躅聊和来篇示拜嘉

明恕斋

明恕题标榜心随目所瞻平反长在念燕适自无嫌山气侵朝幌江光射昼檐几何非吏隐危坐兴难厌

中秋夜待月不见一首

中秋待月异寻常桂魄如何特晦藏疑是天心忌盈满故将云影蔽辉光旁徨注目瞻霄汉冷落呼灯照豆觴须记今宵有余恨明年此会莫轻忘

寄明守刘公仪

去年更直宿文昌今日睽违各一方遐想四明安坐府肯思三峡险乘航恨无羽翼亲谈席应

有笙歌簇燕堂旧好未宜因远废邮筒时且寄篇章

九日

重九萧条秋已深登高更在蜀江浔黄花未肯趁时吐白酒祗如常日斟
絕塞烟云长满目故园风物愈关心须凭酩酊酬佳节追感齐山不浪吟

宿缙云僧舍一首

石磴跻攀上缙云九峯苍翠与天邻岩崖佛屋疑神助烟霭禅局絕世尘
此日乘轺宿寒夜他年屈指数青春山僧莫笑恁恁去寻胜能来有几人

过温汤寺一絕

一窦飞泉煖似汤池鱼无数自洋洋不须遶寺寻碑刻知是南平古道场

武龙道中

四十年前前进士三千里外外官人手提邦宪平冤抑敢不公心报大钧

放船一首

峥嵘岁垂尽泛鷁下岷江鸣櫓风声壮摇旌日影双巨滩何累累急鼓促聃聃语疾躯生翼论
危颈缩腔栖迟凭漆几睥睨近纱窗解缆侵朝雾休程傍晚缸童山连岌岌古木竞攲攲岑絕
行荒县间关按列邦俗书慵注目薄酒倦开缸仙迹徒追羨【如忠之丰都景德观有王方平
陰长生五云洞及万之南浦有岑公洞】名篇乃素降【如忠有白傅诗夔有杜子美诗】有
谁陪亶亶竟夕听淙淙幽兴将诗遣还嗟语意彫

正月二日饮茂宗官舍一首

然灯数百照青樽香穗萦回酒半醺却怪预为元夕态撩人乡思乱纷纷

咏八仙

捻鼻

道气本冲融胡为捻鼻中知无愿言嚏聊以快吾衷

爬背

刻成纤手利痒背可施功岂待麻姑爪携持意自通

呵欠

引手如双翼俄然一欠伸须臾端顾眄别是好精神

栲髻

搔首意不满聊凭象栲功高情唯自适岂恤鬓如蓬

鼓琴

万事不关心悠悠在一琴非山亦非水何必问知音

吹箫

内乐本无声吹箫且任情於兹代长啸自是一般清

横笛

不是乐繁音吹扬兴自深数盃醇酎罢更学水龙吟

捻耳

捻耳意阳阳林泉白昼长市朝声自远聪听又何妨

丁承受放目亭一首

择地为亭智思全飞薨如翼插苍烟身栖一哄喧声外目逆千山秀色边腊雪春葩饶映带峡云江月每流连所嗟此境藏夔府不入当年子美篇

人日太宁道中一首

改年三日立青春涉七风光日日新列岫渐生千霭媚幽禽初弄小声匀篮舆度岭官兵汗红旆穿林野雉驯白髮自怜犹远使何时归棹浙江滨

白帝祠一絕

瞿塘峡口江声急古木陰中白帝祠犹有余灵凭险阻往来舟楫祷安危

奉节道中望羣山有雪

腊去春来只数朝远山残雪未全消崑冈玉出清光莹沧海潮横白浪遥天外画图终日展云端仙佩许谁邀长途极目添幽兴更折寒梅渡野桥

和刘公仪见寄

崎岖巴峡走单车潇洒鄞江想载旗驰款比追前日好开缄忽奉去年书篇章互及情皆见踪迹相睽义不疏但使鳞鸿勿虚过何须临纸恨踌躇

忠州木莲花二絶

乔木开花似水莲画图远自昔人传【唐白傅有画木莲花图】化工既许殊凡品落在遐方亦可怜

绿叶枝头灼烁红尚疑轻易比芙蓉根苗不自污泥出只合移栽近佛宫

寄明守刘公仪

海角天涯相去遥邮筒还往势迢迢两篇佳咏兼金重三复长吟万虑销已向宦途惊聚散休将桂籍论荣凋承夸倒载清欢数使我流涎乡思摇

摆绣鸡

异质本难驯金笼摆绣频文华真出类舒卷速如神怒角双枝翠垂綫九叶新燕堂春昼永注目屡逡巡一片垂丹臆鲜明锦不如殷红间深翠半敛又全舒未遇夺真画犹虚博物书虽非孔鸾比傥可詫其余

戏答宋茂宗

穿山君蹈险逆浪我乘危玉事以勤济人生少暇时多材看腾蹕无补愧衰迟已饱殊乡味何烦觉後知【予至部後岁余】

寄李世美

都门执别再经春相望天涯引脰频峡外山川愁倦翼江西风月羨怡神来书虽阔情还密旧咏重窺意似新聊寄短篇追往好莫缘无雁便因循

送宋茂宗

三年持节使巴夔今日飘然受代归去棹勇争江水急前旌遥趁峡云飞陟明仁听跻华贯荣
觀应欣着彩衣肯记天涯留咏处翠岩幽洞亦几稀

渝南九日

草草开筵重九日区区奉使第三年黄花不肯趁时节薄酒可堪无管弦秋雨岷山犹涨水夕
阳巴峽自生烟登高兴味空惆怅万里乡关在目前

南陵坡

南陵坡对巫山县直上青冥百八盘此日身由岁巡到他年愁向画图看可堪雨湿羊肠险更
怯风冲狐腋寒却想九天朝谒罢禁街平稳跃金鞍

金山

金山目逆路之隅峭壁奇峰画不如若使峥嵘近京雒未应声价减南徐【润有金山在扬子
江心】

瘦驴岭

马瘡前咏闵驰驱登岭今朝歎瘦驴自是老来情味减欲图靡盬可安居

石榻平望七峯山

路过黔江石榻平七峯奇杰翠峥嵘祗应自有神仙宅肯向人间浪得名

宿木宗驿【涪州武龙界】

暮投荒驿傍岩隈更柝声频梦易回半夜忽惊飞霰急凌晨还喜冻云开雪凝山表平如截梅
发林坳迴若堆问俗观风何所补勤劳唯有马虺隤

二月

二月渝南春已老西园桃李顿萧然傍檐飞絮纷如雪贴水圆荷大似钱览物未能忘感槩纾
情聊且缀诗篇冯郎白髮知多少更向巴山听杜鹃

邻垣

官路蹉跎晚景斜更堪踪迹在天涯江春已老犹寒色山雨相仍减物华留滞唯知搔白首衰

疲何可泥丹砂无聊情思翻成喜喜见邻垣架上花

壽安县君挽词一首

乡党推贤懿宗嫺慕孝慈享年非及耄造物固难知神护铭旌远龟从葬宅宜幽冥复何恨夫子映清时再和张从道

二月

天气融融近禁烟巴渝风俗自熙然排门沽酒易成市着处看花不用钱一带江山入图画几番云雨促诗篇独嗟久使无裨补终日归心趁杜鹃

邻垣

官舍相依吾二家碧山之麓水之涯祗知闲暇交谈屑不觉逡巡改岁华坐喜良农得麴麦行闻异俗贡璫砂【近报张程二蕃已到溱川堡予昔官主客阅西南诸蕃贡目唯贡璫砂】衔杯且尽兵?酿安用呼儿索五花

和唐韦相国盛山十二咏

宿云亭

无心固无恋犹爱宿危檐况复寻幽客高情岂易厌

隐月岫

隐月月非隐岫名诚强名清光中夜满谁谓碍峥嵘

茶岭

种茶当岭上日近地先春始自钧陶手遗芳及後人

梅谿

青影笼寒水幽香逐晚风和羹人已远谿上自芳丛

流杯渠

渠湾水流速杯漾酒行迟莫谓经营巧清懽得所施

盘石磴

盘石以为磴紫纒上翠岑披云瞩佳境适此慰登临

桃坞

当日桃花坞多应傲武陵春风今寂寞犹以旧名称

竹岩

栳密翠婵娟结根岩石前不饶尘土地自信雪霜天

琵琶台

象物名台势琵琶出自然登临得真趣所乐类无弦

葫芦沼

沼有葫芦状成非疏凿功宵澄星月影彷彿似壶中

绣衣石榻

绣衣无已久石榻尚依然不识寻山客几人能爱贤

上士瓶泉

上士体虚无瓶泉与道俱倘余涓滴润可救衆焦枯

清远阁

屹然虚阁并莲宫似出尘寰扰扰中浩荡乾坤来爽气峥嵘栏楯倚晴空江奔吴楚流何急山接岷峨望不穷清远榜题真有意登临聊以裕吾衷

横翠亭

胜槩本天成增营智亦精何年丹檻敞终日碧山横青霭飘来薄澄江泻去明官居况相迓杖屨不胜情

九日

四逢九日峡江湄窃禄无功祗自嗤把酒又迟今岁菊开编还愧去年诗牛山凄感何其昧蓝水欢吟乃所宜白髮不辞吹帽落更登山阁醉佳时

答王晋叔

区区行役临南浦忽奉来书墨未乾见报新恩移亳社便疑衰迹近长安山危水恶行将免宦思乡情日渐宽朝夕放船来就别赠言应许遗琅玕

遇黄志仁

舟楫逢迎涪水滨久违应讶鬓霜新按廉虽共相望阔邂逅於斯两喜钧对舫晴沙旗影动交谈寒夜烛花春迟明又向东西去回首沧江雾色匀

别张从道

官居相并日相过盈岁光阴不觉多每幸开心互询度都忘倦迹久蹉跎新除忽遂东归欲雅好其如远别何把酒不辞金盞溢预将离索就消磨

别王叔重

区区奉使越三年晚得渝南刺史贤美政日闻行旧学高怀时见发新篇近违方得挥谈麈远别俄惊彻祖筵回首寒江初放鷁牙城隐隐隔云烟

送张公度之官南安

尽道清时多汲引夫何高翮尚卑栖迢迢别乘欣然去冉冉轻装寡所齎坐想推余先峽北行闻流誉出江西更将学行规逢掖桃李无言下自蹊

送胜之宰仁和

霜风掠野卷愁云紉紉催船画鼓频方喜乡闾得贤宰却惊燕席失佳宾去鄞迤邐穷残腊渡浙依稀傍早春恰幸主人真恺悌承宣相与慰斯民

和舒信道中丞

腊月才飞玉律灰物情已若在春台高怀果动山中兴秀句歛从尘外来兵酿可应随日熟官梅能不为时开何当举白西河上茗芋须容倒载回

又和

浅雪初成玉石灰冒寒拥腋上层台那嗟晚景催人老且喜新春入手来戢戢庭萱芽始迸娟娟池柳眼先开几回骋望南湖辙坐想高谈肠九回

腊月十八日乙卯立春丁卯会饮开元呈信道中丞

潇洒江城雪後天访寻幽境就开筵数声晚角催残照三日新春入旧年鼎坐探题频击鉢杯行度曲有危弦莫论俯仰成陈迹顷刻清欢亦可怜

再和

湖山清迥雪霜天结客寻幽布锦筵猛作清欢送残腊冥搜佳句待新年共欣爱日临樽俎暗觉和风入管弦数品香葩为时发潜知造物以相怜

春後五日即事呈信道中丞致平学士

闰余中朔蚤岁暮已春回沼沚全消冻林园半落梅南风湿旧础暮雨送新雷节物逡巡变衰顔忍不开

再和二篇

会饮临登燕【亭名】逢春第一回箏移未归雁笛送已飘梅北海俄空酒南山忽隐雷交谈幸投隙尘虑此时开春归虽斗顿寒去尚裴回已放沙茸草犹将雪掩梅清吟陵鲍谢高谊薄陈雷倘缓西行兴芳筵愿数开

复以前韵示别

泛鷁兹辰去前驺几日回离觞醺浮螳暮角听吹梅雪峤初消玉涛江远震雷应多解颐句归覲锦囊开

元正二日小宴呈席客

二日新年半月春朝来小雨破轻尘依稀带雪梅枝老髣髴笼金柳色匀投隙会并宜勉强转头光景祗逡巡不应万点花飞後方许伤多酒入唇

和章致平西兴见寄二首

金玉来音忽迺闻开缄恍若对丰神始知渡浙元宵逼遥想乘时乐事频恨不衔杯同此夕【十五日书至】可应聯咏属他人果然佳句先垂寄依旧余辉返照邻

天为元宵卷暮云团团放出月精神随时行乐与民共若处观灯彻席频玉笋坐邀同醉客琼枝怀想未归人更抽鄙句招回棹早复官居壮德邻

石都讲仲谟挽辞二首

高翮欲腾超年华忽早凋名言在宗室休誉满公朝卜远灵舆逝伤春挽铎摇南明此时路花草为萧条桂科名旧峻玉殿对新归异宠行将及英魂遽已飞贵来年不待志在命先违还葬春山晓空歌薤露曦

嘉燕堂

屋角翬飞栋宇深檐前老木翠森森琤琮虽欠泉声玉琐碎仍多竹影金胜槩岂顛供主席清驩唯欲浹朋簪但令广座嘉宾满不惜融樽罄所斟

九经堂

屹屹危堂近紫烟傍堂双桧亦参天四时风月收罗尽千里山川瞩望全阮屐登来何必蜡陶琴携上不须弦赐经虽缺名犹在此乐终为古所贤

鉴亭

虚亭屹立沼中央古匠施工亦异常略约相联虹对影涟漪四面镜涵光雕楹圆槛环然敞碧瓦飞甍势欲翔杖履时来涤尘虑可能随事见毫芒

探春轩

东园亭榭巧相因更辟东轩探早春面直小桥通沼沚背临宏构拥松筠鸟鸣鱼跃先时得柳绽桃苞入眼新造物也知摇落久应怜着意伺芳辰

宿凤亭

碧梧千尺覆檐楹宿凤何年被美名鸛雀不栖如有畏烟云常近岂无情林间日月於兹永物外尘埃岂复生危坐忽惊年龠晚漫吟嘉瑞乐昇平

和舒信道二首

樽前虽阙旧年人旧事重论迥若新记得长春为絶唱依稀难和似阳春

谪仙居处枕湖边手种垂杨已系船勿谓门庭岑寂久天将巨用理当然

和信道以诗见邀

摇摇画隼过寒汀为得新诗欲饯行
饮散十洲回首处暝烟疎柳不胜情

次韵周开祖清明会景之作

难并四者重良辰寒食风光泽国春
日滉湖光千顷绿烟披汀柳万条新
铃斋投隙登临好吟笔裁篇气格淳
顾我不能酬絶唱聊将鄙句慰邦人

又和会月波楼与范德镇赓唱之什

屹屹楼依櫓李城月波标榜映双楹
未逢秋夕披襟坐且向春风曳履行
诗伯高篇先独唱使君健笔许谁争
还朝滞客方无赖对此飘然思亦生

吴大夫挽词二首

浩气忽凌虚飘然厌虎符风流失循吏
术学丧醇儒飞旄冲霜外哀歌惨路隅
螭蚺有贤嗣遗憾想公无邂逅淮东别
逡巡二纪余岂期还故里止得望灵輿
直道钦遗誉高门仰旧居鄙情凭薤唱
聊以解欷歔

至节蒋颖叔见召以病不赴

一阳潜复自黄宫难变霜髯作少容
方伯以时均宴衍野人不幸困龙鍾
望尘修敬慙无及举白承懽恨莫供
但有诚心腾善颂愿随寿斚祝椿松

和周开祖即席

海云收雨作新晴春日开筵趣早成
六席共年谁独少千龄几半互相兄
须怜东道情尤厚况是西归盖始倾
更玩掌中珍句好不知帘外玉蟾生

和周开祖赋会有美堂呈权府察院

共陪红旆陟巍峩有美轩楹气候和
樽酒融融懽广座梁尘拂拂应清歌
风随江浦霜涛急日下湖山翠霭多
何处追谈此佳趣主人不晚在鸾坡

和宇伯修侍郎会中和堂二首

燕堂高会势峨峨拂面薰风气候和
广座初陪文字饮满城重听袴襦歌
锦裯藉舞矜回雪玉麈挥谈沛决河
牧伯娱宾同衆乐庾公清兴未为多

华构峥嵘倚碧霄开筵潇洒聚英僚衣沾翠霭天收雨目送银山海上潮半日清欢浹觞咏几番凉吹韵笙箫醺酣老客依幘庇归隐而今岂俟招

忆游金华洞一首寄婺守陈子文

不到金华四十年碧溪深洞想依然故人为郡应多暇何日双旌翠霭边

和宇文侍郎观潮

江上双峯屹若门秋潮涌出势横奔先声何翅云雷震猛逝直疑溟海翻壮观平分吴与越激波遥自巽之坤驱除残暑长空凜喷薄晴光列岫昏冲涉唯惊兀舟楫迁腾那复论鹏鲲仙槎远泛时相际野马兼驰力更掀华信筑塘无宿恨子胥乘浪有忠魂吴儿勿詫轻身弄自古冯河岂足言

送吴圣取给事

忠嘉早结九重知隙驷徒惊晷景驰祥鼓素琴犹累月恩除青琐已先期秋风惨处违丘垄霜柳疎中即路岐得志泽民贤者事伫观功业映清时

送深闇梨之越开讲

家世事簪绅方袍早出尘诗书捐旧习戒律悟前身杯度吴川雪经繙越峽春逆知专讲席着意警迷津

和韩琯山斋

爱君筑室踞青山高躅宁容俗士攀吏隐幽怀潜物外诗成秀句落人间涛江远向窗扉见竹坞静宜巾履闲顾我衰残倦登览偶来聊此共开颜

刘握大夫挽词二首

平生端素履四纪仕清朝移守将前迈修龄忽後凋琴书遗淡泊几杖舍逍遥有子光承绩幽堂慰寂寥弃养临茗水传声到武林仁贤没何遽老友恻尤深珠玉藏前咏风標起旧钦灵輿不克送薤唱寓空音

刘钦止承务挽词一首

年始踰强仕俄从逝水沅祗应怀永慕遂尔继先君利器方施手高翔未及云呜呼今已矣衆叹漫纷纷

钱塘集卷七

卷八

钦定四库全书

钱塘集卷八

宋 韦骧 撰

利州路转运判官谢上表二首

皇帝

臣某言伏奉告命授臣利州路转运判官已於四月二十九日到任管勾讵漕将之选误及孤踪敕戒之严仰膺睿训兼修程而叱驭涓吉日以莅官责重望轻迹荣心愧臣某诚惶诚惧顿首顿首伏念臣智非应变学愧知方篆刻文章窃儒科於皇佑之末间关州县脱选调於熙寧之初仅三纪以逶迤秉一心之朴拙俛仰耻随於曲俗卷舒辄意於古人不希画餅之虚声唯远素餐之公患而蔑然善状慙五十之无闻故慨若昌辰念千一之徒遇分永投於冗散甘自弃於轮囷岂图冒被宸俞濫分使指况远方之所寄在慎柬以尤详若臣之愚其实非称此盖伏遇皇帝陛下皇明委照鸿造曲成网罗遗材纲纪至治拔淹振滞尽公议於一时进善黜邪宣休风於四海曾惟微蕞亦玷选抡臣敢不勉罄其衷恪修所职省徭均赋下齐郡邑之为肃吏寬民上副朝廷之意庶几补报少助涓埃臣无任瞻天荷圣激切屏营之至谨奉表称谢以闻臣某诚惶诚惧顿首顿首谨言

太皇太后

臣某言【同前】择使远方岂容虚授擢材多士必厌公言寒踪获预於遣中惊宠实踰於意外即星驰而就职唯夕惕以疚怀臣某诚惶诚惧顿首顿首伏念臣性本倥侗器非宏博早尘科第久玷朝绅齟齬百端固乏趋时之智蹉跎三纪信知行学之难念幸位以是羞肯苟为而自弃晦迹或几於瓦合存心宁蔽於雷同然而历郡邑以承宣曾微善最累岁月而迁陟仅脱谴诃方偃仰於熙辰敢觊觎於锐进夫何天幸兹被甄收付之漕运之权飭以训辞之戒在於遭遇奚以克胜此盖伏遇太皇太后陛下化极圣神仁齐覆帔增广太平之业延洪累盛之朝为官择人每资於博采因能任职必协於金谐乃若孤生亦叨烦使臣敢不竭诚莅事劲节徇公激浊扬清劝十州之吏治抑强扶弱安一道之人情期有补於毫厘庶不辜於驱策臣无任瞻天荷圣激切屏营之至

贺擒获鬼章上皇帝表

臣某言伏闻八月十九日诸将攻围洮州击破蕃贼生擒首领鬼章等者戎虏肆凶骤干边障神兵仗义生获渠魁稟圣筭於无前伸国威於不阵蛮夷胆落将帅凯还四方传闻万口称庆

臣某诚欢诚忭顿首顿首窃以虞舜舞干而苗格周文因垒而崇降盖圣明之德动於无知则桀黠之情感而自悔倘拒违而不改固翦灭以为宜何兹丑类之尤独昧盛朝之化暨声教而狼心如故沾雨露而蜂蛭复生辄兴犯塞之狂以取覆巢之祸皇赫斯怒秋霜助肃杀之严天夺其心晚雾絶遁逃之计缚酋豪於反掌埽种落於亡踪自昔命征之雄徼斯决胜之敏此盖皇帝陛下神机渊妙睿断高明既隆柔远之文复振摧奸之武威加阃外鼓行皆貔虎之师势震洮东系颈尽氐羌之长正邦刑於万里壮军实於一时臣拘迹远疆驰诚双阙阻观都护归奉万年之觴徒效诗人仰歌三捷之咏臣无任瞻天望圣喜跃屏营之至谨奉表称贺以闻臣某诚欢诚忭顿首顿首谨言

太皇太后表

臣某言伏闻八月十九日诸将攻围洮州击破蕃贼生擒首领鬼章等者天威震远塞境戒严将略受成凶渠就执埽荡豺狼之窟振扬貔虎之功风声所加鼓舞以听臣某诚欢诚忭顿首顿首窃以犬戎遗种鬼族擅强屡扰边陲久逃鈇钺贪鸛之情不已猖狂之计复兴胁党类以相连婴城郭而自固未伸螳臂死当战陈之前已屈兽心生致檻车之内俾游魂於霜锬将就戮於梟街惟兹斩馘而献俘甚若摧枯而拉朽轰雷霆於絶域重华岱於偏师壮驩呼於奏凯之间虽同自昔纪擒获於书勲之际独盛於今此盖太皇太后陛下道合高穹德均厚载武不黷而所修必备兵不玩而所举必平致其专阃之臣应机以胜挫彼黠羌之首系颈而旋正治世之大刑增熙朝之伟观臣尸官远部引领上都念阻造庭共庆捷书之献愿闻虚堠永光信史之传臣无任瞻天望圣喜跃屏营之至谨奉表称贺以闻臣某诚欢诚忭顿首顿首

福建运判谢上表

臣某言伏奉告命授臣充福建路转运判官臣已於二月十九日到任管勾讫仰冒宸恩再叨使指局踣训辞之重乌敢少忘精勤职事之初唯忧不称臣某诚惶诚惧顿首顿首伏念臣倥侗末学朴小材遭逢圣时龟勉仕路窃第倏逾於三纪恪官敬历於四朝虽微绩效之可名固有朴忠之自信顷繇误选尝使远方赖德泽之广而年登盗衰幸教令之明而民纾吏戢洎终更而安守获逃遣以代归巴蜀十州方休於督察瓯闽一道复佐於转输奔走周星之间崎岖万里之半顾身劳而何惮念责重而可虞短技易穷惧难堪於屡试壮行不竞徒有愧於初心旋省微躯曷膺烦使此盖伏遇皇帝陛下尧仁徧覆舜智兼明爱人及物则不异迹遐为官择才则罔遗钜细如臣孤拙尚预采收申命丁宁尤矜幽远臣敢不夙宵尽瘁俛仰竭诚进善紕邪庸警齐於衆职兴利除害以便安於列城庶几犬马之能不负乾坤之造臣无任瞻天荷圣激切屏营之至谨奉表称谢以闻臣某诚惶诚惧顿首顿首谨言

谢恤刑诏书表

臣某言进奏院递到诏书一道赐臣令恤刑禁仍散下管内常切提举无令旷慢者天时方暑起畏憚於羣心宸诏遽颁戒滯淹於庶狱奉十行之申饬督列郡以遵承共深钦恤之怀上副丁宁之训臣某诚惶诚惧顿首顿首恭惟皇帝陛下德参覆载道极圣神徧爱追尧舜之仁措

刑迈成康之术虽存五辟以助治每虑一夫之不辜眷盛夏之在辰軫累囚於率土敷扬明命
儆厉攸司洁完先自於圜扉涤濯仍臻於三木贫而无饷者给之以粟疾而难纵者济之以医
期无淹系之徒必絶滥加之罚幅员万里竞趋远罪之风遐迩一心咸戴好生之惠臣敢不仰
膺言綍恪举宪条勉一道承宣之勤寛九重矜恻之广庶几犬马之效不负乾坤之施臣无任
瞻天望圣激切屏营之至谨奉表称谢以闻

代虞学士遗表

臣某言逢辰窃禄愧乏涓埃之劳忍死献言徒伸犬马之恋脱官联而安没荷乾造之有终重
违清时犹抗余息魂欲去体辞多不伦臣某诚悲诚惧顿首顿首伏念臣生而朴野学亦空疎
蚤尘儒科晚玷文馆义有可守则未始枉寻而直尺事有可举则罔或吐刚而茹柔间关三纪
之余遭遇四朝之盛荐叨器使独病材难敢谓致身之未高唯忧陈力之不迨赞画天府尝助
浩穰之烦曳裾王门久尸讲解之职而桑榆势迫药石功亏疾疢暴深精爽垂尽想赤墀而陨
涕沥血恳以怀慙直节何为殊无报国之效哀鸣不已尚冀敝帷之恩伏望皇帝陛下特轸天
衷曲从人欲悯其旧物贷以深仁俾臣遗踪获有箕裘之绍则臣瞑目甘为沟壑之捐臣历任
三十七年并无谴累久在诸王府供职见理提刑资序本家未有儿男食禄欲乞一恩例沾及
寒族臣长男芹年若干曾应进士举得解伏望圣慈特赐俞允於文资内安排干冒旒宸臣无
任兢危陨越之至谨奉表陈乞以闻

代杨侍郎谢授宝文阁待制知庐州表

皇帝

内阁宠名实中朝之高选方州重寄乃外补之最荣拜优命以稠重揣卑惊而警惕【中谢】
伏念臣降才不敏涉道非深遭逢盛时叨窃廛仕守朴忠於无挠当盘错而勿辞尝滥长於理
官每戒得情之喜继忝陪於司寇第谋助治之寛旋陞民部之剧繁唯谨邦财之经费虽无善
状亦免瘵官冒先皇拔擢之恩蒙陛下包涵之赐日月浸永筋骸始衰比缘衔命之勤偶致愆
和之疾难久妨於贤路仍幸处於省曹陈诚辄叩於九重引述频尸於一郡倾葵心而仰俟感
天听之曲从以禁近之职而饰其陋躬以安闲之壤而使之颡面恩出望外愧深胷中夫何微
踪及此厚幸此盖伏遇皇帝陛下幹圣神之妙廓天地之仁怜其犬马之劳假以丘山之惠臣
敢不深铭悃悃奉龙光凤夕兢兢方守循墙之戒始终皦皦弥坚报国之心臣无任瞻天荷圣
激切屏营之至

太皇太后

效职累年恐衰疲之败事露章两上坚恳乞於罢麾恩俞既与其便藩宠秩复加於内阁仰承
优渥深积兢惶【中谢】伏念臣本出寒儒早从末宦勤劳三纪朴拙一心幸逢盛世之明昌
叨遇元朝之奨拔擢由棘寺进贰刑曹殊未着於官能骤已陞於民部事之利疚罔不竭精时
所戚休得以宣力更炎凉而浸久偶瘵旷之未形方怀持禄之慙敢銜剗繁之术陛下未加显

黜尚谓小材辍其坐局之勤付以出疆之命冒苦寒於远道感微疾於中宵迨此使还难安省列窃畏尸官之譴且虑妨贤之讥遂亟请於偏州冀少全於素分天威重冒方惧雷霆之严圣造曲从遽蒙雨露之泽畀之禁近之职授以清闲之邦於臣所望有加若臣何幸及此此盖伏遇太皇太后陛下神机运用坤德包涵怜其孤进而无他悯其久劳而不懈徇犬马之私欲推丘山之至恩臣敢不激励懦衷只膺明命誓秉靡捐之志终酬覆载之仁臣无任瞻天荷圣激切屏营之至

知庐州到任谢上表

皇帝

臣某言伏蒙圣恩授臣充宝文阁待制知庐州已於某月某日到任讫职秩既优幸参华於内阁事权甚重颙分控於长淮方谨始於颁条唯厉精於宣化自慙朴拙实玷龙光【中谢】伏念臣早缘末学窃缀下科崎岖历官黽勉从政积寸长而何助怀小智以无堪越俎治庖戒於侵职画墁志食耻在素餐宜於公者势可举而必行便於时者力可为而必尽久剽理官之剧再迁省部之烦愆尤偶逃疲薊非称乞郡章而外补感天听之下从途不束装已获承宣於善地身虽去国仍叨侍从之荣名仰冒误恩深踰素分此盖伏遇皇帝陛下至仁覆露洪造包涵察其技穷而犹未遽捐念其劳久而假之暂逸臣敢不始终一节夙夜竭诚抚养羣元上广尧舜之泽望瞻首善遥驰魏阙之心庶殫犬马之能仰答乾坤之施臣无任瞻天荷圣激切屏营之至

太皇太后

臣某言【同前】文阁清华叨误恩於增秩淝川旷静冒优寄於分符下车首见其吏民奉诏仰宣於德泽力轻任重心愧迹荣【中谢】伏念臣朴微材斗筭浅器出逢盛际进躋周行义有可为则奋不顾軀道之所枉则耻於投步顷贰刑曹之要荐陞民部之烦渠渠唯尽於公忠碌碌苟逃於谤责偶愆和於弱质辄露请於偏麾遽蒙天眷之曲从复过愚衷之始望忝近班之贲节获善壤之寛闲去国不遥目想云中之双阙幸时无事坐安淮右之列城方莅政之云初念致身之有自此盖伏遇太皇太后陛下运圣神之造垂雨露之仁察臣悉力有涓埃之裨贷臣少休俾承宣於外加宠光而泛及庇孤陋而曲成臣敢不恪守官箴勤恤民隐广朝廷惠养之意成畎亩便安之情冀微助於隆平庶仰酬於覆育臣无任瞻天荷圣激切屏营之至

贺坤成节表

金风应律当造化之成功玉殿称觴庆圣神之诞日四海致梯航之献庶邦倾葵藿之心熙然覆载之间幸此明昌之会【中谢】恭惟太皇太后陛下倪天唯睿御世以仁翕张万微鼓舞羣动力庇帝图之盛道侔坤德之宏庆辰密迹於中元贺礼交修於上国请方前古远超文母之徽愿比南山尽效华封之祝臣忝司偏郡阻造彤庭奉万年之杯既远鹄鸾之列望九重之阙但驰犬马之情臣无任瞻天荷圣拚蹈激切之至

夔路提刑谢上表

臣某言伏奉告命差提点夔州路刑狱公事已於三月十七日到任管勾讫列职礼曹頼窃郎潜之奉按刑夔服仰承圣训之严即叱馭於险途已莅官於远部才微责重心惴迹荣臣某诚惶诚惧顿首顿首伏念臣起自诸生幸於久仕中立虽完於素守壮行已负於初心不攘画饼之虚名唯耻获禽之诡遇自叨使指屡易岁华尝再领於转输并偶逃於瘴旷巴闽两部首尾六年川陆兼行往还万里一忝司宾之选每怀尸禄之忧方谋自斂於冷官岂谓复叨於烦使况庶狱必资於明慎而远毗尤在於抚绥非高材不足以窒羣枉之萌非精识不足以纠一成之失此焉退省臣则冒居斯盖伏遇皇帝陛下独化日新至仁天覆明罚止期於助治好生深軫於非辜不限地之迹遐必择人而刺察曾惟陈力之末亦被遣行之光臣敢不益励愚衷?遵涣命责羣吏尽心之实必使无冤成一方远罪之风庶几有补下伸蝼蚁之志上报乾坤之恩臣无任瞻天荷圣激切屏营之至谨奉表称谢以闻臣某诚惶诚惧顿首顿首谨言

谢赐历日表

臣某言今月十九日进奏院递到准太史局牒送到合赐绍圣三年历一卷者恩出中宸颁朔必先於正岁历由太史授时爰及於远方捧受致恭奉行知敬臣某诚惶诚惧顿首顿首恭惟皇帝陛下对天御世稽古保民分飭羲和之官详推日月之运筹成密法示陰阳消息之期布在绵区儆稼穡艰难之序臣敢不?遵国令上体君仁纠正夺农之违戒除暴物之戾庶图小补仰报大钧臣无任瞻天荷圣激切屏营之至谨奉表称谢以闻臣某诚惶诚惧顿首顿首谨言

又

臣某言某月某日进奏院递到宣一道赐臣绍圣三年历日一卷者历为大纪協正统於天心恩出九重谨颁宣於岁首按远方而有守拜明命以尤荣臣某诚惶诚惧顿首顿首恭惟皇帝陛下德命乾坤道齐尧舜发政必循於时令成书爰敕於日官参符缇室之灰密着清台之法布於率土使知敬授之方儆彼安毗不失先期之备臣敢不钦承重赐敦谕列城助阳推慎罚之端顺序举劬农之职庶图小补仰报洪钧臣无任瞻天荷圣激切屏营之至谨奉表称谢以闻臣某诚惶诚惧顿首顿首谨言

又

臣某言今月十六日进奏院递到宣一道赐臣绍圣四年历日一卷者君命布宣远赐万年之历臣心祇敬率同四海之滨方拜受以知荣遂宝藏而遵用臣某诚惶诚惧顿首顿首恭惟皇帝陛下对天育物体道御民顺时令而陰阳弗违命日官而中朔必正书成大纪敕敬授於攸司賚及万方谨奉行於有政臣敢不恪承明赐敦勉列城德刑循舒惨之期稼穡儆作成之备庶符協气仰赞昌辰臣无任瞻天荷圣激切屏营之至谨奉表称谢以闻

谢中使传宣抚问表

臣某言今月二十九日入内侍省高品关琳到渝州传宣抚问者王人将命传天语之丁宁臣子拜恩荷圣衷之轸恤虽在方隅之远如瞻象魏之光钦戴抚存窃深荣悸臣某诚惶诚惧顿首顿首恭惟皇帝陛下仁参覆帔明合照临绍重熙累洽之休大持盈守成之德储神正宁不忘宵旰之忧兴念远臣尤悯边陲之役遣使星驰於万里宣言泽及於四方臣敢不上体睿慈俯修职业唯知尽瘁誓殫犬马之能庶有微劳仰报乾坤之赐臣无任感天荷圣激切屏营之至谨奉表称谢以闻

又

臣某言正月二十九日巡历至云安军遇入内侍省内西头供奉官王怀志传宣抚问者星轺遽至临六服之幽遐天语敬传冒九重之存抚光荣虽甚陨越是忧臣某诚惶诚惧顿首顿首恭惟皇帝陛下治掩成康德钧尧舜运神机於独断绍先烈於重熙宵旰储精措幅员之宁谧岁时轸虑念边鄙之勤劳遣中使以载驰恤远臣而敦谕丝纶降被戴恩知挟纆之温葵藿齐倾向日罄推心之赤臣敢不恪修职业上体睿慈誓殫犬马之能仰报乾坤之赐臣无任感天荷圣激切屏营之至谨奉表称谢以闻

谢恤刑勅书表

臣某言某月某日进奏院递到勅书一道赐臣令恤刑禁仍散下管内常切提举无令旷慢者夏暑蕴隆动九重之惻怛诏书敕勅轸庶狱之滞淹恪官况在於按刑承命尤资於尽瘁寅膺钦恤之训倍谨哀矜之诚居不遑宁日惟加励臣某诚惶诚惧顿首顿首恭惟皇帝陛下天临万国子育兆民虽严五辟以沮惩不忍一夫之抵冒念时炎燠难堪縲紲之中发号清明广布幅员之内聳有司之兢惕悯被系以安全圜扉必戒於洁凉三木必勤於涤濯视贫而给之以食察疾而济之以医趣听讞於平停屏推求於滋蔓枉直悉由乎审克重轻不失其简孚庶使无冤成圉圉空虚之治岂为小补助乾坤长养之功臣敢不敬服宸纶肃持邦宪下绳郡邑共坚慎罚之心仰戴朝廷推广好生之德臣无任感天荷圣激切屏营之至谨奉表称谢以闻

又

臣某言今月日进奏院递到勅书一道赐臣令恤刑禁仍散下管内常切提举无令旷慢者天方暑动宵旰之储思君诏遽颁轸寰区之庶狱?稟丁寧之训益勤钦恤之诚戒飭列城奉行明命臣某诚惶诚惧顿首顿首恭惟皇帝陛下爱民犹子覆物如天发施仁政而推不忍之心明罚勅法而期无刑之治矜羣愚之抵冒虑圜土之滞淹炎威当三伏之隆涣号达万方之远敕有司之怠忽恤被系以求全洁清至桎梏之微济助有饷医之给斥吹毛之滋蔓督阅实之平停遐迩一堂孰起向隅之泣生灵四面咸钦祝网之恩臣敢不敬服宸纶肃持邦宪下绳郡邑效君子尽心之方仰戴朝廷广圣人好生之惠臣无任瞻天荷圣激切屏营之至

贺兴龙节表

臣某言邁誕聖之庆辰大时成岁起祝尧之善颂四海钧情有生共乐於明昌无远不同於鼓舞臣某誠懼誠拊頓首頓首恭惟皇帝陛下運神明而獨斷繼統業以丕承千萬化以大中之權納羣元於至治之域允作百王之高規豈惟三代之同風節應興龍感鴻圖之紀瑞樂方儀鳳贊紫殿之稱觴臣忝使巴陲阻趨魏闕惓惓云漢倍深拱北之衷懇懇精誠禱後天之筭臣無任祈天頌聖激切驩呼之至謹奉表稱賀以聞臣某誠歡誠拊頓首頓首謹言

又

臣某言伏以律更大呂月臨成歲之功運應千齡天啓降真之日萬物盡懷於生意四方共起其驩心臣某誠懼誠拊頓首頓首恭惟皇帝陛下高邁三王丕承六帝持盈成而寶龜鼎廓聲教而服華夷誕辰紀電斗之祥光輝不極禮貢致梯航之獻鼓舞無窮臣承之闕封馳誠魏闕仰天威於不遠祝睿筭於無疆稱庆捧觴阻伏簪纓之末傾心向日敢希葵藿之情臣無任瞻天望聖激切屏營之至謹奉表稱賀以聞臣某誠懼誠拊頓首頓首謹言

又

臣某言祥電繞樞應千齡之嘉運瑞莫夾陞茂八莢於隆冬當聖人庆誕之辰正海?太平之日羣生鼓舞萬國梯航【中賀】恭惟皇帝陛下德耦尧仁明符舜智丕顯盈成之業增高繼述之猷賞刑信而善惡勸懲聲教遠而車書混一興龍紀節昌期協成歲之功儀鳳奏音列辟奉後天之壽臣迹拘遐裔心仰嚴宸拱北傾誠悵周行之獨遠望云?懇祝睿筭以無疆臣無任祈天頌聖激切驩呼之至謹奉表稱賀以聞臣某誠懼誠拊頓首頓首謹言

謝轉官加勲表

臣某言今月初四日進奏院遞到告一道伏蒙聖恩授臣朝請大夫仍加柱國者年勞無狀愧當考課之程國賞有常獲冒陟明之典官勲并進榮悸兼深臣某誠惶誠懼頓首頓首伏念臣江湖末族蓬華寒儒遭逢聖時塵綴仕籍間關几及於四紀朴直唯肩於一心利於公者知無不為施於政者思止其位壯行所學雖潛負於素懷苟合以容固耻隨於流俗自叨簡拔愈竊兢危未嘗枉道以求從何敢謀身而幸進備郎官於再歲持使指於十年方虞總核之明難追黜幽之辱第知分守豈意序遷夫何累日之勤亦被自天之渥振遠方之觀望增小已之光華拜寵若驚抚窮無措伏遇皇帝陛下乾剛獨運離照繼明昭法度以綱紀四方審予奪以勸懲多士俾庶績之咸考雖小臣而不遺遂令微蕞之軀輒玷進陞之賜敢不永端晚節彌激懦衷受而益恭愿效循牆之戒圖其稱報用逃濡翼之讥更俯誓於麤捐庶仰酬於覆焘臣無任感天荷聖激切屏營之至謹奉表稱謝以聞

賀受玉璽表

臣某言伏奉近降德音敬聞五月朔受傳國寶禮畢者聖政日躋協千年之景運珍符天錫垂萬世之休光禮成大庆之崇澤霑四方之遠生靈鼓舞宇宙晏清赫然昌辰偉矣盛事臣某誠

懽懽拊顿首顿首恭惟皇帝陛下德参尧禹道揜商周绍祖宗之业而增大盈成赞覆载之功而致隆皇极刑赏明而必信贤邪判而不淆吏称民安同归于治鸢飞鱼跃各遂其情藹乎至符之充纷若殊祥之应建安翔鹤裴徊和气之游集庆灵光缘饰太平之象於铄咸阳之壤聿兴玉玺之珍盖神物之护藏待圣时而呈露诸儒考古原至宝之攸传路寝陈仪敬高穹之所授新乐章而協比酌礼典以敷施辉映古今震聳夷夏继河洛图书之瑞小郊藪麟凤之祥受命永昌宝篆显延洪之福锡民大赉脰恩推宥过之仁臣糜职巴陲驰精魏阙奉觴称庆莫参鹄鹭之行拱极倾诚徒想云龙之会臣无任瞻天颂圣激切懽呼之至谨奉表称贺以闻臣某懽懽拊顿首顿首谨言

明州谢上表

臣某言伏蒙圣恩差知明州军州事已於某月某日到任管勾讞方按狱虽久尸官毫社分符未容及境优渥再承於明命光华假守於便邦已见吏民敬宣德泽臣某诚惶诚惧顿首顿首伏念臣蚤由末学获仕昌朝审义命之可尊笃公忠而自信退有诚身之道进忘出位之思不为易缺之嶢嶢几近无奇之碌碌曩误膺於简拔愧无补於事功区区使指之勤忽忽岁华之久念因循而冒处惧衰薨之难堪仰叨九阁凯州麾之可乞俯从微物荷天听之不遗矧此近乡界之善地山奇水胜昔人曾况於蓬丘事简民良今日颇优於泽国载惟委寄之重宜得承宣之能自揣不材诚为非据此盖伏遇皇帝陛下仁参覆载道极圣神增广太平之基廓开衆正之路公予夺以聳四方之听均劳逸以怀羣下之情乃以寒踪蒙兹厚幸臣敢不恪修职业上体睿慈知师帅不可以苟为思所以养人之术知民社不可以虚受图所以报国之劳庶几循吏之徒不负大君之赐臣无任感天荷圣激切屏营之至谨奉表称谢以闻臣某诚惶诚惧顿首顿首谨言

贺生皇子表

臣某言伏睹德音降生皇子者天心降鉴貽上主之鸿休圣嗣诞生協万方之大庆臣某诚懽懽拊顿首顿首恭惟皇帝陛下尧仁博大舜智高明敦继述以丕承保盈成而独化发政先好生之德开边全不杀之威民物乂安神灵悦善和气四充於宇宙珍符并贐於堪輿纬象昭垂炳前星之灿灿元良载育增景祚之绵绵壮哉极治之洪基伟矣昌期之盛事臣叨分符竹远仰阙廷莫预鹄行共欢呼而称庆第钦龙喜想慈惠之均沾臣无任瞻天望圣激切欣跃之至谨奉表称贺以闻

贺册立皇后表

臣某言伏覩礼部録降九月八日制书立皇后者册命隆恩推本元良之育宫闈正位密繫辅佐之勤懿德冠於长秋喜气钧於函夏臣某诚懽懽拊顿首顿首恭惟皇帝陛下尧仁睦族舜法治家以身为度而考古御今以风化下而由内及外持盈神器雅協鳬鹭之文正始褱衣昭显关雎之德禁掖仰徽音之嗣旋霄丽轩宿之明允属昌期式符盛礼臣糜躯守土注目望云无缘称庆於周行但极倾心於魏阙臣无任瞻天颂圣激切欣跃之至

贺收青唐邈川表

臣某言伏闻邈川青唐大首领率诸族归顺朝廷其疆土置湟鄯二州者天声远暨坐收不战之功戎族来归仰慕至仁之化不顿一戟而开边千里不鸣一鼓而置守二州解重铠者莫匪倾心请长纓者岂烦虚论实无前之伟绩属极治之昌期万世輝光四方鼓舞臣某诚懼诚拊顿首顿首恭惟皇帝陛下德威丕冒文武兼隆端继述以拱揖太平揽权纲以维持大业帝眷于上而珍符杂沓人怀於下而异域柔从纳鄯城於反掌之间收湟水於衔璧之际行兵不试异周文因垒之降圣化所徕同虞舜舞干之格广幅员於无外耀方策於不穷臣守职海隅不获蹈舞阙庭臣无任瞻天颂圣踊跃懼呼之至谨奉表称贺以闻

贺皇帝登极表

臣某言伏奉今月十三日赦文皇帝陛下寅膺顾命光绍宝图号令惟新生灵胥庆臣某诚懼诚拊顿首顿首恭惟皇帝陛下大明继照至德升闻历数在躬丕承七圣之统仁恩徧物允属万邦之归臣职守郡符不获躬诣阙庭无任瞻天望圣欢呼激切之至谨奉表称贺以闻臣某诚欢诚拊顿首顿首谨言

谢传宣告谕表

臣某言今月初九日内殿承制合门祇候向子履到本州告谕兼赐官吏军员将校僧道百姓等勅书一道者圣神纘绍光輝千载之期命令布宣抚谕万方之衆在使华之所及荷天语以无穷臣某诚感诚戴顿首顿首恭惟皇帝陛下德合祖宗仁齐尧舜继鸿图之赫赫膺宝历之绵绵孚号惟新颁十行之温诏望云胥庆起四海之诚心臣职守郡符不获奔诣阙廷臣无任感天荷圣激切屏营之至谨奉表称谢以闻臣某诚感诚戴顿首顿首谨言

贺太后表

臣某言伏闻皇太后权同军国事纘绍丕图当圣人之恭默缉熙初政繫丈母之聪明涣号亟传羣情均庆臣某诚欢诚拊顿首顿首恭惟皇太后陛下德齐天妹位统坤仪绍任姒之大猷贊勋华之至治六宫钦戴慕美化于积年四海乂安听徽音于此日臣职拘守土不获称庆阙廷臣无任瞻天望圣激切屏营之至

谢转朝议表

臣某言今月七日进奏院递到告一道蒙恩特授左朝议大夫依旧知明州军州兼管内劝农使者天泽徧沾不遗微物圣恩遐暨爰及孤生奉纶綍之训辞厉冰渊之诚敬臣某诚惶诚惧顿首顿首恭惟皇帝陛下尧仁天纵舜知日新绍七圣以丕承怀万邦之欣戴广宣初政之惠首念羣臣之劳随班聯而泛迁尽中外而均被如风之行而鼓舞羣动若春之感而荣华一时而臣假守海滨叨蒙乾施虽积罔功之愧亦陞寄祿之阶臣敢不俯伏再思窃慕循墙之德夙

宵不懈以图报称之能庶几小已之愚不负大钧之赐臣无任感天荷圣激切屏营之至谨奉表称谢以闻

贺生皇子表

臣某言伏奉四月十五日诏书以皇子生大赦天下者诞育元良伟矣九重之庆广宣恩宥驩然四海之情盛宗社之光华动生灵之鼓舞臣某诚欢诚拚顿首顿首恭惟皇帝陛下丕承帝业仰合天心参化育之至仁措幅员於极治庆流百世前星俄照於龙楼賚及万方睿泽爰颁於凤阙羣心欣戴和气充盈臣职守郡符不获奔诣阙廷臣无任瞻天颂圣激切欢呼之至谨奉表称贺以闻

贺天寧节表

臣某言邁圣诞之昌辰千齡协庆仰天寧之盛节四海均欢皞如鼓舞之情穆若照临之下臣某诚欢诚忭顿首顿首恭惟皇帝陛下仁齐尧舜业绍祖宗履重熙而抑畏不矜千万化而持循以正坦辟直言之路增深极治之源庆期遇震夙之时列辟奉忠勤之祷当年飞电曾形绕斗之祥此日称觴感祝後天之筭臣幸逢华旦僻守偏州远有列之周行心驰魏阙祈无疆之睿筭愿效华封臣无任瞻天颂圣激切欢呼之至谨奉表称贺以闻

谢赐历日表

臣某言今月二十八日进奏院递到宣一道赐臣建中靖国元年历日一卷历为大纪正中朔而不差恩出九重被迓遐而无外拜赐爰钦於敬授披文弥谨於寅遵臣某诚惶诚惧顿首顿首恭惟皇帝陛下建皇极以承天亶聪明而御世发政施仁而民神斯悦对时育物而陰阳以和勅密法於日官布成书於海宇号遽先於正岁分颁远逮於守臣臣敢不上体睿慈下修官政勤督耕桑之务皆使先期仰承德惠之行必图推广庶有毫厘之补不辜覆焘之恩臣无任瞻天望圣激切屏营之至谨奉表称谢以闻

慰表

臣某言伏奉正月十四日大行皇太后遗诰者东朝上僊奄弃大养率土仰恋莫非羣悲臣某诚哀诚咽顿首顿首恭以大行皇太后坤德承天陰功被世颺御遽远徽音永传中外一心感泣万里伏惟皇帝陛下孝慕罔极圣情难居愿抑九重之哀以安四海之望臣拘守远郡不获匍匐奔诣阙廷臣无任瞻天望圣悲摧殒咽之至谨奉表称慰以闻臣某诚哀诚咽顿首顿首谨言

谢致仕表

臣某言八月二十九日伏奉敕命宜守本官致仕者引年以请俯慙无补於明时得谢而归仰

荷曲成於洪造拜圣恩而知幸揣愚分於增荣臣某诚惶诚惧顿首顿首伏念臣倥傯寒品朴
樸小材由末学以奋軀邁昌辰而从仕涵泳五朝之德泽超踰四纪之光陰或宣化於便藩或
司宾於华省按刑将漕屡玷於选抡窃禄尸官终逃於譴责爰及暮年之至自惟陈力之难乞
身欲遂於屏居承命获从於善去岂其孤贱能尔保全此盖皇帝陛下舜知日跻尧仁天覆深
固太平之业恢隆纯被之风使万物各安其生无匹夫或失其所致臣衰朽幸此退休臣敢不
完一节于余生报大钧之巨赐虽同老马力弗逮於恋栈愿比露葵心不忘於向日臣无任瞻
天荷圣激切屏营之至谨奉表称谢以闻

贺天寧表

臣某言遇圣明之诞节玉帛奔趋起臣子之诚心簪绅鼓舞幸际千齡之盛仰祈万壽之隆臣
某诚欢诚拚顿首顿首恭惟皇帝陛下仁参化育治极明昌广一德以承天正四维而御国持
盈成而守之抑畏志绍述而慎所更张乐闻正直之言坦辟大中之路庆辰惟永四方钦震夙
之期睿筭无疆百辟共欢呼之禱臣恪司海郡遥拱枫庭仰盛旦之辉光念周行之高远捧觴
称庆徒想紫宸之班向日倾诚愿效华封之祝臣无任瞻天颂圣激切屏营之至谨奉表称贺
以闻臣某诚欢诚拚顿首顿首谨言

代陈少卿贺福康公主进封兗国表

中宸有命美化务先於族亲贵主进封优恩不夺於典礼风声遐被中外交忻臣诚欢诚喜顿
首顿首恭惟尊号皇帝陛下配天地之德绍祖宗之基守无逸於持盈概至公於立极御远以
近齐邦以家治内等周官之规训女偕帝尧之法罔媿前躅克成令猷公主分乾之英体翼之
顺虽曰爱之欲富不以生而暴荣岂汤沐不可一而充印绶不可一而足盖海育之存节故宠
私之有阶龙光一宣慈孝两得教其有素下嫁岂忘其矩矱泽匪不隆四方孰谓之偏党朝野
懽浹人神气和迈治古之休光增太平之盛事臣限以官守不获奔走阙廷称庆臣无任瞻天
踊跃之至

贺苗淑妃进封贤妃表

正宁留神内张辅佐後宫进善下帅嫔嫗恩盖盛於得人命实优於中礼纶言一出驩颂交流
【中谢】恭惟尊号皇帝陛下嗣临四方宝守重器万机闲暇至化清明尚宵旰以图徽犹起
居而谋治列位既登乎俊哲中闈复选乎才良意出入之有裨庶言动之无失何则贤者得之
殊称妃由配以为名龙光不私遐迩称庆樛木存逮下之谕美有所归鷄鸣着相戒之勤验在
今日助陰教之纲纪副圣心之简求法貽彤管之书宠絕椒房之侈心忘私謁风永迈於周南
俭不曳衣誉难专於汉室全一时之令典绵千載之昌期臣限以官守不获蹈舞阙廷无任瞻
天踊跃之至

代刘兵部贺兗国公主出降表

臣某言伏审六月日内降白麻福康公主进封兗国出降者礼盛太平舄奕本朝之事势荣下嫁光华旧戚之门筑馆据乎鲁经附骑沿於汉制表正人伦之大藩维帝祚之长四方闻风万口称庆臣某诚懽诚喜顿首顿首恭惟尊号皇帝陛下荷祖宗之业挟尧舜之心循降女之前规发慕亲之至德赐公主以兗国之号乃陛下爱育之深归公主於皇舅之家盖陛下孝思之永延宠休於勿絶继懽好而又新物仪所稽丰约惟古义评周什车服避帝后之尊言采庶臣资送减先皇之子圣明一举慈顺两全远贻册史之昭章幽致庙灵之悦喜臣限以官守在远不获奔走阙庭蹈舞称贺卑情无任瞻天踊跃之至谨差某奉表以闻

又代陈少卿表

伏审六月日内降白麻兗国公主出降者国仪慎重中宸鑒古而展成陰礼章明公主益封而下嫁冠人伦之纲纪壮帝室之藩垣华夏布传臣民庆忭恭惟我尊号皇帝陛下嗣守钜业积隆太平敦睦族之令猷循降女之故事乃以兗国公主进加汤沐选尚亲贤下适皇舅之家上崇先后之德舄奕累世光华一门斯见圣明之心实隆仁孝之本肃雍所咏未坠周人之诗资送不踰尚存唐相之议荣欢乎戚里之旧悦怍乎宗祏之灵臣限以守职在外不获舞蹈门阙无任瞻天忭跃之至

代陈少卿谢宣赐历日表

臣某言十二月日进奏院递到宣一道伏蒙圣恩赐臣嘉佑三年历日者玃齐七政仰符天度之明历校四时专责日官之职霈纶言於庶土布岁令於前期四方守臣百拜称庆臣某诚懽诚喜顿首顿首恭惟尊号皇帝陛下绍隆三圣合德二仪教化醇醲人神说喜经纪以之顺动陰阳以之久调积为至和充塞无外筭成密法杪忽不遗妙探灵宪之精高轶清台之课求端上赞班朔下传臣忝列分符预叨被赐敢不奉藏如礼听受以时勿稽民事之期以戴君恩之重臣无任瞻天激切之至

代潘郎中遗表

臣某言臣窃禄清朝媿无补报守符偏壘将及罢归被疾暴深假息垂尽君门严邃不复曳裾天造始终唯增陨涕【中谢】窃念臣生匪令器素持孤踪藉先?之余休遭明时而从宦闲关三纪朴直一心内无毫髮之私外乏錙铢之援仰叨覆育幸免弃遗承命再颁於郡条积官一至於郎署宠泽逾分夙宵靡寧凡有益於民敢不尽力或害于政未尝少容誓竭涓尘之劳冀酬穹壤之德而桑榆遽逼沟壑即填神魂虽飞忠赤未折诚无显效附竹帛而可传夫何哀鸣渎旒扆而不避然臣冒恩衔感非木石之顽故臣忍死献言伸犬马之恋臣历任三十余年两次知州并无公私过犯本家未有子孙食禄欲乞一恩例沾及寒族臣长男震年若干习进士业伏望圣慈特赐俞允於文资内安排干冒天聪臣无任仰望阙廷涕恋之至臣某诚惶诚惧顿首顿首谨言

代张郎中谢转官表

臣某言今月五日进奏院降到勅告各一道授臣前件官者年劳无状惟日积忧天造不遗以时序进对宠灵之优渥震肝胆以悸慙【中谢】伏念臣性实迂疏才非博敏粗知古道早玷仕途所至虽切切厉精所施无班班显绩坚操履於孤立抱朴忠而自明一叨符竹之休恩三易江湖之善壤顾惟宣力不足慰朝廷之思尚且偷荣未能安田里之分伏蒙皇帝陛下大明委照沛泽远沾象之以日月之勤陞之以班秩之次在陛下驭臣之术可谓至公於微臣报主之情不胜多媿敢不永固晚节誓殚寸诚恐惧深前循益恭之克戒作为慎末期後效之有闻庶几犬马之心上答乾坤之赐

代章郎中贺郊赦表

祀展圜丘方毕就阳之礼庆流沛泽尽冒如天之仁遐迩同心忭跃称颂臣诚欢诚喜顿首顿首恭惟皇帝陛下享三灵之佑绍四圣之休跻纯治於重熙廓至明而继照端若持盈之虑巍然独断之权更为必顾於适时发政必谋于师古推重严禋之典首务躬行诞敷寬宥之恩复仍旧贯凡在幅员之内孰非鼓舞之情臣限守远疆阻奔盛事奉承明诏敢怠於宣扬荷戴洪钧益深於感激臣无任瞻天望圣恳切屏营之至

谢传宣抚问表

臣某言今月日到渝州传宣抚问者星轺遽至耸遐裔之观瞻天语敬传恤远臣而存问一时鼓舞万里光华拜命肃恭戴恩局踣臣某诚惶诚惧顿首顿首恭惟皇帝陛下明齐舜智德迈尧仁绍统业於重熙纳生灵於极治垂衣而化务绥靖於方隅轸虑以时念勤劳於边徼遣使谨奔驰之役宣言示抚劳之深臣敢不上体圣慈下修官业誓殚直节以图分寸之能仰报大钧不负生成之赐臣无任瞻天荷圣激切屏营之至

谢宣赐历日表

臣某言今月日进奏院递到宣一道赐臣绍圣五年历日一卷者统合天心国永明昌之盛历颁春始恩无远迩之殊拜赐欣荣披文寅敬臣某诚惶诚惧顿首顿首恭惟皇帝陛下仁参覆载智运圣神对时育物而生成不偏导民务本而补助有法飭日官而谨职布岁令以授人粲若成书轶清台之精密锡为大纪俾率土以奉行臣敢不益厉愚衷虔膺明赐承流於郡邑赞施德於朝廷戒以夺农全东作西成之力斥其暴物顺阳舒陰惨之期倘小补於熙辰庶仰酬於洪造

贺兴龙节表

臣某言伏以吕助黄鍾适庆岁成之候虹流华渚咸钦圣诞之辰域中均鼓舞之情方外谨梯航之供声教所暨欣愉率同臣某诚欢诚忭顿首顿首恭惟皇帝陛下德合勋华仁参覆载正法度以继承六圣端政化以纲纪四方纷然符瑞之臻至矣明昌之盛光辉庆节隆冬秀八莢之莫肃敬称觴列辟奉万年之寿臣官居夔服迹远枫宸倾向日之诚心遥瞻魏阙祝後天之

睿筭窃效华封臣无任瞻天颂圣驩呼激切之至

钱塘集卷八

卷九

<集部,别集类,北宋建隆至靖康,钱塘集>

钦定四库全书

钱塘集卷九

宋 韦骧 撰

谢举主陈少卿啓

右某啓今月初九日伏闻发奏举某堪充县令者洁己而进终始或乖取人之艰古今所病矧利禄之兼诱则真邪之并驰廉隅易修底里难辨仰惟着令尤重举官内责公卿外凭牧守屡宜所荐无三适之褒一失其人有连坐之玷故居要者怠於汲善胶荣者恬不顾卑所抑既多彼求愈巧以至胁肩事谄利舌献谗或仗势於权豪或屈身如厮役止期苟得安耻屑为悠悠尽然往往皆中是以伊优被用端直见遗辟书不及於寒门廛仕悉归於华胄夫唯有志之士岂或效尤於时宁坐而穷不徼而贵幸焉际於知遇足以为之振明若某者不才陋儒勉力初宦固以操守拙於耦从狱讼尽心未尝自愧尘泥托迹讵敢躁图虽知行谊之可依常惧单微之难立赖居軫下少慰胸中逃责及年抚躬甚庆况於意念之外复冒发扬之恩旋省愚蒙并增喜惧此盖伏遇知郡少卿廓精明之鉴辟中正之途报国不捐其所知器人不责其必备曾是疎贱亦逢挈持上叩九重之深使充百里之任所谓揉蟠木而荐万乘歛微埃而增泰山可否未分光荣已倍金石可败肺腑不忘然獎饰既优乌得议私心之感唯忠勤以报庶不貽公举之差过兹以还不识所措

谢举主潘驾部啓

伏闻今月二十五日发奏举某堪充县令出於不虞悚若自失致让莫及过情是忧窃惟名卿之建言本朝之剗弊在择令之一事深遗恩於四方曩者忽为小官署以庸品不由保任之重詎间贪污之流累月中程指期得调藉展私计他无善图陰持金钱争市膏壤殆其施政适足殃民进既无光荣显赫之资退不惜高尚清白之举日暮途远情侈意奢尽力爪牙属餽肺腑百里之系彼哉何思一躯之谋靡所不至邑邑相望人人效尤世所共忧下几无告理义不足膺其面法律不足诛其衷岂渐靡之使然由选用之非要暨兹革制莫不承休谓朝廷高远不可偏评其短长则牧守按临乃宜审核於才实所知者俾以名进不令则咎其滥升用是有年号为得士幽深蒙惠凋瘵更生弦歌相闻赋役不横若昔单父之子贱益昌之易于间或有之曷可胜纪脱非挟精明之度何以副论荐之优如某者赋性近愚趋时寡变投耒即学弹冠应书偶尘下科获就初仕然虽断断实无他能寧或庸庸以徼後福善可扶而必直恶可沮而必摧冀纾夙心孰愧清识而况贤威在上公道甚平贯行匪劳囂讼自引天假之幸间空犴而坐曹日亡所营但援琴而悦德窃安闲而持已奚毀誉之在人未为奇功犹免俗吏罔志於化敢

言容驷之高门母枉所存何害折腰於五斗庶可逃责尚安望祈岂意左右泛传聪明误采以充举吏之所请备长人之员獎饰逾涯惊惶无地此盖某官持衡当路推轂下僚敦易事而不求录小能而必器策歛段而与其进括轮囷而使之材故虽么微亦被振发敢不永怀方格固守朴忠誓无玷身义不尸禄捷径邪至耻同躁人凿墉益高远鉴古语完平生之蘊藉迟异日之穷通万一有为勉罄设施之效始终勿改仰酬顾遇之私舍兹以还不识所措

代徐签判谢宪使啓

窃以别乘之职半刺之任赞纲纪于一郡助风化于千里其责匪易其人甚难往存辟署之法今开汲引之路自非乎朴茂之士挟干济之才则何足当论荐之重为擢用之渐若某者格局踈浅闇於临事持守齟齬拙於趣时一尘科目七更州县连蹇万状孤寒一节若王良之说岂能为之诡遇如韩子所谓谁肯转之清波幸焉晚岁偶缀通籍获从事于垒幕诚托庇于使旆不及旷败已踰意望岂料过听反辱兹举荷推轂之赐虽甚可荣怀凿墉之惧何以自慰斯盖某官以公忠报国以明恕取人凡有小善而必录不於一夫而求备故惟庸贱亦被振挈敢不薄略边幅坚固蘊藉监鲜终之戒卒至白首持不阿之志上承清朝庶几保全无玷知獎过此以往不知所裁

谢漕使冯学士举京官啓

右某伏闻发奏举某堪充京官任使窃冒荐扬惊惶固甚仰惟驱策庸懦不胜何则朝廷高深郡县绵邈吏役于外官曹实繁奚事事之可稽岂铢铢之足较廉能恶得而上达旌劝曷缘而下通故辟宠荣之涂乃张保任之法使部察一部州举一州限之常员拘以累日屡宜所荐虽不之褒一失其人则均而咎增峻彝范逆防偷邪爵祈不虚位欲无幸且天下从宦数常万千而选中得贤十或八九然而间有废道尚怀穿窬侥恩而荣窃赏而惠频频儉佞之党烈烈贵权之门谄谀浸加请托交至所嫉虽可用退而寘诸渊所悦虽不才钻而出其羽是以伊优忝轩冕之赐耿介有山林之思诚穷素之阻艰实公平之蛊蠹非哲人得志安能汲寒峻之踪非雅吏致身何以当君子之荐如某者赋性朴钝与时迂疎强遗犁鋤出即禄仕然其断断殆无它能寧或庸庸以徼後福有诚必尽出位必谋念幼学而壮行詎枉寻而直尺尘埃一命敢谓乎滯淹狱讼三年偶逃于谴责皆贤威之所覆在天幸以何多尚安妄图足以自适岂意聪明泛采衡鉴误收以充数於囊封请备员於京守獎饰过越悸慚倍兼此盖伏遇某官以义取人以忠报国不於一夫而求备虽有小善而必闻曾是么微亦遭振挈敢不至其弗逮勉所未完砺清节而益坚秉赤心而愈固若穷通所繫一付於大钧唯正直不渝永酬于厚遇舍是以往罔知所裁卑情无任激切依归之至

谢转官啓

右某啓伏蒙恩授前件官职业空蒙冒铨衡之钩考宠灵槩及忝宸陛之肱传頼伏载惟悸慙独甚何则承平积久从仕至多以干进为常心指养恬为异趣饰廉隅以文其外广结纳以援其旁悠悠簪组之间泛泛轩裳之列撫寸铢而称效象日月以侥荣莫匪自谋几何小补背毛

腹毳夫岂能为乘集双飞固奚足恤朝端患其若是选法与之更新保任则减夫常员课最则增于旧矩欲荐扬之实必俟考盈防请托之深唯容外举岂将厄汲引之路盖以待英豪之来苟非超卓之伦曷副延求之意如某者学靡该洽器非优长以罢软而弃农耕由窶贫而图禄宦一窃科第久甘尘泥虽知利达而有为自分颡蒙之难强远骋逐之可恶固操修於必安发施无不笃於诚思虑未尝踰其位治囚江左犹多好犯之民作邑淞东或有敢欺之俗鉴古人而良歎叨秩廩以宜羞奚虞冗散之资亦被褒陞之命孰谓自致敢忘所缘此盖伏遇集贤仆射相公坚赞国之怀竭代天之力辟公道而形四海端直表而正百官虽澄滥进之源常嫉蔽贤之敝欲裨巨浸不弃涓流之微欲助大明罔遗爝火之细遂使迂疎之品亦由论荐而迁敢不充扩良能养完旧蕴务端平而中立舍矫揉以外求赤心有不徇之忠白首无可移之节仰禱覆载之惠次答钧陶之私真兹而言曷识所向卑情无任激切知归之至

谢太守啓

右某啓此者拜命枫宸窃玷王言之綍补官萍邑获依刺史之天载省载维且懽且惧一昨滥膺章奏偶合铨衡繇江左之决曹徙淞东之领县虽持已有常道而治民无长才第遵法令之程勉袭循良之迹然而风力所被未虚讼简劝导所加犹有旷土犴或留于宿系犬未免于夜鸣徒亹亹以竭精乏班班之显效閱历万变因循数年止图逃责以罢归不意当途之论荐揣非功而见録慙以次而被迁籍名初隶于省中出宰合从于湖外念安輿之侍奉患远道之间关据陈此心请易兹地其如生齿繁夥封疆濶疎久传难治之声固有先忧之势借令挟利器之用乌可忽盘根之坚况欲远希古人摆去俗状上承朝家抚育之意下徇田里便安之情兴言及斯为理非易仰有所赖庶几自平恭以知郡郎中德性素高术学尤粹识通世务望压仕途辍计庭经画之谋即藩壤承宣之任发恩威而兼济端错举而至公千里安甿悉纾怀而乐处一时属吏唯拱手而贯行则某也奚憚剽烦良甘托质岂须矫激易于无腰笏之劳敢事优游巫马守戴星之分方叙欵诚之献过蒙教诲之贻指期可伏於门闌向谊难穷於笔舌下情无任激切知归之至

谢刘兵部啓

右某啓伏蒙恩授前件官窃叨陞擢实冒荐扬自知固明塞责何以拜命之始积忧已深何则百里之疆万室之衆思斲所致戚休所缘教令择後先利害审因革孤惸困疾之必济强梗侵陵之必锄均赋役之重轻训农桑之勤怠皆政本之尤急在思兼而果为事或难常不欲苟作而徼誉敝有得易不当姑息而殃民上奉朝廷爱育之深下成闾党便安之望故典邑之官则小而字人之职非轻况贯行于盛时剗次补于旧制率由保任之法宜得精明之材傥匪其人曷充兹选如某者闇於大体实无他能学尚柅於逢原识未宏于经远枉寻直尺违俗得讥吐刚茹柔与古共耻向占名于仕版获试采于江城砺愚以勤补拙唯正自谓赤心之足特诿疑白璧之难为业踈诚病于技穷谋过返惭于智小方免愆之未暇俄被举于不虞卒令蕞微玷此铨品此盖伏遇知府兵部逢时补报履道信诚不私所荐而害人不舍所知而蔽上持衡显位毫隐莫容推轂下僚迹单罔间曾是空顽之器亦遭汲引之恩敢不固于朴忠勉所充扩弹琴听治虽微子贱之优闲腰笏卫民敢效易于之激切庶几有立之渐靡及无闻之嗟上答生

成次酬驱策寘是而语乌知其他

代章郎中谢两府啓

拜命中宸荣欢固切领麾远郡愧惧方深念委寄之匪轻揣才猷而莫称窃起循墙之戒且虞假器之讥虽朝廷任人容有不备然师帅宣化得无自难恭惟某官柱石邦家钧衡海内赞周道之如底辅尧仁之若天未尝不为官择人思所以与世兴利耻一物之遗泽远过伊臯欲伊人之长民皆如龚鲁如某者滥膺抡选实积兢惶敢不固守朴忠厉精术学勉图治状岂甘碌碌之无奇微补昌时愿效涓涓之不止仰答生成之赐次醺陶铸之私舍兹以还不识所措

谢运使王学士啓

将迎既失窃羞拘滞之资苛细不诛尚赖寛明之度愆为谋之甚拙於自咎以宜多何则邑落幽深使麾崇重非按视之繇此曷瞻望之有阶固当俯伏道旁奉承铃下露悃忱之万一听教戒之丁宁岂惟尽事上之仪亦足悟临民之术而某智忘适变性泥执方念积粟于困仓虑系囚於囹圄畏空城之无守计嶮路之且遥奔驰敢惮于暮归参候欲图于晨往岂意供帐都御脂车亟行入境不呵耕耘之无止解鞍唯顷侦伺之难量是以策蹇莫前拜尘靡及忧沾汗背愧发頰顔虽闻飞盖之辽犹惧半途而画回轡固慚於违礼越疆返惧于冒威进退冰渊腹心芒刺弹琴听治耻非子贱之优闲负弩先驱独远相如之风采其为不幸乌可胜言恭惟运使学士道涉本原器含宏厚吏不由于末节假人微察于至诚故此蕞微之体得逃懈缓之谴仰戴鉅德实将终身某下情无任惶惧之至

上刘工部啓

某啓伏审涓辰已谐礼上千里之内民物喜跃乃及旁郡莫不延颈企踵以便教命之行仁人之风其盛如此恭惟某官德业宏远志勇兼善累更重寄所至称首爵赏之及未尝不避化天下之贪激天下之懦远比古人夫复何让顷者领荆楚之漕乘岁歉之後迫于经费假易供调冀纾民力卒挂吏议左授此邦在公何愧邦之士庶闻上拜命知公决无愠色而皆望赐于公是公之德谊见信于四方深矣则公之自任宜如何其重且睦虽偏封数得贤守前有范赵以言谪居公今继之輝焰相属岂天独私于是哉某不才之人向备奔走受公之恩殆为私颂公之美不为谄今兹效官幸在近境虽获偃仰山邑听輿歌之传不能俯伏麾旆道州人之庆伏祈早膺大用以充郡望卑情无任激切依归之至谨具啓事陈贺

代章伯瞻谢沈舍人举陞擢啓

右某伏闻论荐引重度越伦等自顾衰晚岂不愧荷古语有之达观所举如明公之达而某也被举不既失於多爱而略其所观乎恭惟明公发德谊之积廓兼善之量不以富贵自大以赏识汲引为已任虽古之才臣忠辅笃于拔贤进善者当不过是宜有豪杰茂美醞藉深远副明公甄收之精当熙朝器使之重若某者何足尚哉明公曲借题品请备陞用挽而致之使出门

下岂所谓先其所知而来所不知者邪退惟匪材敢不强勉耿介之守老当益壮有为之心亦所未已庶几异日不为提獎之玷寔是而言詎锡何报区区之诚实罄于此

谢郭省副啓

右某窃以朝廷清明贤杰辈出中外要职罔或轻付虽官非宿业仕不食旧而束求进用平正详审故人各自效宣布风力增高太平辉映前世然犹间诏近侍参举所知付之有司以备陞擢为官择人无盛於此宜有朴茂瑰伟之彦宏深厚重之器达古而不局于泥适时而不牵于俗材猷绰然度越夷等上副鉅贤之论荐下平四海之公议在于某也能如是乎忽玷明公之荐仰尘当宁之览旋自省度岂不恐畏此盖伏遇某官廓精明之鉴持刚正之度责人甚薄未尝矜已小善不隐将以报国曾惟疎鄙亦冒汲引霜台靖位夙荷于恩麻虎符远守尚叨於齿记终始厚德何以负戴固当倍益素蘊坚完晚节更图微效之立庶塞见知之深舍兹以往不识所措

谢王学士啓

伏闻发奏举某堪充京官任使者无所取材分孤踪之连蹇不求必备幸高谊之甄收仰冒荐扬窃深惊惧伏念某学不贯道智非适时强离耰锄出即禄仕忽忽已踰于一纪区区才历于两官无边幅之外修无錙铢之旁援独立虽不愧直行多所违衆皆谓其迂疎心自安于方格敢为白璧奚憚青蝇是以门如冰寒席或尘满靡图虚誉之饰第畏素餐之尤然而赋性不灵临事几闇摄调万室龟勉三年狱讼岂能尽其情惇独岂能周其隐薄征均役盖国令之素明止盗去奸亦人情之常务乏优优之美政微赫赫之奇功得逃瘝旷之诛已慰勤劳之虑岂谓聪明泛采衡鉴误收擢之尘土之间闻之朝廷之上罔称驱策难平悸慙此盖伏遇某官充扩至诚主张公道别羣吏之淑慝振列城之纪纲排巧宦谄谀之朋絶贵权请托之路片善可摭虽寒生不遗一恶可摧虽美官必抑但量能于器使不格物于已长故在么微亦叨汲引敢不增修践履固守朴忠利国惠民则知无不为谨身乐善则没而後已庶几一介之节无玷鉅贤之门舍兹以还曷识所措

谢宪使元郎中啓

某啓幼伏草莱辱公之顾旧矣从仕十余年常恐碌碌无状为门阑之羞耳典邑穷僻官满垂去而公按视此道望见麾旆愧喜兼作甫迨朞月首被论荐是公之所以蓄待不谓终久碌碌而期有植立于後时也则某之所以自勇于善报公之德宜如何其为守局畏简书不获奔走庭下姑献鄙言以叙荷戴之恳惟公亮其诚略浼渎之罪惶恐惶恐不宣某再拜

贺章郎中移广西察刑啓

某啓乍违麾旆倾慕深极伏承被受新命凡邦之吏民无不悦喜如某等辈冒德之厚其为拚跃以言相贺百倍吏民之情非贺此足以为公荣盖大君子进用之渐宿德旧蘊施发于他日

未易可量是亦足以为贺也不识骑从今憩何所杭越计少留止赴治之程未知复过兰汀否
瞻仰威重不胜拳拳春深犹有寒气途中倍乞自壽以慰衆望不宣某再拜

谢守倅啓

某啓智不察几虽昏冥而可念体如慢上在微蕞以宜忧尚赖寛明得逃谴责抚怀知愧冒德
无涯何则礼辨等衰律存统属贱承于贵若级之在堂县隶于州如足之戴首顺此高卑之分
自然礼义之安苟易视而不伦或轻为而敢犯只自取辱孰云善谋谤非难掩于能言悔吝罔
违于旋踵且不分菽麦犹知蹈此而寒心岂粗服典经反肯倨然而措意事出不料情当有原
缘府隶之具文诣邑庭而请判诘其所命则曰承檄而专驰审其所须则曰附身而为据念旧
槃之尝及遂直书而不疑不度斯人辄连以上渎聪明而已甚发威怒于必行亟穷怠忽之根
芽将寘愆尤于绳约而某深思本末倍积悸慙汗竟趾而尚流魂去干而重返惛愚衷之未达
露鄙语以自明非求文过而脱身所觐宣诚而待罪岂谓霁严以纳推恕而通原心特追其因
循降指唯从于戒飭置孤踪于无玷貽厚幸于不虞窃惟顓蒙何以补报此盖伏遇某官开有
容之度敦易事之风不由一眚而废人不即一夫而求备故兹下吏获被深仁固当勉所未完
充其不逮誓坚清白之节仰答包含之私舍兹而言不识所向

谢章少卿举应手诏啓

右某啓伏蒙奏名仰应手诏鄙朴何幸獎知独深由门下之荐扬方离选集被廷中之音旨又
越等伦感恩虽志于无穷揣已固慙于非分喜畏兼集情言曷胜恭以圣人临治之初天下久
安之日丕承乎祖宗基业尤慎维持所重者邦国事为难忘因革既开谏直之路复念滯淹之
材以谓得于岁举则泛泛未精拘以官联则规规不广乃颁不次之命庶获有为之贤内焉属
近视之臣外以委行台之使母有所隐各举尔知不论品秩之高卑止间贵权之族裔槩取实
效壹归至公奉兹诏者其责非轻与是举者其人岂易宜收士类之翹杰以副上心之采求如
某者器业不优操修未粹徒蓄敢行之志殊无应变之资凡所存诚固也效古人之守及夫临
事几何非俗吏之为曩得调于铨衡获承风于使节踈钝本希於逃责聪明返误于见知僻邑
三年愧难成其美治荐书一上幸曲借其余辉解官既远于恩闕待次方留于里閭岂图多爱
常齿不才复推累日之勤俾预一时之选除官芸省方抱濫迁之忧出宰萍江遽闻烦使之报
始悞巨源之啓益銜智伯之知敢谓当然何由致是此盖伏遇运使少卿至明自照特立不疑
报国以诚取人以恕有以适用虽片善而不遗果于必闻虽屡言而无倦故此蕞微之品数叨
汲引之私敢不涵养良心坚牢素履慕蹇蹇输忠之迹屏区区胶禄之情誓不苟随保松筠于
霜雪庶几有补助海岳之涓尘上答生成次酬振挹过此以往不知所裁

上江州刘吏部啓

右某伏审解职霜台颁条江国仰惟化治之暇保协神明之休恭以知府吏部德业粹全声辉
充溢顷辍西畿之经画入践乌府之崇班指佞斥邪朝端畏其风角廉贪立懦天下慕其猷为
言有中而勇于必行事或偏而期于必矫素耻依违之病比形执奏之坚蹇蹇自持固守匪躬

之节硤硤见抑肯兴易缺之嗟甘迁谪以独安谨承宣而愈效幸哉千里获繁布政之优奈此
輿谋犹蔚登贤之望某尸官僻邑引领恩闕简书有畏而进谒莫前麾旆且遥而驰心徒极伏
望上副倚注精调寝兴

谢范吉州啓

右某言念曩繇公便得遂私诚较士籍以告休伏宾陞而知幸才仰海言之益遽违德谊之高
归复拘挛日驰精爽贡恳方慚于稽晚贻书又拜于勤劬斋醢远沾均美议晋贤之度瑞图佳
贶集珍钦汉守之良骤增敝邑之光愈积懦衷之感未缘参候徒切倾依伏望上副倚注精调
寝餽云云

谢运使徐郎中啓

右某啓伏蒙发奏举某堪充不次陞陟任使者剗繁无状方深罢黜之虞与善不求遽冒荐扬
之赐荣惧相半情诚曷胜恭惟国家缉持纪纲振补滞敝事有可革不牵袭故而重于更张才
有可庸不患处卑而难于骤进故献议多繇于草野高蹈或作于丘樊正贤者引类之秋乃君
子得时之会然非抱奇玮之器曷足膺振拔之公况当精识之昭昭岂容误采于泛泛如某者
所鍾不粹以学自资蚤脱犁鋤之劳即从关柝之守盖为贫而无愧奚窃禄之足讥知理义有
以悦心而思虑未尝出位荏苒既踰于一纪因循方历于两官讵能枉道以求伸不谓悯穷之
见取顷繇汲引檄预迁除安輿念远侍之难剧邑遂易方之请材非虞诩当盘错而可忧业谢
言游在弦歌而安用自据案而临治每穷辰而疚怀平赋役于锱铢之间辨情伪于毫末之始
知其疾苦必也力行有所承宣敢或自缓然而智浅谋远心专术疎虽欲慕古人之为几何非
俗吏之事岂意聪明过听獎饰滥加曲形外举之章援进下僚之迹退自揆省曷为夤缘此盖
伏遇某官报国以忠取人以恕压列城而恩威兼济廓至鉴而贤否坐分不忽涓埃之微不遗
飞集之寡皆笼罗摭拾欲尽致于有为故朴钝迂疎亦见推于不次某敢不益完素节愈励赤
心有利于邦纵捐躯而何爱非义而贵誓没齿而不居仰答生成之私次酬知遇之厚寔此而
语莫知所从

谢运判夏屯田啓

右某啓伏蒙奏举某堪充大藩通判任使者窃依钜庇逃吏责以踰年辄玷误知冒荐书于前
日幸出不虞之甚忧深克荷之难伏以国家用人之常着令所守凡预迁陞之次率沿保任而
居非示之以疑貳之端盖施之为诱掖之道使轻浅易摇者把持而自固罢软不力者强勉以
自支岂寸寸之可量在滔滔而有间加泽虽繇于正宁挈权多委于外台当高贤公举之明必
衆人皆可之善苟不及是奚宜致哉如某者挺身草莱从事经史学第求古器非适时心恶巧
而近愚性耻随而几僻为贫而仕视关柝而不卑由义以安远风波于莫测一尘士籍之末两
效官曹之微乏美最之足称唯孤衷之自信仅从汲引得预改除安輿念远侍之艰剧邑遂易
方之请其如民物繁夥封疆复遥知礼谊者盖稀谨教导而难入当兹错节愧无利刃之资必
也得情期偏鸣弦之乐閱岁时而将久缉条理而粗成未彰旷职之尤已慰善谋之计岂谓聪

明过察赏识泛收取于列城之穷擢于羣彦之後曲形奏牍之重俾贰藩条之雄退省不胜静思所自此盖伏遇某官至诚任已直道赞邦持衡当路而轩轳不偏推毂下僚而采求不备曾是迂踈之品亦叨挽进之私某敢不激励远存养完旧蘊坚其固守之节充以壮行之心进则竭忠唯没身而後已泰于从欲誓得志而弗为上答生成次酬獎遇过此以往讵知所裁

上运使徐郎中啓

右某啓伸於知己士心之常不如乘时古语所载稽义命而无愧审情言而可形况在高明之前必寬浼瀆之咎某生而甚朴学以自持一尘下科久历微宦虽无应变之智独保徇公之诚未尝违道以求从岂或屈身而希进职思所守固防濫窃之讥义在必行敢迹因循之病徒欲展区区之志未能离碌碌之间幸此效官深于冒庇方慚盘错之困返被荐扬之光揆力不胜衔恩已厚尚安恳款之献盖乐门阑之归恭惟某官敦易事之风廓有容之度察其非狂狷之请使之安附托之荣则愿竭愚衷冀毫厘之可摭仰承贤画庶万一之有裨云云

上?州刘都官啓

右某啓念向慕德名方抱积年之恨夤缘吏干获伸一拜之勤幸欵奉于霁威复饫承于余论奔走侯封之内往还宾履之间更月律以再之勤館人者数矣及乘舟楫之便徒想旌麾之光衔礼遇而固深贡诚音而何缓敢恃高明之炤必原倥偬之情伏惟镇抚多余福休并集恭以某官吾儒懿范当世伟材术学素明声猷相副兴利除害心古人之心履义居仁乐君子之乐比辍外台之画甍临剧郡之雄虽远民慰来暮之怀然舆论有淹贤之叹伫闻大任之降以愜至公之评曾是么微尤增祝颂伏望上为邦社精调寝兴

谢淮漕蒋金部举陞擢啓

右某啓伏审发奏举某堪充陞擢任使者风力不强方虞旷职聪明误采返玷荐书荷恩则深度已唯愧且朝廷严督责之法郡邑有承宣之难非精识疏通不足任今日之事非周才浹洽不足赴一时之功而某也学粗知方智非应变僂俛薄宦因循历年盘错屡当孰称利器雪霜不改自保孤筠悉心县道之繁栖迹海壖之陋止待譴斥敢希獎知此盖伏遇某官履道坦夷取人泛博寸能必纪片善不遗故在蕞微之踪亦叨汲引之赐敢不就志谋远忘躯徇公终保自知之诚仰酬公举之德下情无任激切依归之至

谢转太常博士啓

右某啓今月二十三日伏奉勅告授前件官者逢时从仕宣力无闻累日序迁拜恩可愧伋俸虽知于益戒轮囷终病于非材静以返思胡然冒进此盖伏遇某官至诚与物正谊接人凡其托轩轳之间莫不被含容之赐故使承流之末既沿考绩而陞敢不淬激于中持循所学愿竭壮行之志庶无幸位之羞上答天仁次酬贤造下情无任激切知归之至

谢监司举陞陟啓

右某伏蒙发奏举某堪充陞黜任使效官无状幸吏责之偶逃冒庇已深况荐书之复玷出于不度感在无穷何则巨江以南剧县相半曾是敝境且邻大湖户口栉比而艰于治生风俗轻悍而狃于冒法识礼义者盖寡贼善良而固多颇为难官足号岩邑向患侍亲于远遂甘易地而来既至之初悉心已治开之以孝弟之道示之以廉耻之端斥惰游之害农去邪蠹之妨政争讼求决必也冤枉直真伪之原赋役有加必也均重轻劳逸之势力可为而必极虑可索而必殫间关三年僂俛一意乏显绩之足道偶编氓之粗安皆高贤涵覆之私非不肖剿裁之致岂意聪明过采衡鉴误收矜其不备之资期以有成之器曲加赉饰俾预迁陞自惟欲然何以至此兹盖伏遇某官诚心无挠德量有容报国以忠一言不苟蔽贤是嫉片善不遗故在孤微之踪亦叨汲引之赐敢不益坚素守愈激懦衷见义必行羞于胶禄在邦有补誓不顾躯庶冀践履之完无辱獎知之重舍兹以往曷识其他

得替谢监司啓

右某今月十一日依准先奉勅命已交割县事与替人管勾治繁既久逃责固多受代已归荷恩有自瞻门阑而虽远铭肺腑以弥深何则自江以西为邑非易况此岩险介于湖湘占版籍者四万余食境壤者十五六举皆顽钝而难化复多轻悍以忘生诈伪衆而艰于辨真抵冒烦而劳于扶弱足为盘错之地诚费剿裁之功故官者类不欲来而来者鲜以善去某材资朴野术学迂疎始因远侍之难遂有易方之请然而据案临事常惧不胜遵法卫民自疑无效倏忽三年之外间关万变之来赋役均平幸朝廷良法之降盗贼衰止藉天地丰年之祥间或承檄奔驰越疆营干虽狱事絀非辜之効而县道免不职之愆知非所能寔有攸赖此盖伏遇某官至明兼照巨量广包驭吏固有其方责人不取其备遂使孤微之迹不形瘝旷之尤誓罄真心仰酬厚德下情无任激切依归之至

谢提刑毛职方啓

右某啓伏蒙削奏举以陞陟者逃责归罢已繫钜庇发函论荐复玷误知感惧文深情言兼切一昨官岩邑试刃盘根行所学而自持幸吾民之见幸裁决庶空于投鋤勤渠敢後于戴星皦皦诚心虽欲慕古人之事区区治状几何非俗吏之为固微异绩之可书常虑非声之或过向邻名部久冒德辉屡蒙善海之貽获免瘝官之失何天幸之加厚会使麾之改行首临敝境之穷独霁严威之重察大体而不诛其细假优礼而少与之权百里增荣二天均况及兹受代莫匪衔恩贡谢恳以方驰闻荐书之遽上出于踰分倍以再恩此盖伏遇提刑职方广聪明之资秉中正之谊取人以恕报国以忠持衡当路而轩轻不偏推轂下僚而采求不备故在孤微之迹亦叨汲引之私敢不勉激懦衷益宏素节愿违碌碌趣直道以安行请效涓涓滋明时而潜补庶以始终之守不为獎遇之羞舍斯以还不识所措下情无任激切依归之至

谢蹇学士张学士举陞陟啓

右某顷玷荐书获序陞而固幸久稽谢款由密啓而莫知感忤并深诚情兼至伏念某智非应变材不识时强违丘樊出即禄仕谓事功之可勉则知无不为谓术学之可施则笃于自信凡五迁于职局唯壹意于朴忠宣勤徒罄于区区抗迹未离于碌碌一昨拘挛海邑向望使麾窃冒德以虽多怅拜尘而罔及岂意聪明过采衡鉴误收潜纾汲引之恩远及空疎之质此盖伏遇运使学士取人以恕报国以忠不遗寸长必致之於有用不间小善必报之于勿疑故在孤踪亦叨公举敢不养完素守勉励壮行庶几正直之风仰酬知遇之重舍兹以往讵识所裁

问候仆射王相公啓

右某啓歛尘迹之微累踰淮海望台光之重久阔门阑岂无犬马之情第恨云泥之隔故尺牋不通于左右寸诚不达于高明在朝夕以拳拳历岁时而苒苒恭惟仆射相公材尊命世功极代天智变若神卷舒由道以稷禹自任于已非尧舜不陈于君发圣经之义而学者知原赞皇极之猷而人心归厚事可图而必立何惮艰难政可革而必更孰为沿袭独蓄龟于机务絶蒂芥于浮言追还治古之风增重熙朝之业绩既成于久大身遂退于优游印绶乞还即旧邦而偃息节麾悬避领仙观之清闲虽钜贤进退之心固安于义然四海瞻依之素未足于情某自省颛蒙尝陶教育怅縻踪于末宦阻伏谒于高牙愿听袞衣之归早充輿诵之欲伏望上为宗社精调寝兴

谢发运吴兵部啓

伏蒙论荐举某堪充台阁清要任使者弱羽卑栖物情所分高材巨用人事之宜苟违一间而求是拒大钧之势在志士乃能安于命惟达贤有以取诸人故拔淹振滞则有时而为嘘枯救涸则尽力而已要之不失于清议然後可符于至公若公之举也岂所宜轻如某之愚也何足以称此盖伏遇发运兵部深仁泛爱厚德有容采其善而不求其完择以心而不格以已曾是冥行之迹亦尘密啓之言敢不充扩至诚养全旧学勉其得为而不牵于习俗高其所向而无愧于古人庶几自信之诚仰答见知之重舍兹以往罔识其他

海门得替谢啓

右某啓今月三十日准勅受代讫勤劳海邑营职无闻荏苒天时终更遽及获逃官谤壹赖公庥方其朝家法美而令严县道势轻而责重必欲奉行而底于理莫非精识而竭其情乃能宣上之德泽而不为空文始可议民之戚休而以安鄙屋凡此皆其难务非才何以曲全静维免戾之繇固有归仁之地兹盖伏遇某官辅时以道待物以诚耸振列城之风激扬羣吏之治不铢铢而求备尝皦皦而有容故于朴拙之踪亦追迂疎之责感戴厚德镂铭深衷无任缕缕恳到之切

代杨侍郎上文太师啓

右某伏审光膺宸命荣剧帝师颛机政之大谟主经邦之至论四方传播壹意拚欢恭惟某官

命世鉅材濟時重器出將入相久贊無窮之基尊主庇民允成可大之業避榮即退閑之樂趨召副淵嘿之思戚休常系于生靈出處可議于宇宙位冠三公之長禮伏五日之朝四夷方懾其威聲百辟再瞻其儀表太公之佐周室止當應卜之初傳說之相商朝亦在宅憂之後豈若詔聘加于得謝之際謀猷納于弗言之時誠復古之所無乃昌辰之攸賴壯龜鼎尊安之勢慰寰瀛鼓舞之情某忝領州麾遽之淮甸望台阶之煜煜展慶無緣貢愚欸之區區宣心莫及伏祈上為邦社精調寢興

謝楊侍郎

右某啓頃蒙論荐恩蓋出于不虞久懽剽聞罪難逃于弗敏聵聰一挾媿汗交流感衷則新冒德惟旧竊以高位以蔽賢為患志士以自媒為羞然而人才固豈易知已知亦不易遇惟疏達公明之識乃克有知而不疑惟敏廉勁正之資乃能有遇而無負若某也間關末宦朴小材聲迹不足以動人知謀不足以適用徒洁身而奚補姑苟祿以未歸方其倅貳于淮城幸矣栖迟于使部第拘側僻未仰輝光遽承趨節以還空起恋軒之望不圖誤愛嘗玷飛章及追責于終更即罹忧于永慕視息延于殆絕衣冠復于更生一來京師兩易歲序馳騁敢思于千里回翔僅占于一枝虽漫刺之获投尚霽威之未覲膺門可貴方思再拜之榮濤啓或傳始悟積年之賜此蓋伏遇戶部侍郎取人以道照物以誠是非不謬于毫厘軒輊不差于薺芥采察有要何嘗直尺而枉尋慰荐所加不俟听言而觀貌此不肖銘心之感宜倍常情在鉅賢援手之私若為圖報誓永堅于操守庶毋辱于獎知卑情無任激切依归之至

代人謝及第

淡榜載揚竊尘精選渙恩就擢深愧非材宜黜而收以榮為懼伏以國家養完士類辟雍尊建師儒恢張三舍之規延聚四方之隼崇淵微詣理之學斥破碎不经之文有升補以激其能有考察以砥其怠欲觀其久則歲月以限必懲其甚則殿罰以終蓋誘之掖之使成君子之器則或出或處盡冒聖人之風宜其詔舉一傳計偕四集獨此羣彥取先萬邦多造道自得之倫絕異端斯害之黨曳袍即席氣凌風云涉筆吐奇妙入神化極天人之精程窮治亂之本源莫非瑰玮之資足副英雄之覈悅不然者何其與焉豈銖銖之稱而不免于差豈一一之歟而或容其濫如某也降才非穎厉志自強勉勉弓冶之傳拳拳詩禮之訓兩繇鄉舉一預荐書虽得失不足以動心而智慧莫諧于乘勢因治任于千里幸占籍于上庠偃然樂育之間期于深造而已年弥加而意弥篤學愈久而業愈疎适偶設科之求忘圖發策之決傷弓勸翮易生曲木之惊再戰疲兵徒有焚舟之誓与諸生而并進角一日之所长潛分罢归敢希偶中致此策名之及詎无援已之緣此蓋伏遇某官开发聖經主張吾道从容不倦之誨裨益有為之時變愚而明化駁而粹故使寡聞之迹亦叨賜第之光敢不勉所未能至其不逮用擴良心之蘊永堅大節之端仰答生成次酬教育實此而語罔知所裁

謝呂少監大夫舉陞陟啓

右某啓勾稽竊祿方托余麻剡奏推材遽先鄙迹出于不度感也甚深何則古人重傾蓋之知

志士甘抱关之守唯得之有命守虽贱而必安唯取之以诚知虽新而弗舍故穷不沦于媒已达不于蔽贤邈哉此风存亦无几如某者养心未至涉道不精仕由为贫才岂适用奋力鉅创之後勉从列职之卑栖迟一枝荏苒三岁曷期内府之贰忽偶高贤之临趋风才仰于设施分行亟闻于迁拜驰情徒极怅淳海之难亲泛爱曲收承飞章之已误此盖某官勇于进善恕以取人振蟠屈于可伸之时饰轮囷于有用之地故兹慰荐亦逮迂踈其在区区之衷敢忘皦皦之遇誓坚素节毋玷公言下情无任激切依归之至

上尚书右丞启

右某启伏以富贵得以道膏泽下于民乃古人之深称真丈夫之能事恭惟某官盛德重启逢辰得君奋身公忠致位丞弼密若嘉猷之告廓然兼善之心四海衣冠同于驰仰一时议论孰不知归而某苦块余生乡间屏处潜蒙大庇之及莫献寸诚之勤兹就礼经载趋朝宁畏简书之所迫图造门而未由姑进悃衷少纾向望

谢执政启

右某启辞富居贫乃古人不得已尔让夷急病凡志士岂无心哉盖力有不能则戒于先迷义或可违则退亦余裕当不肖输诚之日正鉅贤容物之时收愧汗之泚颜听德言之善诱顽非木石铭在肺肝恭惟某官器越伊臯道深姬孟推至怀于高位廓兼济于四方以匹夫不获为已忧以片善必求为已任采摭罔遗于朴忌嫌无择于葭莩取之有方宁与十禽之诡舍其不逮盖矜五技之穷若某之愚其感也甚乏季路乘桴之勇有仲将书榜之虞方戴丘山之恩遽愆警策之指唯区区之微悃幸皦皦之见明可忘冰渊尚负芒刺钻皮而出其羽固衔振拔之端投足而转之波更起鸣号之望庶几充扩仰报獎知舍兹而言罔识所措

谢吏部梁学士启

右某启托庇云初方慰勤拳之仰误知何遽已蒙汲引之恩感衷倍蓰愧汗流浹窃以命有穷达不移者志士之所持位无高卑可尚者正人之所与盖尊贤以能致其类故观举而逆知其伦傥非道守之优难起德言之荐如某者性资朴拙术学迂踈自为器器未免碌碌效官无补久负壮行之心养内不忘徒完夜气之息一昨鉅创始复余惫仅支弹冠再迫于荐贫窃禄敢谋于择地鷗枝偶附鼠技奚施第黄卷之是耽于素餐兮孰甚幸逢高谊来践名曹辄缘职局之微获造门阑之峻承教既祛于茅塞飞章复冒于材称虽知贲饰之荣实愧吹嘘之重此盖伏遇某官力行有逮自信甚明不遗片善而乐於进人不责全能而裕于接物故在抱关之党亦叨推轂之私敢不充扩所存端平其执庶保匪躬之节勿貽厚遇之羞舍兹以还罔识所措

谢李郎中林工部启

右某启伏蒙高义不遗过有论荐出于望外感激倍蓰伏念某降才冥昧涉道肤浅从仕久矣成效蔑然行学之志徒窃愧负顷缘家难之後余息未泯无环堵以蔽风雨无担石以给晨夕

自力疲薾复造表着非唯量已而易禄殆亦久渴而甘饮委心钩考之末垂首簿书之际卑枝一栖壮气何在然而事权无与吏责甚薄坐糜廩食苟度岁月虽忘大易任重之患亦畏诗人素餐之刺以是碌碌自保固已厚顔尚何敢冀高位君子荐之于朝廷之上哉伏惟某官德量浑厚藻鉴融远持衡公道推轂下列以进其所知为报国之务故力之可迨则引类不舍如某愚陋亦与收采岂失于多爱而惑于误听耶旋自揆省第深局踏完冰蘖之守未足为清戴丘山之恩何以图报更期勉勵于晚节庶或裨补于盛世且以副知遇之万一而不貽门下之羞也不胜悃悃之至尘冒观览伏增惭惧谨启

贺谢中书胡舍人

右某啓伏审光膺制命荣陟词垣休声一传羣口交庆窃以朝廷清明则贤者进号令温雅则王猷尊唯要地可以试经纶之才非大笔不足当训诰之重故西掖之高选为上心之慎求得人于斯今日尤盛伏惟某官珪璋其质金石其衷器业弘深文章醇正岳岳儒冠之上广誉莫先嶢嶢谏列之中直言无诘守道不回则天之与我顾义所在则国尔忘身繇齟齬于半途久间关于外补难抑至公之论果符遴拣之明立螭陛以记言岂容淹晚傍凤池而裁诏遽历清华在于向仰之情豁若隐忧之释驰寸诚而尚缓荷累幅之见勤心慙至音殆几于忘味目惊奇宝宁惑于暗投益钦盛德之谦光第发厚顔之愧汗款悰所感声画奚殫

贺范待制启

右某启光奉恩俞荣陞侍从正人遂进举世忻闻万舌一辞同诚相庆何则力裨国体忠贤为心膂之资识照事几旧德有蓍龟之喻虽进退之有命实惨舒之系人故用舍无喜愠之荣而出处系重轻之势在今日之宠授宜輿情之乐传伏惟某官涉道深醇挺身中正声华冠于仕路事业迈于古人不负壮行之心独高仕济之美曩居谏列直言尝及于免冠累剖使符遗爱每喧于卧辙更炎凉而易得外夷险以自如公议久存难缓中朝之高选休恩荐至俄迁内阁之近班伫承大任之来行展鉅材之效尚稽驰贺首辱颺音捧累幅之輝光特多谦挹鏤中扃而銜荷莫克胜任愧忤所深叙陈罔既

谢户部杨侍郎启

右某启区区之迹久玷知遇不图今者复冒论荐感?兼倍情诚靡极恭惟某官以道德术学早登近侍而注措施设莫不赞国助治为志其援挽收拾宜得瑰玮奇絶之材而举之于朝使有以致用如某愚浅何足比数而两尘荐牍岂失于取之太恕而听之或过耶如其不然盖仁人君子傥有所知知其稍不宜舍则引之掖之期于利达有用而後已不忍坐视其穷而不加之力也繇是推之则某重被推轂之恩其所荷戴尤宜常心相万若某之朴拙之守间关之势为公之所谅旧矣不俟缕缕以烦聪明其感衷自勉力行晚途冀有以上答睠与固亦当藏诸心而深若铭刻不假逆陈于左右今其言者姑以示德公之赐而重为之仪且以异平日之请见于门阑浼瀆将命但增恐畏谨奉启事陈谢伏惟台慈俯赐鉴念谨启

代人谢举学官启

右某启伏闻剡奏举某堪充内外学官者明诏搜才独系禁近公言荐士误及蕞微感恩则深揣已唯愧窃以国家闲暇朝廷清明道德教化之淳典章法度之备陶冶万类辉华太平登廊庙者袭迹咎夔列藩翰者比肩申召政事有龚黄之匹文章或班马之俦抱忠履信而济济何多应变适时而人人自若膏泽充於四海精神会于一时历考陈编之文莫踰今日之盛然犹虑崇学之未至患育材之未完近繇胶庠远迨郡国必谨师儒之选以颢教导之功在于昌辰兹实先务涣若丁宁之令发于渊嘿之严付慎举于迓臣薪兼收于羣隼自非锐于博习固以力行造道逢原弼中彪外杰然而模范正沛然而闻识强则何以上副睿训拣求之详下当钜贤论荐之重如某者生而朴野学不该通心无自得之明性近困知之陋穷圣经之深远仅涉其流慕贤业之光辉徒坚其志偶玷儒科之等初尘仕籍之联方将刻意以进修岂足诲人而诱掖遽蒙翦拂俾应选抡循省非宜悸慙尤甚此盖伏遇某官竭纯诚而报国推兼善以及人谊有可采则进之不疑力有可成则施之不倦适仰承于休命爰下挽于寒生使之伸铢寸之能冀以入涓埃之助敢不扩充素蕴激励懦衷究先王之典而罔怠服膺安君子之途而永忘改步庶完操守上答獎知舍兹以还不识所措

代杨潜古授宝文阁待制知庐州谢两制启

幸假便藩叨聯近侍仰膺涣汗伏积凌兢窃以宝阁华资参禁中之要职淝州乐土总淮右之列城皆荐绅之共荣为当世之高选宜得明哲以承宠光下慰郡邑便安之情上副朝廷委寄之重如某者赋才拙陋临事迂踈遭际盛时玷尘臚仕长棘寺而澄清无效贰省曹而经画非功勉勤瘁于积年爽冲和于此日惧貽後悔遂乞偏麾夫何诚恳之微冒此恩俞之异过于所望理有攸归此盖伏遇某官德度渊深义端方格推人材之伦品赞国体之尊安陰加援助之仁默借吹嘘之势敢不钦敬明命坚完朴忠暂休骥力之劳寧忘故步当比松心之壮不易晚雕庶补报之有成期始终之无玷上答生成之赐次酬誉饰之私

又谢前执政启

叨荣近侍忝寄便藩仰冒宠光伏深愧畏窃以禁垣美职参华内阁之隆淮甸名邦分总列城之剧宜得强明之隼以当付畀之难内焉可以输献纳之忠外焉可以谨承宣之任乃称盛朝之选始安輿议之公如某者识局不宏材资非颖误蒙器使常惧颠跻幸赖明时获伸薄效长理官之重刑成唯慎于哀矜貳民部之繁调度敢违于艺极更炎凉而既久虑疲繭以难支遂乞偏麾庶休勸迹何幸情诚之露遽沾恩命之优静思厥由固有所自此盖伏遇某官德高经济才大将明表仪四方羽翼多士睠旧物而嘿加庇助悯孤踪而曲赐吹嘘致是拙踈玷兹华要敢不增修晚节务壮後图戴門下之恩丘山愈重完胷中之守金石非坚宠惊弥戒于循墙功累勿亏于覆篋期始终之不貽冀补报之有成上酬覆育之仁次答钧陶之赐过此以往罔知所裁

谢韩左司启

右某启曩叨公举已冒德于积年今幸剽闻遽输诚于一日岂後恭而先倨盖情动而言形窒
聪既失于晚知畏简又拘于禁谒徒仰门阑之峻姑驰惊悃之微媿汗泚于面顏感衷发于毫
穎伏念某材资非敏器识不宏间关仕途黽勉禄食虽固时中之守已愆行学之心耻胁肩而
若病夏畦治龟手而未免澣綖第怀有命之俟敢冀当权之知在不肖貳滌之时正高贤按部
之日措事每承于循理剴烦尝受于指踪唯图谴责之逃岂意荐扬之及违旌麾于千里之外
更星禽者八年於兹鉅创更肉而复生短翮一枝而易足适栖迟于卑局获瞻跂于高风膺门
方念于难登涛启忽传于密致玷重言而既久悟厚赐以何迟并新感作之情尚赖包容之度
伏惟某官量涵方格志扩公忠报国必举所知取人不求其备故翦拂不遗于欸段吹嘘亦逮
于轮囷敢不励所存心安于履坦俾之有用宁少惑于胶荣必也终穷誓不移于劲节庶保践
修之正不貽獎遇之羞舍兹以还罔识所措

得替谢执政

右某启今月十五日受代已解职事者画墁志食虽甚愧于无功藏器须时亦潛希于有用乍
脱簿书之迹遽忘关柝之心盖士人惟幸于逢辰而君子莫荣乎行志当道揆之盛旦卒官常
于累年得逃瘵旷之愆实冒包含之赐义命所感情言曷胜伏念某朴 小材迂踈末学早尘
科第久涉仕途间关凡历于七官荏苒将盈于三纪剴裁数邑切于民者罔不致详倅贰两州
便于公者莫非极力饰吏敢繇于他道趣时每戒于苟为枉寻直尺则义不忍闻吐刚茹柔则
耻之有素但非诡遇何恤获禽之踈悦以先容未甘蟠木之弃一昨鉅创初复余惫仅支繭然
造朝勉以从事病渴固知于甘饮为贫寧慊于居卑投身钩考之间斂翮班联之末日月易得
孤筠四见其雪霜智力何施芒刃久虚于盘错兹幸及期而代可违尸禄之尤匪有使然乌能
逮此此盖伏遇某官力熙帝载道亮天工扩伊吕之才而沛然有余推尧舜之泽而施之无外
陶成世治悉归粹美之风表正官师尽励忠良之操有惟熙之百志无不获之一夫故俾区区
之踪亦同皞皞之泰遂终更而善罢保素守以自全某敢不愈激懦衷更坚晚节惟其所用固
当尽瘁于明时若也终穷犹足仰歌于至化上答乾坤之施次酬甄铸之恩舍兹以还靡识所
措

代李尚书回王学士谢館职启

右某伏审光奉宸恩荣迁阁职于荐绅而共喜寔清议之所归何则石渠天禄之游仙府蓬山
之比珍图秘籍充牣其中故老名儒萃聚于此历代以为要地在仕以为美官先皇尝罢其名
聊以澄一时之敝上主复修其废盖将崇百世之文要之独难其人必也能材诸位伏以某官
器含方格学际渊微休声远过于等夷烦使累更于中外鉅贤引重固知公道之开盛世陟明
尤贵书林之选棘位慙淹于陪贰霄途伫见其超腾念展庆之未遑俄祝音之先及情词良厚
诵味不忘感愧所深叙陈曷既

回王学士谢理雪启

右某启曲蒙賤牒窃仰情诚非罪横罹知世人之共悯被恩昭雪喜君子之载亨过形推谢之

言愈服撝谦之度伏以某官性资冲厚术学宏深蚤参文馆之游尝预枢庭之属即事功而有裕养器业以无亏德靡不常乌有承羞之患疾生无妄果成勿药之痊市虎之善谤已消塞马之亡踪自复在旁观而皆愜寔衆论之攸归瓦弗怨飘益重逊辞之示圭方磨玷尤忻美宝之全既愧勤衷且驰贺意悽悽之欸缕缕奚周

谢授职任启

右某伏蒙圣恩授前件差遣公言密启幸遇已知之深明命曲成叨膺使指之重汲引固荣其所自甄收窃惧其不胜惕然情诚曷以报称何则转输所总刺举是兼系一道之威休分九重之忧虑谓邦财必裕所宜先者艺极之供谓民力必舒不可存者掊克之弊摘伏发奸则有残苛之戒匿瑕含垢则虞偷惰之风惟公私之便安惟宽猛之均济乃号称职是为得人是非术学有原智能无蔽亶亶通适时之务滔滔怀应变之才则何以副器使于外台助休明于盛世如某者降才不敏造道未深间关徒久于效官蓄缩每慙于行志衆皆讥其肮脏心自信于迂踈识不足以穷物之微谋不足以经事之远即侵寻于老境甘连蹇于仕途夫何朝论之余擢以漕权之佐既私忧於任重且内省於宠惊勉图陈力之疲敢有望洋之避全牛无见将希投刃之能蟠木不遗尽赖先容之赐此盖伏遇某官辟至公之路廓兼善之心以惠民报国为材难以进善举能为已任?奉丁宁之训详求端正之伦因泛及于陋儒遂偶当于遴选振扬滞迹获出钜贤之门驰走修途往钦烦使之命敢不至其不逮求所未知察利病于列城审施为于庶务孰为盘错潜忘利器之矜何惮雪霜终保劲松之节上答生成之造次酬獎拔之私舍兹以还罔识所措

到任谢执政启

右某伏蒙圣恩授前件差遣已到任管勾者纶言督遣?奉丁宁化笔品题叨逢采拾趣办严于浹日旋叱驭于畏途固蕲悉力以莅官第惧非材而速戾视事云始操心甚危伏念某识昧通微术踈应变投步虽安于履坦谋身每拙于趋时仕也为贫何慕潜光而隐耀得之有命未尝直尺而枉寻涉三纪以数奇秉一心而自信谁言高翮不在卑栖常恨壮行未酬幼学齿髮踰始衰之境情诚忘锐进之歧方混迹于荐绅甘擬伦于樗散夫何幸会遽冒恩俞付一道之事权委十州之馈运曷由逮此固有使然此盖伏遇某官以道致君以忠报国邪正一归于区别滞淹尽出于搜扬明黜陟于朝端坦若至公之路示仪型于天下昭然丕变之风曾惟朴樸之资亦玷甄收之赐敢不励其职业慎所施为体明时爱物之心念远俗怀生之意肃齐郡县俾无扰暴之殃抚驭边陲庶絶驿骚之患上答乾坤之施次醕钧铸之私舍兹以还罔识所措卑情无任激切依归之至

谢执政启

右某伏蒙圣恩授前件差遣到任管勾者?奉纶言之光再叨烦使仰繁化笔之力仍玷误知办严遽涉于修途卜日敬临于始事思所报称内惟悸慙伏念某造道不深降才非颖迹虽安于履坦术未迫于逢原窃禄无功庶类画墁而志食秉心有守曷虞为范以失禽间关三纪之余

黽勉衆人之後暨齒髮之垂晚幸陶甄之曲成俾之宣力于远方必也竭精于庶务既逃譴累复预选抡荐更漕挽之权亟付瓯闽之部刃非甚利独忧盘错之当拔本易穷难强飞游之短乌敢引避第钦所缘此盖伏遇某官诚亮天功力熙帝载迈臯夔之事业赞尧舜之聪明择官必度其能何尝虚授责实不求其备固在有容曾惟朴拙之资犹冒品题之赐某敢不益坚素节愈激懦衷穷利病于八州敢轻举错察正邪于羣吏必示劝惩庶职业之粗修效埃之小补上答乾坤之施次酬钧铸之私舍兹以还不识所向

上蒋颖叔启

右某言念自违钧底日企台光怅竿牍之莫修恋门墙而徒剧伏惟坐颡方面倍拥福禧恭以判府枢密观文禀天元精为国重器学贯古今而行之以道智穷事物而处之以中顯然具多士之瞻伟矣富真儒之业玉堂挥翰润色训辞之严枢府运筹宣威沙漠之远功茂寝兵之盛恳辞秉政之劳诚心上感于清衷俞旨曲从于勤请压全吴而临重镇人庆歌襦过故里而拥高牙世钦昼锦某夙叨恩遇久玷仕途窃慙无补于时已遂投闲之乞方图问舍即从桑梓之归将获望尘复戴帡幪之赐愿延鼎鼐之召庶慰旄倪之情伏望上为庙朝精调寝饋卑情无任依归祝颂之至

谢新及第状元以下十八人启

右某伏审莫陞胪传桂科魁选声华籍甚中外翕然【余云唱第枫宸飞名桂籍声华霭着中外翕然】窃以新恩状元先辈行谊出伦文章根道射策吐胷中之蘊程能冠天下之材【余云决科高天下之材】舆论一时方骇飞鸣之异层霄万里伫观事业之光念展庆以未遑辱长牋之先及感慙弥切敷叙奚周云云

谢解启

窃以士怀经济之能所希乎遇主君有治安之术莫盛于得人盖无其位不足为兼善之资非其臣不能成独化之业圣贤相济今古一端政教之原根基于此然而不由道而入仕谓之窃天官不尽礼而取材谓之轻国器故公朝有特起之命深谷无自媒之心聘之甚勤至者见用或离蔬而践廊庙或起亩而登公卿皆高谊之素闻故大任之亟授迨时寢改干进实繁采求难以见其详考核于是抡其等汉以策为绳准唐以赋为铨衡虽文词未足尽才然辅相亦由兹选国家垂统数世绍隆前王伊周吕召猷其明臯夔稷禹布其职察廉进善天下无沉弃之人聚精会神彀中皆豪隼之党尚犹深讲治具间颁诏音凡预乡论俾参郡举其在进扬之始亦沿声律之程非徒角之空文盖将求于实效草莱疎贱不以势而间然社稷忠良尽此途而出矣自非超异曷副详延若某者性近颡愚识非通博衆皆讥其寡合心自信于安贫未尝舍义而求从唯惧立身之不至学当为已慕古儒而必行禄未及亲与人子而同患念昔年之挫刃复今日以弹冠岂期误中文评辄偕计籍顾艺能而知短当推荐以怀慚事出不图恩归有地此盖伏遇某官扶持文教翦拂士流赞圣人侧席之求助乡老登书之选饰弩成驥俟十驾而责其功揉曲为良荐万乘而适于用欲使无闻之品亦皆有补于时敢不恪厉深衷坚持大

节此焉充赋詎甘忝冒之名必也扬庭愿脱阿谀之耻庶几微蕞无玷獎知过兹以还不识所措

谢及第启

右某启三月二十一日皇帝御崇政殿放榜蒙恩赐进士出身仍当日释褐者公选精明当收贤者圣恩恢廓亦及幸人拜命虽荣揣心甚愧窃以为君独治自古共难必求良臣以责显效奈至旌旗岩谷物色草莱召以礼不召以威取其人而不取其阙弃版而相商宗聘之特勤舍渔而师周王遇之甚渥托一时之卜梦新四海之听瞻皆谓有非常之才固当为不次之举然兹殊典难格後时永惟取士之详莫若设科之要自汉而降由唐以还较评雄词区处羣彦文章凜凜共高当世之风圭绂班班率借此途而出非唯试艺足号得人国家世统灵长治原翕輶野无弃士廷有力臣坐廊庙者以伊夔处心列藩屏者以吕召任已台阁讲议辉华乎典谟胶庠弦歌畅导乎礼乐备闋前代无加本朝尚犹间下诏音广招雋类凡预乡书之荐俾繇礼部而陞然後引之天庭揭以圣训俛有中程之状悉膺署第之光然而声律之间可容妄作爵命之重岂宜滥当高或致槐棘之尊下或取郡邑之贵所系悉大其才寔难虽在伊人之为尽由今日之选自非超异曷副详延若某者生而贱贫性复庸野不能治产尤喜执经衆皆谓之僻儒心独安于直道无阔达之度常愧于古人负空虚之资俯羞于浮俗始千里选一黜文评崎岖数年连蹇万态学如短绠信未及于渊源志若疎筠曾不迁其节操时可佐而位无所践亲欲养而禄无所于忠孝未全日月易往复偶旁求之命再兴妄进之怀虽焚舟以示于必行而发策尚虞其难得岂意乡老贡迹太常籍名幸趋邃旒仰待明试天题渊秘落笔辞穷昼景迅驰举目心隕仅缀三篇之略殊无一日之长所忧罢归敢觊荣擢泊中楹之唱等唯上意之第能不图微躯亦玷後列宠乎踰分理则有归此盖伏遇某官甄陶儒风仪表世教佐主而求士欲无所遗器人而尽材容有不备使浅闻之贱介亦见采于明时敢不永励赤心坚持素节罔冀金朱之乐愿伸犬马之能上酬国恩次答钧造降此以外不知他为某卑情无任感荷激切知归之至

到任谢执政启

右某伏蒙圣恩授前件差遣已于三月十七日到任管勾讫被遣按刑奉丝纶之明训退思踰分荷甄铸之深仁奔驰备历于险巇督察始临于疆境忧其非据情所不胜伏念某造道不深受材非敏第诚身而自信蔑求外以苟为间关从仕之劳荏苒历年之久虽不足趋时而应变固未尝直尺而枉寻持节远方荐忝皇华之使坐曹中省幸参白首之郎徒坚报国之心实愧食功之禄方谋引迹欲丐投闲不谓误恩复加烦使况治世所矜者重轻之典清朝尤恤者幽远之氓傥匪精明之资曷当刺察之任泛及孤拙岂无夤缘此盖伏遇某官诚亮天功力熙帝载坦辟公平之路判分邪正之俦取人无求备之难分职有因能之妙曾惟朴陋亦玷品题敢不愈激懦衷勉图微效去奸助善列城共底于澄清急吏寬民庶狱必祛其冤滯冀少裨于忽杪期不玷于明昌上酬覆焘之恩次答钧衡之赐舍是而语詎知所裁卑情无任感戴激切之至

上执政启

右某启屈蠖求伸乃品物之常理涸鳞希润宜至仁之动心在愚虑以甚危望台阶而远叩情言迫切进退凌兢伏念某朴樸小材倥侗末学蚤从禄仕久困尘泥窃科几四纪之深效官逃十任之责自叨使指屡易岁华始巡巴蜀之封旋领瓯闽之部悉为远地岂敢告劳周旋六载之中间关万里之部既每胜于諏询谋度且备尝乎险阻艰难下绳州邑之勤上赖朝廷之福财赋不愆于供贡盗奸毕即于诛锄凡两及于终更敢自言其善状洎预造庭之列滥充典客之员白头虽愧于郎潜素节罔欺于士论自公退食曾不越思有道诚身未尝诡遇羞捷径之窘步愧凿墉而益高僂俛再葺颛蒙特立幸遇圣政赫日新之盛真贤赞道揆之明未见斥于冷官遽复蒙于烦使仰轩陛训辞之重念庙堂驱策之荣义难固辞乐就远适然而离乡六七千里去国五十九程每航不测之渊常蹈无穷之嶮或烟瘴浸淫于晨迈或虎狼惊突于昼行固奚恤于轻身唯恐罹于旷载饬列城于明慎儆庶狱于公平虽未全远罪之风亦庶絕非辜之叹勤瘁不忘于终日拘挛已閱于三冬溪瓜代以过期丐行符而剡奏皇皇俟命栗栗斋心重念某齿髮日衰关节痰动昏花眊视渴涸消中乃缘冲冒之劳以病蕞微之质俾之久处实重私忧辄希仰首之鸣号不避黜尊之罪戾恭惟某官功高总揆志遂泽民以唐虞之道致吾君以稷契之忠任吾已不忍匹夫之失所赞成四海之升平察其露恳之诚寬此冒威之譴回台輝而下烛运化笔以曲成庶几垂尽之愚获被更生之赐誓坚晚节上报鉅恩干浼尊严某卑情无任惶惧激切之至谨具啓事陈献伏惟钧慈俯赐鉴念

谢两府启

右某启伏蒙圣恩差知明州军州事已于七月二十三日到任管勾讫过瓜受代四年久使于远方剖竹分符数月遽更于两郡露奏获伸其诚府把麾遂适于乡关仰承优渥之恩悉自埏熔之力唯知感激第切凌兢伏念某术学空疎性资朴拙早繇仕路久玷朝绅窃禄几四纪之深持身坚一节之守随时頗仰鄙世俗之可羞与道卷舒慕古人之特立每惧过情之闻敢希虚受之官固宜自分于疎闲何幸误膺于识拔与郎潜者再岁奉使指者十年间关虽竭于勤劳翺忽殆忘于裨补旋省衰疲之质恐貽忝冒之讥剡章屡叩于九闕拜命果分于千里况四明之善壤为三泐之美邦民饶畎亩之膏腴地有山川之清胜冠盖无往来之冗厨传絕修飾之劳利烟海之鱼盐衆皆乐止近武林之桑梓人颇荣之设令自择以居所欲不过如此斯盖伏遇某官力熙帝载诚亮天工别忠邪以裨极治之朝明黜陟以赞仰成之政致此寒微之迹遂其安便之私某敢不鉅细悉心夙宵竭力承流宣化庶无愧于昔年利国惠民愿有为于今日上答乾坤之赐次酬陶冶之仁过此以还罔知所措卑情无任荷戴知归之至谨奉启事上谢伏惟钧慈俯赐鉴念

谢户部虞尚书举自代

右某启窃闻剡奏举某自代者某衰晚孤踪荒落旧学无所堪可日思退缩岂谓八座高贤一时硕德特不遐遗过有论荐且荣且愧惟感惟幸恭惟某官以忠报国以义取人举其所知不嫌故旧之密施于有政祇期器识之宜夫何泛及于匪材不宜少牵于多爱虽欲激昂以酬知

遇于清明之世其如罢輒不克荷承于激引之恩仰銜睠錄不胜惓惓之至谨具启上谢伏惟
台慈俯赐鉴念谨启

钱塘集卷九

卷十

<集部,别集类,北宋建隆至靖康,钱塘集>

钦定四库全书

钱塘集卷十

宋 韦骧 撰

进兴龙节功德疏

右臣伏以光华盛旦幸逢诞圣之辰精确?诚仰祝後天之算集缙黄於净宇演道释之秘文藉为臣子之勤钦奉邦朝之庆恭惟皇帝陛下膺图继统御世承平性均二帝之仁政迈三王之治祥推遶斗适当千载之期节庆兴龙咸讚万年之壽凭真詮之至妙介景福之无疆永助尧龄岂愧梯航之献遥瞻魏阙更希葵藿之倾臣无任瞻天祝圣激切屏营之至

又

右伏以千龄景运钦逢诞圣之辰四海驩心竞起祝尧之敬精恳仰祈於万壽真詮共演於三旬恭惟皇帝陛下独揽权纲绍隆统业默运至仁之化增高极治之风昌期拥帝脰之休庆旦协岁成之候臣忝司远部遥致严宸凭梵衆之?诚即金僊之净宇宣扬秘典合集胜缘滕宝轴以载驰望玉阶而恭献伏愿鸿图惟永势等于乾坤睿算无疆数均于箕翼臣无任祈天颂圣驩呼激切之至谨具疏以闻谨疏

又

右臣伏以上主诞辰运协千龄之庆四方翹首恳祈万壽之隆敬宣秘典仰祝鸿休虽乾坤之赐欲报而无由盖臣子之心有诚而必尽恭惟皇帝陛下仁如尧舜治轶商周绍隆先烈之光增重太平之业清明华旦夙钦电斗之祥向慕远人悉奉梯航之献臣忝司遐裔遥跂中宸先期凭梵衆之勤弥月演真詮之妙伏愿帝图惟永对北极以齐尊圣算无疆与南山而共久臣无任祈天颂圣激切驩呼之至谨具疏以闻谨疏

坤成节功德疏

右臣伏以应千年之运庆辰密比于中元赞万壽之祺?恳率同于下国弥月集缙黄之衆维时宣道释之经庶竭臣诚仰祈睿算恭惟太皇太后陛下德隆任姒仁迈勋华固宗社于无疆纳生灵于至治圣神诞节适当坤德之成遐迩驩心共祝帝龄之久臣官居蜀部迹远严宸效倾藿以徒勤跂称觴而莫及忻逢盛旦遥钦魏阙之尊敬藉真詮窃慕华封之祝臣无任瞻天望

圣激切屏营之至

又

伏以玉律在申正协坤成之候素舒既望雅符圣诞之期庆辰丕显于明昌率土悉同于鼓舞演真詮于弥月禱睿算于後天恭惟太皇太后陛下仁迈唐虞德隆任姒纳寰瀛于至治之极固龟鼎于无疆之休节继中元密契千齡之遇情均下国仰祈万壽之延臣等恪守远官忻逢盛旦飭精?于梵衆藉胜妙于贝文遥钦魏阙之尊輒效华封之祝臣等无任瞻天望圣拚跃屏营之至

又

右伏以圣神诞节盛当坤德之成臣子欢心仰赞帝齡之永集缙黄于精舍演释道之秘文弥月伸?溥天一致恭惟太皇太后陛下仁参覆载化被华夷保基业于安强纳生灵于富庶运符千載庆辰密亚于中元诚祝万年勤禱率同于下国臣等职拘闽部迹远枫宸称觴莫继于簪绅向日但希于葵藿藉真詮之有助祈睿算于无疆臣等无任瞻天祝圣激切屏营之至谨疏

进兴龙节功德疏

右臣伏以遇圣神之诞日曲尽?诚演释道之秘文仰祈睿算虽乾坤之赐难报盖葵藿之心必倾恭惟皇帝陛下继统明昌持盈宪度光大祖宗之业均齐尧舜之仁绕斗效祥昭契千齡之盛兴龙庆节咸歌万壽之祺爰藉力于真詮永延洪于景祚拳拳驰敬遥钦魏阙之尊恳恳献言窃绍华封之祝臣无任瞻天祝圣激切屏营之至

又

右臣伏以祥电绕斗雅符圣诞之辰飞龙在天尽冒君临之泽率土敬祈于万壽真詮共演于三旬恭惟皇帝陛下治越成康德侔舜禹纳生灵于富庶保基业于隆平昌期拥帝眷之休庆旦协岁成之候臣忝司闽部遥跂枫宸凭梵衆之精?就佛宫之严洁宣扬秘典成集胜缘緘宝轴以远驰望玉阶而仰祝伏愿鸿图惟永齐久于乾坤睿算无疆比隆于箕翼臣无任瞻天颂圣激切懽呼之至谨具疏以闻谨疏

天寧节进功德疏

右伏以千齡庆节允符天德之寧万国诚心共祝圣人之壽集缙黄于宝刹演道释之真詮敬修弥月之胜因仰赞无疆之睿算恭惟皇帝陛下性仁御极稽古绍图守成光七圣之规发政出三王之表言纳葛尧而輿情上达恩沾动植而和气四充流渚绕枢幸遇诞辰之盛望云就日咸输精禱之勤臣恪守州符遥钦魏阙藉?诚于淨侶宣秘典于累旬伏愿龟鼎灵长佑明昌于亿世冕旒垂拱保安治于万年臣无任瞻天颂圣驩呼激切之至

又

右臣伏以造化元功方庆岁成之序圣神诞节允侔天德之宁寰区欣千载之逢钟梵祝万年之算恭惟皇帝陛下德参覆帔明合照临建皇极以承天运陶钧而御史智执两端而用中如舜仁不徧爱而急贤若尧熙熙极治之时皞皞可封之俗光辉自昔咸钦绕斗之祥讴颂于今竞起望云之祷臣恪司符竹遥仰阙廷集净侣以先期演真詮于弥月伏愿皇图巩固益隆不拔之基圣壽增荣永保无疆之福臣无任瞻天颂圣驩呼激切之至

进兴龙节银表

进奉兴龙节银一千两

右臣伏以明圣诞辰咸祝万年之算方隅礼贡莫先九牧之金前件银山实效珍地非爱宝助盛旦充庭之末输远臣任土之诚冒瀆宸旒臣无任瞻天望圣激切屏营之至谨附福州纲诣阙上进以闻谨进

同前

右臣伏以诞圣庆辰幸邁千齡之运望云恭贡敢希九牧之金前件银任土效珍充庭致礼仰祝後天之算遥倾向日之诚干瀆宸旒臣无任瞻天望圣激切屏营之至其银谨附南剑州纲诣阙上进以闻谨进

同前

右臣伏以庆节光华咸祝万年之算贡金明洁可参前列之龟前件银地不藏珍礼由任土式助充庭之末敬伸向日之诚臣无任瞻天望圣激切屏营之至

进奉坤成节银状

右臣伏以倪天诞圣协千载之庆辰列国望云祝万年之睿算均驩心于无外致贡物而有常前件银任土所宜效珍于远愿充庭实之末庶竭葵倾之诚干冒宸慈臣无任瞻天望圣激切屏营之至

进天寧节银绢状

银五百两绢五百疋

右臣伏以上主诞辰咸起後天之祝四方礼贡各修任土之仪前件物山岳效珍蚕桑致用敢备充庭之末仰祈万壽之隆干冒宸旒臣无任瞻天望圣激切屏营之至

又

右臣伏以君王诞节有生皆乐其圣时臣子勤诚任土各修其方贡前件物精坚为品组织效能仰尘北阙之严上祝南山之壽干瀆旒宸臣无任瞻天望圣激切屏营之至谨録上进以闻谨进

代杨侍郎使北表奏书状【贺十二月七日生辰】

白沟谢御筵奏状

肃将信币方趣赴于庆辰始及邻疆遽远颁于礼宴旋省驰驱之迹仰銜犒劳之私感激良多敷陈曷谕

新城谢抚问表

叨被恩私曲加存抚【中谢】窃以睦邻修好庆诞讲仪拥节光华将致国书之重传辞温厚载怀郊劳之优荣感所并情诚莫罄

燕京谢酒果奏状

载驰驿骑方憩留都渥恩与厚礼兼隆嘉实共醇醪并赐益滋銜荷难极叙陈

檀州谢赐汤药表

驰庆宝邻念修程之遄迈拜嘉珍剂荷殊惠之骈臻【中谢】窃以聘节在途时寒应序曲被抚存之厚远貽服饵之良仰冒眷慈内深兢惕

副使奏状

叨陪修聘方跋履于长途幸预拜恩获緘藏于良剂仰戴抚存之惠伏增感激之诚

中京谢皮褐衣物等表

荐辱宠私远颁衣褐【中谢】窃以恭修国聘寅奉使华荷赐有加曲降凝严之备抚躬知幸都忘冲冒之劳惠虽被于体肤感实深于悃悞

谢筵赐酒食奏状

信睦颙修方此车徒之憩匪颁遽及沛然醪饌之均仰味恩沾第增诚感

谢館宴奏状

乍息乘輶方勤授館遽承宴犒尤荷宠綏仰优渥之所加叙悬惊而罔既

谢合食酒果奏状

觴豆曲頒仰銜醇厚之味果肴兼賚饫享甘鮮之珍叨美貺以滋多揣愚衷而甚忤

谢生饩奏状

兹展庆仪屡蒙礼赐既沾荣于宴劳复拜贐于饩牵感与愧并情非言究

谢射弓御筵奏状

义隆邻好礼浹宾荣肆筵敦示惠之情讲射尚和容之节敢自矜于穀率徒有愧于堵观荷遇
从容省躬悚幸

谢春盘幡胜奏状

春阳应候礼馈适时嘉蔬助旅食之甘彩胜增使华之美累膺宠賚倍积感惭

谢餞筵奏状

致币奉觴既成仪于诞节还朝复命仍叩赐于祖筵即就道以言旋唯铭心而倍荷

回燕京留守三幅

振轡使輶将讲宝邻之好假途留钥幸瞻宗戚之风荷华翰之首贻在鄙诚而倍感

副使

叨陪使驿幸过留都首蒙海翰之华仰服谦冲之度窃深荣荷曷罄敷陈

谢燕京留守请赴筵

持旄暫弭幸通謁于門闌飛翰見期重伸誠于觴豆仰銜厚意尤激深情

副使

假道宗藩幸参使事贻书宾馆特辱礼招荷睠劳之过勤怀悸慙而弥甚

谢燕京留守钱筵

使毕南归复閱别都之盛礼勤东道特伸祖席之华感厚遇以不忘叙繁言而莫既

副使

复继还轺荐经留镇方在脂车之隙更叨饌席之荣荷德弥深铭衷无已

回中京留守三幅

驰庆诞辰方恭修于国聘假途留钥将仰覲于贤规敢意谦冲先贻緘翰其为感忤何以谕陈

副使

参华持节取道别都敢图厚德之冲先损緘题之况荷慙无已敷叙奚殫

谢中京留守召赴筵

行方弭节幸少憩于留都待以肆筵固益钦于主礼仰当宠召深愧勤诚

副使

忝陪銜命幸获披风敢希留务之余特有燕私之召愈增感服难尽喻云

谢中京留守钱筵

礼成复命再出名都义重叙违更勤胜饌唯仰钦于顾遇但并积于感铭

副使

毕聘言旋归途载复何幸蕃宣之重过形饌送之勤拳跂谦光镂铭心曲

回中京留守攀迎状

聘好已修方回策驭道涂所历复过封畿仰睠意之益隆辱緘题之先覩感慙之甚惊悃不胜

副使

叨貳使车既成讲好复经留甸载获望风过蒙枉教之光益甚厚顏之愧

回诸州攀迎

好通邻域道出乐郊方叱馭以言还遽飞文之见及感勤兹甚叙悬奚周

副使

出疆讫事还阙戒行忝参貳于传车复经繇于乐土首辱緘膺之贶窃深佩刻之惊

谢诸州请赴筵

趣还驰传复道名疆遽沐荣緘曲形嘉召钦勤诚之相厚寔鄙意以独深

副使

幸陪归使再历要藩敢烦治具之延何意观音之逮?惭殊剧纓述奚穷

回诸州钱送

馭叱星轺心驰天阙更烦祖饯之礼尤助归途之荣载仰勤劬不胜衔感

副使

还貳輜轩复经名壤辱贻书而加礼烦供帐以饯行悚荷兼常敷宣莫及

回诸州远迎

恭持聘节幸出治封钦厚意之特勤枉柔緘而先辱即谐展叙聊致款诚

代鸿胪陈卿使北表

谢白沟御筵奏状

恭持信币颺奉庆辰戒行将谨于出疆加礼首烦于命介仍沾宴衍益佩恩荣感悻所深情诚莫既

新城谢抚问表

叨被睠私曲加抚问【中谢】窃以讲睦邻之好修庆诞之仪寅奉使华将肃成于礼命仰膺郊劳已懽服于德音旋省愚衷第知厚幸

燕京谢酒果奏状

受辞文陛驰庆宝邻方憩止于别都遽颁宣于嘉惠醇醪溢榼美实盈筩仰味恩慈深铭肺腑

檀州谢汤药表

仰奉肱传曲颁药餌【中谢】窃以睦邻讲信持节在途执献壽之清觴将陪盛礼锡尚鑿之良剂首服除私拜命载惟抚躬增感

谢赐毛褐衣物表

远谕纶言荣颁毳褐【中谢】窃以恭修国聘夙驾使轺方趋奉壽之辰先荷赐衣之礼服之以拜固知狐貉之非温被而在躬孰谓雪霜之可畏刻肌弥感叙恳莫殫

谢館宴奏状

乍息乘轺遽蒙授館将讲邻欢之信叨承宴犒之仪优渥所沾悚惶弥剧

谢签赐酒食状

甫及诞辰将伸庆礼方车徒之就舍俄饮饌之沾恩仰奉睠存但增衔感

谢合食酒果状

致币称觴恭修邻好投醪怀核屡浹宾荣仰厚遇之有加俯卑惊而知愧

谢春盘幡胜状

新春应序嘉贶适时俎有珍蔬助甘滋于旅食首加彩胜增贲饰于使华第切忻铭不胜悃悞

谢生饩奏状

恭修贺庆已蒙宴犒之优曲被恩私更及饩牵之厚仰怀遇待愈积悸慙

谢射弓御筵奏状

宠厚肆筵礼优讲射幸享娱宾之厚愧无中鹄之功声画所穷悃诚莫究

谢饯筵奏状

礼成诞节将复命于明廷义重邻欢载承恩于胜饯行矣言旋之迹悠然怀感之情

谢观打球表

骏马争驱广场增气神珠应手衆目骇观【中谢】窃以载举宴仪曲优赐节既豆觴之嘉惠复驰击以侑欢臣等将命兹时预观为幸仰念宠嘉之厚益增愧荷之深

回燕京留守三幅书

讲驩邻域叨使指以载驰假道留都幸宗臣之相际首辱緘膺之贶但深铭感之怀

回燕京留守请赴筵

乘轺假道方幸于晤言飞翰见招益钦于礼意其为欣荷曷罄叙陈

谢燕王饯筵

兹幸使还复经留钥曲蒙主礼更肆祖筵仰厚意之益勤俯深诚而增愧

回中京留守三幅书

驰庆诞辰假途留钥方幸披风之便首蒙枉翰之勤感忤所深敷陈奚究

谢中京留守饯筵

还辕复命再出留都具礼饯行重勤祖席仰钦睠厚第切感铭

回中京留守攀违

持节言旋既蒙厚礼飞文叙别益仰勤诚在愧感以难名唯保调而是请

回诸州攀迎

幸成使事复过郡封荷雅睠之曲敦枉华辇而先及即谐瞻晤可罄欵诚

谢诸州请赴筵

还叱轻輶复繇乐土遽辱饌题之贶将伸觴豆之勤窃荷嘉招但铭私悃

谢诸州饌送

使还假道既幸于晤瞻主礼致勤重烦于饌送情非言喻感与愧并

代卫尉陈少卿使北表奏启状

白沟谢御筵状

因时讲好尤重春元衔命出疆首蒙恩渥仰荷宴慈之及益增使事之光窃感固深繁言莫究

新城谢抚问表

叨承音旨曲被抚存【中谢】窃以改岁庆元睦邻修好恭持信币道方肃于宵征远冒德言礼有加于郊劳其为荣感莫罄悃悰

燕京谢酒果奏状

使輶遄迈方憩别都礼赐远颁益钦异数既享醇醪之味兼尝美实之珍衔感无穷书言曷致

檀州谢汤药表

交庆春朝将展宝邻之聘拜嘉乐土遽蒙珍剂之颁【中谢】窃以拥节驰驱际时凝凜曲轸修程之迹特推良饵之恩祇受载维仰衔无已

副使奏状

参陪使节驰骋邻封荷轸恤之异恩捧调和之良剂唯珍服饵弥刻肺肝

中京谢皮褐衣物等表

星輶言迈天气冽寒曲被恩慈远加衣褐【中谢】窃以恭修国聘肃奉使华冲冒遵途方有凝严之惮匪颁在笥遽承温燠之私抚已增荣铭心知感

谢馆宴奏状

乘輶税上拜赐稠重既蒙授館之安复荷加筵之礼宠绥所逮铭镂奚殫

谢筵赐食奏状

车徒方憩将展庆仪醪饌有加均沾宠数极情诚而增感在笔舌以奚穷

谢合食酒果奏状

樽罍曲赐醇美既沾肴核旅陈珍鲜并享仰冒眷慈之重愈深衔感之诚

谢生饩奏状

恭致国书屡承台馈宴犒已沾于优渥饩牵复继于颁宣感?不胜敷陈罔既

谢射弓御筵奏状

射惟观德宴以示慈兹缘邻好之修遂玷宾荣之赐能非志穀徒有醕觴慙荷休恩充盈卑悃

谢春盘幡胜奏状

律变时春恩加节物柔蔬荐味彩胜增华益钦礼馈之优幸作使光之助

谢餞筵奏状

礼成修聘将复命以言旋恩厚肆筵叨餞行而知愧皦皦永怀于心曲悽悽难尽于笔端

回燕京留守三幅

讲好邻邦取途留府何幸藩宣之重先形翰墨之华感忤兼深纾陈奚既

副使

叨貳使轩幸经留钥敢图谦德首辱荣緘荷礼遇之勤劬在悃悃而悚息

谢燕京留守请赴筵

兹幸假途获睹旌麾之盛特勤飞翰见期觴豆之延祇服睠私弥深感愧

副使

弭节留都幸聆广誉枉书候馆曲被嘉招仰钦存劳之私第积感惭之素

谢燕京留守钱筵

乞事旋归道载经于留钥伸诚将送礼尤厚于祖筵衔荷不忘指陈莫极

副使

幸参华节再历名都方重别于音徽更叨承于饮饯弥深感仰曷罄敷宣

回京留守三幅

驰驿邻邦方勤于修聘假途留钥将幸于闻名敢意撝谦先烦飞翰感惭滋甚敷谕奚周

副使

叨陪使节幸涉留都荷睠与之特勤枉緘封而先及其为感?曷罄敷陈

谢中京留守召赴筵

颺憩星轺幸兹授館遽承珍翰期以肆筵仰厚意之过勤抚深惊而增愧

副使

参贰使华之行获经美治敢希留务之隙时枉宠招悚荷所深喻名奚究

谢中京留守钱筵

使轩云复幸再历于名疆主礼尤勤重叨承于盛饯倍衔厚遇第极鄙情

副使

参陪复命再假归途方伸取别之情更辱饯行之礼感衷弥甚溢幅奚殚

回中京留守攀迎

已毕聘仪复经留甸切荷谦冲之量先形緘翰之光悚忤良多指陈莫喻

副使

忝贰使轩已恭修于聘好荐经留府将载还于风猷荷尺牒之先贻铭寸心而不泯

谢观打球表

腾蹕广场睹追风之骏足斡旋妙技骇应手之神珠【中谢】窃以义重睦邻礼优展庆申惠私而加宴肆驰击以侑觞臣等弭节兹时寓观为幸激懦衷而愈感写深悃以难周

去日回诸州攀迎

修聘邻封取途治府首烦华翰仰荷勤诚感戢所深布宣莫逮

副使

幸叨乘遽获涉治封敢意谦冲先贻緘翰俯慙无已缕述奚殫

去日回诸州请赴筵

暫休驰驿方幸假途特枉荣緘曲形嘉召弥荷勤劬之睠尤增?慙之情

副使

叨陪星使方瀆馆人更辱緘题之荣曲垂觴豆之约感慙益甚敷致何穷

回日谢诸州攀迎

兹叱还轺载经会府荷谦勤之见及损翰墨以先贻第切悚铭莫殫剖述

副使

忝参复命载饬还辕先沐枉书尤钦厚意在深衷而弥感非累幅之可陈

回日谢诸州请赴筵

趣还上国复过名城辱竿牒之见贻具壶觴而为召深衔礼遇曷罄指陈

副使

幸参回节荐历名疆既蒙授馆之勤仍沐壶觴之召不胜愧荷无以喻云

进奉郊禋罗

右臣伏以圣神继王重反始于祖宗禋祀肇修大推尊于穹昊盛矣圜丘之事驩然万国之心包茅并驰琛賫交献见夷夏怀仁之至诚邦朝济治之隆臣忝守封疆阻承鹵簿不获骏奔于大礼第唯想望于清光贡物有常敢踰任土之制充庭甚薄深惧黷君之诛前件罗差教练使某乙管押上进臣无任瞻天望圣激切屏营之至谨进

上广西漕章少卿

右某言念自违恩庇日企德辉怅道里之甚辽拜旌麾而莫及顷滥迁于省局尝驰谢于邮筒窃惟恳款之深仰被聪明之照恭以运使少卿量含宏厚识际渊源久着正人之声独高旧德之萃搢绅慕其格度当宸器其材猷连捧芝函之荣两司桂管之重虽朝廷之意欲惠于远方然廊庙之资尚淹于大用伫闻不次之命以塞至公之评某夙冒獎知尤增瞻颂伏望上为邦社精调寝兴无任激切依归之至

上郑内翰啓

右某伏审拜命上前拥麾方面中外之望犹为赫然东南之情不胜幸甚仰惟镇抚之始福禧以凝恭以某官稟粹天元游心圣奥以伊臯任已之重以尧舜致君之明风迹高于本朝声华映于近古润色大业方絜鸿笔之摅颁条巨邦俄便安輿之奉虽承宣远副于当宁而膏泽尚拘于一方未谐当轴之权终蔚荐绅之望顾惟鄙朴尤颂高明附风云之程尝叨于曩日远珪璧之度已涉于积年欣闻桑梓之间获被埏熔之造第怅縻躯于职局莫由齎謁于门闌拳拳有诚缕缕难罄伏望上为倚注精调寝兴

上章少卿罢广西漕

右某伏审解印南方拥麾北阙暂休经画之虑即戒川途之程仰惟冲冒之间福休以相恭以某官秉心纯正涉道精深识通几微政有根本材猷久服于羣口风迹着闻于九重黽勉数年振岭表列城之敝奔趋三节副朝端前席之询行膺不次之恩聊塞至公之论某夙叨獎遇尤切瞻颂属官局之有拘望车尘而莫及伏望上为眷倚精调寝兴

上河阳富相公【代浙漕段大卿】

某言念久违钧庇日企台光怅外计之所拘拜高牙而莫及伏惟镇抚多暇福休荐臻恭以某官与国辉光为时间杰心游仁义之粹学际天人之交发策决科经纶夙着出疆专对荒犷久宁非尧舜不陈于君以稷契自任于已志已充于功业望益重于老成勤劳邦家被三朝之注意出入将相耸四海之具瞻握枢辍谋画之烦拥节遂优闲之请虽清衷加厚猗所欲于勳贤然舆论难平愿复还于钧轴某素叨獎顾尤极颂言伏望上副倚毗精调寝味

上集贤曾相公

右某言念賤封上瀆惕愚慮以方深教訓下頒仰台光而如近迹系外台之役心馳東合之榮伏惟燮理多余神明來相恭以某官術高經濟道着將明柱石三朝蓄龜萬化謀謨入告自比伊夔之誠勳業大凝遠逾房杜之器贊盈成于無逸避譽聞于不居增重太平之風優游賢相之體四方奠枕莫非偃草之從百辟具瞻悉荷秉鈞之庇某衰遲晚節黽勉東州獲逃漕挽之愆盡出埏埴之賜在持身而愈篤于頌德以益深伏望上為邦家精調寢餼

上省主韓端明狀

縻軀漕局曠迹計庭望德滋深與時浸永方貢成而未幾遽拜教于不圖榮慰雖多跂瞻愈切伏惟經畫余暇福休迭來恭以某官識洞淵源器函方格奮身胄族之貴平步鼎科之雄公忠久荷于倚毗材術累更于踐歷剗煩曩日肅天邑之浩穰任重此時贍邦財之用調未遂鈞衡之用尚淹廊廟之資而某夙被獎知日蒙庇賴既貫行于戒命且善頌于聰明願觀當軸之榮躋以快輿情之竊議伏望上為邦社精調寢興

上兩省以上起居問候狀

職局轉輸奔馳列郡歲時遷變遠高閭雖久曠于貢音固不忘于慕德伏惟氣體養正神明降休恭以某官器等珪璋量包淵藪秉赤心而內固歷華貫以荐更廊廟未登尚抑謀猷之遠冕旒載眷仁聞委寄之優伏望為國自將副人善禱

上知郡錢少卿

某不競舍田即學竊玷仕版既朴無他長每自顧以義而不敢苟于進取故袞袞微宦勉力以資祿養者幾二十年名聲不能動人氣力不足立事仰思古之豪偉魁磊之士唯愧恨其不及而所不作者所守未嘗違所學耳曩者次補遠邑易地茲土既至之始乘圯敝紛揉之余鷄鳴而起孳孳從事日赴于庭者不啻蚊聚烏合之衆而習俗輕悍人人爭勝相軋以錙銖毫髮為校而求其所以平參以筦庫犇走簿書期會藂于叢然雖極力以為之常惧材智淺鈍不勝其任而絀吏議故僣勉區處不遑少安惟是晨昏定省之外他皆所不暇也若其江山清曠之興歲時游從之樂不知為何等事官況至此良為未愜乃所幸者冒執事照庇之賜異于等倫庶幾猶可為也苟或不然則引去也久矣仰托恩力如是其肯作慢以取威怒于不測乎雖牧兒羗子之愚亦知其不可為也且某獨何心而為之乎某前日以虧利之咎輒勤有司此不職之所宜得在着令之文明如秋陽而不可掩雖子弟不能覬幸于父兄之手也其名為罰其理不足以辱則心無所動也以其不能覬幸則憾無所從起也于無動無憾之間而返加橫逆于承檄之人是足為狂疾人也然則何欤蓋若人旧役于縣累有宿愆逋責久挂官籍慙于煩浼听覽不敢數數申請乘其來之便遂令了一名件此犯情尤不良亦祇略與乞竟不圖興訴以干階屏今日捧受使檄乃知緣此追逮吏輩震恐慙慙汗流及趾不肖之迹不能遠嫌于未然其被罪也固不敢逃唯蘄高明委曲垂恕而亮其踈拙而無他心不謂不知厚德之及而疎絕之

则幸甚

上省判皮郎中

右某伏审光膺诏检荣赞计庭伏惟庆慰恭以某官学穷根本识照几微声华一时风采羣彦蚤更器使之重密简上知之明北道宣勤贍兵储于不日中朝遴选佐国用于复来岂唯积劳竭虑而致财赋之饶将见高翔阔步而摠醞藉之广某尝叨獎遇尤极颂瞻怅职局之所縻走门阑而莫及下情无任欣拚之至谨具状起居陈贺

上翊善冯学士

右某言念自违恩阙日企德辉怅道里之阻长贡款诚而稀阔伏惟道谕之暇神明其休恭以某官涉道粹深处躬夷亮著龟万变标矩一时智谋渊渊赞计庭之财赋风迹凜凜肃天邑之典型雅协宸衷之至贵迁王府之佐至诚以固居有可尊之名清议所归伋膺不次之用某夙叨獎遇尤极颂瞻听諄诲而未涯驰鄙心而弥切

上发运皮度支

右某伏以抱非常之略微剧任不足见其所施对有为之时唯钜贤乃可分其所寄材与世而相会义兼命以不违亦振古之所难逢在吾儒而为盛事若簪纓倾风之衆驰庆争先而门阑荷德之生致诚独後岂自貽于譴絶盖久困于拘挛少平恐惧之衷辄恃高明之度仰惟经画余裕福休在躬恭以某官气稟纯和量函方厚术学坚正智谋博通应事变以无穷适时宜而有要作清平之重器奋夷亮之大心未涉四邻之荣颺六路之计风力扬于朝右事权半于寰中无愧古人真得壮行之志实繁輿议尚淹入告之猷某顷冒獎知复叨庇育铭诲言而历历向恩义以拳拳何日望尘得伸却扫之礼惟时钦颂固有恋轩之情伏望上副倚毗精调寝膳

贺陈院邓舍人

右某伏审光奉恩俞荣颺制命正人翔步多士驩心顾惟门下之生少慰胷中之望恭以某官学行自信德性素高以纯诚结主上之知以博器为衆贤之重勇当言责每焚草以慎传审治官聯惟择材而密启方藉英华之气独承纶綍之裁然侍从虽优岂足尽远之志傥疑丞未拜乌能使輿论之安某窃玷獎知尤深忻颂怅海壖之拘迹企台屏以驰情伏祈上为庙朝精调寝餽

贺判监侍讲学士

右某伏审光膺诏检入奉经筵闻风一时交语相庆恭惟某官存诚务远涉道资深术应变以无穷智运才而莫敌献言中禁早悟天心拥节东州力宣君泽重器难淹于外补封轺遽促于

北归秘殿论书必尽唐虞之道上庠主教益敦邹鲁之风伫闻大任之荣以愜至公之议某窃叨顾遇尤剧颂瞻怅跼缩于海濒阻奔趋于门下伏望上为邦社精调寝兴

问候陈院邓舍人

右某自违德庇日企台光怅拘迹于海壖旷驰诚于恩阙伏惟草制余裕对时纳休恭以某官器业宏深践修方正学际天人而守之以晦智通事物而应之以虚绰有大儒之风俨为多士之望履亨翔步虽荣侍从之班兼善存心犹鬱将明之蕴某窃叨顾遇尤剧颂瞻愿观大任之陞蚤慰輿言之切伏祈上副睠倚精调寝兴

问候江东运使职方

右某言念久远恩闕日钦德表阻道途之绵邈贡音绎以濶踈仰恃高明之有容庶几愆责之可追伏惟按历多暇福休并臻恭以某官器业宏深材谋超迈累膺使指之重夙被宸衷之知移节江东虽慰一方之望纳忠朝右尚稽三接之荣某素荷爱存倍深祝颂伏望上副睠倚精调寝兴

贺前淮漕俞学士移命

右某伏审光奉诏书荣趋魏阙属拘官之有守望行旆以无缘恋德益多驰诚莫究恭以某官材谋超远器业宏深智应变以不穷学逢原而自持久耸仕途之望早参公府之华上简宸衷特预书林之选出膺使指暂分淮甸之忧抚疲瘵以方寧广咨询而未足召节遽至輿情若为然近用非宜固也速吁俞之命而对扬不晚庶乎恢膏泽之资某窃荷獎知尤增瞻慕愿为邦社善调寝兴

贺杭州知府待制沈兴宗

右某伏审光膺飞诏雄领便藩岂唯耀闾里之观诚足慰东南之望一时清议交口均驩伏惟坐镇雍容纳休骈萃恭以某官材猷超远德谊高深学见于行智酬于变奋迹忠嘉之道致身侍从之荣抚育全吴虽朝廷之优寄赞承密席在器业以尚淹某久远辉光倍增瞻仰怅縻躯于簿领阻伏谒于门阑日对讼棠益想端人之表心驰恭梓聊输不肖之诚伏望上副倚毗精调寝味

问候发运张职方

右某言念久远辉光日增向仰再叨庇育中窃忻愉但拘烟海之濒难走旌麾之下在愚诚莫能少贡盖音驿不敢僭驰岂自絶于贤门肯辄忘于礼遇仰祈明廓之鉴委照葢微之衷伏惟经画多余福休兼萃恭以某官器锺间异材蕴将明学逢自得之源智应无穷之变累膺邦寄早结主知未涉四隣之荣暂颺六路之计风力盛扬于朝右事权几半于寰中何愧古人真得

壮行之志实繁輿议尚淹入告之猷某未遂望尘第深颂德谨缘一介之便聊献积年之情伏冀上副倚毗精调寝餽

谢前海门徐主簿

右某久濶绪言积瞻思而无算向缘同事忻际遇之有涯旋审见星之行遂虚披雾之愿弦朔易改音邮莫传幸单介之遽来荷尺书之远及伏望俯就礼制载安寝兴宿学周才难久淹于栖隐修途清贯行仰听于飞翔会晤尚賒保调是请

贺冬

右某伏以剥往复来物心将泰陰消阳长贤履所宜恭惟某官告德在躬纯诚应物邁此令辰之会纳诸繁祉之休某跼缩穷深縈縻职守第望风而申祷图拜壽以无缘

滁倅到任谢监司

右某伏奉勅差前件差遣已于今月十八日到任讵非材佐郡方?视事之初高位钧仁固识托庥之幸恭惟某官聪明坐照德谊内充表仪羣吏之端振举百城之治某乍顓职守仰奉声輝未能听教于门阑第用驰诚于音驿

滁州陈内翰

比者濫膺宸綬叨贊郡条方依德之有涯窃省躬而自慰恭惟知府内翰性鍾间异道涉渊源以嘉谟直节而结上主之知以硕学鉅材而耸时贤之望踐玉堂之清近更天府之浩穰偶镇偏封坐极承宣之效伫迎大任行摠经济之猷某景向积年参陪有日预忻披雾将仰于台光先谨发函辄尘于 鉴伏望上为邦社精调寝兴

又

言念近贡牋函方悸慙于尘冒遽貽海牋但感仰于谦光伏承山国寒微铃斋甚暇穆若神明之相晏然气宇之和式慰远瞻且符善颂恭以知府内翰术操经济材蘊将明外夷险而以道自期忘贵富而以德自任剖符暫屈限膏泽于一方趋节伫闻耸仪刑于四海某即奔官守渐还台辉唯祈召拜之少延庶慰倾依之夙望伏冀为时自壽副下所瞻

贺冬监司

伏以日在北陆阳萌黄宫岁功为布德之初人道重履端之始惟时贺庆之礼莫盛贤明之归恭惟某官器业高深忱诚浑厚对令序而顺适纳纯修而独多坐抚列城均致福绥之及伫膺大任倍迎宠数之优某跼守备员阻趋为壽遥企门阑之峻徒增祝颂之?

贺运使韩司勳

伏审光膺诏检荣领漕权凡冒德庥举增诚悦恭以运使司勳材猷高远器业宏深蔚有古人之风周知当世之务霄岐翔步行膺三接之荣淮甸先声立致百城之福某縻躯职局企踵旌麾未修伏谒之勤姑献颂瞻之恳

贺提仓李国博

伏审光膺宸诏出按淮邦惟时列城壹意相庆恭以某官材深应变器重适时要剧累更声燁独盛尚淹高躅未慰愜于輿言颺屈远谋为福休于一道某尸官山郡引领车尘未伸一拜之勤聊谨寸诚之献

上本路监司

比者叨被恩俞幸分郡寄将依德庇预慰诚心恭以某官器业宏深材猷高迈中外屡更于要职事功绰着于昌辰持节东吴虽厚一方之福飞声上国伫膺三节之招某指日戒途之官濒海望使台而渐迓伏宾次而有期敬迟参承并纾恳款谨先奉状起居

贺丰待制

右某伏审光奉恩纶荣颺方面列城千里相庆一辞恭以某官德望素高学行甚伟以忠说蚤扬于谏列以刚明久贰于卿曹颺离侍从之联出展藩宣之效睢阳近甸顷辞留钥之崇浙右名邦来统兵钤之重昼锦旁辉于乡国歌襦翕振于民声某之官海滨假途节下修桑梓之敬匪夕伊朝仰旌戟之严既欣且幸先驰緘庆曷究款诚谨奉状贺

贺谢苏倅

右某伏审及瓜受代解印还台窃惟庆慰恭以某官性资冲厚术学精深藹然恺悌之声美矣承宣之助宣劳泽国惠民物而有终奏课宸庭被龙光于不日曾惟衰拙遂失瞻依辱海翰之先贻在悃诚而深愧即期邂逅以罄叙陈谨奉状贺兼谢

贺章倅学士

右某伏审涓辰已谐视事窃惟庆慰恭以某官学深造道德粹秉彝冠多士于南宫耀英游于文馆露章请外蚤摅及物之诚明诏发中伫听急贤之召曾惟衰拙将幸瞻依欣慰良深敷陈罔既谨奉状贺

到任谢监司

右某言念叨奉恩除误膺郡寄涓辰惟谨始视事以厉精冒庇云初窃抚躬而知幸兹焉依仰至矣情诚恭惟某官德量渊宏材规高远副九重之拣擢振二浙之风声持节此方其尽光华之实旌能不日伫跻清近之班某尸职海濒驰心节下未遂参承之愿且通悃悞之勤倾向攸深叙陈罔既谨具状谢谨状

贺台州楼朝请

右某窃审涓辰已谐视事伏惟庆慰恭以知郡朝请材猷敏劭术学粹深褫身固久于中庸莅政独多于恺悌分符海角暫为福于斯民趋节日边伫迓恩于伊夕曾惟衰拙幸迓风声念驰庆之未遑辱赐音之先及感慙弥甚敷谕奚周谨奉状贺兼谢谨状

钱塘集卷十

卷十一

<集部,别集类,北宋建隆至靖康,钱塘集>

钦定四库全书

钱塘集卷十一

宋 韦骧 撰

进贺皇帝登宝位银状

银一千两

右伏以圣明践阼方继照於天区臣子守疆谨贡诚於方物前件银地难爱宝山实效珍修任土之仪仰助充庭之末冒黷宸旒臣无任瞻天望圣激切屏营之至谨录上进以闻谨进

进奉皇太后礼物

绢五百疋

右前件物广修中度经纬有伦敬伸任土之仪仰备充庭之贡谨录上进以闻谨进

进奉皇太妃礼物

绢五百疋

右前件物组织成功洁完充幅敬修方物之贡奉宫闈之严谨录上进以闻谨进

贺门下仆射韩相公

右某伏审宣制大庭登庸元宰千官敬听皆悦而成服之心四海亟传有忻然相告之乐况埏熔之旧物倍簪绂之常情恭以某官间世钜贤经邦大器学贯古今而行之以正智穷事物而决之以诚致主以唐虞之隆处躬於稷契之上弼亮久安於王室将明密契於宸衷陞应上台之纒总临百揆之务势钧帝赉雅符说命之书善继父功美協緇衣之咏赞熙朝於九鼎之重措绵宇於一堂之安某营职偏州驰心崇屏望风拚跃虽在輿情之先展庆恭勤莫参旅进之末卑诚无任激切依归之至谨具状贺

贺中书仆射曾相公

右某伏审诞告宸庭进登相位協千官之敬听耸四海之具瞻欣跃所同中外如一恭惟某官生禀明气出为真儒学际天人之微识穷事物之表辅翊王室久全柱石之功持总兵枢独运蓍龟之智当太平之注意遂爰立以登庸上赖谋猷之嘉下蕲膏泽之广忠侔伊尹岂容专美於商志迈臯陶奚止赓歌於舜动寰区之鼓舞增廊庙之尊严某尸禄偏州驰心崇屏闻风拚喜虽在輿情之先展庆恭勤莫阶旅进之末卑诚无任激切依归之至谨具状贺

贺枢密蒋正议

右某伏审光膺中诏进贰西枢熙帝载於一时具民瞻於四海真儒当轴太平之势益隆舆论同辞诚服之情胥悦恭以某官问世异稟经邦鉅材学造圣贤之微识通今古之变演经纶而增华国体纳谋猷而仰契天心爰倚弼谐之患亟参机密之政文武斯究未高申伯之能股肱惟良雅合咎繇之咏坐振国威之远行消边警之严某假守偏州驰诚崇屏闻风拚跃虽在羣情之先展庆恭勤莫阶後进之末卑诚无任激切依归之至谨具状贺

贺内翰曾侍读

右某伏审拜命枫宸陞华翰苑硕德进而昌时愈盛大儒显而熙朝益尊四方传闻万口胥庆恭以某官受材宏博造道渊深识洞古今之宜文参经纬之妙出为藩屏而仁声洋溢入掌丝纶而国命光华副南面之简求登北门之清近谋猷密启虽钦内相之崇膏泽沛余仁听四邻之陟某逖拘职守久远门阍修庆謁以未由伸颂言而徒切卑情无任依归之至谨具状贺

贺提举周大夫

右某伏审荣被宸恩美迁使节遗爱实多於吴域按形爰领於闽方愈益光华窃惟庆慰恭以某官器涵方格学造本原蚤膺遴选之明久播休声之远推行良法已深二浙之仁明慎尽心将厚八州之福某属拘符竹徒望旌麾莫修庆謁之勤第极倾依之素谨奉状贺

贺枢密安太尉

右某伏审光奉制恩崇颺枢府播传四海欣跃一心盖鉅贤任重则朝廷益尊輿望愜情则士民胥庆恭以某官生膺闲气出佐圣时蚤登廊庙而明若蓍龟力赞邦家而久为柱石日如隙驷夺孝慕之深诚诏趣脂车副睿恩之伋见复持机密之政愈壮治安之基固有辉光耸具瞻於有衆尚多颂祷听爰立之休声某拘守州麾阻趋台屏奔驰展庆莫偕旅謁之勤拳跂致诚徒谨尺书之献某卑情无任激切依归之至谨具状贺

贺范右丞

右某伏审拜命中宸陞华右辖真贤大任赞至治而益隆羣口同辞耸具瞻而交庆恭以某官明诚造道德业映时杰然闲世之资沛若经邦之术忠谊久陪於国论谋猷密契於上心亟奉

都俞之音俄迁弼亮之地肃机进陟愈光四辅之荣总揆延登犹郁輿情之望某守符海郡引领台阶展庆奔驰莫继簪绅之末望风喜跃第修竿牒之勤某卑情无任激切依归之至谨具状贺

谢运使程金部荐

右某窃审剡章过形论荐自慙衰晚曷称推扬伏惟某官识度高深材猷宏远按列城而率之以正察羣吏而取之以公虽汲引之仁密啓不遗於旧物而承宣之未过情但愧於误知感厚德以固多驰寸诚而罔究谨奉状谢

谢发运胡龙图荐

右某窃审剡章过蒙论荐自揣衰迟之迹曷当推引之私感焉则深愧亦不浅恭惟某官鉅材超卓厚德渊宏肩以人事君之心执尽忠报国之节不遗旧物尚垂采摭之情载玷公言仍重品题之赐借辉光於朽质助龟勉於明时短技何为徒勤劳於末路深仁莫报第铭刻於懦衷仰荷睠知卑诚不任惓惓之至谨具状谢

贺提举孙朝请礼上

右某伏审光奉宸恩荣移使节涓择谷旦按临列城伏惟庆慰恭以某官材猷高迈术学渊深蚤膺朝寄之华久耸士林之望振提良法将安二浙之情洋溢休声行达九重之听某坐縻官守仰托德庥未缘伏谒於门阑姑用驰诚於竿牒谨奉状贺

贺翟龙图再知越州

右某伏审光膺明诏再镇巨藩伏惟庆慰恭以某官秉心忠厚植操端方主上庠则学制益明坐南床则台纲尤正蔼休声於睢北久专留钥之荣复旧治於浙东重睹甘棠之茂吏民胥庆旌戟增辉虽期仁政之行必充衆欲第恐禁涂之召遽促西还某荷顾夙深托庥伊始未遑伏谒姑用驰诚谨奉状贺

贺知衢州陈朝请礼上

右某伏审涓辰已谐眠事伏惟庆慰恭以某官材猷敏劭器局宏深久飞誉於仕途蚤陞华於郡守下车伊始已聆善政之传趋节匪朝行听优恩之被自惟假守幸迓余辉顾驰庆之未遑愧祝音之先及感铭弥甚敷谕奚周谨奉状贺兼谢

贺知越州张大夫

右某伏审光膺休命荣镇巨藩窃惟庆慰恭以某官材猷高迈器业宏深蚤持使节之华久耸

朝绅之望颁条督府悉钦善政之初趋召严宸伫听异恩之擢曾惟衰拙幸托庇庥通谒未缘
驰情徒切谨奉状贺

贺新提刑王司谏

右某伏审光膺诏检荣领宪台列城闻风羣口交庆恭以某官材猷高远器业宏深声华见慕
於簪绅忠谊被知於旒扆颺辍七人之列出奉使华来清二浙之刑亟为民福某夙承礼遇兹
幸德庥未缘展谒之勤第谨驰诚之献谨奉状贺

贺新发运黄大夫

右某伏审光膺诏检总领漕权伏惟庆慰恭以某官器业博深材猷高远声采聳簪绅之望设
施动旒扆之知暂倚宏谋颺东南之大计伫闻严召陞左右之近班某假守偏州远叨余庇莫
缘展庆第切驰诚谨具状贺

贺新运使齐少卿

右某伏审光膺诏检荣领漕权伏惟庆慰恭以某官受材宏博植操端方声华久聳於士林经
画累更於朝寄提纲太府施为实亚於九卿出使列城惠泽伫宣於二浙某拘挛假守倾仰高
风方兹冒德之初未遂通名之敬姑驰诚欵少代参承谨奉状贺

贺新运使程金部

右某伏审光奉宸恩荣颺漕计伏惟庆慰恭以某官材猷敏劭器识渊通蚤膺遴选之光久着
能名之美承宣巨屏方蒙恺悌之休经画一方颺假设施之妙某夙叨睠顾幸遇按临未由通
谒於门阑姑用驰诚於竿牋谨奉状贺

贺新知杭州吕太尉

右某伏审显膺制命出镇藩方百城吏民万口歌颂恭惟某官元精异稟间世钜贤学际天人
之微术兼文武之胜以深智而蓄龟事物以至忠而柱石邦家当日秉钧妙變调於元化累年
分阃广开斥於穷边清衷念恳请之勤愈旨畀承宣之逸拥节旄於左右壮屏翰於东南何幸
金吴尽起袴襦之颂唯忧飞诏趣还鼎鼐之司某久远台阶僻颺海郡第知引脰遥想旌幢之
光不获望尘一修桑梓之敬某卑情无任激切依归之至谨具状贺

贺新知越州章相公

右某伏审显膺制命出镇藩方百城闻风万口交颂恭惟某官济时硕德命世钜贤熙载犹稷
契之功致主以唐虞之道学探圣微而充之以正勳着王室而守之以谦钧轴七年以尽经纶

之妙旌麾千里遂操方面之权暂辍上台之崇俯从东越之请亏具瞻於四海成厚幸於一方偃治方初下絕无孺之叹诏还不日上隆有袞之恩某久冒陶熔复叨帡庇仰承教约未由奔走於門闌敬致悃誠姑用勤劬於竿牋某卑情无任激切依归之至謹具狀賀

回新及第石少府

右某伏审拜命枫宸策名桂籍窃惟庆慰某官天资粹美儒学渊通蕴志操以自成猎荣华而俯拾未遑修庆先辱长牋感佩所深敷陈罔既谨奉状贺兼谢

谢提刑白朝散荐

右某窃审露章特蒙论荐自维朴拙曷称品题仰厚德之推扬倍卑惊之感忤恭惟某官秉心纯正造道渊深按列城而力振典刑察羣吏而精分淑慝岂谓承流之末误膺密启之知虽贤者居高必欲举材而报国而陋儒揆已实慙借誉之过情阻伏門闌第修竿牋不胜恳到缕缕之至謹奉狀謝

贺陈漕

右某伏审光奉宸恩荣移使节伏惟庆慰恭以某官天材超卓贤履粹精早更省寺之华久耸簪绅之望政成二浙海滨方赖於深仁诏下九重河朔遽迁於要任伫闻优召行即近班某托庇之初倾风弥切属拘官守莫造宾阶喜愧兼深叙陈罔既谨奉状贺

贺上官正言

右某伏审光膺明命荣镇巨藩窃惟庆慰恭以知府正言受材宏博涉道精深忠嘉蚤着於諫垣澄察久劳於使节睿恩甚渥崇加专面之权仁政既扬伫听近班之召曾惟衰旧幸托庇庥未遂参承徒深颂祝谨奉状贺

贺赵宪

右某伏审光膺宸命荣领宪台涓择刚辰按临属部伏惟庆慰恭以提刑水部材猷高迈器业宏深声华久振於士林委寄蚤登於省户暂烦使指宣惠泽於一方伫听诏还荷宠光於三接某分符窃幸托庇云初未伸参候之勤姑致款诚之献谨奉状贺

贺冬

右某伏以剥往复来物心将泰阴消阳长贤履所宜恭惟某官植德端方秉心谅直茂拥时休之集伫迎天宠之来某属守郡符阻趋宾次唯谨緘?之贡聊伸祝颂之勤下情不任?切之至謹具狀賀

又

右某伏以阳复黄宫灰飞子律物心将泰贤履所宜伏惟某官顺对令辰茂膺纯祉陰有神明之相伫迎宠禄之绥修庆謁以莫前致颂言而徒切谨奉状贺

贺正

右某伏以三阳成泰万物簇寅时春肇新贤履均福伏惟某官秉彝安正顺序纳休阻修庆以造前第倾风而善颂恳诚弥切敷谕奚周谨奉状贺

回福州柯司封礼上

右某伏审光膺明命荣典巨邦适谐涓吉之宜已谨颁条之始恭以某官材猷超越器局闾通藹闻望於周行久践扬於华省壽春宣化既全政术之优长乐偃藩更益兵钤之重遽承枉翰倍切驰诚愧荷所深敷陈罔究

贺提刑祖郎中

右某伏审光膺诏检荣领宪权伏惟庆慰恭以某官智机明穎德量寬宏蚤膺拣拔之公久着风猷之盛仰参列宿未还华省之聯出按八州尚屈祥刑之察虽莫平於輿论已深慰於远民曾是匪材间睽高谊营职幸同於一道指期将借於余光更冀保调以符颂祷谨奉状贺谨状

贺淮西提刑钱朝议

右某伏审光奉宸恩荣移使节伏惟庆慰恭以提刑朝议秉心纯正履道坦夷藹闻望於簪绅膺选抡於展宁政成闽部已收抚察之功恩易淮西更赖澄清之术方依仁而为幸遽去德以勤怀喜怅兼深敷陈罔既

贺新运判李朝请

右某伏审光膺诏检荣贰漕权窃惟庆慰伏以某官秉心冲厚植操端平蚤膺遴选之精久藹休声之盛剖符泗水方叨剗割之明驰传闽方遽委转输之任

贺杭州邓内翰

伏惟条教始颁福休并集恭以知府内翰谏议诚忱格物智变适时杰然高世之材富矣经邦之业正台纲而真邪判演宸綍而训诰明厌真禁庠遂囊封之恳请宣风乡梓方锦昼之荣懽固知眷倚之深遽易蕃宣之要布中和於列壤寬疲瘵於一方总制全吴隱若长城之赖久虚前席伫闻当轴之归某拘迹官规驰心德海阻望门阑之峻第传闾里之謡姑献悃衷仰祈矜

亮伏望上为邦社精调寝兴

提刑范学士移齐州

右某伏审诏从诚请麾易便邦列城之心驰恋如一恭以提刑学士学行自固德性素高奋迹贤科之雄危言谏列之峻澄清讼狱久淹拥节之劳偃息蕃宣俄遂刻章之恳彼望风而何幸此怀慕以不胜政发休声想弗踰於累月恩还重任当少慰於輿情某遽失依归唯铭顾遇怅拘官之有守望行施以无缘下情无任拳拳瞻恋之至

谢贺钱虞曹

右某伏审光膺宸命荣践郎曹伏惟庆慰恭以某官器识疏通性资深厚更仕途而宣力藹朝着以飞声貳政殊能美協承流之效陟明优典秩参应宿之荣某幸迓邻輝日钦德望慚致诚而尚缓荷枉教之先贻恳欸所潜敷陈罔既谨奉状贺

贺提刑林郎中

右某伏审光膺诏检荣领宪台列城闻风交口相庆恭以提刑郎中材猷宏远术学精深谊满朝绅望高国器蚤豫宸衷之简屡更使指之华淮甸一方兹幸澄清之惠霄岐万里尚淹后沃之谋某仰德素勤托踪伊始走门闌而未迨贡诚欸以先驰

贺元龙图

右某伏审飞诏中天复班内阁一时公议万口交忻恭以知府龙图器业宏深材猷高远累更繁剧之选久着事功之称戒在不虞固有除戎之备疾生无妄果成勿药之懽还故列之清华颺旧藩之镇抚伫听休声之远即为大任之阶某荷德素深倾风尤甚倍常情而忭喜怅营职以拘挛展庆莫前驰诚徒切

迎蔡内翰

右某伏审暂违禁掖出抚淮城千里闻风同辞相庆恭以知府内翰材谟高远德业宏深夙膺旒纁之大知久作邦朝之重器承流魏观剗天府之浩穰润色鸿猷践玉堂之清近尚缓钧衡之拜俄从蕃翰之荣某仰谊积年托庥有日实倍吏民之喜愿瞻旌旆之光伏祈顺时炎凉为国寿重

贺谢交代钱殿丞

右某伏审光膺宸命荣贰郡条将辱交承尤深慰拚恭惟交代通判殿丞智谋通敏器识优长望耸仕途声飞朝着外补尚淹於半刺骤迁行擢於全材某自顾拙疎幸亲契好及瓜而代预

喜於吉音解弦而调更祈於善继方恳诚之欲贡遽緘翰之先貽愧感所多叙陈罔既

转屯田谢监司

右某伏蒙恩授前件官累日序迁公朝之必信非材幸进志士之所羞自惟拜命之初深积省躬之愧反思所及推致有由此盖伏遇某官盛德兼容深仁均暨远俾迂疎之品坐逃瘵旷之愆遂忝陟明可非惊宠惧於虚受愿充称服之为勉在益恭窃慕循墙之戒庶几补报仰荅吹嘘

贺邻郡通判

右某伏审涓辰已谐视事托邻庥而为幸造门仞以未缘勤企风规第驰诚恳

贺邓内翰复知制造

右某伏审光膺诏检载陟掖垣廓然輿情允矣公议恭以某官德名超卓术学闳深智穷事物而以正自持忠贯金石而以和外表久辍承明之直独高维屏之功方国祀之均厘加宸衷之密眷丝纶复掌固荣旧物之还钧轴在权伫闻大任之召某夙叨顾遇倍剧忻愉伏门仞以未缘驰音诚而徒愧

问候太原曾尚书

某言念自违德庇日企台光窃怀疎鄙之嫌慙致情诚之黷伏惟静镇多暇纯禧荐臻恭以某官材应昌辰生锺间气发胷中之奇蘊收天下之休声事功久赞於朝廷器业迥高於绂冕辉华八座方摅经济之谋膏泽一方暂屈设施之术钧轴行闻於迅召仪形庶愜於輿言某蚤伏门阑尤深颂祷怅道途之且邈望旌戟以无缘伏祈上副倚毗精调寝味

谢成都许龙图

右某此者叨奉宸俞误膺使指跂辉光而甚迓图谒伏而未缘方驰向仰之情遽拜海音之辱恭以铃辖知府内翰材包经济学极渊源高文首出於时英伟业久淹於法从出持旌节虽安远俗之心入秉钧衡始慰四方之望不日伫承於趋召惟时当遂於走迎谨泐芜槭先驰诚悃

贺新运判王朝请

右某伏审光膺綍命荣领漕权八州闻风羣口相庆恭以某官材猷宏远术学精深蚤当遴选之优久着能名之盛偃藩凝绩尚稽三节之招揽警宣风暂屈七闽之寄某自维衰迹偶此尸官窃忻受代之有期何幸高贤之为继喜尤先衆言岂宣心未即晤瞻更祈保卫谨奉状贺

谢益宪庄朝奉

右某比者叨奉宸恩误膺使指揣薄材而非据涉远道以徒劳夫何天幸之深获通邻光之盛况眷存之有素在向往以无穷方图驰恳以上尘敢谓贻书之先及悚若芒背泚然汗颜恭以某官德性宏深诚心纯固涵养粹和之气从容澄按之余念旧物而不遗诱愚衷而加勉飞章论荐已衔昔日之恩拙礼见容更荷此时之赐伏谒既拘於营职瞻风第切於驰情伏望上为庙朝精调寝餼

问候汝州韩大资

右某言念远去台辉惊炎凉之忽忽仰銜德造增夙夕之拳拳虽尝奏记以致勤返以黜尊而怀畏然钜贤多可必将颇察其依归而浅士有诚不敢自嫌於僭渥伏惟镇抚多暇福禧荐臻恭以判府大资学达圣微识通时变柱石宁朝之体蓍龟大政之机合稷契之谋而不显其忠推尧舜之泽而弗逮是耻暂休熙载之力出即偃藩之安屏翰颢居固坐分於重寄钧衡早复庶下慰於具瞻某尸职远疆驰心崇屏未遂奔趋之谒徒深颂祝之惊伏望上为庙朝精调寝味

贺谢梓州路运使秦朝散

右某伏审光膺宸诏荣领使台宣扬王休慰释民望恭以运使朝散材猷高远术学宏深累更委寄之劳久着声华之盛再烦杖节出临左蜀之雄即听封轺入践清途之要顾惟衰迹幸迓高风在驰庆以未遑遽祝音之先及感慙弥甚敷叙奚周

回诸郡知州贺冬状

右某伏以新阳云复物理将亨吉履所宜人情共喜伏惟某官诚忱有相休祉荐臻在驰庆以未遑遽祝音之先及其为感戢何以喻陈

回谢举荐状

右某比形公荐方愧言轻遽辱荣缄益慙意厚钦景谦冲之度第增悚感之私

贺冬成都提刑

右某伏以剥往复来物心将泰陰消阳长贤履所宜恭惟某官德业兼隆神明来相顺迎令序倍拥纯休揽轡澄清已遗一方之福拜恩优渥即膺三节之招曾是愚衷第增善颂勤拳所积敷述奚殫

谢新兴元知府蒲大夫

右某伏审光膺诏检出领藩条千里传闻同辞相庆伏惟某官材猷高远器度博深尝持节於此方率銜遗惠暂承流於盛府尽愜先声在驰庆以尚稽遽颺音之首及感慙固甚敷谕奚周

回郡官生日星香状

右某伏蒙勤厚特枉过仪不敢捧当辄违雅意感慙弥甚敷叙奚周

贺提举茶事阎承议

右某伏审光膺宸命荣领使权窃惟庆慰伏以某官材猷高迈术学精深早当遴柬之明久着能名之盛经书数路兹暂屈於智谋超腾一时将大摅於器业披风渐还为幸良多

谢洋守李承议

右某伏审光膺廷诏荣领郡符伏惟庆慰某官材资通敏智识精强兹承抡选之华暂展承宣之效尚未遑於驰庆遽先辱於貽缄悚慙所深叙陈奚既

贺正成都提刑朝奉

右某伏以灰飞青律三阳成开泰之时构建寅方万物遂发生之志首人正而为重在贤躬而益宜恭惟某官秉德粹和受材宏博履兹上日之庆翕若纯休之来澄按弥年固尽百城之福进陞不日伫闻三接之恩属官守之有拘造宾阶而莫及第深祝颂曷罄敷陈

谢诸州知通贺正

右某伏以三阳交泰万物棣通在吉履以尤宜有纯休之来相方图驰庆遽沐惠缄愧感所怀叙陈曷既

谢邻郡知通贺正

右某伏以三阳交泰庶彙棣通福履所宜时休来相伏惟某官茂膺令序坐拥繁禧在驰庆以未遑遽颺音之先及感慙弥甚指谕奚周

贺平章司空相公状

右某伏审拜册盛仪面槐正位总二日万几之大加三公一命之崇增重朝廷之尊慰安海隅之望孰不敬听泰然均懽恭以平章司空相公道协圣微德为世表蓍龟百揆柱石四朝赞主上於三代之隆措天下如一堂之乐庆传渭水素号帝王之师美轶缙衣独高父子之继畀优游於坐论倍烜赫於具瞻九重之礼命播宣列辟之情诚悦服某尸官远部引领上台相与颂

言心虽先於民吏恭修庆謁迹阻廁於簪绅卑情无任拚跃依归之至

贺仆射门下相公

右某伏审诞告宸廷进登相位千官敬听皆悦而诚服之心四海亟传有忻然相告之乐恭以某官生稟间气出为真儒极高明而履中庸可久大而充德业弼亮久安於王室将明密契於天心陞应上台之躔总临百揆之务忠符姬旦助扬文武之休志迈阿衡推广勋华之泽爰立一腾於纶綍具瞻载耸於簪绅廊庙赓歌正协明良之咏寰区鼓舞即期仁寿之跻某尸禄远方驰诚崇屏闻风拚跃虽在輿情之先展庆恭勤莫参旅进之末卑悰无任激切依归之至

贺门下侍郎状

右某伏审光膺制命进贰台衡熙帝载於一时具民瞻於四海真贤当轴太平之势益隆輿论同辞诚服之情胥悦恭以门下侍郎间世异稟经邦钜材智侔蓍龟诚动金石居股肱之要而久安国体纳谋猷之嘉而密契宸衷自天监周正类仲山之迹致君为舜雅同伊尹之心入践西台之崇增华四辅之重纶綍遽播朝廷愈尊百辟忻然尽仰国钧之秉庶毗安若即期寿域之跻某尸禄远方驰情崇屏闻风拚跃虽在羣情之先展庆恭勤莫参旅进之末卑悰无任激切依归之至

贺尚书左丞状

右某伏审光膺制命进贰台衡熙帝载於一时具民瞻於四海真贤当轴太平之势益隆輿论同辞诚服之情胥悦恭以尚书左丞间世异稟经邦钜材智侔蓍龟诚动金石摠风宪之严而久裨国体纳谋猷之嘉而密契宸衷自天监周正类仲山之迹致君为舜雅同伊尹之心入陞右辖之崇增华四辅之重纶綍遽播朝廷愈尊百辟忻然尽仰国钧之秉庶毗安若即期寿域之跻某尸禄远方驰精崇屏闻风拚跃虽在羣情之先展庆恭勤莫参旅进之末卑悰无任激切依归之至

回蒲大夫

右某伏审涓辰已谐视事振师帅承宣之始慰士民瞻望之情图驰庆以未遑沐貽緘之先及感慙固甚敷谕奚周

回运判来承议

右某伏审光膺诏检荣领使权幸联职以相依辱观音之先及喜兼愧至感与慰并伏以某官术学渊深材猷宏远蚤登桂籍之贵遽陟霜台之严外府度财久籍赞裨之力远方将漕暂劳经画之明念亲谊以非遥在驰情而固切更祈 嗇以副倾瞻

贺中丞李龙图状

右某伏审恩郤固辞荣迁独坐真贤司宪列职畏威四方传闻羣口交庆恭以某官生稟间异出符盛明道德表於一时术学穷於万变九仪赞治曩分宗伯之权八座联荣久总地官之属经画已丰於邦计谋猷素协於宸衷宠加龙阁之名贵陟乌台之长虽绳愆纠缪又新朝野之风而当轴秉钧犹郁簪绅之望某縻躯远部引领高閤谋庆謁以莫前驰诚情而徒极卑情无任激切依归之至

贺冬成都庄提刑

右某伏以一阳旋复庶彙孳萌在天时之布新宜贤履之绥福恭惟某官诚心冲厚德性纯明对令序以顺居拥繁禧而翕受百城蒙惠难淹翔步之雄三节召归伫听摅才之远曾维颂禱曷罄书言谨奉状贺

回交代陈朝散

右某伏审光膺宸命荣领漕权自慙浅陋之资乃忝交承之契喜愧相半情诚曷胜伏惟交代运判朝散术学精深材猷宏远能名已简於当守重寄遽移於便乡敝政在前固赖更张之善輿情所悦况多被治之先在驰悃之未通俄惠音之已及并增感?莫罄叙陈

回梓漕井金部

右某伏审远持使节荣领漕权兼行入疆涓吉视事伏惟庆慰恭以某官材猷高远器业閎深蚤副简求之精累更要剧之选西垣清近尚淹步武之华东蜀闲关暂屈转输之督曾惟衰迹幸迓余光在驰庆以未遑俄祝音之先及感慙弥甚敷谕奚周

谢齐卿举召还台省

右某窃审剡章过形论荐自惟衰拙曷称推褒益知冒德之深但有泚顔之愧恭惟运使少卿至诚接物直道佐时列卿蚤振於朝光外府久裨於邦讎中禁论思之拜领东吴将漕之权岂惟飞挽以助公尤欲搜扬而报国不图密啓误及匪材如某者碌碌勦踪区区假守无良能以耸於衆望无异政以踵於古人徒依厚庇之余遂及终更之去复叨借宠殊?过情仰荷仁言贲饰曲加於朽质永怀晚节镂铭第切於愚衷无任感激惓惓之至谨奉状谢

贺梓路提刑李朝请

右某伏审光奉宸恩荣持使节涓吉日以视事按详刑而恤民方幸瞻依实多庆拚恭惟某官受材端正造道渊通蚤膺柬拔之明累践要繁之任尚淹翔步未登两禁之严暂屈尽心以厚一方之福未遑展謁第切倾风更冀葆颐以符颂禱

谢运判奉议

右某叨奉纶言误参漕计已?辰而视事幸联职以依仁恭以某官器业渊宏材猷高迈蚤致身於廛仕暂持节於远方积粟阜财一归於善画寬民束吏久着於休声伋膺不次之恩少愜至公之论某束装兼道不日趋风方图驰恳之勤遽辱飞文之赐感慙弥甚敷谕奚周

谢提刑朝议启

右某叨奉恩纶误参漕计视事刚辰之吉窃辉华使之余恭以某官植操端方秉心冲厚以学术济通识以德量持高材远方尝赖於宣风要部复叨於理剧此时闽粤暂烦揽辔之清不日朝廷即有封轺之召某依仁兹始通谒未由方驰恳款之勤遽辱緘题之赐其为感忤曷罄指陈

谢泉州知州陈大夫

右某叨奉恩纶误参漕计?辰视事犹在於兼行走介枉书遽承於厚意伏以某官学穷道奥识照几先久播休声蚤膺遴选荣持使节已丰湖外之财远剖州符暂抚泉南之俗尚稽通谒第切倾风更冀保调以符瞻祝

谢诸州知通

右某误膺宸命叨贰漕权虽瞻覲之尚賒在诚情而豫慰伏惟某官忱恂固守谦厚自持先形海牒之勤如挹风规之茂感慙弥甚敷谕奚周谨奉状谢谨状

回本司运司

右某叨奉恩纶误参漕计方涓吉以视事遽飞文而惠音窃服勤诚但增厚愧谨奉状谢

回福州林中散

右某叨奉纶恩误参漕计涓辰视事方获息肩走介枉书遽承厚意伏以某官学穷道奥识照几先蚤膺東擢之荣久着能名之盛翱翔省寺既藹於风猷偃息藩宣尤高於治最伋闻三节之召以慰衆言之公更祝保调以需宠渥谨奉状陈谢谨状

贺判太原府观文范相公

右某伏审光奉诏音荣颺方面凡蒙陶冶举切拚驩敬惟镇抚之初允协神明之相恭以判府观文相公生稟间气出为真儒柱石乎宁朝之基著龟乎大政之要正论远参於古训嘉猷密契於宸衷百揆告劳暂辍钧衡之任列城有赖独高屏翰之功威怀虽冒於一方瞻颂固均於

四海愿听上台之复庶安舆议之公某营职远疆驰诚大旆望尘通谒莫偕旅进之恭仰德致勤徒谨尺书之献伏望上副眷倚精调寝兴某卑情无任激切依归之至谨具状上贺兼问钧候谨状

回福州林中散得替

右某伏审解印还朝拥麾过里方欲驰诚而叙庆遽蒙枉翰以遗音欣承跋履之余克协福休之萃恭以某官材猷高迈器业宏深蚤膺旒宸之知累更省寺之要偃藩称治方受代以言旋趋节戒行即拜恩於不次更祈上为邦社精调寝兴谨奉状陈贺兼谢

钱塘集卷十一

卷十二

宋 韦骧 撰

贺杭州林待制

右某伏审光膺明命荣殿巨邦敬惟镇抚之余坐拥福休之萃恭以知府待制器涵方格学造本原远存久大之资优践中庸之域陞华内阁将摅经济之才移治名藩暫假寬平之政迅召愿稽於三节疲眊庶起於一方某违德踰年縻躯远部每驰情於恭梓第引领於台麾庆謁莫前颂瞻徒极伏望上为庙社精调寢兴卑情无任激切之至谨具状起居兼贺谨状

代陈学士贺文潞公加两镇节钺太师致仕状

伏审光奉册书仰还政事加上公之袞绂备两镇之节旄极大臣报国之能尽明主优贤之礼四方交庆万舌同辞恭以某官夙稟元精蚤膺大任德高辅弼声慑羌夷进善去邪耸仪形於百辟出将入相竭忠瘁於三朝露章坚恳於引年拜命尤荣於佚老??乎功名冠世嶢嶢然宠数深前道虽協於伯阳勇於身退望仍齐於师尹壮尔民瞻某素冒钧陶深增拚跃向恩闕而勤颂托音驿以驰诚伏望顺时节宣副上眷倚

谢李太尉授节钺谢启状

伏审光膺制命荣授节旄伏惟庆慰恭以某官性资冲厚器业宏深行学不回养心有术繇亲贤而当选尚素富贵而守谦虚优游方册之间澹泊轩裳之际历岁华而弥劭动天眷以慰隆重镇推褒涣若宸恩之异广廷布告翕然士论之归某瞻德积勤望风驰喜造门闌而展庆方念拘文拜緘翰之逊言敢期辱赐悸慙已甚敷叙奚殫

谢国学秋贡高等行启

窃审较艺秋闈荐名礼部方坐驰於同喜忽面辱於长牋先辈材美而充学优而励取先多士固已惊於一鸣决胜危科更愿观於三捷感恻之甚叙陈曷周

尚书省奉旨召试入高丽界回远迎状

恭承明命远抚遐陬敢谓驰驱之劳特烦候迓之礼良深所感姑报以言

谢高丽国王送遗状

特损緘题曲垂惠赉文犀饰带知远物之可珍宝匣将仪见深诚之相契勉受勤渠之意益增感恻之情

回国王叙别状

兹缘将命屡获披风宣无外之君恩有加轸恤尽同寅之臣礼足见忠勤方告别以言旋遽贻书之见及既慙厚意更祝善调

与抚守石大人状

言念聆广誉以钦风坐驰惟旧造崇闳而请见伏谒未缘仰惟镇治多余福休来相恭以某官性资方厚术学精深智远照微材高应变一麾剽剧固游刃而有余三节召还伫陟明於不次伏祈为国自壽副人所瞻

谢监司状

此者恩纶从请符竹叨荣方祇命以就途遽涓辰而视事幸亲高庇殊慙深惊伏以某官器识渊宏材猷超远出领外台之寄上分旰食之忧總治有方均被列城之福陟明伊迓伫闻三节之招图修谒以未缘第钦风而弥极伏祈为国自壽副人所瞻

谢转司农上提转状

卿官立貳居者固难其才帝泽优贤得之尤足以贵俯伏拜命惊惶失图何则朝廷清明国家闲暇正臣当轴端士告猷台阁聚精神轩墀多蹇谤爵禄之器安有假人车服以庸未尝滥赏或越等伦而擢其事业或累岁月而不及显高灼然黜陟之行甚若丹青之着饶求者罪所以激贪夫恬守者荣所以嘉清节尽出至公之道复还治古之风在冠冕之班班宜忠良之一一而某衰迟晚节僴俛外藩分符积年剽剧无効昨代归於泗水因得请於光山腹背之毛分不增於远翮口耳之学聊自养於微躯咫尺乡闾优游物局作疎闲之身计期终毕於天年岂谓圣眷尚回周行引重不使废去未谐私谋旋领职於富川仍迁曹於右棘而况司农系乎重寄历代谓之大官窃省匪能曷臻斯地此盖某官借名特甚推庇殊深天幸虽至而不敢自盈官责愈高而第知加惧戒存肺腑何必循墙事极虑思愿忘闭合仰答生成之赐俯全按举之威恳欸所潜指陈奚究

代冯漕学士裕享乞恩例状

右某伏以亲裕太堂盛典旷而复修均恩四方服官优者尤幸虽远骏奔之列亦蒙宠渥之沾協于赏延得以亲举臣有男某长无他技业素学儒念其邁於明时不敢使之自废傥被乾坤之赐庶几弓冶之传其男某乞於文资内安排干冒圣威臣无任瞻天俟命激切屏营之至谨具奏乞以闻伏候勅旨

答梓路提举王朝散

右某引领高风因久钦於时誉息肩远部幸窃冒於邻光念驰歎之未遑愧祝音之先及伏惟提举朝散材猷敏劭器识宏通列城虽赖於深仁三节伫闻於迅召更祈珍嗇以慰倾诚谨奉启起居兼谢不宣

问候成都王宝文侍郎

右某言念自违庇冒日企辉光旋叨被於误恩复载驱於远部旄麾甚迓怅通谒以未由音驿可修愧驰诚之尚缓伏惟镇抚余裕福休倍臻恭以某官造道粹深秉心方正谏垣清近夙罄谋猷计省浩繁比劳经画俄辍中台之重寄暂临西蜀之雄藩德政融融莫匪去思之本民声亹亹犹多来暮之嗟行俟诏音之传即闻柄任之召伏望上副眷倚精调寝兴卑情无任恳禱之至谨具状起居谨状

谢泸州毕抚

右某比者衔命之官涓辰视事方窃依於邻庇尚稽致於邮书先承翰墨之华愈重情诚之愧伏惟某官受材通敏执节端平久参使幕之雄行迓廷恩之渥伫期还驭即歎高标更丐珍颐以符善禱谨奉状谢

贺许右丞

右某伏审光奉丝纶复登辅弼播传四海驩跃一心盖钜贤进则朝廷益尊輿望塞则士民胥庆况在埏熔之旧固深鼓舞之情恭以尚书左丞禀天元精为国重器文章魁杰於当世德业辉华於盛时曩日庙堂端谋谟而不挠累年区宇望膏泽之载加果符倚注之深还陟赞襄之任熙载力毘於大政秉钧增茂於前休沛然爰立之音伫闻於朝夕颺若具瞻之衆始慰於迓遐某尸职巴陲驰精台屏无缘趋走敬参旅谒之勤姑献悃衷少叙輿情之贺某卑诚无任欣忭依归之至谨具状上贺谨状

贺蔡右丞

右某伏审光膺纶綍进秉钧衡四方闻风羣口交庆盖真贤用则膏泽远大任重则朝廷尊凡预甄熔之辈举增驩跃之诚恭以尚书右丞气鍾间异德迈明诚学造圣心之微政通儒术之要出为藩屏固久着於治功入赞谋猷迺益高於衆望果膺眷倚之重遂陟疑丞之隆即聽奋庸究极致尧之效伫钦注意播传命说之音某尸职远疆驰精崇屏未由趋走一参旅谒之俦姑献悃衷少致輿情之贺某卑诚无任欣忭依归之至谨具状贺谨状

贺蔡内翰

右某伏审拜命中宸陞华内相大儒陟用谋猷当密赞之初举世传闻拚跃有同辞之庆恭以侍读内翰为时间出履道中行材高应变之机学至逢原之妙巨藩累镇宣王化於无穷八座

荣跻阜邦财於不扰登北门之清近副南面之简求润色训辞虽极文章之选沛余膏泽尚淹经济之资某逖在远官莫偕旅庆即聽奋庸之任更勤仰颂之诚卑情无任激切之至谨具状上贺谨状

贺正旦

右某伏以寅杓始建春律初回人统得天心之中阳长为君子之庆伏惟某官诚忱笃厚践履端平茂膺令序之和并集繁禧之粹属拘官守逖远风规通庆谒以未缘在瞻祈而徒切

问候成都刘枢密

右某言念自违钧庇日企台光怅久远於门阑愧缺修於竿牍仰惟镇抚之暇翕受福休之繁恭以判府端明枢密禀天元精为国重器机密预坐筹之久藩宣分颡面之权云阙九重应伫谋猷之告坤维巨屏尚繫感爱之明行闻趋节之光还陟秉钧之任庶平輿议以愜一时某迹限疆封心摇旌戟踧踖未阶於参造勤拳徒剧於颂瞻伏望上为庙朝精调寝餼某卑情无甚切之至谨具状起居谨状

贺中书许侍郎

右某伏审光膺制命进贰台衡熙帝载於一时具民瞻於四海真贤当轴增重明昌之期輿论同辞相为欣跃之庆恭以某官气鍾间异道极高明柱石中朝之隆蓍龟大政之要弼亮久安於邦体谋猷密契於宸衷仰膺南面之咨询愈显西台之崇峻国钧重秉愈深膏泽之施揆序尚虚犹鬱搢绅之望某尸官巴裔引领台阶喜拚倾风与羣情而窃倍奔驰展庆继旅谒以未由某卑诚无任欣悻依归之至

贺曾枢密太尉

右某伏审光膺制恩崇颡枢府播传四方欣跃一心盖钜贤任重则朝廷益尊輿望愜心则士民胥庆恭以某官天元异禀道妙资深烛理有蓍龟之明安邦如柱石之固筹画折冲於万里谋猷入告於九重显奉咨俞之音總持机密之政聳具瞻之有衆虽极迓遐聽爰立之休声尚勤朝夕某尸官巴裔引领台阶喜拚倾风固倍羣情之剧奔驰展庆莫参旅谒之勤某卑诚无任忻悻依归之至

贺蔡左丞

右某伏审拜命中宸陞华左辖真儒大任赞至治而益隆羣口同辞聳具瞻而交庆恭以某官高文贯道盛德映时杰然间世之资沛若经邦之术弼亮久熙於帝载谋猷密契於上心荷眷注以弥深奉恩俞而尤笃肃机进阶愈光四辅之荣總揆延登犹鬱輿情之望某尸官巴裔引领台阶展庆勤拳难追踪於旅谒望风喜跃徒驰敬於尺书某卑情无任忻悻依归之至

贺王右丞

右某伏审拜命中宸陞华右辖大儒任重助至治而益隆羣口同辞耸具瞻而交庆恭以某官谋谟纯正德业辉光道探本原诚贯金石劝讲久参於经幄纠绳屡振於台纲铨综官师方表仪於八座进登丞弼爰翊赞於万机当清衷眷注之隆慰举世倾祈之素某尸官巴徼引领台阶展庆奔趋莫厕簪绅之末望风拚喜第驰竿牍之勤某卑情无任激切依归之至

回新渝守王学士

右某伏审光膺宸命荣剖郡符念瞻睟之有期在情诚而窃幸知郡学士文华贯道器业映时辍蓬瀛着撰之功分巴蜀承宣之寄鬱然盛暑想叱馭於险途飒尔清风传拥麾於近境尚未遑於修詞俄先辱於贐音感悖所深敷陈罔既谨奉状起居兼谢

贺成都郑右丞资政

右某伏审光膺明诏移镇钜邦百城闻风羣口交庆仰惟抚馭之始翕受福休之繁恭以判府资政右丞生禀天元学穷圣奥中台秉政右辖增辉方成熙载之功俄遂偃藩之请北都解印旄倪一意於去思西蜀建牙途路共歌於来暮宣化承流而分忧宵旰寬民急吏而助治明昌德惠遽沾维慰一方之望钧衡後任已勤四海之祈某违远台光拘挛巴裔未由进谒敬瞻旌戟之华姑用驰诚聊致賸函之庆伏望上副睠倚精调寝兴某卑情无任激切依归之至谨具状起居兼贺谨状

贺蒋内翰

右某伏审拜命枫宸陞华翰苑硕德进而昌时愈盛大儒显而熙朝益尊莫非胥庆以同辞况在冒恩之旧物恭以内翰太守材高应变学粹逢原仁谊充於胷中声闻溢於天下出颢帅阃羌戎重足而畏威入治王畿奸盜革心而远罪伸矣壮行之志伟哉中立之贤副南面之柬求登北门之清近谋猷密启虽钦内相之荣膏泽沛余犹为四邻之望某尸官巴峡引领门阊修庆谒以未由第颂瞻而尤切伫聆当轴之拜少慰荐绅之情某卑诚无任欣拚依归之至

谢夔守王大人到任启事

右某伏审精择刚辰荣临要郡窃惟庆慰知府大夫受材宏博涖任敏明仕途久播其佳声朝寄雅当於遴选缅想承宣之始已愜民心伫闻讴咏之传必嗟来暮未遑驰喜先辱贐书载欽辞意之勤弥切感慙之素谨奉状贺兼谢

贺彭尚书启

右某伏审远抗牙旌荣临江国涓辰協吉视事谨初千里钧情一时胥悦恭以知府尚书待制

降材高迈造道粹深文章冠天下之英注错发胷中之蘊被九重之眷遇聳八座之光仪天允
恳祈暂偃藩於乡部世钦德业覬广泽於庙堂曾是愚衷尤深善颂莫从旅庆之末始献尺书
之勤伏望上为邦朝精调寝餼某卑情无任激切之至谨具状起居兼贺谨状

廷评谢授官

右某启伏蒙圣恩授前件官仰冒宠灵就安里落皆自吹嘘之力载华衰朽之踪愧感交指名
奚究

乾元节啓建疏

右伏以薰风应律熙然万宝之心祥电绕枢盛矣一人之庆幸逢诞圣之日率罄瞻天之诚恭
惟体天法道钦文聰武圣神孝德皇帝陛下明配照临德参覆焘膺一千之景运迈三五之休
规未尝自安荷宗祖承平之业所以致治得生灵爱戴之情均惟远方乐此华旦效葵霍之倾
向托讴歌而发扬宸扆光华愿齐於北极帝躬久固祈比於南山复飭缙黄预精焚诵荡荡之
恩莫报悽悽之恳徒深臣无任望阙祝圣之至

兴龙节开启文

右臣伏以光华盛旦式钦诞圣之期宣演秘文仰祝齐天之算缙黄咸集弥月伸?颂祝同声普
天一致恭惟皇帝陛下膺图有大御极继明光绍祖宗之基远隆尧舜之治祥推绕斗应休运
於千龄节庆兴龙起驩心於率土藉真銓之至妙讚万壽之无疆今者某官内罄?诚躬临法会
敷扬梵典已凭释衆之勤恳叩佛慈更效华封之祷

贺林枢密

右某伏审光膺中诏荣陟西枢朝进真儒助太平於四海仁居高位交庆悦於一时恭以某官
间世鉅材元精异稟学造圣贤之妙智穷事物之几銓量士类而八座推先润色王言而三长
兼善德业夙高於衆望谋猷久協於上心果奉畴咨之音进登机密之任公忠许国赞成熙载
之功膏泽下民行慰具瞻之衆某尸官巴裔引领台阶展庆奔驰莫继簪绅之末向风拚喜姑
修竿牋之勤某卑情无任激切依归之至

贺祖提刑礼上

右某伏审涓择刚辰按临剧部幸余辉之将及想清晤之非遥复此驰诚以前展庆勤渠所致
敷谕奚周谨奉状贺谨状

贺运判李朝请礼上

右某伏审涓辰已谐亲事幸於聯职尤切懽惊緬惟冲冒之余駢集起居之福即期候迓并叙欸诚更冀保调以符跂祝谨奉状贺

回王学士以生日寄示壽星壽香

右伏蒙尊慈以某生日特贐星香仰荷勤诚固深愧感伏思厚礼难以捧当谨奉状回纳兼谢伏惟照察

贺正

右某伏以万物棣通化工方盛三阳交泰贤履所宜伏惟某官养德冲和秉心端正兹茂迎於令序当倍拥於纯休伫闻宠陟之光行副瞻祈之切无缘庆謁徒剧情诚谨奉状贺

谢权梁山王朝奉

伏审涓辰已谐视事辱长牋之见及荷勤意以弥多知郡朝奉术学素深材猷兼茂临事肯违於中道长民必愜於輿情伫聆惠政之传以慰鄙怀之俟尚遥觀晤更祝保调谨奉状谢

贺谢王安抚转遥刺再任

右某伏审光膺宸命重綰使权显矣遥麾之荣优哉连任之寄愧驰诚之尚缓荷貽翰之特先伏惟安抚铃辖作坊材器素高声华夙振投笔蚤当於遴选拥旌静镇於遐方俄治誉之蔼闻致恩辉之被及轻裘缓带风威颇类於祭军增秩赐金宠异果符於汉表未缘謁庆但切忻愉谨奉状陈贺兼谢谨状

谢新知全州王左藏

右某伏审光膺宸命荣綰郡章伏惟庆慰窃以知郡左藏学通儒术智達兵机久摠将领之能果陟承宣之任方图驰庆先辱枉书欣感尤深指陈莫究

贺王运判

伏审涓辰已谐视事窃惟庆慰某官材猷高迈术学渊通誉蔼周行进膺妙选慙临远服方拥节以宣风伫见列城率钧懽而蒙惠顾惟衰晚同此按廉维謁晤之未能在倾驰而弥甚谨先奉状贺谨状

回答高丽人使书状

答正使先状

伏审远持使节安乘沧海之舟来奉国忧追仰鼎湖之驾方遂披风之便遽承枉教之勤感忤所深叙陈莫既谨奉状攀迎兼谢

答副使

伏审安若乘槎适在中秋之候勤先同轨敬趋七月之期伫弭节以暨休蒙枉书之首及第深愧荷无以谕言谨奉状攀迎兼谢

答正使谢大排

此者设席肆筵幸使华之戾止飞觴授爵愧主礼之阙然珍题更荷於不遗媿汗固深於有泚谨奉状谢

答副使

伏承特迂使驭来屈公堂方慙治具之疎更辱飞文之厚感并於愧言曷究情谨奉状谢

谢正使送土物

此者授馆云初披风既幸云賸飞翰继沐於温言土物将诚更蒙於多品弥怀厚意祗益腼顔谨奉状谢

谢副使

此者既遂郊迎挹清风而窃幸遽貽筐实嘉远物之可珍载惟情礼之隆第有感铭之切谨奉状谢

答正使贺九月旦

伏以降霜及物仰化育之成功合朔在天敬光华之顺序伏惟奉慰尚书中和有守业履素高对令节以纳休养清心而安正方修詞候之礼遽沐緘之貽感愧无穷敷紓罔既谨奉状贺兼谢

答副使

伏以节届授衣在起居之顺履礼隆改朔宜詞问之交修伏惟奉慰侍郎局度端平材猷敏劭对此良辰之盛拥夫纯祉之休未遑驰诚先辱枉翰感铭兹甚叙述奚殫谨奉状贺兼谢

答正使先状

伏以大明继照生灵钧鼓舞之情远域向风玉帛谨梯航之献遽闻使节首逮郡疆沐华翰之先贻在深诚而窃愧谨奉状攀迎兼谢

答副使

伏以宝位嗣兴率庆昌辰之盛楼航善济殊勤远使之来方图授馆以少休遽辱贻书之先及其为欣感曷罄敷陈谨奉状攀迎兼谢

答正使谢大排

伏承特枉使华肯临公燕念酒肴之不腆方窃厚颜沐翰墨之甚勤难当盛意愈深感忤曷究叙陈谨奉状谢

答副使

此者载饬肆筵特蒙枉驭公堂酌醴漫勤献酢之仪宾馆濡毫更辱緘题之贶唯其叙感何以措辞谨奉状谢

谢正使送土物

伏以郊迎既展幸际覲於清标方物遽贻独?慙於厚礼情重感言莫能周谨奉状谢

谢副使

伏承特损华緘曲垂美贶礼将诚而兼重物自远而愈珍愧荷良多纾陈奚究谨奉状谢

答正使贺九月旦

伏以金行脱节方物理之告成月吉佳辰在人情而重始伏惟朝贺尚书秉彝正履持节出疆兹逢气序之良宜拥福休之集方图修詞遽辱贶音感激所深指陈难尽谨奉状贺兼谢

答副使

伏以秋时云暮月朏欲生萧然爽气之来安若直躬之履伏惟朝贺侍郎公忠出使颐养顺时遵令序於海邦纳殊休於宾馆将驰詞候俄首沐於贶音祇荷谦慙第倍深於衔感谨奉状贺兼谢

答正使重阳

伏以龙山吹?传晋彦之风流蓝水看萸播唐英之吟咏伏惟朝贺尚书远摅贤业出拥使华将趋双阙之严慙憇四明之隘适逢令节倍纳纯禧顾驰悃之未遑遽貽緘之先辱情诚深荷笔舌奚殫谨奉状贺兼谢

答副使

伏以江涵秋而鴈翼初飞曾动齐山之咏菊盈把而酒樽入望素传彭泽之情伏惟朝贺侍郎远泛鲸波将趋凤阙伏忠怀而济险遇佳节以纳休修问尚稽祝音先及在感慙而相半欲叙述以难穷谨奉状贺兼谢

答正使先状

伏审毕使事於天庭悠然回棹趋归期於海域复此取途将伸候迓之勤先沐緘题之贶第深感刻难罄敷陈谨奉状攀迎兼谢

答副使

伏审奉币造朝已致候藩之礼遵程还国载扬使节之光方欲展於郊迎俄先形於书贶其有感戢无以喻云谨奉状攀迎兼谢

答正使不赴大排

兹者将修主礼之勤庶几肯顾未许使华之辱敢不敬从在跂望以弥深欲指陈而莫究谨奉状谢

答副使

伏以敬邀轩从肆筵愧乏於嘉声遽枉賸题左顾不蒙於重诺第勤向望难尽叙陈谨奉状谢

答正使贺五月旦

伏以律当午位气肇一陰属改朔之令辰有安时之妙理伏惟奉慰尚书秉心处正顺序纳休茂膺谷旦之和倍拥繁禧之集阻趋舍馆辱枉緘题荷德固深抚躬增愧谨奉状贺兼谢

答副使

伏以晏陰成物允協令时合朔在天欣逢谷旦恭惟奉慰侍郎才华辉映器宇恢宏深明消息之机倍纳骈繁之祉未遑展庆先辱祝音徒积腴顏曷胜染翰谨奉状贺兼谢

送答正使物帛

伏以宠贖物仪永佩至勤之好敬驰馈賔敢将匪报之诚具列别牋第加深愧谨奉状谕闻

送答副使物帛

伏以持节而来既首貽於方物扬舲以往取輒献於賔仪聊致微诚具陈他幅谨奉状谕闻

答正使先状

伏审肃奉国珍望赤墀而入贡茂膺宸渥拥华旆以言旋将遂披承先貽緘翰仰佩谦勤之意益深铭感之诚谨奉状攀迎兼谢

答副使

伏以望云来贡蚤幸覲於风规航海言还将载瞻於声采首貽华翰益佩撝谦感愧之深敷宣曷究谨奉状攀迎兼谢

送答正使物帛

伏以南国珍奇过勤来贖中州菲薄輒浼将行虽诚意之有加愧物仪之不腆具陈别幅尚慚虚拘谨奉状谕闻

色罗七匹色绫八匹色纱一十九匹土绢四匹

右谨随状尘浼伏惟留纳

送答副使物帛

伏以曩貽方物深荷意於勤隆兹奉賔仪窃怀慙於轻浼有少微品具于别牋谨奉状谕闻

色罗八匹色绫一十四匹色纱一十九匹土绢四匹

右谨随状尘浼伏惟留纳

答正使谢赴大排

兹者肆设维勤仰威仪之秩秩献酬有序敬德义之温温方慙情礼之疎又辱緘题之重欵诚所积笔舌难穷

答副使

兹者开筵有待慙不腆於豆觴拥节肯来幸少留於輿马不图谦德更辱华絨感与愧并情非言尽

答正使贺端午

伏以角黍荐甘灵符祛疔袞风流而惟远惊节候之遽迁伏惟奉慰尚书德度汪洋材资瑰玮邁良辰於行馆集休祉於直躬方图竿牋之修首沐絨?之祝其为悚荷莫尽指陈

答副使

伏以乘时采药幽人矜肘後之方当昼晒书高士銜腹中之蘊伏惟奉慰侍郎霜松挺节火玉凝姿顺履令辰宜膺多福方欲驰诚而修庆遽蒙枉翰以示谦怀感实多形言难尽

上王内翰书

具位某谨斋沐裁书有献提举内翰合下某闻道之难行也唯德可以行之道之难明也唯文可以明之以德而不以文其传也不足以远以文而不以德又可传乎哉二者相须而成以为斯道之主者必有命世者当之孔子没异端起邪说诬民孟荀杨相继於旷代而以是为已任使圣人之道复振於頽圯坠絕之间而後之人不?溺其良心者皆其力也久而陵夷至于有唐独韩氏奋起排非救失其功不後三子降及五代雕敝尤甚我朝之兴剗革衰乱虽百有余年而教化已被然而世之士类未能向本学以组綉为得而不知有经术之用行以智巧相高而不知有仁义之守鉅人间出往往横身肆力图所以矫变之趣若其德足以行文足以明坚厚醇粹杰然而不可擬者唯公一人而已天下之士践履术业有所未正莫不指公以为羞其间至与不至虽未可以量其於翕然成风亶亶不已而日入於敦实之域岂为小补焉且公岂人人而教之乎如人人而教之则力亦不给矣然则何以哉公之文本六经而明之者也公之德安中庸而行之者也其所以育天下之材者以此也夫唯如是则公之功又不後於韩氏也去韩氏之远想见形采而不可得犹袭其绘像之遗而瞻慕之况生而与公同时窃被教育而不能一拜于左右岂不负矣哉此士人所以汲汲争先於门阑也某生而贫贱不能他为以读书考古为事性虽颡蒙粗识所向当在幼少固已知公之谊可为依归迺致诚款请闻名於将命而公从容降接不以不肖视之谆谆导谕勉之以充扩之本期於有所植立方是时受公之赐不为不多也既而冒取禄仕洶涖尘土不迓辉光者逾一纪焉奔走之隙虽不舍所学以期树立第所得之寡不足以补其所亡返思曩时导谕之重诚可深愧然而天下之士窃被训育犹以不拜左右为所负况某也承教之旧岂以欲然于心而自絕於大君子之庭哉是敢叙悽悽以聽命於屏下谨献近所为论一篇鄙浅无取徒为摯见之礼且以发请诲之端也干浼威严不胜惶惧不宣某再拜

上滕舍人书

月日具位某谨再拜上书纠察舍人合下某闻古之君子所以大过人者以其善推所为以及人知富贵利達之所以自任而不以富贵利達之势介放胷中则位益高心益广其所以推而及人者日益远且大也於其所及人之间其数甚博而莫大於道义乐育其类夫乐育之者非在於日讲月谕规规淳淳於寻寸毫髮之中彼能适然而向我者我察其材志而辅导之引翼之使之自我而至於有为而后止此诚大君子之任也恭惟执事以巨材厚德致身高显所施廓大皆有原本欲以兼天下之善而未尝以翺忽矫天下之士真所为知富贵利達之自任而不以其势介於胷中也士人满门其被辅导引翼之赐者为不少益以日月则孰不至於有为真所谓善推所为以及人也某江湖野人幼喜读书二十来京师求禄仕同时进取之流素不识面者往往或道名而指背究其所缘皆执事誉饰之致也未几附风云之末仅窃科第一落尘土闲关无状虽自信之心愈於前时而踪迹湮涩去门阡日以疎也因循岁时几十五年今日赴铨衡会执事有典制之拜地虽愈崇而微蕞之旧不敢自弃於将命谒既上矣执事遇之如平昔询之以术学勗之以不倦益又知执事以利達自任而忘其势欲推所为以及人之甚也使某也愚而无所欲为则已如欲有为则舍执事之门奚往哉谨録新文古律诗共八十篇尘献几席非敢以为文章徒以为请教之资且明年虽加而学未画也惟执事不以狂狷之进而咎之不以挟故之问而欲之则幸甚幸甚干冒威重不胜战惧不宣某再拜

上太守书

月日具衔某再拜献书某官合下夫櫟题之材施於大厦能胜其任者栋梁借之势也腹背之毛传於鷠明举而冲天者六翮借之势也虽有利镞与之势则犀革可贯否则鲁縞不入虽有轻车与之势则千里可至否则跬步不进岂物独有是殆人亦然矣今天下之吏官小而任重者县令为甚县令之权裁制万室虽舒惨在手而其势实资於刺史刺史与之势则利可以兴害可以去事之疑者可以闻政之便者可以专所革易以迁所集易以成下之难化者不能轻议以动摇若然患胷中无有耳何为而不得哉其於幼学而壮行庶几无憾也刺史夺之势则利不可兴害不可去事之疑者不得以闻政之便者不得以专所革难以迁所集难以成下之难化者莫不轻议以动摇若然惟摈斥是忧奚暇於设施乎故曰在下位不获乎上民不可得而治矣然获乎上有道非胁肩諂笑耦意求从而获之也必将诚於身悦於亲信於友然後获之也获之不敢豫於已曰有义不获不敢非其上曰有命然则不贤者能若是乎故上之人孳孳聽察者假借於其贤者以其有为也某不敏生於田野不习他技专意经史遭时得官才不应用强勉驱策为贫而仕自此关柝所向未能发其志所立未能闻於时尘泥十年食粟而已诚可羞愧今此何幸吏于执事镇抚之下得邑徧小尤利於拙视事六月矣无分寸之美挂人齿牙而谴责不及诚执事庇育优赐也然而迹远麾旆无缘时伏左右仰聽教命且致一言以宣鄙心之万一惟日馁矣祇役兹便来拜庭下岂复默默以自取弃故敢叙其说干叩将命以为资势之兆则於从政也岂云小补哉觐执事亮其诚不以狂妄咎之则幸甚幸甚不宣某再拜

上通判官

月日具衔某斋沐拜书某官合下某闻圣人之言曰君子易事而难说说之不以道不说也及

其使人也器焉小人难事而易说也说之虽不以道说也及其使人也求备焉呜呼斯言至矣乎夫易事则人乐为用而难说则君子进焉以君子之高明粹美而其类日进於前故其智虑益广而其道益尊也虽事则人不乐为用人不乐为用而易说则小人进焉以小人之狭隘敖僻而其类日进於前故其智虑益浅而其道益卑也然则小人之事易事也虽有便巧之资捷给之材求耦其意而为之任也固不可得矣若夫善悦则将安施乎君子之事难事也虽有宏远之器兼济之术求其见信也固不可得矣若夫妄说则其能为乎是以古之君子择所事而事之未尝妄仕也至有膳肉不及不税冕而行千里而至不受禄而去必不得已则乘田委吏抱关击柝为辞富辞尊之计耳今之仕者非若古人然古人之仕於鲁不合则於齐又不合焉则於郑於陈於楚於燕俟其合而止也今人之仕受官於朝隶职於外唯其所事而事焉姑洁已自信理义自养迺其遇之难易有幸与不幸也夫何择哉幸而得所事不披心腹极思虑蚤夜孳孳竭其所能而为之用者可谓智乎某无状幼而罢软不能任农工之劳又耻遭明时而不自植立不得接踵荐绅以设施仁义之蘊谋明王道之原故勉力读书十年而仕仕十年矣而官为县令食粟而已所为蓄缩未足动人耳目而际昔贤之畛域唯夙宵皇皇常恐碌碌与俗吏相類仰於一世中耳乃所幸者获事执事之贤且明也到官之始趋谒庭下执事引之坐未霁威海语谆谆不已迺知执事开易事之心而少加亮於愚衷也坐局临政行将满岁而不被譴斥岂非执事之赐乎图欲俯伏左右道胷中之一二且聽教命而执事远临他郡又数百里而远也所守拘系愿未获伸第瞻颂盛德而不知止极充於心而形於言故笔之书以寓猷几格恭惟执事信道甚笃自知固明不以其言为妄说也至於披心腹极思虑蚤夜孳孳竭其所能而为之用则某不敢弃智就愚而失所事於君子也干冒尊严不胜惶恐不宣某再拜

上章郎中书

某闻古人有言曰幼而学之壮而欲行之夫行之有二穷则行之身達则行之民行之民之尤切者宜莫若郡守县令守之於令卑高之相远其间不能以寸虽所施有大小而其趣无以异也而其治未尝不相资以成守得其令可遗一邑令有贤守有遗一身遗之非忘之也无可虑之患而知其必以济也若其不虞之忧则君子不忧且郡守筦摄其下有贵重之势视令之才则变置之易如奕碁耳至於得其人犹悦以自慰况令焉者进退在守而获遇其贤且明则其乐而自幸也宜如何哉乐於中必形於言既乐矣苟为能言不宜緘默以自舍然或迟迟其言者盖将待可言之际耳故曰言未及之而言谓之躁言及之而不言谓之隐非躁非隐其可言之际乎善知本者事其上之贤也不当以是夫某不敏生田壠间幼不他习而喜於学学十年而仕仕之年十而治官才再耳僂俛其位夜气以存虽毫髮之务不敢轻以视从公之余则類仰羣籍资取理义以益胷中之未逮能虽未知抑不可谓不知其本者矣临邑无状逃责逾岁始获事於合下迎拜麾旆之初固已乐而自幸矣然而视不敢仰语不敢出缩缩然与於旅进之後非愚於自弃也诚以尘贱之迹未见亮於合下苟言之不既失於躁乎今聽命於局三月矣政无可称而譴斥不加鄙朴之守庶几稍安而合下必少加察也居可言之际或反箝结以自隘某独何心哉故敢叙其欵以露猷於左右冀合下怜其诚而纳焉则幸甚幸甚干冒清严不甚悚息不宣某再拜

谢章守书

某谓谗言似正顺言似佞苟辨其谗不可惑於似正而取焉苟察其顺不可惑於似佞而拒焉是为知言之至也某今日之言顺言也恭惟明公不以似佞而拒之夫师帅千里如古诸侯之任近而与生民兴利去疾远而为天子宣布风化非高明简重知治体之君子明敏而才者将子子苛刻务为烦碎非徒无益而又扰之迂而滞者将靡敝不振坐视其下受患而已耳且自浙而东婺为大邦人多高货习俗素薄悍鬪鬪讼相轧务胜朝廷难其尹而别为简擢之地明公居之期岁矣政举治成得寛猛之中吏民帖然莫不心悦而诚服真所谓高明简重知治体之君子也某窃守下邑偃仰教命之久惟知贯行夫复何措明公不以某为不才召置节下使治讼数月虽朝夕僴俛悉力从事而昭昭之前事至见本重轻取舍罔或违道指谕条理无有齟齬徒欲作聰明为毫髮之补不可得已退归故局遽远言海乃心茫然如失所依徐而精思第知仰公治体之明而颂公盛德之美耳明公恩於鄙朴矣不有佞言干求之疑是敢敷为顺言以献左右在明公自知不惑必不谓其似佞而拒之也干冒清严情悸顔泚不宣某再拜

谢杨倅书

夫挟故而问君子所不答也何则资於师者不当恃旧故而易视之苟有恃而至其不受之宜矣此特以道义之贵虽一问焉不可有所挟况从政事上其势愈於彼其又可以有挟乎盖曰法在焉而已耳且义之末然後有法及其至也义或不胜其重上下有分之谓法故旧不遗之谓义今从政事上而不可挟故是义不胜法之重昭矣然而上焉者主於法而义得以兼下焉者唯守法而俟其义而已某拜合下之德旧矣典邑于此复冒合下之庇曩者被檄假治督邮朝夕趋走左右言必公礼必吏私心欲然不敢有一芥之挟曰守法可也合下霁威严而接之又援之以备所荐岂独主於法而兼义邪殆将先义而後法也还邑七八日骤违门阑惟仰高威义之不暇情动语发书画不能究尽姑献其畧以渎视聽幸合下少加亮焉不宣某再拜

上使宪使书

夫士之有常心而不变於异物者以其仁义礼知根於中非有待於外而然也故富贵不能淫贫贱不能移威武不能屈其所以自视常欲然而其志未始一日倦於为善非所谓慕赏饰而畏罚沮也其知天之所与而趋向操守适当然耳是故其临下也恕其事上也忠取舍有义进退有命卷而畜之终身无足忧充而扩之兼善固有余裕志得不以泰不得以憾求乎在内而不求乎其所不在焉故曰人知之亦嚣嚣其尊德乐道不如是不足以有为也然则有是心也岂或诡激以取闻乎美言以求合乎不由是而闻不由是而合其必归於与正也天下之与正者常少而好诡激说美言者常多是以士之有常心者不常闻且合也某愚无似学粗知本僴俛微宦一纪于兹所施蓄缩固不足道而滋养旧蘊不舍所受未尝敢以簿领冗未而辄忘去也若其尊德乐道虽未足以有为有亦庶几有常心而不变者矣恭惟明公宿德大度敦与正之心按视一道察羣吏之知长善否昭如秋阳明白不可蔽至於诡激美言皆明公之所不取也某今日之幸以属邑吏迎拜麾旆之下获吐一辞以归高谊岂所谓取闻求合之正乎亦乐於见贤而不得闭默以自弃也惟明公察焉而进退之不宣某拜

上王漕书

某月某日具銜某上书某官合下某幼贫而愚不能习知他事唯读书考古学为文辞规速化之术且不自度谓仕则行道如反掌耳弱冠而得官奔走十余年志未及举气未及舒凡至所措置去离绳约仅或容髮则有履祸之畏况道之欲行其可窃觊邪所不失者从公之余则偃仰图史耽味经籍究前人之是否评衆事之得失发於词章议论诚虽不才固亦足以自乐也得是乐也其敢谓之自致乎幸而隶明公按举之下民信吏戢庶务条理故朴钝之守亦见包蓄而不加摈斥遂得乐於此耳然不幸所典穷僻不得一拜麾节仰聽教诲以发胷中之未逮则前所谓乐者抑未为足矣今将代归岂宜无言以谢鉅德具宣鄙心之万一哉谨致文字若干非敢以为文庶公知治下之吏有荷公之赐而得乐如此也干冒清严无任悚息不宣某再拜

上王漕摄青谿书

今月七日伏奉使檄差权睦之青溪青溪剧邑宜得才者以当剗治如某等辈仅守绳约何足任使而执事遣之承乏意将驱策钝弱使之动心极力以成骏健也固当奔走承命不可少缓然敢以辞者某顷在东阳閱历半岁近被音旨才复旧局家有疾病治疗未起遂即远道实所未堪且官期逾迈代者至不可度日月不多政不能久徒使两邑扰於送迎耳是敢敷露愚欵仰叩将命伏惟执事容德照隱察其悽悽而安全之则幸甚干冒威严无任悚息不宣某再拜

钱塘集卷十二